

O LE EKALLESIA A IESU KERISO O LE AU PAIA O ASO E GATA AI • NOVEMA 2011

# O Le Liahona



**Saunoaga  
o le Konafesi Aoao**

**Ua Fofogaina Mai  
Malumalu Fou e Ono**



*Aoao mai i Tusitusiga Paia, saunia e Nancy Crookston*

*Sa aoao mai e le Alii, "E suesue outou i tusi; aua ua outou manatu tou te maua ai le ola e faavavau: o tusi foi ia o loo molimau ia te au" (Ioane 5:39).*

## SAUNIGA I LE TAEAO O LE ASO TOONAI

- 4 A o Tatou Toe Feiloai Ai  
*Peresitene Thomas S. Monson*
- 6 O Le Mana o Tusitusiga Paia  
*Elder Richard G. Scott*
- 9 Faaliga Faaletagata Lava la ma le Molimau  
*Barbara Thompson*
- 11 O Le A Oo Mai le Taimi  
*Elder L. Whitney Clayton*
- 14 Faia o le Mea Sa'o i le Taimi Sa'o, e aunoa ma le Faatuai  
*Elder José L. Alonso*
- 16 Fautuaga i le Autulavou  
*Peresitene Boyd K. Packer*
- 19 E Tauga Oe ia te Ia  
*Peresitene Dieter F. Uchtdorf*

## SAUNIGA I LE AFIIFI O LE ASO TOONAI

- 23 O Le Lagolagoina o Taitai o le Ekalesia  
*Peresitene Henry B. Eyring*
- 24 O Le a Liliu Atu Loto o Fanau i o Latou Tama  
*Elder David A. Bednar*
- 28 Tamaiti  
*Elder Neil L. Andersen*
- 31 O Se Taimi e Saunia Ai  
*Elder Ian S. Arden*
- 33 E Sili Atu Lava le Tepa Ae i Luga  
*Elder Carl B. Cook*
- 35 Togiola  
*Elder LeGrand R. Curtis Jr.*
- 38 O Le Meaalofa Paia o le Salamo  
*Elder D. Todd Christofferson*
- 41 O Le Alofa Atoatoa e Faateaseina ai le Fefe  
*Elder L. Tom Perry*

## SAUNIGA A LE AU PERISITUA

- 44 Ua Tauto i Tatou Uma  
*Elder Jeffrey R. Holland*
- 47 O Le Mana o le Perisitua Arona  
*Epikopo Keith B. McMullin*
- 50 O Le Avanoa i le Olaga  
*Elder W. Christopher Waddell*
- 53 O Le Faia i le Ala a le Alii  
*Peresitene Dieter F. Uchtdorf*

- 56 Sauniuniga i le Perisitua: "Ou Te Manaomia Lau Fesoasoani"  
*Peresitene Henry B. Eyring*
- 60 Ia Lototele e Tu Na o Oe  
*Peresitene Thomas S. Monson*

## SAUNIGA I LE TAEAO O LE ASO SA

- 68 O Se Molimau  
*Peresitene Henry B. Eyring*
- 71 Faatalitali i le Alii: Ia Faia Lou Finagalo  
*Elder Robert D. Hales*
- 74 O Le Tusi a Mamona—o se Tusi mai le Atua  
*Elder Tad R. Callister*
- 77 Alofa i Lona Tina  
*Elaine S. Dalton*
- 79 O Le Taua o se Igao  
*Elder M. Russell Ballard*
- 82 Tutu i Nofoga Paia  
*Peresitene Thomas S. Monson*

## SAUNIGA I LE AFIIFI O LE ASO SA

- 86 Feagaiga  
*Elder Russell M. Nelson*
- 90 O Aoaoga a Iesu  
*Elder Dallin H. Oaks*
- 94 Aoaoga Atua e Tusa ai ma le Agaga  
*Matthew O. Richardson*
- 96 O Faifeautalai o Ni Oa o le Ekalesia  
*Elder Kazuhiko Yamashita*
- 98 Filifili le Ola e Faavavau  
*Elder Randall K. Bennett*
- 101 O Le Faamanuiaga o le Tatalo  
*Elder J. Devn Cornish*
- 104 O Pese e Le Mafai Ona Latou Usuina  
*Elder Quentin L. Cook*
- 108 Seia Tatou Toe Feiloai  
*Peresitene Thomas S. Monson*

## SAUNIGA AOAOGA A LE AUALOFA

- 109 O Le Mea Ou Te Faamoemoe o le a Malamalama ai Fanau Teine (ma Fanau Tama) a La'u Fanau e uiga i le Aualofa  
*Julie B. Beck*
- 114 E Le Uma le Alofa  
*Silvia H. Allred*
- 117 Ia Pipii i Feagaiga  
*Barbara Thompson*
- 120 Aua Ne'i Galo A'u  
*Peresitene Dieter F. Uchtdorf*
- 64 O Le Au Pulega Aoaoga o le Ekalesia a Iesu Keriso o le Au Paia o Aso e Gata Ai
- 124 Faasino Upu mo Tala o le Konafesi
- 125 Aoaoga mo o Tatou Taimi
- 125 Au Peresitene Aoaoga o Ausilali
- 126 Tala Fou o le Ekalesia



# Aotelega mo le Konafesi Aoaio Lona

## 181 Faaleafatausaga

### TAEAO O LE ASO TOONAI, 1 OKETOPA, 2011, SAUNIGA AOAIO

Pulefaamalumalu: Peresitene Thomas S. Monson. Taitai: Peresitene Henry B. Eyring. Tatalo amata: Elder Gary J. Coleman. Tatalo faaii: Elder Lowell M. Snow. Musika e saunia e le Aufaipese a le Tapeneko; Mack Wilberg ma Ryan Murphy, faatonu; Richard Elliott ma Andrew Unsworth, taokeni: “Ua Tafa Ata,” *Viiga*, nu. 1; “With Songs of Praise,” *Hymns*, no. 71; “Le Perofeta Pele e,” *Viiga*, nu. 11, arr. Wilberg, e lei faasalalauina; “Faaola o Isaraelu,” *Viiga*, nu. 5; “O Au O Se Atalii o le Atua,” *Tusipese a Tamaiti*, 2–3, arr. Murphy, e lei faasalalauina; “Le Au Paia Uunai i Luma,” *Viiga*, nu. 44, arr. Wilberg, e lei faasalalauina.

### AFIAFI O LE ASO TOONAI, 1 OKETOPA, 2011, SAUNIGA AOAIO

Pulefaamalumalu: Peresitene Thomas S. Monson. Taitai: Peresitene Dieter F. Uchtdorf. Tatalo amata: Elder Won Yong Ko. Tatalo faaii: Elder Bradley D. Foster. Musika e saunia e se aufaipese a le Peraimeri mai Pleasant View ma North Ogden, Utah; Vanja Y. Watkins, faatonu; Linda Margetts, taokeni: “Tausiga Faifai Pea a le Atua,” *Viiga*, nu. 306, ma le “Ou Te Faafetai ia te Oe le Tama,” *Tusipese a Tamaiti*, 7, fatuga arr. Watkins, e lei faasalalauina; “E Mafai ona Faavavau Aiga,” *Viiga*, nu. 300, arr. Watkins, e lei faasalalauina; “Viia Le na Fetaii ma Ieova,” *Viiga*, nu. 15; “E Alofa Lo’u Tama Faalelagi ia te A’u,” *Tusipese a Tamaiti*, 16–29, ma le “Ua Ou Mautinoa o Soifua lou Tama,” *Viiga*, nu. 185, pub. Jackman, medley arr. Watkins, e lei faasalalauina.

### AFIAFI O LE ASO TOONAI, 1 OKETOPA, 2011, SAUNIGA A LE AU PERISITUA

Pulefaamalumalu: Peresitene Thomas S. Monson. Taitai: Peresitene Dieter F. Uchtdorf. Tatalo amata: Elder Richard G. Hinckley. Tatalo faaii: Elder Koichi Aoyagi. Musika e saunia e se aufaipese a le Au Perisitua Mekisateko mai Pleasant Grove, Utah; Justin Bills, faatonu; Clay Christiansen, taokeni: “Rise Up, O Men of God,” *Hymns*, no. 324, arr. Staheli, pub. Jackman; “Ua Naunau ia te Oe,” *Viiga*, nu. 57, arr. Bills, e lei faasalalauina; “Fiafia,

o le Alii o le Tupu!” *Viiga*, nu. 38; “O Mai Fanau a le Alii,” *Viiga*, nu. 24, arr. Bills, e lei faasalalauina.

### TAEAO O LE ASO SA, 2 OKETOPA, 2011, SAUNIGA AOAIO

Pulefaamalumalu: Peresitene Thomas S. Monson. Taitai: Peresitene Dieter F. Uchtdorf. Tatalo amata: Elder Paul K. Sybrowsky. Tatalo faaii: Elder James B. Martino. Musika e saunia e le Aufaipese a le Tapeneko; Mack Wilberg, faatonu; Andrew Unsworth ma Clay Christiansen, taokeni: “Lead Me into Life Eternal,” *Hymns*, no. 45; “Ieova e ia Tautai Pea i Matou, O Thou Great Jehovah,” *Hymns*, no. 83, arr. Wilberg, e lei faasalalauina; “Consider the Lilies,” Hoffman, arr. Lyon, pub. Jackman; “Ia Viia oe le Atua,” *Viiga*, nu. 10; “Ou te Alu i Mea e Te Tofia,” *Viiga*, nu. 169, arr. Wilberg, e lei faasalalauina; “Ou Te Talitonu ia Iesu,” *Viiga*, nu. 71, arr. Wilberg, e lei faasalalauina.

### AFIAFI O LE ASO SA, 2 OKETOPA, 2011, SAUNIGA AOAIO

Pulefaamalumalu: Peresitene Thomas S. Monson. Taitai: Peresitene Henry B. Eyring. Tatalo amata: Elder F. Michael Watson. Tatalo faaii: Elder Gregory A. Schwitzer. Musika e saunia e le Aufaipese a le Tapeneko; Mack Wilberg ma Ryan Murphy, faatonu; Bonnie Goodliffe ma Linda Margetts, taokeni: “Arise, O God, and Shine,” *Hymns*, no. 265, arr. Wilberg, e lei faasalalauina; “I Feel My Savior’s Love,” *Children’s Songbook*, 74–75, arr. Cardon, e lei faasalalauina; “Ia Fiafia Tatou,” *Viiga*, nu. 3; “A o lei Tuua i Matou,” *Viiga*, nu. 153, arr. Wilberg, e lei faasalalauina.

### AFIAFI O LE ASO TOONAI, 24 SETEMA, 2011, SAUNIGA AOAIO A LE AUALOFA

Pulefaamalumalu: Peresitene Thomas S. Monson. Taitai: Julie B. Beck. Tatalo amata: Barbara C. Bradshaw. Tatalo faaii: Sandra Rogers. Musika e saunia e se aufaipese a le Aualofa mai Eagle Mountain ma Saratoga Springs, Utah; Emily Wadley, faatonu; Bonnie Goodliffe ma Linda Margetts, taokeni: “Ua Tafa Ata,” *Viiga*, nu. 1, arr. Wilberg, e lei faasalalauina; “Le Atua Malie Lau Galuega,” *Viiga*, nu. 82, arr. Manookin, pub. Jackman; “Faalogo Nuu Uma!” *Viiga*, nu. 165; “Ia Fiafia Tatou,” *Viiga*, nu. 3.

### E MAUA SAUNOAGA O LE KONAFESI

Ina ia maua saunoaga o le konafesi aoaio i le tele o gagana, asiasi ane i le conference .lds.org. Ona filifili lea o se gagana. E masani lava ona maua lipine faalogologo i faletusi autu, i totonu o le lua masina e sosoo ma le konafesi.

### SAVALI A FAIAOGA O AIGA MA FAIAOGA ASIASI

Mo savali a faiaoga o aiga ma faiaoga asiasi, faamolemole ia filifili se lauga e aupito sili ona fetui lelei ma tulaga o loo manaomia e i latou tou te asia.

### I LE FAAVAA

Luma: Ata na pueina e John Luke. Tua: Ata na pueina e Les Nilsson.

### PUEGA O ATA O LE KONAFESI

O vaaiga o le konafesi aoaio i le Aai o Sate Leki na pueina e Craig Dimond, Welden C. Andersen, John Luke, Christina Smith, Cody Bell, Les Nilsson, Weston Colton, Sarah Jensen, Derek Israelsen, Danny La, Scott Davis, Kristy Jordan, ma Cara Call; i Pasila na pueina e Barbara Alves, David McNamee, ma Sandra Rozados; i Kanata na pueina e Laurent Lucuix; i El Salvador na pueina e Josué Peña; i Egelani na pueina e Simon Jones; i Iapani na pueina e Jun Aono; i Mekisiko na pueina e Monica Mora; i Filipaina na pueina e Wilmor LaTorre ma Ann Rosas; i Aferika i Saute na pueina e Rob Milne; i Suetena na pueina e Anna Peterson; ma i Iurukuei na pueina e Manuel Peña.



**NOVEMA 2011 VOL. 35 NU. 11  
O LE LIAHONA 09691 890**

O Le Lomiga Faamaonia Faa-Samoa a le Ekalesia a Iesu Keriso o le Au Paia o Aso e Gata Ai

**Susuga a le Au Peresitene Sili:** Thomas S. Monson, Henry B. Eyring, Dieter F. Uchtdorf

**O Le Korama a Aposetolo e Toasefululua:**

Boyd K. Packer, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, Neil L. Andersen

**Faatonu:** Paul B. Pieper

**Fautua:** Keith R. Edwards, Christoffel Golden Jr., Per G. Malm

**Pule Faatonusili:** David L. Frischknecht

**Faatonusili e Fuafuaina ma Faatonotonu:**

Vincent A. Vaughn

**Faatonu o Karafi:** Allan R. Loyborg

**Pule Faatonotonu:** R. Val Johnson

**Pule Faatonotonu Lagolago:** Jenifer L. Greenwood, Adam C. Olson

**Au Faatonu Fesoasoani:** Susan Barrett, Ryan Carr

**Aufaigaluega Faatonotonu:** Brittany Beattie, David A. Edwards, Matthew D. Flitton, LaRene Porter Gaunt, Carrie Kasten, Jennifer Maddy, Lia McClanahan, Melissa Merrill, Michael R. Morris, Sally J. Odekir, Joshua J. Perkey, Chad E. Phares, Jan Pinborough, Paul VanDenBerghe, Marissa A. Widdison, Melissa Zenteno

**Pule Faatonusili o Faatufugaga:** J. Scott Knudsen

**Faatonusili Tusiata:** Scott Van Kampen

**Pule i le Gaosiga:** Jane Ann Peters

**Au Mamanu Sinia:** C. Kimball Bott, Thomas S. Child,

Colleen Hinckley, Eric P. Johnsen, Scott M. Mooy

**Aufaigaluega e Mamanuina ma Gaosia:**

Collette Nebeker Aune, Howard G. Brown, Julie Burdett, Reginald J. Christensen, Kim Fenstermaker, Kathleen Howard, Denise Kirby, Ginny J. Nilson

**Tailolomi:** Jeff L. Martin

**Faatonusili Lolomiga:** Craig K. Sedgwick

**Faatonusili o le Tufatufaga:** Evan Larsen

Mo O le okaina o mekasini, alu i le store.lds.org po o le Faletusi Tutotonu i Pesega. Telefoni 64127. Totogi o le Mekasini: \$0.55 (Samoa) i le kopi. Totogi mo le Tausaga Atoa \$6.60 (Samoa).

**Auina atu tusitusiga ma faafesili i luga o le initoneti i le liahona.lds.org: pe meli mai i le Liahona, Rm. 2420, 50 E. North Temple, Salt Lake City, UT 84150-0024, USA; po o le i-meli: liahona@ldschurch.org.**

*O Le Liahona* (o lona uiga i le Tusi a Mamona o le "tapasa" po o se "faatonuala") e lomia i le faa-Alepania, Aminia (Sasae), Pisilama, Palekeria, Kemupotia, Sepuano, Saina, Kalaotia, Siekisolovakia, Tenimaka, Take, Iglilisi, Esitonia, Fiti, Finelani, Farani, Siamani, Eleni, Hanikeri, Initu, Isealani, Initonesia, Italia, Iapani, Kiripati, Korea, Lativia, Litunia, Malakasa, Masela, Monokolia, Nouei, Polani, Potukale, Romania, Rusia, Samoa, Silovenia, Sipaniolo, Suetena, Tagaloka, Tahiti, Tai, Toga, Iukureini, ma Urutu, ma Viatename. (E eseese lava gagana.)

© 2011 Puletaoafia e le Intellectual Reserve, Inc. Ua taofia aia tatau uma. Lomia i le lunaite Setete o Amerika.

E mafai ona kopi tala ma ata o *le Liahona* mo le toe faaogaina i lotu po o le aiga ae ia le faia ai ni pisinisi. E le tatau ona kopi ni tala po o ni ata pe afai o faasa mai i le laina o loo ta'ua ai le e ona lea faatufugaga. Auina atu fesili e uiga i le puletaoafia i le Intellectual Property Office, 50 East North Temple Street, Salt Lake City, UT 84150, USA; i-meli: cor-intellectualproperty@ldschurch.org.

**For Readers in the United States and Canada:**

November 2011 Vol. 35 No. 11. O LE LIAHONA (USPS 311) Samoan (ISSN 1045-0947) is published monthly by The Church of Jesus Christ of Latter-day Saints, 50 East North Temple, Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address *must* be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Poste Information: Publication Agreement #40017431)

POSTMASTER: Send address changes to Salt Lake Distribution Center, Church Magazines, PO Box 26368, Salt Lake City, UT 84126-0368.



**FAILAUGA I LE FAASOLOGA  
FAAALAFAPETA**

Allred, Silvia H., 114

Alonso, José L., 14

Andersen, Neil L., 28

Arder, Ian S., 31

Ballard, M. Russell, 79

Beck, Julie B., 109

Bednar, David A., 24

Bennett, Randall K., 98

Callister, Tad R., 74

Christofferson, D. Todd, 38

Clayton, L. Whitney, 11

Cook, Carl B., 33

Cook, Quentin L., 104

Cornish, J. Devn, 101

Curtis, LeGrand R., Jr., 35

Dalton, Elaine S., 77

Eyring, Henry B., 23, 56, 68

Hales, Robert D., 71

Holland, Jeffrey R., 44

McMullin, Keith B., 47

Monson, Thomas S., 4, 60,

82, 108

Nelson, Russell M., 86

Oaks, Dallin H., 90

Packer, Boyd K., 16

Perry, L. Tom, 41

Richardson, Matthew O., 94

Scott, Richard G., 6

Thompson, Barbara, 9, 117

Uchtdorf, Dieter F., 19, 53,

120

Waddell, W. Christopher, 50

Yamashita, Kazuhiko, 96

**FAASINO AUTU**

Agaga Paia, 6, 9, 16, 33, 47,  
82, 94

Alofa, 53, 77, 96, 120

Alofafua, 68, 109, 114

Aoao atu, 94

Aoaoina, 94

Auaiga, 28, 77

Aualofa, 109, 114

Auaunaga, 14, 47, 50, 53,

56, 68

Autalavou, 16, 24, 44, 47,

50, 77

Avea ma soo, 109

Faafaliga, 6, 9, 16, 82

Faaiipoipoga, 28

Faalagolago ia te oe lava, 53

Faamoemoe, 19, 71

Faamuamua, 28, 31

Faataitaiga, 41, 60, 77, 90, 96

Faatuatua, 28, 33, 71, 101,

104

Faiaoga asiati, 109, 114

Faitalia, 98

Feagaiga, 86, 117

Galuega faafaifeautalai, 11,

41, 44, 50, 79, 96

Iesu Keriso, 35, 41, 74, 79,

90, 101

Igoa, o le Ekalesia, 79

Konafesi Aoao, 4, 23, 108

Liua, 68, 96

Lototoa, 33, 60

Mafatiaga, 71, 104

Malumalu ma galuega

faalemalumalu, 4, 24, 41,  
109, 117

Molimau, 9, 60, 68, 74, 82

Natura paia, 19

Ola mama, 16

Olioli, 38, 120

Onosai, 71

Ositaulaga, 50, 120

Perisitua, 24, 47, 56, 60,

86, 109

Perisitua Arona, 47

Puleaina o le taimi, 31

Salamo, 16, 35, 38, 44

Sauniuniga, 50, 56, 96

Talafaasolopito o aiga, 24

Tali atu o le tagata lava

ia, 98

Tamā, 77

Tama Faalelagi, 108

Tamaitai Talavou, 77

Tamaiti, 28

Tatalo, 82, 101

Taua o le tagata lava ia,

19, 120

Taua o le tagata Lava Ia,

19, 120

Tekinolosi, 24, 31

Tiute, 47, 56

Toefaatoagaina mai, 14,

35, 50

Toefuataiga, 11

Togiola, 33, 35, 38, 90

Togiola, 35

Tulaga faamātua, 28, 77

Tulaga faatonuina, 44, 60,

77, 82

Tumau, 68, 71

Tuputupu ae, o le Ekalesia,

11, 41

Tusi a Mamona, 6, 50, 68,

74

Tusi Paia, 74, 90

Tusitusiga paia, 6, 74

Uelefea, 53

Ulugalii faamisiona, 44

Ususitai, 33, 38, 86, 90

Valoaga, 11



Saunia e Peresitene Thomas S. Monson

## A o Tatou Toe Feiloai Ai

*Ou te tatalo ia faatumulia i tatou i le Agaga o le Alii a o tatou faalogologo atu i savali i le aso ma a taeao, ma aoaoina na mea ua finagalo le Alii tatou te iloa.*

**S**e mea ina a lelei, uso e ma tuafafine, o le faafeiloai atu ia te outou i le Konafesi Aoa Lona 181 Faaleafatausaga a Le Ekalesia a Iesu Keriso o le Au Paia o Aso e Gata Ai.

O le konafesi lenei ua atoa i ai le 48 tausaga talu ona valaauina a'u i le Korama a Aposetolo e Toasefululua e Peresitene Tavita O. MaKei. Na faia ia Oketopa o le 1963. E foliga mai ua tele naua tausaga ua oo mai ma mou atu talu mai lena taimi.

A oo ina tatou pisi, e foliga mai e vavave lava le alu o le taimi, ma e le'i i ai se avanoa mo a'u i masina na mavae atu nei. O se tasi o faatumutumuga o lena vaitaimi, o le avanoa lea sa ou maua e toe faapaia ai le Malumalu o Atlanta Georgia i le aso 1 o Me. Sa matou malaga ai ma Elder ma Sister M. Russell Ballard, Elder ma Sister Walter F. González, ma Elder ma Sister William R. Walker.

I le taimi o faafiatiaga faaleaganuu sa faaigoaina o "Moli o Sasae," na faia i le afiafi a o lumanai le toe faapaia, sa matou matamata ai i alii ma tamaitai talavou e 2,700 mai le itulagi atoa o le malumalu, sa faafiafia. O se tasi o polokalama sili ona tulaga ese ua ou vaai i ai, ma sa tele taimi na tutulai

ai le aofia e patipatia.

O le aso na sosoo ai na toe faapaia ai le malumalu i ni sauniga se lua, lea sa matuai iloga le mafuta mai ai o le Agaga o le Alii ma i matou.

I le faaiuga o Aokuso, na faapaiaina ai e Peresitene Henry B. Eyring le Malumalu o San Salvador El Salvador. Na latou malaga ai ma Sister Eyring ma Elder ma Sister D. Todd Christofferson,



Elder ma Sister William R. Walker, ma Sister Silvia Allred o le au peresitene aoao o le Aualofa. Sa lipotia mai e Peresitene Eyring, o se sauniga sa sili ona faaleagaga.

I le faaiuga o le tausaga nei, o le a malaga ai Peresitene Dieter F. Uchtdorf ma Sister Uchtdorf faatasi ma isi Pulega Aoa o Quetzaltenango, Guatemala, o le a ia faapaiaina ai lo tatou malumalu iina.

O loo faaauau pea le fauina o malumalu ma le le faalavelaveina, uso e ma tuafafine. O le aso ua ou maua ai se avanoa e faasilasila atu ai isi malumalu fou.

Muamua, ou te fia ta'u atu e leai se fale o le Ekalesia e fauina, e sili atu ona taua nai lo se malumalu. O malumalu o nofoaga e faamau faatasi ai sootaga ina ia tumau e oo i le faavavau. Tatou te faafetai mo le tele



o malumalu i le lalolagi atoa ma mo faamanuiaga ua maua ai mo olaga o o tatou tagata.

O le tausaga ua mavae na matua faatama'iaina ai le Tapeneko o Provo i le Itumalo o Iuta i se afi matautia. Sa tuua lenei maota matagofie, sa pele i augatupulaga o le Au Paia o Aso e Gata Ai, ma na o ni puipui o fafo sa tutu ai. Ina ua maea se suesuega auiliili, sa tonu ia i matou e toe fauina ma ia toefuatai atoa ma faasao le itu i fafo, e avea ma malumalu lona lua o le Ekalesia i le aai o Provo. O le malumalu o loo i ai nei i Provo, o se tasi o malumalu aupito sili ona pisi o le Ekalesia, ma o se isi malumalu e lua a'i, o le a faafaigofie ai le aofaiga faateleina o tagata faamaoni o le Ekalesia o loo malaga atu i le malumalu mai Provo ma nuu taulalata atu.

Ou te fiafia foi e faasilasila atu ia malumalu fou i nofoaga nei: Barranquilla, Colombia; Durban, Aferika i Saute; Kinshasa i le Ripapelika Temokarasi o Congo; ma Star Valley, Wyoming. E le gata i lea, ua tatou agai atu i luma i a tatou fuafuaga mo se malumalu e fauina i Pale, Farani.

O le a tuuina atu auiliiliga o nei malumalu i le lumanai pe a maua nofoaga e faatutu ai, ma isi faamaoniga e tatau ai.

Sa ou ta'ua i konafesi ua mavae le tulaga alualu i luma ua tatou faia i le faatutuina o malumalu ia latalata atu i o tatou tagata. E ui ua faigofie malumalu mo le toatele o tagata o le Ekalesia, ae o loo i ai lava vaega o le lalolagi e matuai mamao ese lava ia malumalu mai o tatou tagata, ma o lea latou te le gafataulimaina ai feoa'iga e manaomia ina ia latou o

ai i ai. Ona le mafai ai lea ona latou mauaina faamanuiaga paia ma le faavavau e maua mai i malumalu. Ina ia fesoasoani i lea tulaga, ua matou faaavanoaina le mea lea ua ta'ua o le Tupe Lautele e Fesoasoani ai i Tagata Ulu i le Malumalu. O lenei tupe e maua ai se malaga se tasi i le malumalu a i latou o le a le mafai ona o i le malumalu, ae ua matua naunau lava mo lena avanoa. Soo se tasi atonu e manao e saofagā i lenei tupe, e mafai ona tusia i faamatalaga o le pepa masani o foai lea e tuuina atu i le epikopo i masina taitasi.

O lenei, uso e ma tuafafine, ou te tatalo ia faatumulia i tatou i le Agaga o le Alii a o tatou faalogologo atu i savali i le aso ma a taeao, ma aooaina na mea ua finagalo le Alii tatou te iloa. Ou te tatalo atu ai i le suafa o Iesu Keriso, amene. ■



**Saunia e Elder Richard G. Scott**

○ Le Korama a Aposetolo e Toasefululua

# ○ Le Mana o Tusitusiga Paia

*O tusitusiga paia e pei lava o ni tamai sulu e faamalamalama ai o tatou mafaufau ma saunia i tatou mo taitaiga ma musumusuga mai lugā.*

○ i tatou e o mai i lenei pulelaa i le taimi o konafesi, e lagona ina le mana o a outou tatalo. Matou te manaomia, ma e faafetai atu ai te outou mo na tatalo.

Sa malamalama lo tatou Tama i le Lagi ina ia mafai e i tatou ona alualu i luma, e pei ona tatau ai i lo tatou olaga faaletino, e manaomia ona tatou feagai ma ni luitau faigata. O nisi o nei luitau o le a toetoe lava ina le gafataulimaina. Ua Ia saunia meafaigaluega e fesoasoani ai ia i tatou ia faamanuiaina i lo tatou olaga faaletino. O se seti se tasi o na meafaigaluega, o tusitusiga paia.

I gasologa o tausaga na musuia ai e le Tama i le Lagi ni alii ma ni tamaiti filifilia e saili, e ala i le taitaiga a le Agaga Paia, ni tali i faafitauli sili ona faigata o le olaga. Na Ia musuia na au-auna faamaonia e faamaumau na tali e fai ma se ituaiga o tusitaulima mo i latou o Ana fanau e faatuatua i Lana fuafuaga o le fiafia ma i Lona Alo Pele, o Iesu Keriso. E mafai ona tatou maua lenei taitaiga i soo se taimi e ala i oa ua tatou ta'ua o tusitusiga faavae—o lona uiga, o le Feagaiga Tuai ma le Feagaiga Fou, le Tusi a Mamona, le

Mataupu Faavae ma Feagaiga, ma le Penina Tau Tele.

Talu ai o tusitusiga paia na pogai mai i fesootaiga musuia e ala mai i le Agaga Paia, o ni upumoni a'ia'i lava ia. Tatou te le tau popole i ni faamaoniga o manatu faavae o loo i ai i tusitusiga faavae ona e talu ai o le Agaga Paia sa avea ma meafaigaluega na uunaia ma musuia i latou taitoatasi na faamaumauina ia tusitusiga paia.

O tusitusiga paia e pei lava o ni tamai sulu e faamalamalama ai o tatou mafaufau ma saunia i tatou mo taitaiga ma musumusuga mai lugā. E mafai ona avea ma ki e tatala ai ala i fesootaiga ma lo tatou Tama i le Lagi ma Lona Alo Pele, o Iesu Keriso.

E maua mai i tusitusiga paia le malosiaga o le pule i a tatou tautinoga pe a malamalama tonu i ai. E mafai ona avea ma ni uo faamaoni ia e maua i soo se mea i soo se taimi lava. E maua pea i latou pe a manaomia. Ua maua mai i lo latou faaogaaga o se faavae o upumoni ia e mafai ona fagua e le Agaga Paia. O le aoaoina, mafaufau loloto, sailiili, ma le taulotoina o mau ua pei lava o le faatumuina o se kapeneta o faila i uo, tulaga

faatauaina, ma upumoni ia e mafai ona tapa i ai i soo se taimi, i soo se mea i le lalolagi.

E mafai ona oo mai se mana maoae mai le taulotoina o mau. O le taulotoina o se mau o le fatuina lea o se faigauo fou. E pei lava o le mauaina o se tagata fou e mafai ona fesoasoani mai i se taimi o puapuaga, tuu mai musumusuga ma faamafanafanaga, ma avea o se punavai o uunaiga mo suiga manaomia. Mo se faataitaiga, o le manatuaina pea o lenei salamo, ua avea ai ma se punavai o le mana ma le malamalama mo a'u:

“O le lalolagi ma mea o tumu ai o a Ieova ia; o le atu laulau ma e o nonofo ai.

“Aua o ia lava na faavaeina ai i luga o le sami, ma faamau ai i luga o vaitafe.

“O ai ea se alu ae i le mauga o Ieova? O ai se tumau i lona afioaga paia?

“O le ua i ai lima mama, ma le loto mama, o le ua le naunau lona loto i le mea faatauva, ma ua le tauto faa'ole'ole.

“Na te maua le manuia mai ia Ieova, ma le amiotonu mai le Atua o lona faaolataga” (Salamo 24:1-5).

O le mafaufau loloto i se mau faapena e maua mai ai se taitaiga sili o le olaga. E mafai e tusitusiga paia ona fausiaina se faavae o le lagolago. E mafai ona latou saunia se punaoa maoae tele o ni uo naunautai e mafai ona fesoasoani ia i tatou. O se mau e taulotoina e oo ina avea ma se uo tumau e le faavaivaia i le gasologa o taimi.

O le mafaufau loloto i se savali mai se mau e mafai ona avea ma se ki e tatala ai faaaliga ma taitaiga ma musumusuga a le Agaga Paia. E mafai e se mau ona faatoafilemuina se agaga le fiafia, tuu atu le filemu, faamoemoe, ma se toefuataiga o le talitonuina o tomai o se tasi e faatoilalo ai luitau





o le olaga. Ua i ai ia i latou se mana malosi e faamalolo ai luitau faalelagona pe afai o i ai le faatuatua i le Faaola. E mafai ona latou faatele'a'ia le faamalologa faaletino.

E mafai e tusitusiga paia ona fesootai atu uiga eseese i taimi eseese i o tatou olaga e tusa ma o tatou manaoga. O se mau atonu sa tatou faitau i ai i le tele o taimi e mafai ona maua ai ni uiga fou manino ia e faafouina ai ma malamalama i ai pe a tatou feagai ma se luitau fou i le olaga.

E faapefea ona e faaaogaina patino ia tusitusiga paia? Pe e te makaina au kopi? Pe e te tuuina ni faamatalaga i le laina ia manatua ai se taimi o se taitaiga faaleagaga po o se aafiaga na e aoaoina ai se lesona loloto? Pe e te faaaogaina uma ia tusitusiga faavae, e aofia ai le Feagaiga Tuai? Ua ou mauaina ni upumoni taua i itulau o le Feagaiga Tuai o vaega taua ia i le faavae o upumoni lea o loo taialaina lo'u olaga ma aveva o se punaoa pe a ou taumafai e faasoa atu le savali o le talalelei i isi. Mo lena mafuaaga ou te fiafia ai lava i le Feagaiga Tuai. Ua

ou mauaina ni maataua faapelepele o upumoni o salalau i ona itulau. Mo se faataitaiga:

“Ua fai atu Samuelu, E tusa ea ona fiafia o Ieova i taulaga mu ma taulaga, i lona fiafia i le faalogo i le siufofoga o Ieova? Faauta, o le faalogo e sili lea i le taulaga, ma le usiusitai e sili lea i le ga'o o le mamoe poa” (1 Samuelu 15:22).

“Ia e faatuatua ia Ieova ma lou loto atoa; a e aua le faalagolago i lou lava atamai.

“Ia e manatua o ia i ou ala uma, ona faatonuina ai lea e ia lava ou ala.

“Aua e te faafiapoto; ia e mata'u ia Ieova, ia alo ese i le leaga. . . .

“Lo'u atalii e, aua le faatauva'a ia te oe le aoaiga a Ieova; aua foi e te inoino pe a aoaiina oe e ia:

“Aua o le ua alofagia e Ieova, e aoaiina o ia e ia; e pei o le tamā ona aoaiina o lona atalii ua ia fiafia i ai.

“Amuia le tagata na te maua le potu, ma le tagata na te maua le mafaufau” (Faataoto 3:5-7, 11-13).

O le Feagaiga Fou foi o se punavai o upumoni taua:

“Ona fetalai atu ai lea o Iesu ia te ia, E te alofa atu i le Alii lou Atua ma lou loto atoa ma lou agaga atoa, ma lou manatu atoa.

“O le poloaiga muamua lena ma le sili.

“E faapena foi le lona lua, E te alofa atu i le lua te tuaoi, ia pei o oe lava ia te oe.

“O na poloaiga e lua ua autu ai le tulafono uma ma le au perofeta” (Mataio 22:37-40).

“Ua fetalai atu le Alii, Simona e, Simona e, faauta, ua manao tele Satani ia te outou, ia lulu ia te outou e pei o le saito:

“A ua ou faatoga mo oe, ina ne'i mavae lou faatuatua; a o oe foi, pe a liua mai oe, ona e faamalosi ai lea i ou uso.

“Ua fai mai o ia ia te ia, Le Alii e, ua ou sauni ta te o faatasi ma oe i le fale puipui atoa ma le oti.

“Ona fetalai atu lea o ia, Peteru e, ou te fai atu ia te oe, e le vivini moa i le po nei, seia e faafiti faatolu mai e te le iloa a'u. . . .

“A ua iloa o ia e le tasi o auauna fafine o nofo mai i tafatafa o le afi, ona pulatoa lea ia te ia, ua faapea ane, o lenei tagata foi sa faatasi ma ia.

“A ua faafiti atu o ia ia te ia, ua faapea atu, Funa e, ou te le iloa o ia.

“Ua toe itiiti, ona vaai mai lea o le tasi ia te ia, ua faapea mai, o oe foi le tasi o i latou. Ona fai atu lea o Peteru, Sole, e le o a'u.

“Ua mavae, pe atoa le itu po e tasi, ona matua fai mai ai lea o le tasi, ua faapea ane, E moni lava sa ia te ia lenei tagata, aua o le Kalilaia foi o ia.

“Ona fai atu lea o Peteru, Sole, ou te le iloa le mea e te fai mai na. Ona vivini loa lea o moa, a o tautala o ia.

“Ona faliu lea o le Alii, ua silasila atu ia Peteru. Ona manatu mai ai lea o Peteru i le fetalaiga a le Alii, na ia fetalai mai ia te ia, E le vivini moa seia

e faafiti faatolu mai ia te au.

“Ona alu ai lea o Peteru i fafo, ua tagi lotulotu ia” (Luka 22:31–34, 56–62).

E maeu le tiga o lo’u loto i le mea na tupu ia Peteru i lena taimo.

O le mau lenei mai le Mataupu Faavae ma Feagaiga ua matuai faamanuiaina ai lo’u olaga: “Aua le saili e talai la’u upu, ae ia muamua saili ia maua la’u upu, ona matala ai lea o lou laulaufaiva; ona oo lea, afai e te manao i ai, o le a e maua lo’u Agaga ma la’u upu, ioe, le mana o le Atua i le faatalitoniua o tagata” (MF&F 11:21).

I la’u faamasinoga, ua aoao mai e le Tusi a Mamona ia upumoni i le manino uiga ese ma le mana. Mo se faaitaiga:

“Ma o lenei ou te manao ina ia outou lotomauualalalo, ma augofie ma agamalu; e faigofie ona faaoleoleina; tumu i le onosai ma le tali-tiga; ma faautauta i mea uma; ma filiga i le tausiga o poloaiga a le Atua i taimi uma; ma ole atu mo soo se mea tou te manao-mia, faaleagaga ma faaletino; ma faafoi atu i taimi uma le faafetai i le Atua mo soo se mea o mea uma tou te maua.

“Ma vaai ia i ai ia te outou le faatuatua, faamoemoe, ma le alofa mama, ona tumu ai lea o outou i galuega lelei i taimi uma” (Alema 7:23–24).

Ma le isi:

“Ma o le alofa mama e loa ona tali-tiga, ma e agalelei, ma e le losilosivale, ma e le faafefeteina, e le sailia e ia ana lava, e le faaitagofie, e le mafaufau i se mea leaga, ma e le olioli i le amioletonu ae olioli i le upu moni, e onosaia mea uma, e talia mea uma, e faamoemoe i mea uma, e onosai i mea uma.

“O le mea lea, ou uso pele e, afai e le ia te outou le alofa mama o ni mea noa outou, ona e le uma le alofa mama. O le mea lea, ia outou fusi ai i le alofa mama, le mea ua silisili lea i mea uma, ona e iu mea uma—



“Ae o le alofa mama o le alofa le pona lea o Keriso, ma e tumau e faavavau; ma o soo se tasi e maua ua i ai ia te ia i le aso gataaga, o le a lelei ia te ia.

“O le mea lea, ou uso pele e, ia outou tatalo atu i le Tama ma le malosi atoa o le loto, ina ia faatumulia outou i lenei alofa, lea ua ia faaee mai i luga o i latou uma o e o soo moni o lona Alo, o Iesu Keriso; ina ia mafai ona avea o outou ma atalii o le Atua; a oo ai ina afio mai o ia o le a tatou faapei o ia, ona o le a tatou vaai ia te ia e pei ona i ai o ia; tau ina ia tatou maua lenei faamoemoe; tau ina ia mafai ona faamamaina i tatou e pei lava ona mama o ia.” (Moronae 7:45–48).

O lo’u toalua faapelepele, o Jeanene, e fiafia i le Tusi a Mamona. A o talavou o ia, na avea ma faavae o lona olaga. Sa avea ma se punavai o lana molimau ma aoaoga i le taimi o lana misiona talai i matusisifo o le Iunaite Setete. A o ma galulue ai i le misiona a Coroba, Atenitina, sa ia uunaia malosi lava le faaaogaina o le Tusi a Mamona i a matou taumafaiga talai. Sa faamautu muamua e Jeanene i lona olaga e faapea o i latou e faitauina pea le Tusi a Mamona e faamanuiaina i se fuataga faaopoopo o le Agaga o le Alii, se naunautaga sili e ususitai i Ana poloaiga, ma se molimau malosi atu o le paia o le Alo o le Atua.<sup>1</sup> I tausaga taitasi mo le tele o tausaga, ou te iloa pe fia, ou te vaaia ai lava o ia o nofonono filemu,

ma toe faamaeaina foi ma le toto’a le faitauina atoa o le Tusi a Mamona a o tulata i le faaiuga o lena tausaga.

I le 1991 sa ou manao ai e avatu se meaalofa faapitoa lava o le Kerisimasi i lo’u aiga. Sa ou faamaumauina i la’u api talaaga le faataunuuina o lena manao e faapea: “Ua ta nei le 12:38 i le aoauli, Aso Lulu, 18 Tesema, 1991. Faatoa maea lava le puega o la’u faamatalaga o le Tusi a Mamona mo lo’u aiga. Sa avea lenei ma aafiaga na faateleina ai la’u molimau o lenei galuega paia ma faamalosi ai se manao i totonu ia te au ina ia faamasani atili i ona itulau ina ia aoao mai i nei upumoni i tusitusiga paia ina ia faaaogaina i la’u auaunaga i le Alii. Ou te fiafia i lenei tusi. Ou te molimau atu ma lo’u agaga e moni ia, sa saunia mo le faamanuiaina o le Aiga o Isaraelu, ma ona ituaiga eseese uma o loo salalau i le lalolagi. O i latou uma o le a suesueina ana savali i le lotomauualalo, i le faatuatua e talitonu ia Iesu Keriso, o le a iloaina lona moni a’ia’i ma o le a maua ai se oa e taitai atu ai i latou i le fiafia sili atu, filemu, ma mea e ausia i lenei olaga. Ou te molimau atu i le paia atoa, e moni lenei tusi.”

Tau ina ia faaaoga uma e i tatou taitoatasi le tamaoaga o faamanuiaga e maua mai i le suesueina o tusitusiga paia, ou te tatalo ai i le suafa o Iesu Keriso, amene. ■

#### FAAMATALAGA

1. Tagai Gordon B. Hinckley, “A Testimony Vibrant and True,” *Liahona*, Aug. 2005, 6.



**Saunia e Barbara Thompson**

Fesoasoani Lua i le Au Peresitene Aoao o le Aualofa

# Faaaliga Faaletagata Lava Ia ma le Molimau

*Afai tatou te tausia ma le filiga poloaiga ma ole atu i le faatuatua, o le a oo mai tali i le ala a le Alii lava ia, ma i Lona lava taimi.*

I ni tausaga se tele ua mavae, a o ou a'oga i le kolisi, sa ou faalogologo ai i le konafesi aoao i luga o le leitio ona sa le'i i ai sa matou TV i totonu o si o matou tamai falemautotogi. Sa maoae failauga o le konafesi, ma sa ou fiafia ai i le malosi o le lagonaina o le Agaga Paia.

Ou te manatua lelei lava ina ua saunoa se tasi o Pulega Aoao e uiga i le Faaola ma Lana galuega ona ia tuuina mai ai lea o se molimau mai le loto, sa faamautu mai e le Agaga Paia i lo'u loto sa saunoa o ia i le mea moni. I le taimi lena, sa leai so'u masalosalo o loo soifua le Faaola. Ou te lei masalosalo foi sa ou maua se faaaliga faaletagata lava ia lea na faamautuina mai ia te au "o Iesu Keriso o le Alo o le Atua."<sup>1</sup>

Ina ua valu o'u tausaga, sa papatisoina ma faamauina au ma maua le meaalofa o le Agaga Paia. Sa o se faamanuiaga matagofie i lena taimi, ae ua oo ina faateteleina le taua a o ou tuputupu ae ma maua le meaalofa o le Agaga Paia i le tele o auala talu mai lena taimi.

E masani lava a o tatou tuputupu ae mai le laiti seia oo ina talavou ma

agai ina aveva ma tagata matutua, tatou te feagai ma ni luitau ma ni aafiaga i le ala, lea e mafua ai ona tatou iloa, tatou te manaomia le fesoasoani faalelagi lea e oo mai e ala i le Agaga Paia. A oo mai faigata, tatou te ono fesili ifo ia i tatou lava, "O le a le tali i lo'u faafitauli?" ma le "Pe mafai faapefea ona ou iloa le mea e fai?"

E masani ona ou manatua le tala i le Tusi a Mamona e uiga ia Liae i lona aoaoina o lona aiga i le talalelei. Sa ia faasoa atu ia i latou le tele o faaaliga ma aoaoga e uiga i mea o le a oo mai i aso amuli. Sa saili e Nifae le taitaiga a le Alii ina ia mafai ona ia malamalama lelei i aoaoga a lona tama. Sa siitia, faamanuia, ma musuia o ia, ia iloa e moni aoaoga a lona tama. O lena mea na mafai ai e Nifae ona mulimuli ma le totoa i poloaiga a le Alii ma ola i se olaga amiotonu. Sa ia maua ni faaaliga faaletagata lava ia e taiala ai o ia.

I le isi itu, sa fefinau ai ona uso o le tasi ma le isi ona sa latou le malamalama i aoaoga a lo latou tamā. Ona fesili atu lea o Nifae i se fesili e sili ona taua: "Ua outou ole atu ea i le Alii?"<sup>2</sup>

Sa vaivai le latou tali: "Matou te le'i ole atu; ona e le faailoa maia e le Alii

ia te i matou se mea faapena."<sup>3</sup>

Sa faaaoga e Nifae lena avanoa e aoao atu ai ona uso i le ala e maua ai faaaliga faaletagata lava ia. Sa ia fai atu: "Tou te le manatua ea mea na fetalai mai ai le Alii?—Afai tou te le faamaaa o outou loto, ma ole mai ia te au i le faatuatua, ma le talitonu o le a outou maua, faatasi ma le filiga i le tausiga o a'u poloaiga, e moni o le a faailoa mai nei mea ia te outou."<sup>4</sup>

O le auala e maua ai faaaliga faaletagata lava ia, e manino lava. E tatau ona tatou mananao e maua faaaliga, e le tatau ona faamaaa o tatou loto, ona tatau lea ona tatou ole atu i le faatuatua, talitonu moni o le a tatou maua se tali, ona tausia lea ma le filiga o poloaiga a le Atua.

O le mulimuli i lenei mamanu e le faapea ai o taimi uma tatou te fesili atu ai i le Atua, o le a vave oso mai le tali faatasi ai ma faamatalaga uma o le mea e fai. Ae peitai, o lona uiga afai tatou te tausia ma le filiga poloaiga ma ole atu i le faatuatua, o le a oo mai tali i le ala a le Alii lava ia, ma i Lona lava taimi.

A o ou laitiiti faapea lava a'u o faaaliga faaletagata lava ia po o tali i tatalo o le a oo mai i se leo e faigofie ona lagona. Ioe, o nisi faaaliga e oo mai e ala i le faalogoina o se leo moni. Ae peitai, ua ou aoaoina e tele auala e fetalai mai ai le Agaga.

O loo faamalalama mai i le Mataupu Faavae ma Feagaiga vaega e 6 nisi o auala e mafai ona tatou maua ai faaaliga:

"Sa e ole mai ia te au, ma faauta, o le tele o taimi na e ole mai ai, na e maua ai faatonuga mai lo'u Agaga."<sup>5</sup>

"Sa Ou faapupulaina lou mafaufau."<sup>6</sup>

"Ou te le'i tautala atu ea le filemu i lou mafaufau e uiga i le mataupu?"<sup>7</sup>

I isi mau ua tatou aoao atili ai e uiga i le mauaina o faaaliga:

“O le a ou ta’u atu ia te oe i lou mafaufau ma lou loto, e ala i le Agaga Paia, lea o le a oo atu i ou luga ma lea o le a mau i lou loto. O lenei, faauta, o le agaga lenei o faaaliga.”<sup>8</sup>

“O le a ou faia ia mu lou loto i totonu ia te oe; o lea, o le a e lagona ai ua sa’o.”<sup>9</sup>

“O le a ou faaali atu ia te oe ai lo’u Agaga, lea o le a faapupula ai lou mafaufau, lea o le a faatumulia ai lou agaga i le olioli.”<sup>10</sup>

O le tele lava o taimi o le a oo mai ai faaaliga faaletagata lava ia a o tatou suesue i tusitusiga paia, faalogo ma mulimuli i fautuaga a perofeta ma isi taitai o le Ekalesia, ma taumafai e ola i ni olaga faamaoni, ma amiotonu. O nisi taimi o le a oo mai musumusuga mai se fuaiupu se tasi o mau pe mai se laina i se lauga o le konafesi. Atonu o le a oo mai lau tali pe a usuina e tamaiti Peraimeri se pese matagofie. O nei mea o ituaiga uma ia o faaaliga.

I aso popofou o le Toefuataiga, e toatele le au paia sa sailia ma le filiga ni faaaliga ma sa faamanuiaina ma musuia i latou e iloa le mea e fai.

Sa tuuina atu ia Sister Eliza R. Snow se tiute mai le perofeta o Polika Iaga e fesoasoani e siitia ma aoao ia uso o le Ekalesia. Sa ia aoao mai e mafai e tamaitai taitoatasi ona maua musumusuga e taiala ai i latou i o latou lava olaga, o latou aiga, ma o latou tiutetauave i le Ekalesia. Na saunoa o ia: “Ta’u atu i uso e o atu ma faatau-nuu o latou tiute, i le lotomaulalo ma le faamaoni ma o le a faapea ona i ai le Agaga o le Atua i o latou luga ma o le a faamanuiaina i latou i a latou galuega. Tuu atu ia i latou e saili i le potou nai lo le pule, ma o le a faapea ona latou maua le pule uma ua i ai lo latou potou e faaoga ai.”<sup>11</sup>

Sa aoaoina e Sister Snow le usoga e saili le taitaiga mai le Agaga Paia. Fai mai o ia, o le Agaga Paia “e



faamalieina ma faatumulia ai faanau-nauga uma o le loto o le tagata, ma faatumulia ai avanoa uma. A faatumulia au i lenei Agaga, . . . ua faamalieina lo’u agaga.”<sup>12</sup>

Ua aoao mai Peresitene Uchtdorf, e faapea, “o faaaliga ma molimau e le masani ona o mai faatasi ma le malosiaga lofituina. Mo le toatele, e oo mai lemu se molimau—se vaega e tasi i le taimi.” Sa ia toe saunoa mai: “Ia tatou saili atu ma le faamaoni i le malamalama o musumusuga patino. Ia tatou ole atu i le Alii e faaeeina mai i o tatou mafaufau ma agaga le amataga o le faatuatua lea o le a mafai ai ona tatou maua ma iloa ai le galuega paia a le Agaga Paia.”<sup>13</sup>

O a tatou molimau e puipuia ma faamalolosia ai i tatou a o tatou feagai ma luitau i o tatou olaga i aso taitasi. O nisi tagata e tauivi ma faafitauli faigata o le soifua maloloina; o nisi o ni faafitauli tautupe; o isi e i ai luitau i a latou faaipoipoga po o a latou fanau foi; o isi e pagatia i le tuua toatasi po o faamoemoega ma miti ua le taulau. O la tatou molimau, e tuufaatasi ma lo tatou faatuatua i le Alii o Iesu Keriso ma lo tatou malamalama i le ata o le faaolataga, e fesoasoani ia tatou manumalo ai i

nei taimi o tofotofoga ma faigata.

I le tusi *O Afafine i Lo’u Malo*, tatou te faitau ai e uiga ia Sister Hedwig Biereichel, o se tamaitai i Siamani o le na puapuagatia i le tele o le faanoanoa ma le faaogea i le taimi o le Taua Lona Lua o le Lalolagi. Ona o ona uiga alofa ma le agalelei, ma e ui lava foi i lona mativa tele, sa ia faasoaina atu ai ma le fiafia ana meaai i se pagota na matalaina o le taua. Mulimuli ane, ina ua fesiligia o ia pe na mafai faapefea ona ia “faasoaina se molimau i le taimi o na tofotofoga uma,” sa tali o ia, “ou te le’i faasoaina se molimau i na taimi—na faasoaina au e le molimau.”<sup>14</sup>

Ona o le i ai o sa tatou molimau malosi, e le faapea ai la, o le a tumau ai pea faapena. E ao ona tatou fafagaina ma faamalolosia ina ia mafai ona lava lona malosi e lagolagoina ai i tatou. O le tasi lenei o mafuaaga tatou te “potopoto soo faatasi”—ai ina ia mafai ona tatou aai ma feinu i le faamanatuga, faafou a tatou feagaiga, ma ia “tausia i le afioga lelei a le Atua.” O le afioga lelei a le Atua lea e tausia i tatou “ia faatutumu ai ia mataala e le aunoa i le tatalo, ma faalagolago i le alofa o Keriso, o le pogai ma le iuga o lo [tatou] faatuatua, ua faalagolago i ai.”<sup>15</sup>

Na aoao mai i tatou e Elder

David A. Bednar, “A o outou sailia i le tulaga talafeagai ma faalagolago atu i le agaga o faaaliga, ou te folafola atu o le a outou ‘savavali i le malamalama o le Alii’ (Isaia 2:5; 2 Nifae 12:5). O nisi taimi o le a galue vave ai ma malosi le agaga o faaaliga, o isi taimi e faifai malie ma le le gaoia, ma e tele lava ona matua’i maaleale atonu o le a e le malamalama lelei i ai. Ae po o le a lava le mamana e maua mai ai lenei faamanuiaga, o le malamalama na te aumaia o le a suluia ai ma faa-lauteleina ai lou agaga, ma faatupu-laia lou malamalama (tagai Alema 5:7; 32:28), ma taitai ma puipuia oe ma lou aiga.”<sup>16</sup>

E finagalo le Alii e faamanuia mai i tatou i faasinoala, potu, ma le taitaiga i o tatou olaga. E finagalo o Ia e liligi mai Lona Agaga i o tatou luga. Ou te toe faapea atu, mo faaaliga faaletagata lava ia, e tatau ona tatou mananao e maua, e le tatau ona faamaaa o tatou loto, ona tatau ai lea ona tatou ole atu i le faatuatua, talitonu moni o le a tatou maua se tali, ona tausi lea ma le filiga poloaiga a le Atua. Ma a o tatou sailia tali i a tatou fesili, o le a Ia faamanuiaina i tatou i Lona agaga. Ou te molimau atu ai i le suafa o Iesu Keriso, amene. ■

#### FAAMATALAGA

1. Mataupu Faavae ma Feagaiga 46:13.
2. 1 Nifae 15:8.
3. 1 Nifae 15:9.
4. 1 Nifae 15:11; tagai foi i le fuaiupu e 10.
5. Mataupu Faavae ma Feagaiga 6:14.
6. Mataupu Faavae ma Feagaiga 6:15.
7. Mataupu Faavae ma Feagaiga 6:23.
8. Mataupu Faavae ma Feagaiga 8:2–3.
9. Mataupu Faavae ma Feagaiga 9:8.
10. Mataupu Faavae ma Feagaiga 11:13.
11. *O Afafine i Lo’u Malo: O Le Talafaasolopito ma le Galuega a le Aualofa* (2011), 45.
12. *O Afafine i Lo’u Malo*, 46.
13. Dieter F. Uchtdorf, “Lou Tulaga Gafatai, Lou Avanoa,” *Liahona*, Me 2011, 60.
14. Tagai *O Afafine i Lo’u Malo*, 86–87.
15. Morona 6:4–6.
16. David A. Bednar, “O Le Agaga o Faaaliga” *Liahona*, Me 2011, 90.



**Saunia e Elder L. Whitney Clayton**  
 O Le Au Peresitene o Fitugafulu

## O Le A Oo Mai le Taimi

*Faatasi ma outou, ou te tu ma le ofo a o agai i luma faavavega lenei galuega, ma le ofoofogia, ma le manaomia.*

**S**a avea au o se faifeautalai talavou mo ni nai masina i eria tuto-tonu o Lima, Peru. O le mea na tupu, sa ou pasia le Plaza de Armas o Lima i le tele o taimi. O le Maota o le Malo, le maota aloaia ma le ofisa o le peresitene o Peru, na faafesagai ma le plaza. Sa ma valaaulia ma la’u soa ia tagata i le plaza, e faalogologo i le talalelei toefuataiina. E masani lava ona ou mafaufau pe faape’i se lagona pe afai e ulu atu i le maota tele, ae o lea manatu na foliga mai o le a le tupu lava.

O le tausaga ua tea, sa matou feiloai atu ai ma Elder D. Todd Christofferson o le Korama a le Toasefululua faapea ma isi, ia Alan García, lea sa avea ma peresitene o Peru i lenei taimi, i le Maota o le Malo. Sa matou matamata i ona potu matagofie ma sa taliina ma le faaaloalo i matou e Peresitene García. Na faataunuuina ou mafaufauga faa-faifeautalai talavou e uiga i le maota i se auala ou te le’i mafaufauina e mafai ona tupu i le 1970.

Ua i ai suiga i Peru talu mai lenei taimi sa ou faifeautalai ai, aemaise lava i le Ekalesia. Pe a ma le 11,000 tagata o le Ekalesia sa i ai iina i lenei vaaitaimi ma e sa na o le tasi le siteki. I le asō, ua silia ma le 500,000 tagata o le ekalesia ma e toetiiti atoa le 100 o siteki. O aai ia sa i ai na o ni nai vaega toalaite o

tagata o le ekalesia, ua i ai nei ni siteki ola ma ni falelotu mata’ina ua faamata-gofieina ai le laueleele. O le mea foi lea e tasi o loo tupu i le tele o isi atunuu i le lalolagi atoa.

O lenei tuputupu ae maoae o le Ekalesia ua manaomia ai se faamalamalama. Tatou amata i se valoaga mai le Feagaiga Tuai.

O Tanielu o se pologa Eperu sa i ai i Papelonia. Sa ia maua se avanoa e faaliliu ai se miti a le Tupu o Nepukanesa. Sa ole atu Tanielu i le Atua ina ia faaali mai ia te ia le faalepo ma lona faaliliuga, ma sa tali mai lana tatalo. Na ia tau atu ia Nepukanesa, “O i ai le Atua i le lagi, o le na te faaali mea ua lilo, ma faailoa mai ai ia Nepukanesa le tupu o mea e oo mai i aso amuli. . . . Sa faapea le mea na e silafia i lou tofaga Sa faapea le mea na e silafia i lou tofaga.” Fai mai Tanielu na vaai le tupu i se tupua foliga taufaamata e i ai se ulu, tino, lima, ogavae, ma vae. O se maa na tofi mai le mauga e aunoa ma lima na taavale mai ma na faatupulaia lona tele. Sa taia e le maa lenei tupua, ma nutililii ai, “o le maa na lavea ai le tupua ua avea lea ma mauga tele ua tumu ai le lalolagi uma.”

Na faamatala e Tanielu o le tupua o le faatusa lea o malo faaupufai i le lumanai ma “o ona po o [na] tupu [i



le lumanai] e faatuina ai e le Atua o le lagi le malo e le faaumatia e faavavau: . . . na te tuimomomoina ma faaumatia ia malo uma lava, a o ia e tumau lava e faavavau.”<sup>1</sup>

Se’i o tatou agai atu i se taimi lata mai. Na muai faaali atu le agelu o Moronae ia Iosefa Samita i le 1823 ma ta’u atu ia te ia, “o i ai i le Atua se galuega mo [ia] e fai; ma e faapea o [lona] igoa o le a tauleleia ma taulea-gaina i totonu o atunuu uma, ituaiga, ma gagana.”<sup>2</sup> O le savali a Moronae sa mautinoa lava na te’i ai Iosefa aua faatoa 17 ona tausaga.

I le 1831 sa tau atu ai e le Alii ia Iosefa o ki o le malo o le Atua “ua tuu atu i tagata i luga o le lalolagi.” Sa ia fetalai atu o le “talalelei [o le a] taavale atu ai i luma i tuluiga o le lalolagi, e pei o le maa na tofi mai le mauga e aunoa ma lima . . . , seia tumu ai le lalolagi atoa,”<sup>3</sup> e pei lava foi ona faamatalaina e Tanielu ia Nepukanesa.

I le 1898, sa toe taua ai e Peresitene Uilifoti Uitilafi se aafiaga na ia oo i ai ina ua faatoa liliu mai i le ekalesia i le 1834 i se sauniga perisitua e lata i Katelani. Sa ia faamatalaina: “Sa vala-auina e le Perofeta i latou uma lava o e umia le Perisitua e faapotopoto i le tamai faleaoga laau sa i ai iina, atonu pe 14 futu [4.3 mita] faatafafa. Ina ua matou faapotopoto sa valaau mai le Perofeta i Toeaina o Isaraelu. . . . e tuuina atu molimau o lenei galuega. . . . Ina ua maea uma latou sa faapea mai le Perofeta, ‘Uso e ua matua faaga-etia au ma ua aoaoina e ala i a outou molimau iinei i le po nei, ae ou te fia fai atu ia te outou i luma o le Alii, e

tou te leiloaina nisi mea faaopoopo e uiga i taunuuga o lenei Ekalesia ma le malo nai lo se pepe i luga o vae o lona tina. Tou te lei malamalama i ai. . . . Ua na o sina luutaga itiiti o le Perisitua o loo outou vaai atu i ai i le po nei, ae o lenei ekalesia o le a faatumulia ai Amerika i Matu ma Saute—o le a faatumulia ai le lalolagi.”<sup>4</sup>

O nei mea na valoia ai:

- o le malo o le Atua ua faatusa i se maa na tofi mai le mauga o le a tumu ai le lalolagi atoa;
- o le igoa o Iosefa Samita o le a lauiloa i le lalolagi atoa; ma
- o le a faatumulia e le Ekalesia ia Amerika ma faatumulia ai le lalolagi

atonu na foliga faavalevalea i tausaga ua alu. O se vaega toalaiti o tagata

talitonu, na tau le lava le faasoa e ola ai i vaega o Amerika e lei nofoia, ma na siitia solo ina ia aloese ai mai sau-aga, ma e lei foliga mai o se faavae o se faatuatuaga o le a laasiaina ni tuaoi faavaomalo ma ootia ai loto i soo se nofoaga.

Ae o le mea tonu lava lena na tupu. Sei ou tuuina atu se faataitaiga.

O le Aso o le Kerisimasi, i le 1925, i Buenos Aires, na faapaiaina ai e Elder Melvin J. Ballard le konetineta atoa o Amerika i Saute mo le talaiga o le talalelei. Na oo atu ia Aokuso o le 1926 ua papatisoina le toatele o tagata liliu mai. O i latou o tagata muamua o Le Ekalesia a Iesu Keriso o le Au Paia o Aso e Gata Ai na papatisoina i Amerika i Saute atoa. O le 85 lena o tausaga ua mavae, o le soifuaga atoa lena o le toatele o loo faafofoga ma i le konafesi i le aso.

Ua 23 nei siteki o Siona i Buenos Aires i le aso, ma le anoanoai o siteki ma le faitau sefulu afe o tagata o le Ekalesia i aai ma taulaga i Atenitina atoa. O le taimi nei, ua silia ma le 600 siteki i Amerika i Saute ma le faitau

### Montevideo, Iurukuei



miliona o tagata o le Ekalesia i Amerika i Saute atoa. A o tatou maimoa atu i ai, ua faatumulia le konetineta i le malo o le Atua, ma ua faasalalauina le igoa o Iosefa Samita e le gata ia i tatou ae faapea foi ma le au faitio i atunuu na te lei faalogo i ai i le taimi o lona soifuaga.

Ua lata i le 3,000 siteki a le Ekalesia atoa i le taimi nei, mai Boston i Bangkok ma le Aai o Mekisiko i Moscow. Ua tatou agai atu i le 29,000 uarota ma paranesi. I le tele o atunuu ua i ai ni siteki matutua, faatasi ma o latou tagata o o latou tuua o e na liliu mai. I isi nofoaga, o loo i ai ni vaega toalaiti o tagata fou o loo feiloai o ni paranesi toalaiti o le Ekalesia i fale maototogi. O tausaga uma lava e salalau atu ai le Ekalesia i le keloape atoa.

O nei valoaga e uiga i le faatumulia o le lalolagi ma lauiloa ai i le lalolagi atoa: Pe faavalevatea? Atonu. Pe masalomia? Pe faigata? Ua maotinoa lava e leai. O lea lava e tupu a o tatou vaavaai atu i ai?

Na ta'ua e Peresitene Gordon B. Hinckley:

“Sa i ai se taimi sa i ai se faaupuga faapea, e le goto lava le la i luga o le Malo o Peretania. Ua tuuaititia nei lona malo. Ae e moni e le goto lava le la i lenei galuega a le Alii aua o loo pa'i atu pea i olaga o tagata i le lalolagi atoa.

“Ma ua na o le amataga lenei. E anoanoai mea e le i faia . . . E leai se tuaoi o la tatou galuega. . . . Ua latalata mai na malo ia te i tatou ma o le a i ai se aso e matala mai ai.”<sup>5</sup>

O le taimi nei ua tatou vaai ai i le latalata mai o le faataunuuga o le valoaga e uiga i le Tusi a Mamona:

“Ma . . . o le a oo mai le taimi o le a tapunia e tupu o latou lava gutu; ona o le a latou vaai i mea sa le'i ta'uina atu ia te i latou; ma o le a latou manatunatu i mea sa latou le'i faalogo i ai.

“Aua i lona aso, ona o au lava, o le



**Salvador, Pasila**

a galueaiina ai e le Tama se galuega, lea o le a avea o se galuega tele ma le ofoofogia i totonu ia te i latou.”<sup>6</sup>

O le galuega a le Alii e moni lava e tele ma ofoofogia, ma e alualu i luma ma le taua ma e le iloa e le toatele o taitai faaupufai, faaleaganuu, ma faaleaoaga. E auaua'i lava le tasi o le loto, tasi le aiga i le taimi, i se ala filemu ma le le gaioia, o ana savali paia ua faamanuina ai tagata i soo se mea.

Ua tuuina mai i se fuaiupu i le Tusi a Mamona se ki i le tuputupu ae faavavega o le Ekalesia i aso nei, “Ma e le gata i lea, ou te fai atu ia te outou, o le a oo mai le taimi e salalau atu ai le malamalama o se Faaola i atunuu uma, ituaiga, gagana, ma tagata.”<sup>7</sup>

O la tatou savali e sili ona taua, lea ua faatonuina ma poloaiina ai faalelagi i tatou ina ia ave i soo se nofoaga o le lalolagi o le, o loo i ai se Faaola. Sa soifua o Ia i le taulotoaiga o taimi. Sa Ia togiolaina a tatou agasala, na faasatauroina, ma ua toetu mai. O lona savali le mafaatusaliaina, lea tatou te folafolaina atu faatasi ma le pule mai le Atua, o le mafuaaga moni lea ua tuputupu ae ai le Ekalesia e pei ona i ai.

Ou te molimau atu sa faaali faatasi mai o Ia ma Lona Tama ia Iosefa Samita. I lalo o le taitaiga a le Tama, na Ia toe faatuina ai Lana talalelei i luga o le fogaelele. Na Ia toe auina

mai aposetolo, perofeta, ma ki o le perisitua i le lalolagi. O loo Ia taitaiina Lana Ekalesia e ala mai i se perofeta soifua o, Peresitene Thomas S. Monson. O Lana Ekalesia o le maa lea na tofi mai le mauga e aunoa ma lima ma ua taavale atu i le keloape atoa.

Tatou te faafetai ia Iosefa Samita, ma vaavaai atu ma le ofo a o faamamaluina lona igoa, ma, ioe, e inosia foi i le lalolagi atoa. Ae tatou te iloa o lenei galuega maoae o aso e gata ai e le faatautu ia te ia. O le galuega a le Atua Silisiliese ma Lona Alo, le Aloalii o le Filemu. Ou te molimau atu o Iesu Keriso o le Faaola ma e faatasi ma outou e tutu atu ma le ofo a o agai i luma faavavega lenei galuega, ma le ofoofogia, ma le matua manaomia. E moni, “o le a oo mai le taimi e salalau atu ai le malamalama o se Faaola . . . i atunuu uma, ituaiga, gagana, ma tagata.” Ou te molimau atu ia te Ia, o le Faaola o tagata uma, ma lenei galuega, i le suafa o Iesu Keriso, amene. ■

#### FAAMATALAGA

1. Tanielu 2:28, 35, 44; tagai foi i fuaiupu 1–45.
2. Iosefa Samita—Talafaasolopito 1:33.
3. Mataupu Faavae ma Feagaiga 65:2.
4. *Aoaoga a Peresitene o le Ekalesia: Wilford Woodruff* (2004), 25–26.
5. Gordon B. Hinckley, “O Le Tulaga o le Ekalesia,” *Liahona*, Nov. 2003, 7.
6. 3 Nifae 21:8–9.
7. Mosaea 3:20.



Saunia e Elder José L. Alonso

○ Le Fitugafulu

# Faia o le Mea Sa’o i le Taimi Sa’o, e aunoa ma le Faatuai

*Sa tuuina mai e le Faaola . . . ia i tatou se faataitaiga maoae e uiga i le le faatali e tuuina atu se toomaga ia i latou o e ua leai se lagona o le fiafia ma le olioli.*

○ le taimi nei, e toatele tagata o loo ola ma le faanoanoa ma le tele o le le mautonu. Latou te le o maua tali i a latou fesili ma ua le mafai ona taulima o latou manaoga. O nisi ua leai se lagona o le fiafia ma le olioli. Ua folafola mai e perofeta e faapea, o le fiafia moni e maua i le mulimuli i faataitaiga ma aoaoga a Keriso. O Ia o lo tatou Faaola, o Ia o lo tatou Faiaoga, ma o Ia o le Faataitaiga ua atoatoa.

O Lona soifuaga o se soifuaga o le auauna atu. A tatou auauna atu i o tatou tuaoi, ua tatou fesoasoani atu ia i latou o loo manaomia le fesoasoani. I le faagasologa, tatou te maua ai fofo o o tatou lava faafitauli. A o tatou faataitai i le Faaola, tatou te faaali atu lo tatou alolofa i lo tatou Tama Faalelagi ma Lona Alo o Iesu Keriso, ma avea atili ai i tatou e faapei o i Laua.

Sa saunoa le Tupu o Peniamina e uiga i le taua o le auauna atu, i le faapea mai pe a tatou “auauna atu i o [tatou] uso a tagata, ua na o lo [tatou]

auauna atu lava lea i lo [tatou] Atua.”<sup>1</sup> E tofu tagata uma ma avanoa e tuuina atu ai auaunaga ma faaali atu le alofa.

Ua talosagaina i tatou e Peresitene Thomas S. Monson ia tatou o atu “e laveai” ma auauna atu i isi. Na saunoa o ia: “O le a tatou iloa o i latou o loo tatou auauna atu i ai, o e ua lagonaina le pa’i atu o le aao o le Matai e ala i a tatou galuega, e le mafai ona latou faamatalaina le suiga lea e oo mai i o latou olaga. O loo i ai se manao e auauna atu ma le faamaoni, ia savavali ma le faamaualalo, ma ia ola atili e pei o le Faaola. O le mauaina o la latou vaaiga faaleagaga ma iloa atu folafolaga o le faavavau, ua latou tautatala ai foi i upu a le tagata tauaso lea na toe faapupulaina e Iesu, lea na fai mai, ‘O le mea e tasi ua ou iloa, sa ou tauaso, a o lenei ua ou vaai.’”<sup>2</sup>

O aso taitasi tatou te maua ai le avanoa e tuuina atu ai le fesoasoani ma le auaunaga—o le faia o le mea sa’o, i le taimi sa’o, e aunoa ma le faatuai. Mafaufau i le toatele o tagata

o loo faigata ona maua se galuega pe o gasegase, o e o lagona le tuua toatasi, o e foi o mafaufau faapea ua aveesea a latou mea uma. O le a se mea e mafai ona e faia e fesoasoani atu ai? Vaai faalemafaufau e faapea, ua telefoni atu lou tuaoi ia te oe mo se fesoasoani ona ua faaletonu lana taavale ae o loo timuga. O le a le mea sa’o e tatau ona fai mo ia? O le a le taimi sa’o e tatau ona fai ai?

Ou te manatua se mea na tupu ina ua ō lo matou aiga i le taulaga o le Aai o Mekisiko e faatau mai ni lavalava mo le ma fanau e toalua. Sa laiti lava i laua. Faatoa atoa le lua tausaga o lo ma atalii matua, ae o le atalii laitiiti sa na o le tasi lona tausaga. Sa tumu le auala i tagata. A o fai le matou faatauga, sa ma uuina lima o le ma fanau, ona matou tutu lea mo se taimi e tilotilo atu i se mea, ma e aunoa ma le iloaina, ua leiloa lo ma atalii matua! Ma te lei iloa pe na faapefea, ae sa le’i i ai faatasi o ia ma i matou. E aunoa ma se toe faatali, sa ma taufetuli solo loa e sue o ia. Sa ma sue solo ma taufono o ia, sa lagona le ita tele, ma manatu a nei e leiloa atu o ia e faavavau. I o maua mafaufau, sa ma tau fai augani atu i le Tama Faalelagi e fesoasoani mai ia ma maua o ia.

Ina ua mavae sina taimi itiiti, sa ma mauaina o ia. A lale, sa matamata o ia ma le le malamalama i meataalo i le faamalama o se faleololo. Sa ma tau fai opoina o ia ma feasogi atu i ai, ma sa ma faia le tautinoga ia ma filiga i le vaaiga o le ma fanau, ina ia le toe leiloa se tasi o i laua. Sa ma aoaoina, ina ia mafai ona ma oo atu e laveai lo ma atalii, sa le manaomia ona tau fuafuaina ni fonotaga. Sa na ona ma gaoioi loa, ma o atu e saili le tasi sa leiloa. Sa ma aoaoina foi, sa le’i iloa lava e lo ma atalii na leiloa o ia.

Uso e ma tuafafine, atonu e toatele



i latou, ona o ni mafuaaga, ua leiloloa ai mai la tatou vaaiga, ma e le o iloa o loo leiloloa i latou. Afai tatou te faatuai, e ono leiloloa i latou e faavavau.

Mo le toatele o e o loo manaomia la tatou fesoasoani, e le tau manaomia ona faia ni polokalama fou pe fai ni taumafaiga faigata pe taugata. Pau le mea latou te manaomia o lo tatou naunau e auauna atu—e fai le mea sa’o i le taimi sa’o, e aunoa ma le faatuai.

Ina ua faaali atu le Faaola i tagata o le Tusi a Mamona, sa Ia tuuina mai ia i tatou se faataitaiga maoae e uiga i le le faatali e tuuina atu se toomaga ia i latou o e ua leai se lagona o le fiafia ma le olioli. O le aoaoina o tagata, sa Ia silasila atu sa le mafai ona malamalama i latou i Ana upu uma. Sa Ia valaaulia i latou e o i o latou aiga ma mafaufau loloto i mea sa Ia fai atu ai ia i latou. Sa Ia ta’u atu ia i latou e tatalo i le Tama ma saunia i latou lava e toe o mai [i le aso e sosoo ai], pe a toe foi atu o Ia e aoao i latou.<sup>3</sup>

A o Ia faaiuina [Ana] aoaoga, sa silasila atu o Ia i le motu o tagata ma vaaia ai ua fetagisi i latou, aua sa mananao e nofo atu o Ia e faatasi ma i latou.

“Ma sa ia fetalai mai ia te i latou: Faauta, ua tumu lo’u lotu i le agaalofo ia te outou.

“E i ai ea ni isi o ia te outou ua mama’i? Ia aumai i latou iinei. E i ai ea ni isi o outou ua pipili, pe ua tauaso, pe ua setu, pe ua manua, pe ua lepela pe ua supa, pe ua tutuli, pe ua puapugatia i soo se ala? Ia aumai i latou iinei ma o le a ou faamaloloina i latou, ona ua ou agaalofo tele ia te outou; ua tumu lo’u lotu i le alofa mutimutivale.”<sup>4</sup>

Ma sa latou aumai o latou tagata mama’i ia te Ia, ma sa Ia faamaloloina i latou. Sa punonou le motu o tagata i lalo i Ona vae ma tapuai atu ia te Ia



ma sogi i Ona vae, “ma sa oo ina latou faataeleina ona vae i o latou loimata.” Ona Ia poloaiina lea o i latou ia aumai a latou fanau iti, ma sa Ia faamanuia taitoatasi ia i latou.<sup>5</sup> O le faataitaiga lena ua tuuina mai e le Faaola ia i tatou. O Lona alofa e mo tagata uma, ae sa lei misi lava se tasi i Lana vaai.

Ou te iloa o lo tatou Tama Faalelagi e alofa, malamalama, ma onosai. E faapena foi le alofa o Lona Alo o Iesu Keriso, ia i tatou. La te tuuina mai le fesoasoani ia i tatou e ala i a Laua perofeta. Ua ou iloa o loo i ai le saogalemu tele i le mulimuli i perofeta. O loo alu pea “le laveai”. Fai mai Peresitene Monson: “O loo faatalitali mai le Alii i o tatou manatu. O loo faatali mai i a tatou faatinoga. O loo faatali mai i a tatou galuega. O loo faatali mai i a tatou molimau. O loo faatali mai i lo tatou tautino atu.”<sup>6</sup>

Ua ia i tatou se tiutetauave ma se avanoa maoae. E toatele o loo manaomia le toe maua o le tofo suamalie o le fiafia ma le olioli e ala i le toaaga i le Lotu. O lena fiafia e oo mai i le mauaina o sauniga, osiaina ma le tausaiaina o feagaiga paia. E manaomia i tatou e le Alii e fesoasoani atu ia i

latou. Ia tatou faia le mea sa’o, i le taimi sa’o, e aunoa ma le faatuai.

Ou te molimau atu o loo soifua le Atua ma [o Ia] o lo tatou Tama. O loo soifua Iesu Keriso ma na Ia ofoina mai Lona soifua ina ia mafai ai ona tatou toe foi atu i le afioaga o lo tatou Tama Faalelagi. Ua ou iloa o Ia o lo tatou Faaola. Ua ou iloa o lo Laua agalelei e le iu ma o loo faaauau pea ona faailoa mai. Ou te tautino atu o Peresitene Thomas S. Monson o la La’ua perofeta ma na o le pau lenei o le Ekalesia moni i luga o le fogaeleele. Ua ou iloa o le Perofeta o Iosefa Samita o le perofeta o le Toefuataiga. Ou te molimau atu o le Tusi a Mamona o le afioga a le Atua. E tuuina mai ai ia i tatou le taitaiga ma faataitaiga e mulimuli ai ina ia mafai ona ave atili i tatou e pei o le Atua ma Lona Alo Pele. Ou te tautino atu ai i le suafa o lo tatou Alii o Iesu Keriso, amene. ■

#### FAAMATALAGA

1. Mosaea 2:17.
2. Thomas S. Monson, “O e Laveai Mai,” *Liahona*, Iulai 2001, 57, 58.
3. Tagai i le 3 Nifae 17:1–3.
4. 3 Nifae 17:6–7; tagai foi i le fuaiupu e 5.
5. Tagai i le 3 Nifae 17:9–12, 21.
6. Thomas S. Monson, *Liahona*, Iulai 2001, 58.



**Saunia e Peresitene Boyd K. Packer**  
Peresitene o le Korama a Aposetolo e Toasefululua

# Fautuaga i le Autalavou

*E ui lava i mea faafeagai, tofotofoga, ma faaososoga, e le tatau lava ona e toilalo ai pe fefe.*

**O**u te lauga patino atu i le autalavou nai lo mea ou te masani ai, i le faatusatusaina o lo’u talavou ma outou.

E matuā le mafuatiaina lava lo outou taūa. Ua ou vaaia outou i le tele o atunuu ma konetineti uma. Ua sili atu lava outou nai lo le mea na matou i ai a o talavou. Ua tele atu lo outou iloa o le talalelei. Ua tele atu lo outou faatagatamatua ma sili atu le faamaoni.

Ua 87 nei o’u tausaga. Atonu tou te manatunatu i lo’u matua pe o le a se mea ou te mafai ona saofagā ai i o outou olaga. Sa ou i ai i le mea o loo outou i ai ma iloa le mea o loo outou o i ai. Ae tou te le’i oo lava i le mea lea ua ou i ai. Ou te sii maia ni nai laina o se solo e le mafaagaloina:

*Ua amata ona telegese le matuu toeaina.*

*E le o le matuu laitiiti.*

*O mea e le iloa e le matuu laitiiti*

*E iloa uma e le matuu toeaina.*

*O le iloa e le matuu toeaina o mea E aveva ai pea o ia ma matai o le matuu laitiiti.*

*O a mea e le iloa e le matuu telegese toeaina?*

*—Pe faapefea ona lele saosaoa.*

*E lele i luga le matuu laitiiti, ma lalo foi,*

*Ma faapepepepe i luga o le matuu toeaina.*

*O le a se mea e leiloa e le matuu laitiiti saosaoa?*

*—Pe o fea e alu i ai?<sup>1</sup>*

E le o se solo e faatusalia ia Wordsworth, ae o se solo e le mafaagaloina!

Faatasi ai ma mea uma o loo tutupu i le lalolagi, i le faaitiitia o tulaga faatonuina o amioga mama, o outou le autalavou ua ola ae i teritori o le fili.

Ua tatou iloa mai tusitusiga paia sa i ai se taua i le lagi ma sa fouvale Lusifelo ma, “ua lafo ifo i le lalolagi.”<sup>2</sup> Ua ia naunau e faasalaveia le fuafuaga a lo tatou Tama Faalelagi ma saili atu e pulea mafaufau ma amioga a tagata uma. O lenei uunaiga e faaleagaga, ma ua i ai o ia “i le salafa o le laueleele.”<sup>3</sup>

Ae e ui lava i mea faafeagai, tofotofoga, ma faaososoga, e le tatau lava ona e toilalo ai pe fefe.

Ina ua 17 o’u tausaga, ua sauni e faauu mai le aoga maualuga o se tamaitiiti lelei lava sa i ai ni vaivaiga, e pei ona ou manatu i ai, sa faafuasei lava ona suia mea uma na siomia ai matou i se tasi o taeao o se Aso Sa. O le aso na sosoo ai na valaauina ai i matou e o atu i le fale faafiafia o le

aoga. I luga o le tulaga sa i ai se nofoa ma se tamai leitio. Sa ki e le puleaoga le leitio. Ona matou faalogoina lea o le siufofoga o Peresitene Franklin Delano Roosevelt a o ia faasilasila mai le tu’ipomuina o Pearl Harbor. Ua i ai le Lunaite Setete i se taua ma Iapani.

Na toe tupu foi lena vaaiga mulimuli ane. Ua toe faalogoina foi le siufofoga o Peresitene Roosevelt, o le taimi la lenei ua faasilasila mai ai ua tau lo tatou atunuu ma Siamani. Sa salalau solo le Taua Lona Lua o le Lalolagi i le salafa o le lalolagi.

O le taimi lea ua le mautonu ai lo matou lumanai. Sa matou le iloina le mea o i luma atu. Pe mata o le a matou ola se’i faaipoipo ma faia ni aiga?

I aso nei ua i ai “taua ma tala o taua, ma [ua] vāvāō le lalolagi atoa.”<sup>4</sup> O outou, la matou autalavou, atonu ua lagonaina le le mautonu ma le le mautinoa i o outou olaga. Ou te fia fautua atu ma aoao outou, ma tuu atu se lapataiga e uiga i nisi o mea e fai ma nisi o mea e le faia.

O le fuafuaga o le talalelei o “le fuafuaga sili o le fiafia.”<sup>5</sup> O le aiga o le totonugalemu o lena fuafuaga. E faalagolago le aiga i le faaaogaina ma le agavaa o na mana e foafoa ai le ola o loo i totonu o o outou tino.

I le “O Le Aiga: O Se Folafolaga i le Lalolagi,” o se faamatalaga musuia na tuuina mai e le Au Peresitene Sili ma le Korama a Aposetolo e Toasefululua, ua tatou aoao ai i le muai olaga “o tagata uma—tane ma le fafine—[sa] foafoaina i le faatusa o le Atua. O i latou taitoatasi o se atalii po o se afafine agaga faapelepele a ni matua faalelagi, ma, o lea, ua tofu ai ma se natura paia ma se taunuuga. O le tulaga tane po o le fafine [o le tagata] o se vaega taua [ma sa faavaeina i lena muai olaga]. . . .

“. . . Matou te toe tautino atu foi ua



poloai mai le Atua, o mana paia o le foafoaina o fanau, ua na o le va lava o le alii ma le tamaitai ua faaipoipoina faaletulafono, o se tane ma le ava, e tatau ona faaaogaina ai.”<sup>6</sup>

O le faasalaga sili na tuu e Lusifelo ma e na mulimuli ia te ia i o latou lava luga o le le mafai lea ona maua o ni o latou tino faitino.

O le tele o faaososoga tou te fetaii, e mautinoa lava o mea e sili ona ogaoga e fesootai ma o outou tino. Ua le gata ina outou maua le mana e foafoa ai ni tino mo se tupulaga fou, ae ua ia te outou foi le faitalia.

Sa aoao mai le Perofeta o Iosefa Samita, “O tagata uma e fai tino e i ai le mana ia i latou o e leai ni tino.”<sup>7</sup> O lea o agaga soifua uma ua i ai se tino faaletino e mulimuli ane lava e maua le mana e pulea ai le fili. Tou te mafatia i faaososoga ona o le natura faaletino, ae ua ia te outou foi le mana e pulea ai o ia ma ana agelu.

E oo ifo i le taimi na matou faauu ai mai le aoga maualuga, ua toatele au uo ua malaga i le taua, o nisi o i latou e le'i toe foi mai lava. O le isi toatele o i matou o le a vave ona ulufale atu i le militeli. Sa matou le iloaina lo matou lumanai. Pe o le a matou sao mai ea i le taua? Mata o le a lava se mea e totoe o lo matou lalolagi pe a matou toe foi mai?

Ona sa ou mautinoa o le a ou oo atu i le vaegaau, o lea sa ou auai ai i le fuavaalele. Sa vave ona ou i ai i Santa Ana, Kalefonia, mo mua'i aoaoga ave vaalele.

O le taimi lena e le'i ai sa'u moli-mau maumaututu e moni le talalelei, ae sa ou iloa na iloa e o'u faiaoga seminare, o Abel S. Rich ma John P. Lillywhite, e moni. Sa ou faalogo o la molimau ai, ma na ou talitonu ia i la'ua. Sa ou faapea ifo ia te a'u, “O le a ou faalagolago i a la molimau seia oo ina ou maua e au lava ia sa'u moli-mau.” Ma sa faapena ona fai.

Sa ou faalogo e uiga i faamanuiaga faapeteriaka ae sa ou le'i mauaina. I siteki taitasi o loo i ai se peteriaka faauuina ua i ai le agaga o valoaga ma le agaga o faaaliga. Ua faatagaina o ia e tuuina atu ni faamanuiaga patino ma faalilolilo ia i latou ua fautuaina atu e o latou epikopo. Sa ou tusi atu i lo'u epikopo mo se pepa faataga.

O J. Roland Sandstrom o se peteriaka faauuina sa nofo i le Siteki o Santa Ana. Sa ia le iloaina lava se mea e uiga ia te a'u ma e le'i vaai muamua foi ia te a'u, ae na ia tuuina mai ia te a'u lo'u faamanuiaga. Na ou maua ai i totonu ni tali ma ni faatonuga.

E ui o faamanuiaga faapeteriaka e faalilolilo tele, ae o le a ou faaosaina atu se upusii puupuu mai lo'u faamanuiaga: “O le a taialaina oe e ala i

musumusuga a le Agaga Paia ma o le a lapataia oe i mea matautia. Afai e te faalogo i na lapataiga, o le a faamanuiaina oe e lo latou Tama Faalelagi ina ia mafai ona toe faatasia oe ma e pele ia te oe.”<sup>8</sup>

O le upu *afai*, e ui ina laitiiti, ae e telē e pei o se itulau. O le a faamanuiaina au e toe foi mai le taua pe *afai* ou te tausia poloaiga ma pe *afai* ou te faalogo i uunaiga a le Agaga Paia. E ui foi na faaee mai ia te au lena meaalofa i le papatisoga, ae ou te le'i iloaina lava po o ai le Agaga Paia ae pe faapefea foi ona aogā ia uunaiga.

O mea na manaomia ona ou iloaina e uiga i uunaiga sa ou maua i le Tusi a Mamona. Sa ou faitau ai e faapea “e tautatala agelu i le mana o le Agaga Paia; o le mea lea, latou te fetalai mai afioga a Keriso. O le mea lea, . . . ia taumamafa fiafia i afioga a Keriso; aua faauta, o afioga a Keriso, o le a ta'u mai ai ia te outou mea uma e tatau ona outou faia.”<sup>9</sup>

Atonu o le mea e tasi silisili na ou aoaoina mai lenei faitauga o le Tusi a Mamona o le siufofoga o le Agaga e oo mai o se *lagona* nai lo o se leo. O le a e iloaina, e pei ona ou iloaina, ia “faalogo” atu i lena siufofoga lea e *lagonaina* nai lo le *faalogoina*.

Na otegia e Nifae ona uso matutua ma faapea atu, “Ua oulua vaai i se agelu, ma sa fetalai mai o ia ia te oulua; ioe, sa oulua faalogo i lona siufofoga mai lea taimi i lea taimi; ma sa fetalai mai foi o ia ia te oulua i se leo filemu itiiti, peitai ua oulua te'a atu ma le toe *lagonaina*, na oulua le mafafai ai ona *lagona* ana fetalai.”<sup>10</sup>

O nisi faitioga ua faapea mai o nei fuaiupu o loo sese ona e te *faalogo* i upu, e te le *lagonaina* Ae afai e te iloa soo se mea lava e uiga i fesootaiga faaleagaga, e te iloaina o le upu e sili ona faamatalaina ai se mea o tupu, o le upu *lagona*.

O le meaalofo o le Agaga Paia, afai e te faatagaina, o le a taialaina ma puipuia, ma e oo lava i le faasa’oina o au amioga. Sa saunoa le perofeta o Enosa, “Sa toe tulei mai le siufofoga o le Alii i lo’u mafaufau.”<sup>11</sup> Ma na ta’u atu e le Alii ia Oliva Kaotui, “Faauta, o le a Ou ta’u atu ia te oe i lou mafaufau ma lou loto, e ala i le Agaga Paia, lea o le a oo atu i ou luga.”<sup>12</sup>

E le o faamoemoeina e te ola i lenei olaga e aunoa ma le faia o ni mea sese, ae o le a e le faia lava se mea sese matuia e aunoa ma le lapataia muamua o oe e uunaiga a le Agaga Paia. O lenei folafolaga e faata-tau i tagata uma o le Ekalesia.

O nisi o le a faia ni mea sese e matuā matuia lava, o le soliina o tula-fono o le talalelei. O i, o le taimi lea e faamanatu atu ai ia te oe le Togiola, salamo, ma le faamagaloga atoa i le tulaga e mafai ai ona e toe mama. Na fetalai mai le Alii, “Faauta, o ia o le ua salamo i ana agasala, o ia lava lea ua faamagaloina, ma o A’u, o le Alii, e le toe manatuaina lava i latou”<sup>13</sup>

Afai e oo ina ave faapagota outou e le fili ona o a outou agasala, ou te faamanatu atu ia te outou o loo outou umiaina le ki o le a tatala ai le faitotoa o le falepuipui mai totonu. E mafai ona faamamaina outou e ala i le tau-laga togiola a le Faaola o Iesu Keriso.

Atonu tou te manatu i ni taimi o o outou puapuaga ua le aoga ona laveai outou ona ua outou faia ni mea sese, ogaoga pe faatauvaa, ma ua outou manatu ua outou leiloloa nei. E le moni lava lena mea! Ua na o le salamo lava e mafai ona faamalo-loina ai mea ua tiga. Ae e mafai e le salamo ona faamaloloina mea ua tiga, e tusa lava pe o le a.

Afai ua e se’e atu i mea e le tatau ona e oo i ai, pe afai foi ua e fegale-galeai ma tagata ua tosoina ese atu oe i le itu sese, o le taimi tonu lena



e faatino ai lou tutoatasi, lau faitalia. Faalogo i le siufofoga o le Agaga, ma o le a le taitaina sese lava oe.

Ou te toe fai atu e faapea o le autalavou o aso nei ua ola ae i teritori a le fili faatasi ma se faaitiitia o tulaga faatonuina o le ola mama. Ae i le aveai ai ma auauna a le Alii, ou te folafola atu o le a puipuia outou ma leoleoina mai osofaiga a le fili pe afai o le a outou faalogo atu i uunaiga ia e sau mai le Agaga Paia.

Oofu i laei talafeagai; tautala ma le faaaloalo; faalogologo i musika musuia. Aloese mai le ola le mama ma faatinoga leaga patino uma. Ia e puleaina lou olaga ma poloaiina oe lava ia ina ia faamaoni. Talu ai matou te faalagolago tele atu ia te outou, o le a matua faamanuiaina lava outou. E le o tuuaunoaina lava outou e le silafaga a lo outou Tama Faalelagi agaalofa.

#### Leicester, Egelani



O le malosi o la’u molimau ua suia lava talu mai le taimi sa ou faalagolago ai i molimau a o’u faiaoga seminare. O le asō o loo ou faalagolago ai i isi pe a ou savali ona o le matua ma le faama’i pipili a o ou tamaitiiti ae e le mai masalosaloga e tusa ai ma mata-upu faaleagaga. Ua oo ina ou talitonu, malamalama, ma iloa upumoni taua o le talalelei ma le Faaola o Iesu Keriso.

I le aveai ai ma se tasi o Ana molimau faapitoa, ou te molimau atu o le taunuuga o lenei taua lea na amata mai i le muai olaga e le fesiligiaina lava. O le a faia’ina ia Lusifelo.

Sa tatou talanoa muamua i matuu. O outou o tama’i matuu e le manaomia ona outou felelei atu ma toe foi mai e aunoa ma se uiga, ua le mautinoia le ala o i luma. O loo i ai i latou ua silafia le ala “E le faia lava se mea e le Alii o Ieova, a e faaalua lona finagalo i ana auauna o perofeta.”<sup>14</sup> Sa faatula-gaina e le Alii Lana Ekalesia i luga o le mataupu faavae o ki ma aufono.

I le faauluuluga o le Ekalesia o loo i ai ni tamalii se 15 ua lagolagoina o ni perofeta, tagatavaai, ma talifaaaliga. O tamalii taitasi o le Au Peresitene Sili ma le Korama a Aposetolo e Toasefululua ua umiaina ki uma o le perisitua e manaomia mo le taitaiga o le Ekalesia. O le Aposetolo sinia o le Perofeta lea—Peresitene Thomas S. Monson, ma ua na o ia lava ua faatagaina e faaaogaina uma na ki.

E manaomia e tusitusiga paia le galulue o le Au Peresitene Sili ma le Korama a le Toasefululua i aufono ma o faaiuga a na aufono e ao ona autasia. Ma o le mea lena o loo tupu. Ua matou faatuatuaaina le Alii e taialaina le ala, matou te saili atu e faia na o Lona finagalo. Matou te iloa o loo Ia matuai faatuatuaaina lava i matou, taitoatasi ma se vaega atoa.

E ao ona e aoa ia “faatuatua ia Ieova ma lou loto atoa; a e aua le

faalagolago i lou lava atamai.”<sup>15</sup> E tatau ona faatuatua ina oe ma siosiomaiaina oe lava ia i uo e mananao ia pei foi o oe.

O nisi taimi atonu e faaosoosoina oe e pei ona ou oo i ai mai lea taimi i lea taimi i lo’u talavou: Ona o le auala o loo tutupu ai mea, o le a uma le lalolagi. O le a oo mai le iuga o le lalolagi ae ou te le’i ausia mea e tatau ona ausia.” E le sa’o lea mea! E mafai ona e vaai atu i luma i le faia o le mea sa’o—faaipoipo, fai se aiga, ia e vaai i lau fanau ma fanau a lau fanau, atonu foi ma fanau a fanau a fanau.

Afai o le a outou mulimuli i nei mataupu faavae, o le a leoleoina outou ma puipuia ma o le a outou iloaina lava mo outou e ala i unaiga a le Agaga Paia pe o le fea ala e alu ai, aua “o le mana o le Agaga Paia e mafai ai ona outou iloa le moni o mea uma lava.”<sup>16</sup> Ou te folafola atu o le a faataunuaina lava ma talosagaina se faamanuiaga i o outou luga, o matou talavou faapelepele, i le suafa o Iesu Keriso, amene. ■

#### FAAMATALAGA

1. John Ciardi, “Fast and Slow,” *Fast and Slow: Poems for Advanced Children and Beginning Parents* (1975), 1. © 1975 by John L. Ciardi. Ua faaoga ina ua faatagaina mai e Houghton Mifflin Harcourt Publishing Company. Ua taofia aia tatau uma.
2. Faaaliga 12:9; tagai foi i le Mataupu Faavae ma Feagaiga 76:25–26.
3. Mataupu Faavae ma Feagaiga 52:14.
4. Mataupu Faavae ma Feagaiga 45:26.
5. Alema 42:8.
6. “O Le Aiga: O Se Folafolaga i le Lalolagi,” *Liahona*, Nov. 2010, 129.
7. *Aoga a Peresitene o le Ekalesia: Iosefa Samita* [2007], 480.
8. Faamanuiaga faapeteriaka o Boyd K. Packer, na tuuina atu e J. Roland Sandstrom, Jan. 15, 1944.
9. 2 Nifae 32:3.
10. 1 Nifae 17:45; faapoopo o faamamafa.
11. Enosa 1:10.
12. Mataupu Faavae ma Feagaiga 8:2.
13. Mataupu Faavae ma Feagaiga 58:42.
14. Amosa 3:7.
15. Faataoto 3:5.
16. Moronae 10:5.



**Saunia e Peresitene Dieter F. Uchtdorf**

Fesoasoani Lua i le Au Peresitene Sili

## E Tauga Oe ia te Ia

*E faaoga e le Alii se fuafaatatau e matuai ese lava mai le fua a le lalolagi e fuatia ai le taua o se tagata.*

O Mose, o se tasi o perofeta aupito maoae ua lauiloa i le lalolagi, na tausia e le afafine o Farao ma e 40 tausaga o lona soifua sa nofo ai i maota o le aigatupu o Aikupito. Sa masani lelei o ia i le mamalu ma le maoae o lona malo anamua.

I ni tausaga mulimuli ane, i luga o se mauga i se mea mamao, sa mamao ese mai le mamalu ma le matagofie o Aikupito malosi, sa tu ai Mose i luma o le Atua ma talanoa faafesagai e pei ona talanoa o se tagata ma sana uo.<sup>1</sup> I le taimi o lona talanoaga sa faaali mai ai e le Atua ia Mose le taunuuga o galuega a Ona aao, ma faatepa o ia i Lana galuega ma [Lona] mamalu. Ina ua uma le faaaliga, sa pau Mose i le elelee mo ni itula se tele. Mulimuli ane ina ua toe maua lona malosi, sa ia iloaina ai se mea sa le’i tupu mua-mua ia te ia, i tausaga uma sa i ai o ia i le maota o Farao.

Fai mai a ia, “Ua ou iloa ai, o le tagata o se mea noa.”<sup>2</sup>

#### E Faatauvaia i Tatou Nai lo le Mea Tatou te Manatu Ai

O le tele lava o mea tatou te iloa e uiga i le atulaulau, o le tele foi lea o mea tatou te malamalama i ai—ua na o se vaega itiiti—o mea na iloa e Mose. E tele naua le atulaulau, e ese lava, ma mamalu lea e

le malamalama i ai le mafaufau o le tagata. Na fetalai atu le Atua ia Mose,<sup>3</sup> “E le mafaitaulia lalolagi ua Ou foafoaina.” O le ofoofogia o le lagi i le po, o se molimau matagofie lea o lona upumoni.

E i ai ni nai mea ua faatumulia ai au i le maofa faapena, e pei o le lele i le pogisa o le po e sopoia ai vasa ma konetineti ma tilotilo atu i fafo mai le faamalama o le potu o avevaalele e agai atu i le mamalu e le mafaitaulia o le faitau miliona o fetu.

Sa taumafai le au vaai fetu e faitau le aofai o fetu i le atulaulau. Sa taumate e se tasi o vaega o saienisi e faapea o le numera o fetu e iloa atu e a tatou meavaai e faasefulu ona sili atu ai nai lo oneone uma o matafaga ma toafa o le lalolagi.<sup>4</sup>

O lenei faaiuga e i ai se mea mataina e tutusa ai ma le folafolaga a le perofeta anamua o Enoka: “Ana mafai e le tagata ona faitau fasi-meaa o le lalolagi, ioe, le miliona o lalolagi e pei o lenei, e le mafai ona avea ma se amataga o le aofai o au foafoaga.”<sup>5</sup>

O le iloa ai o le le mafaitaulia o foafoaga a le Atua, e leitioa a fautuaina e le Tupu maoae o Peniamina lona nuu ia “manatua pea lava pea, le silisiliese o le Atua, ma lo outou lava noa.”<sup>6</sup>

## **E Sili Atua i Tatou Nai lo le Mea Tatou te Manatu Ai**

Ae e ui lava o le tagata o le mea noa, ae e tumu au i le maofa ma le ofo pe a mafaufau atu “ua tele lava le taua o agaga i le silafaga a le Atua.”<sup>7</sup>

Ma a o tatou vaavaai atu i le telē naua o le atulaulau ma faapea, “O le a le tagata e faatusa atu i le mamalu o le foafoaga?” Na fetalai le Atua lava Ia, o i tatou o le pogai lea sa Ia foafoaina ai le lalolagi! O Lana galuega ma [Lona] mamalu—o le faamoemoega mo lenei lalolagi matagofie—ia laveai ma faaeaina le tagata.<sup>8</sup> I nisi faaupuga, o le telē naua o le faavavau, o mamalu ma mealilo o le atulaulau ma le taimi e le muta, ua fausia uma mo le manuia o tagata soifua masani e pei o oe ma a’u. Sa foafoaina e lo tatou Tama Faalelagi le lalolagi ina ia mafai ona ausia ai o tatou tulaga gafatia i le avea ai o ni Ona atalii ma afafine.

O se faamatalaga feteenai lenei a le tagata: a faatusa atu i le Atua, o le tagata o le mea noa; peitai o i tatou o mea uma ia i le Atua. Pe a faatusa atu i le vaaiga o foafoaga e le mafaitaulia, atonu tatou te foliga mai o se mea noa, o loo i ai sa tatou aloiafi o le afi faavavau o loo mu i totonu o o tatou fatafata. Ua tatou maua le folafolaga tatou te le malamalama i ai o le faaeaga—o lalolagi e leai se iuga—i o tatou lima. Ma o le faanaunauga sili lea o le Atua ia fesoasoani mai ina ia tatou ausiaina.

## **O Le Valea o le Faamaualuga**

Ua iloa lelei e le taufaasese sili, o le tasi o ana aupega sili ona lelei i le taitai seseina o le fanau a le Atua, o le faatosina lea i le mea e gata ai i manatu feteenai o le tagata. I nisi, e faatosina o ia ia latou lilifa atu i le faamaualuga, faafeteteina i latou ma faamalosiaina ia talitonu i mafaufauga faivavale o lo latou lava taua ma

le faigata ona faatoilaloina. Na te ta’u atu ia i latou ua sili atu i latou nai lo le tagata masani, ma ona o tomai, tofi, po o le tulaga faaagafesootai, ua tulaga ese ai i latou mai le vaaiga masani o tagata uma o loo siomia i latou. Na te taitaiina i latou ia faapea ai, ua le toe pule se tasi ia i latou, ma e le toe popole i faafitauli a soo se tagata lava.

Fai mai e ese le fiafia o Aperaaomo Linikone i se solo e faitauina faapea:

*Aisea ea e faamaualuga ai le tagata?  
Pei o se alā e masau mai le vanimomimo,  
se ao lelea,  
O se emo o le uila, se fati o le galu,  
Le mou atu o le tagata ma lenei olaga  
e mapu i le tuugamau.<sup>9</sup>*

Ua malamalama soo o Iesu Keriso e faatusatusa atu i le faavavau, o lo tatou i ai i lenei olaga faitino ua na o se “minute laitiiti” i le avanoa ma le taimi.<sup>10</sup> Latou te iloa o le taua moni o se tagata e itiiti lava sona sao i mea e sili ona faatauaina e le lalolagi. Latou te iloa e mafai ona e faaputua tupe a le lalolagi atoa ae e le mafai ona faatauina mai ai se papa falaoa i le malo o le lagi.

O i latou o e o le a “mautofi i le malo o le Atua”<sup>11</sup> o i latou ia o e avea “e pei o se tamaitiiti, e usiusitai, agamalu, lotmaualalo, onosai, ma tumu i le alofa.”<sup>12</sup> “Aua o se faamaualuga ia te ia, e faamaualaloina lea; a o le faamaualalo ia te ia, e faamaualugaina lea.”<sup>13</sup> E malamalama foi na soo “pe a outou auauna atu i o outou uso a tagata, ua na o lo outou auauna atu lava lea i lo outou Atua.”<sup>14</sup>

## **E Le o Faagaloina i Tatou**

O le isi auala o loo taufaasese mai ai Satani e ala lea i le faalotovaivai. E taumafai o ia e taulai atu la tatou vaai i mea e faalētaua ia i tatou, seia oo ina amata ona tatou le talitonu e tele

so tatou taua. E fai mai o ia ia i tatou, tatou te faatauavaa tele ma e leai se tasi e matauina i tatou, e faapea ua faagaloina i tatou—ae maise lava e le Atua.

Sei ou faasoa atu se aafiaga patino e ono avea ma se fesoasoani ia i latou o e lagona e faalētaua, faagaloina, pe tuua toatasi.

I le tele o tausaga ua mavae, sa ou auai ai i aoaoga faapailate i le Ea Fosi a le Iunaite Setete. Sa ou nofo mamao mai lo’u aiga, o se fitafita talavou mai Siamani i Sisifo, na fanau i Siekisolovakia, o lē sa ola ae i Siamani i Sasae; ma sa matuai faigata la’u tautala i le gagana Peretania. Ou te manatuaina lelei lava lo’u malaga atu i le nofoaga mo aoaoga faamasani i Texas. Sa ou i luga o se vaalele, sa ou saofai i autafa o se pasese e mamafa lona faaleoga pe a tautala, mai le itu i Saute. Sa tau le mafai ona ou malamalama i se upu sa ia tautala ai. O le mea moni sa ou mafaufau pe ua sese le gagana na aoaoina ai au. Sa ou fefe i le manatu e faapea, e tatau ona ou tauva mo tulaga maualuluga iloga i aoaoga faapailate faatasi ma tagata aoga o la latou gagana moni o le Igilisi.

Ina ua ou taunuu atu i le nofoaga autu o le ea fosi i le nuu itiiti o Big Spring, Texas, sa ou suea ma maua ai se paranesi toagaogao o le Au Paia o Aso e Gata Ai, lea sa i ai ni tagata lelei o le au paia, o e sa faatasitasi i ni potu maototogi i le nofoaga o le ea fosi lava ia. Sa i ai le au paia i le faagasologa o le fausiaina o se falelotu laitiiti o le a avea ma se nofoaga tumau mo le Ekalesia. I aso na, o tagata o le au paia sa tele lava ina faia galuega o ni fale fou.

O lea aso ma lea aso, sa ou auai i a’u aoaoga faapailate ma suesue malosi i le mafai na ou mafaia ai, ona faaalu lea o le tele o ou taimi avanoa e galue ai i le falelotu fou. O iina na ou aoaoina ai o le lua-i-le-fa, e le o se



sitepu o se siva ae o se fasilaupapa. Sa ou aoaoina ai foi le tomai faapitoa e faasaoina ai, o le le lavea o lo'u limamatua pe a tutui se fao.

Sa ou faaaluina se taimi tele e galue ai i le falelotu, ma na oo ai ina faailoa mai le popole o le peresitene o le paranesi—o lē foi sa avea ma se tasi o o matou faiaoga avevaalele—atonu e tatau ona ou faaaluina se taimi tele i le faiga o a'u suesuega.

Sa auai foi au uo ma isi tagata aoga faapailate i ni gaoioiga i taimi avanoa, e ui ou te manatu, e saogalemu le faapea atu, o nisi o na gaoioiga ua le ogatasi ma le tamaitusi o loo i ai nei o le *Mo Le Malosi o le Autalavou* O a'u lava ia, sa ou fiafia i le avea ma se vaega malosi o lenei paranesi toalaiti i Texas sisifo, i le faataitaia o o'u tomai fou na maua o le faakamuta, ma le faaleleia atili o la'u Igilisi a o ou faataunuina ou valaauga e faiaoga i le korama a le au toeaina ma le Aoga Sa.

O le taimi lena, o Big Spring, e ui i lona igoa, sa o se nofoaga laitiiti,

faalētaua, ma lē lauiloa. Ma sa masani foi ona ou manatu faapena ia te a'u lava ia—faalētaua, lē lauiloa, ma sina tuua toatasi foi. E ui i lea, sa le'i i ai se taimi na ou faapea ai ua faagaloina au e le Alii, ma pe mata o le a Ia mauaina au iina. Sa ou iloa e le'i afaina i le Tama Faalelagi po o fea sa ou i ai, po o le a lo'u tulaga ma isi i la'u vasega faapailate faataitai, po o le a foi lo'u valaauga sa i ai i le Ekalesia. O le mea sa taua ia te Ia, sa ou faia le mea sili sa ou mafaia, sa lilifa atu lo'u loto ia te Ia, ma sa ou naunau e fesoasoani atu ia i latou sa siomia a'u. Sa ou iloa, afai ou te faia le mea sili ou te mafaia, o le a lelei mea uma.

Ma sa lelei mea uma.<sup>15</sup>

### **O Le Mulimuli O Le A Avea ma Muamua**

E le popole lava le Alii pe tatou te faaaluina o tatou aso e galulue ai i faletele maamora po o fale o manu. Na te silafia le mea o loo tatou i ai, e tusa lava pe o le a le faatauvaa o o tatou tulaga. O le a Ia faaogaina—i Lana lava ala ma mo Ona

faamoemoega paia—i latou o e lilifa atu o latou loto ia te Ia.

O loo silafia e le Atua o nisi o tagata sili ona maoae o e sa soifua, o i latou ia o le a le faaalua lava i nofoaiga o talafaasolopito. O i latou ia o tagata faamanuaina, lotomaulalo o e faataitai i faataitaiga a le Faaola ma faaalu aso o o latou olaga i le faia o mea lelei.<sup>16</sup>

O se tasi o na ulugalii, o ni matua o sa'u uo, na faaali maia lenei mataupu faavae mo a'u. Sa faigaluega le tane i se fale vili uamea i Iuta. A oo i le malologa, na te aumai i fafo ana tusitusiga paia po o se mekasini a le Ekalesia e faitau. Ina ua vaai i ai isi tagata o le au-faigaluega i lenei mea, sa latou tautala ia te ia ma luitauina ona talitonuga. Soo se taimi lava latou te faia ai lena mea, e tautala atu ai o ia ia i latou ma le agalelei ma le mautinoa. Na te lei faatagaina lo latou le faaaloalo e faaoso ai sona ita pe le fiafia ai foi.

O ni tausaga mulimuli ane, sa ma'i tigaina ai se tasi o na tagata sa sili ona tautala atu. A o lei maliu o ia, sa ia talosagaina ina ia faia se tautalaga a lenei tamalii lotomaulalo i lona falelauasiga—lea sa ia faia lava.

O lenei tagata faamaoni o le Ekalesia, sa le tele ni mea sa ia maua i tulaga o le lauiloa po o le tamaoiga, ae o lana uunaiga sa loloto lona oo atu ia i latou uma sa silafia o ia. Sa maliu o ia i se faalavelave i le galuega, a o tu atu e fesoasoani i se isi tagata faigaluega o le sa pa'ulia i le kiona.

E tasi le tausaga ae faia loa se taotoga o le faiai o lona faletua, lea na iu ai ina le mafai ona savali o ia. Ae sa fiafia tagata e o mai e faaalu o latou taimi ma ia aua e faalogo o ia. Na te manatua. E alofa o ia. O le le mafai ona ia tusitusi, na te taulotoina ai numera telefoni a lana fanau ma a latou fanau. Na te manatuaina ma le alofa ia aso fanau ma aso faamanatu o faaiipoipoga.



O i latou e asia o ia e o ese mai ua maua lagona lelei e uiga i le olaga ma e uiga ia i latou lava. Latou te lagonaina lona alofa. Latou te iloa e popole alofa o ia. E le taitai lava faaseā o ia ae faaalu ona aso i le faamanuiaina o olaga o isi. Fai mai se tasi o ana uo, o lenei tamaitai o se tasi lea o nai tagata toalaite na ia iloina, o le na faaalua moni le alofa ma le soifuaga o Iesu Keriso.

O lenei ulugalii atonu o tagata muamua ia e faapea mai, sa faalētaua tele i laua i lenei lalolagi. Ae e faaaoaga e le Alii se fuafaatatau e matuai ese lava mai le fua a le lalolagi e fuatia ai le taua o se tagata. Na te silafia lenei ulugalii faamaoni; e alofa o Ia ia i laua. O a laua faatinoga o se molimau ola lea o lo laua faatuatua malosi ia te Ia.

### E Taua Oe ia te Ia

Uso e ma tuafafine, atonu e sa’o o le tagata o le mea noa lea pe faatusatusa atu i le telē o le lalolagi. E i ai taimi tatou te lagona ai foi le faalētaua, le iloa, tuua toatasi, po o le faagaloina. Ae, ia e manatua i taimi uma, e taua oe ia te Ia! Afai e te masalosalo i lenei mea, ia manatua ia mataupu faavae faalelagi nei e fa:

Muamua, e alofa le Atua i e loto-maulalo ma agamalu, aua “e sili lea i le malo o le lagi.”<sup>17</sup>

Lona lua, ua tuuina mai e le Alii “[ina] ia folafola atu le atoatoaga o [Lana] talalelei e e vaivai ma e

faatauvaa i tuluiga o le lalolagi.”<sup>18</sup> Ua Ia filifilia “[ia] oo mai mea vaivai o le lalolagi ma gau i lalo mea tautaua ma le malosi”<sup>19</sup> ma ia faamāina “ai mea malosi.”<sup>20</sup>

Lona tolu, e le afaina po o fea e te nofo ai, e le afaina po o le a le le taualoa o lou tulaga, po o le a le faatauvaa o lau galuega, po o le a le utiuti o ou tomai, po o le a le tulaga masani o ou foliga vaaia, po o le a foi le foliga laitiiti o lou valaauga i le Ekalesia, e le faapea e le o silafia oe e lou Tama Faalelagi. E alofa o Ia ia te oe. Na te silafia lou loto maulalo ma au faatinoga o le alofa ma le agalelei. O na mea uma, latou te fatuina ai se molimau tumau o lou faamaoni ma lou faatuatua.

Lona fa ma le mea mulimuli, faamolemole ia malamalama o le mea o loo e vaaia ma oo i ai i le taimi nei, e le o le mea lena o le a i ai le faavavau. O le a e le lagonaina le tuua toatasi, faanoanoa, tiga, po o le lotovaivai i le faavavau. Ua ia i tatou le folafolaga faamaoni a le Atua, o le a Ia le faagaloina pe tuulafoai i latou o e lilifa atu o latou loto ia te Ia.<sup>21</sup> Ia faamoemoe ma faatuatua i lenei folafolaga. Aoa e alofa i lou Tama Faalelagi ma avea ma Ona soo i le upu ma le amio.

Ia mautinoa afai e te pipii mau, talitonu ia te Ia, ma tumau faamaoni i le tausiga o poloaiga, e i ai se aso o le a tou iloa ai mo outou lava ia folafolaga

na faaalua mai i le Aposetolo o Paulo: “O mea e lei vaaia e mata, e lei lagona foi e taliga, e lei oo foi i le loto o se tagata, o mea ia ua saunia e le Atua mo i latou o e alofa ia te ia.”<sup>22</sup>

Uso e ma tuafafine, o le Tagata e sili ona malosi i le atulaulau o le Tama lea o lou agaga. Na te silafia oe. E alofa o Ia ia te oe i se alofa atoatoa.

E silasila mai le Atua ia te oe e le gata o se tagata soifua i luga o se paneta itiiti, ma o le e ola mo se taimi itiiti—E silasila mai o Ia ia te oe o Lona atalii/afafine. E silasila mai o Ia ia te oe o le tagata e gafatia ma faamoemoeina e avea ai oe. E finagalo o Ia ia e iloa e taua oe ia te Ia.

Talosia ia tatou talitonu, faatuatua, ma faatulaga o tatou olaga ina ia tatou malamalama i lo tatou taua ma gafatia moni e faavavau. Talosia ia tatou agavaa mo faamanuiaga taua o loo teuina e lo tatou Tama Faalelagi mo i tatou, o la’u tatalo lea i le suafa o Lona Alo, o Iesu Keriso, amene. ■

### FAAMATALAGA

1. Tagai Mose 1:2.
2. Mose 1:10.
3. Mose 1:33.
4. Tagai Andrew Craig, “Astronomers Count the Stars,” BBC News, July 22, 2003, <http://news.bbc.co.uk/2/hi/science/nature/3085885.stm>.
5. Mose 7:30.
6. Mosaea 4:11.
7. Mataupu Faavae ma Feagaiga 18:10.
8. Tagai Mose 1:38–39.
9. William Knox, “Mortality,” i le James Dalton Morrison, ed., *Masterpieces of Religious Verse* (1948), 397.
10. Mataupu Faavae ma Feagaiga 121:7.
11. 3 Nifae 11:38.
12. Mosaea 3:19.
13. Luka 18:14; tagai foi i fuaiupu e 9–13.
14. Mosaea 2:17.
15. Dieter F. Uchtdorf na muamua faauu i lana vasega.
16. Tagai i le Galuega 10:38.
17. Mataio 18:4; tagai foi i fuaiupu 1–3.
18. Mataupu Faavae ma Feagaiga 1:23.
19. Mataupu Faavae ma Feagaiga 1:19.
20. 1 Korinito 1:27.
21. Tagai Eperu 13:5.
22. 1 Korinito 2:9.





**Fofogaina e Peresitene Henry B. Eyring**  
Fesoasoani Muamua i le Au Peresitene Sili

# O Le Lagolagoina o Taitai o le Ekalesia

**E**tuuina atu ina ia tatou lagolagoina Thomas Spencer Monson o se perofeta, tagatavaai, ma talifaaaliga ma Peresitene o Le Ekalesia a Iesu Keriso o le Au Paia o Aso e Gata Ai; Henry Bennion Eyring o le Fesoasoani Muamua i le Au Peresitene Sili; ma Dieter Friedrich Uchtdorf o le Fesoasoani Lua i le Au Peresitene Sili.

O i latou e finagalo ai ia faailoa mai.  
O i latou e faatuiese, pe afai e i ai, ia faailoa mai.

E tuuina atu ina ia tatou talia ma lagolagoina Boyd Kenneth Packer o le Peresitene o le Korama a Aposetolo e Toasefululua, ma uso nei o lena korama: Boyd K. Packer, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, ma Neil L. Andersen.

O i latou e finagalo ai, ia faailoa mai.  
Ai sē faatuiese ai, ia faailoa mai.

E tuuina atu ina ia tatou lagolagoina fesoasoani i le Au Peresitene Sili ma Aposetolo e Toasefululua o ni perofeta, tagatavaai, ma talifaaaliga.

O i latou uma e finagalo ai, ia faailoa mai.

O e au ese ai, pe afai e i ai, ia faailoa mai.

Ua faamalolo mai Elder Claudio R. M. Costa o se tasi o le Au Peresitene o Korama a Fitugafulu.

O i latou e mafai ona auai faatasi ma i matou i se palota o le agaga talisapaia, faamolemole ia faailoa mai.

E tuuina atu ia tatou lagolagoina Elder Tad R. Callister e avea o se tasi o le Au Peresitene o Fitugafulu.

O i latou uma e finagalo ai, ia faailoa mai.

O i latou e faatuiese, pe afai e i ai.

E tuuina atu ina ia tatou faamaloloina mai Elders Gary J. Coleman, Richard G. Hinckley, Yoshihiko Kikuchi, Carl B. Pratt, ma Cecil O. Samuelson i le avea ai ma sui o le Korama Muamua a Fitugafulu ma avea

i latou o ni Pulega Aoa o ua faamalolo faamamaluina.

E tuuina atu foi ina ia tatou faamaloloina mai Elders Won Yong Ko, Lowell M. Snow, ma Paul K. Sybrowsky o ni sui o le Korama Lua a Fitugafulu.

O i latou e finagalo e auai ma i matou i le tuuina atu o le agaga faafetai i nei Uso mo la latou tautua maoae, faamolemole ia faailoa mai.

Ua faamalolo mai Elders Ralph W. Hardy Jr., Jon M. Huntsman Sr., Aleksandr N. Manzhos, and J. Willard Marriott Jr. i le avea ai ma Fitugafulu Eria.

E tuuina atu ina ia tatou avatu le agaga faafetai mo la latou tautua iloga.

O i latou uma e finagalo ai, ia faailoa mai.

E tuuina atu ina ia tatou lagolagoina isi Pulega Aoa o Fitugafulu Eria, ma au peresitene aoao o ausilali o loo i ai nei.

O i latou e finagalo ai, ia faailoa mai.

A i ai se e faatuiese, ia faailoa mai.

Peresitene Monson, ua ou matauina, ua autasi le palota i lenei Maota Autu mo Konafesi.

Faafetai atu, uso e ma tuafafine, mo la outou palota lagolago, lo outou faatuatua, tuuto, ma talosaga. ■





Saunia e Elder David A. Bednar

○ Le Korama a Aposetolo e Toasefululua

# ○ Le a Liliu Atu Loto o Fanau i o Latou Tama

*Ou te valaau atu i tupulaga talavou o le Ekalesia ina ia aoao ma ia iloa le Agaga o Elia.*

**A**o tatou suesue, aoao, ma ola i le talalelei a Iesu Keriso, e tele lava ina fesoasoani le faasologa o mea e tutupu. Manatu mo se faataitaiga, o lesona ua tatou aoaoina e uiga i mea faaleagaga e faamuamua, mai le faasologa o mea autu na tutupu ina ua toefuatai mai le talalelei a le Faola i nei aso e gata ai.

I le Vao Paia, sa vaai ai Iosefa Samita ma talanoa i le Tama e Faava-vau ma Iesu Keriso. Faatasi ai ma isi mea, sa aoao Iosefa e uiga i le natura tonu o le Aigaatua ma faaaliga faifai pea. O lenei faaaliga mamalu na folasia mai ai “le tisipenisione o le atoaga o taimi” (Efeso 1:10) ma o se tasi o mea taua tele i le talafaasolopito o le lalolagi.

Pe tusa ma le tolu tausaga mulimuli ane, i le tali mai i se tatalo naunautai i le afiafi o le aso 21 o Setema, 1823, na faatumulia ai le potumoe o Iosefa i le malamalama seia oo ina “sili atu le malamalama o le potu nai lo le aoauli” (Iosefa Samita—Talafaasolopito 1:30). Sa tu atu se tagata i autafa o lona moega, ma ta’u le taulealea i lona igoa ma ta’u atu “o ia o se avefeau na auina mai mai le Atua . . . ma o lona igoa o Moronae” (fuaiupu 33). Na ia

faatonuina Iosefa e uiga i le oo mai o le Tusi a Mamona. Ona sii mai lea e Moronae o se mau mai le tusi a Malaki i le Feagaiga Tuai, e fai si eseese laitiiti i le gagana o loo faaaogaina i le King James Version:

“Faaauta, o le a ou faaali atu ia te outou le Perisitua, e ala i le lima o Elia le perofeta, ae lei oo mai le aso tele ma le matautia o le Alii.

“. . . Ma o le a ia totoina i loto o fanau folafolaga na faia i tama, ma o le a liliu atu loto o fanau i o latou tama. Afai e le faapea, o le a faaumatia atoa le lalolagi i lona afio mai” (fuaiupu 38, 39).

O faatonuga a Moronae i le perofeta talavou na aofia ai autu taua e lua: (1) o le Tusi a Mamona ma (2) upu a Malaki na muai ta’u mai ai le matafaioi a Elia i le Toefuataiga “o mea uma, ua fetalai mai e le Atua i fofoga o ana perofeta paia uma lava talu mai ana-mua” (Galuega 3:21). O le mea lea, o mea na faatomua mai i le Toefuataiga na faailoa mai ai se malamalama sa’o e uiga i le Aigaatua, sa faamamafa mai ai le taua o le Tusi a Mamona, ma le galuega manaomia o le faaolataga ma le faaeaga mo e o ola ma e ua oti. O lenei faasologa musuia, e malamalama

ai i mataupu faaleagaga e aupito maualuga le faamuamua i le Atua.

O la’u savali e taulai atu i le galuega a le Agaga o Elia na muai ta’u mai e Moronae i ana uluai aoaoga ia Iosefa Samita. Ou te tatalo ma le faamaoni mo le fesoasoani mai a le Agaga Paia.

## ○ Le Misiona a Elia

O Elia o se perofeta o le Feagaiga Tuai lea na faatinoina ai ni vavega maoae. Sa ia faamuamua le lagi ma sa lei ai se timu e pau i Isaraelu anamua mo le 3½ tausaga. Na ia faateleina se meaai ma le suauu a se fafine ua oti lana tane. Sa ia toefaatuina mai se tamaitiiti mai le oti, ma sa ia valaau atu ma aumaia ai le afi mai le lagi i le lu’ina o perofeta a Paala (Tagai 1 Tupu 17–18.) I le faaiuga o le galuega a Elia i le olaga nei, sa “alu ae o ia i se asiosio i le lagi” (2 Tupu 2:11) ma sa faaliliuina o ia.

“Ua tatou aoao mai i faaaliga o aso e gata ai o Elia na umiaina le mana o faamauga o le Perisitua Mekisateko, ma o le toe perofeta lea na i ai a o lei oo atu i le taimi o Iesu Keriso” (Bible Dictionary, “Elijah”). Sa faamatala mai e le Perofeta o Iosefa Samita, “O le agaga, mana, ma le valaauga o Elia o le, ia ia te outou le mana e umia ai le ki o le . . . atoaga o le Perisitua Mekisateko . . . ; ma ia . . . mauaina . . . sauniga uma tau i le malo o le Atua” (*Aoaoga a Peresitene o le Ekalesia: Iosefa Samita* [2007], 311; ua faaopoopo le faamamafa). E tatau ona i ai lenei pule paia o faamauga mo sauniga o le perisitua ina ia aoga ai ma fusifusia i le lagi ma le lalolagi.

Sa faaali atu Elia ma Mose i luga o le Mauga o (tagaiMataio 17:3) ma faaee atu lenei pule i luga o Peteru, Iakopo, ma Ioane. Sa toe faaali atu foi Elia ma Mose ma isi i le aso 3 o Aperila, 1836, i le Malumalu o Katelani



ma faaee atu na lava ki i luga o Iosefa Samita ma Oliva Kaotui.

O loo tusia i tusitusiga paia na tu atu Elia le perofeta i luma o Iosefa ma Oliva ma faapea atu:

“Faauta, ua oo atoa mai le taimi, lea na fetalaia e le fofoga o Malaki—na molimau mai e tatau ona auina mai o ia [Elia], ae lei oo mai le aso tele ma le matautia o le Alii—

“E lilii loto o tama i fanau ma fanau i tama, ne’i taia le lalolagi atoa i se fetuu—

“O lea, ua tuu atu i oulula lima ki o lenei tisipenisione; ma o lenei mea o le a mafai ona outou iloa ai ua lata mai lava le aso tele ma le matautia o le Alii, ua i faitotoa lava” (MF&F 110:14–16).

O le toefuataiga e Elia o le pule mo faamauga i le 1836 sa tatau ai ina ia saunia le lalolagi mo le Afio Mai Faalua o le Faaola ma amatalia ai se

naunau faateleina i le lalolagi atoa i suesuega o talafaasolopito o aiga.

### **O Le Agaga ma le Galuega a Elia**

Na tautino mai e le Perofeta o Iosefa Samita: “O le tiutetauave silisili i lenei lalolagi ua tuuina mai e le Atua i o tatou luga o le sailia lea o o tatou aiga ua malilii. Aua e tatau ona i ai i o tatou lima le mana o faamauga e faamau ai a tatou fanau ma o tatou aiga ua malilii . . . aua o le atoaga o tisipenisione o taimi—o se tisipenisione o le lalolagi mo le faaolataga o le tagata. . . . O lea, na fetalai mai ai le Atua, ‘O le a ou auina atu Elia le perofeta’” (*Aoaoga: Iosefa Samita*, 475).

Na toe faamamalamalama e Iosefa: Po o le pe faapefea ona faataunuaina? E tatau ona auina mai ki, e tatau ona oo mai le agaga o Elia, e tatau ona faatuina le Talalelei, e faapopotoina le Au Paia a le Atua, e fausia

Siona, e o mai foi le Au Paia o ni faaola i luga o le Mauga o Siona [tagai Opetaiia 1:21].

“Ae faapefea ona avea i latou ma faaola i luga o le Mauga o Siona? E ala i le fausiaina o o latou malumalu . . . ma le o atu i ai ma mauaina sauniga uma . . . e avea ma sui o o latou tuua ua malilii . . . , ma o le filifili lena e fusia ai loto o tama i fanau, ma fanau foi i tama, lea e faataunuaina ai le misiona a Elia” (*Aoaoga: Iosefa Samita*, 472–73).

Na aoao mai Elder Russell M. Nelson e faapea o le Agaga o Elia o “se faaaliga mai lea o le Agaga Paia o molimau mai i le natura paia o le aiga” (“A New Harvest Time,” *Ensign*, May 1998, 34). O lenei uunaiga tupito a le Agaga Paia e ta’ina ai tagata ia iloa, faamaumau, ma faatauaina o latou augatuaa ma tagata o aiga—ua mavae ma le taimi nei.

O le Agaga o Elia e aafia ai tagata i totonu ma fafo atu o le Ekalesia. Peitai, i le avea ai ma tagata o le Ekalesia toefuataiina a Keriso, ua ia te i tatou le tiutetauave o le feagaiga e sailia o tatou augatama ma tuuina atu mo i latou ia sauniga faaola o le talalelei. “E le mafai ona atoatoa i latou e aunoa ma i tatou” (Eperu 11:40; tagai foi *Aoaoga: Iosefa Samita*, 475). Ma “e le mafai foi ona tatou atoatoa e aunoa ma o tatou aiga ua malilii” (MF&F 128:15).

O mafuaaga na tatou te faia ai sailiga o talafaasolopito o aiga, fausia malumalu, ma faia sauniga sui mo e ua malilii. O mafuaaga na na auina mai ai Elia e toefuatai mai le mana o faamauga e fusifusia ai i le lalolagi faapea foi ma le lagi. O i tatou o sui o le Alii i le galuega o le faaolataga ma le faaeaga lea o le a puipua ai “le lalolagi atoa [mai le] taia ai i se fetuu” (MF&F 110:15) pe a toe afio mai o Ia. O lo tatou tiute lea ma se faamanuiga sili.



Agaga o Elia. Ou te faamalosiaiu atu ia te outou ia suesue, ia sailia o outou augatama, ma ia sauniuni outou lava e faia papatisoga sui i le maota o le Alii mo o *outou* aiga ua maliliu (tagai MF&F 124:28–36). Ma ou te uunaia outou ia fesoasoani atu i isi tagata ia iloa o latou talafaasolopito o aiga.

A outou tali atu ma le faatuatua i lenei valaaulia, o le a lilii atu o outou loto i tama. O folafolaga na faia ia Aperamo, Isaako, ma Iakopo o le a totoina i o outou loto. O lou faamanuiaga faapeteriaka, faatasi ai ma le tautinoga mai o lou gafa, o le a faafesootaia oe i nei tama ma o le a ‘anoa atili ai ia te oe. O le a faateleina lou alofa ma lou lotofaafetai mo ou augatama. O le a loloto ma mausali lau molimau ma lou liua i le Faaola. Ma ou te folafola atu ia te oe o le a puipuia oe mai le uunaiga faateleina a le tiapolo. A outou auai i le faatinoga ma outou fafia i lenei galuega paia, o le a malupuipuia outou i lo outou talavou ma i o outou olaga.

Matua ma taitai, faamolemole



### O Se Valaaulia i le Tupulaga Faia’e

Ou te valaaulia nei le gauai mai a tamaitai ma alii talavou o le tupulaga faia’e, a o ou faamamafaina atu le taua o le Agaga o Elia i o outou olaga i le taimi nei. O la’u savali ua faamoemoe mo le Ekalesia atoa i se tulaga lautele—ae e faapitoa lava mo outou.

O le toatele o outou atonu e manatu o le galuega o talafaasolopito o aiga e tatau lava ona faatinoina e tagata matutua. Ae ou te iloa e le o faatapulaaina mai se matua i tusitusiga paia po o taiala o loo fofogaina mai e taitai o le Ekalesia faapea ua patino lenei auunaga taua i tagata ua matutua. O outou o atalii ma afafine o le Atua, o fanau o le feagaiga, ma o tufuga o le malo. Tou te le tau faatalitali seia aulia se tausaga tuufaitalia e faataunuu ai lou tiutetauave e fesoasoani ai i le galuega o le faaolataga mo le aiga o tagata.

Ua faaavanoaina e le Alii i o tatou taimi ni punaoa ofoofogia e mafai ai ona outou aoao ai ma fafia i lenei galuega ua faama’alo mai e le

Agaga o Elia. Mo se faataitaiga, o le FamilySearch o se aotelega o faamaumauga, punaoa, ma auunaga, e faigofie ona maua i komepiuta a le tagata lava ia, ma se anoano o masini e uu i le lima, ua mamanuina e fesoasoani i tagata e sue ai ma faamaumau o latou talafaasolopito o aiga. O loo maua foi nei punaoa i nofoaga autu mo talafaasolopito o aiga o loo i ai i le tele o o tatou fale o le Ekalesia i le lalolagi atoa.

E le o se mea na faafuaveta ona oo mai le FamilySearch ma isi mea-faigaluega i se taimi ua matua masani lelei ai tupulaga talavou ma se vaega tele o faamatalaga ma fesootaiga tau tekinolosi. Ua outou iloa auina feau feaveai i telefoni ma komepiuta e faateleai ai ma faalautele le galuega a le Alii—e le na ona fesootai vave ai ma a outou uo. O tomai ma taleni ua molimauina i le toatele o tupulaga talavou i ona po nei, o se tapenapenaga e saofagā ai i le galuega o le faaolataga.

Ou te valaau atu i tupulaga talavou o le Ekalesia ina ia aoao ma ia iloa le

fesoasoani i a outou fanau ma le autalavou e aoao ma ia iloa le Agaga o Elia. Ae faamolemole aua le soona faapolokalamaina leni taumafaiga, pe tuuina atu nisi mau faamatalaga po o ni aoaoga. Valaulia le tupulaga talavou e suesue, e faata'ita'i, ma aoao mo i latou lava (tagai Iosefa Samita—Talafaasolopito 1:20). Soo se talavou lava e mafai ona faia le mea lea ou te fautuaina atu e faaoga ai gaoioiga e aoao ai o loo maua i le [lds.org/familyhistoryyouth](http://lds.org/familyhistoryyouth). O au perezitene o le korama o le Perisitua Arona ma tamaitai talavou e mafai ona avea o se vaega taua e fesoasoani ai i talavou uma e faamasani i nei punaoga faavae. E manaomia lava le faateleina o le avea o talavou ma tagata e aoao, o e galulue ona maua ai lea o le malamalama faaopoopo ma le iloa e ala i le mana o le Agaga Paia—ae le—na o ni tamaiti a'oga e tau faamalosia (tagai 2 Nifae 2:26).

Matua ma taitai, o le a outou maofa i le vave e a outou fanau ma talavou o le Ekalesia ona matua atamamai i nei meafaigaluega. O le mea moni, o le a outou aoaoina ni lesone taua mai nei tupulaga talavou e uiga i le faaogaina lelei o nei punaoga. E tele mea e mafai e le autalavou ona ofoina atu i tagata ua matutua, o e le fiafia pe faamata'u e tekinolosi pe le masani foi i le FamilySearch. O le a outou faitauina foi le tele o o outou faamanuiaga a o tuuto atu e tupulaga talavou le tele o o latou taimi i le galuega o talafaasolopito o aiga ma le auaunaga i malumalu ae laitiiti le taimi mo taaloga faavitio, evaeva ai i le Initoneti, ma le Facebook.

O Troy Jackson, Jaren Hope, ma Andrew Allan e umia le Perisitua Arona ma sa tofia i latou e se epikopo musuia e faiaoga faatasi i se vasega o talafaasolopito o aiga i le latou uarota.

O nei alii talavou o ni sui o le toatele o outou i lo latou naunautaga e aoao ma le mananao e auauna atu.

Na ta'u a Troy, "E masani ona ou sau i le lotu ma na ona nofonofo ai lava iina, ae o lea ua ou iloa nei e manaomia ona ou alu i le fale ma faia se mea. Tatou te mafaia uma lava ona fai le talafaasolopito o aiga."

Na lipotia mai e Jaren e faapea, a o ia aoao atili e uiga i le talafaasolopito o aiga na ia iloa ai "ua le na o ni igoa ae o ni tagata moni. Sa atili ai ona ou sagisagi fiafia e ave igoa i le malumalu."

Fai mai Andrew, "Ua ou sagisagi atu i le talafasolopito o aiga ma se alofa ma se naunautai ou te lei iloa o ia te au. A o ou sauniuni i vaiaso taitasi e aoao atu, e tele taimi e uunaia ai a'u e le Agaga Paia e faatino ma faata'ita'i nisi o metotia na aoaoina i le lesone. O le taimi muamua, o talafaasolopito o aiga o se mea taufaafefe. Ae i le

fesoasoani mai o le Agaga, sa mafai ai ona ou faataunuuna lo'u valaauga ma fesoasoani ai i le toatele o tagata o le matou uarota."

O'u uso e ma tuafafine talavou, o talafaasolopito o aiga ua le na o se polokalama po o se gaoioiga e manaia ua lagolagoina e le Ekalesia; ae, o se vaega taua o le galuega o le faaolataga ma le faaeaga. Ua saunia outou i leni taimi ma ia fausia le malo o le Atua. Ua outou i ai iinei i le lalolagi i le taimi nei e fesoasoani i leni galuega mamalu.

Ou te molimau atu na toe foi mai Elia i le lalolagi ma toefuatai mai le pule paia mo faamauga. Ou te molimau atu o mea e fusifusia i le lalolagi e mafai foi ona fusifusia i le lagi. Ma ou te iloa o talavou o le tupulaga faia'e ua i ai se matafaioi autu mo leni taumafaiga tele. Ou te molimau atu ai i le suafa paia o le Alii o Iesu Keriso, amene. ■



**Saunia e Elder Neil L. Andersen**

○ Le Korama a Aposetolo e Toasefululua

# Tamaiti

*Ou te molimau atu e uiga i le faamanuiaga maoae o fanau ma le fiafia latou te aumaia ia i tatou i lenei olaga ma le faavavau.*

**P**e a tatou vaai atu i mata o se tamaitiiti, ua tatou vaai i se atalii po o se afafine o le Atua o le na tatou tutu faatasi i le muai olaga.

O se faamanuiaga maoae mo se tane ma se ava le fanauina o ni fanau ina ia maua ni tino faaletino o nei fanau agaga a le Atua. Tatou te talitonu i aiga ma e tatou te talitonu foi i le fanau.

Pe a fanau mai se tamaitiiti i se tane ma se ava, ua la faataunuuna se vaega o le fuafuaga a lo tatou Tama Faalelagi i le aumaia o fanau i le lalolagi. Sa fetalai mai le Alii, “O la’u galuega ma lo’u mamalu lenei—ia aumaia le tino ola pea ma le ola faavavau o le tagata.”<sup>1</sup> A o le’i oo mai le tino ola pea, e tataua ona i ai le tino faaletino.

O le aiga ua faauuina e le Atua. O aiga o le ogatotonu lea o le fuafuaga a lo tatou Tama Faalelagi i luga o lenei fogaleele ma le faavavau atoa. Ina ua uma ona tuufaatasia ia Atamu ma Eva i le faaiipoipoga, na faitauina faapea le mau, “Ua faamanuia foi e le Atua ia te i laua, ma ua fetalai atu le Atua ia te i laua, ia fanafanau ia, ma ia uluola, ma ia tumu ai le lalolagi.”<sup>2</sup> I o tatou aso ua tautino mai ai perofeta ma aposetolo e faapea, “O le uluai poloaiga na tuuina e le Atua ia Atamu ma Eva, e faatatau i lo la agavaa mo tulaga faamatua, o se

tane ma se ava. Matou te tautino atu o le poloaiga a le Atua i Lana fanau ia fanafanau ma uluuluola ai le lalolagi, ua faamalositia ma faatumauiina.”<sup>3</sup>

E le o faagaloina pe ua tuu esea lenei poloaiga e Le Ekalesia a Iesu Keriso o le Au Paia o Aso e Gata Ai.<sup>4</sup> Matou te faailoa atu ma le agaga faafetai tele, le faaaliga o le faatuatua maoae o tane ma se ava (aemaise lava o tatou taitoalua) i lo latou naunautai e fanauina se fanau. O le taimi e fanau ai se tamaitiiti ma pe toa fia foi le aofai o le fanau o ni faaiuga faalilolilo lea e faia i le va o se tane ma le ava ma le Alii. O ni faaiuga paia ia—o ni faaiuga e ao ona faia ma se tatalo faamaoni ma galue i ai ma le faatuatua tele.

I tausaga ua mavae atu sa faasoa mai ai e Elder James O. Mason o le Fitugafulu lenei tala ia te au: “O le fanau mai o le ma pepe lona ono sa avea lea ma se aafiaga e le galo. A o ou sioa atu i lenei afafine matagofie ma aulelei i totonu o le potu o pepe i nai minute talu lona fanau mai, sa manino lava lo’u faalogoina o se leo o faapea mai, ‘O le a i ai se isi [pepe], ma o se tama.’ Ma lo’u faavalevarea tele, sa ou faanatinati atu i autafa o le moega o lo’u toalua lea sa matua le lavā lava ma ta’u atu ia te ia le tala manaia. Sa matua sese lava lo’u taimi.”<sup>5</sup> Sa

tulimatai atu le au Mason i lea tausaga ma lea tausaga mo le fanau mai o le la tamaitiiti lona fitu. Na mavae tausaga e tolu, fa, lima, ono, ma le fitu. Na iu lava, ina fanau mai le la pepe lona fitu ina ua mavae le valu tausaga—o se pepe tama.

Sa saunoa mai Peresitene Thomas S. Monson ia Aperila ua tea:

“I se tasi taimi na tele lava ona tutusa tulaga faatonuina o le Ekalesia ma tulaga faatonuina o malo, o lea ua i ai se va tele i lo tatou va, ma o loo faatupulaia pea lena va. . . .

Na faamatala e le Faaola o tagata, o Ia lava sa i ai i le lalolagi ae lē o se tasi o le lalolagi. E mafai foi ona tatou i ai i le lalolagi ae le o ni o le lalolagi pe a tatou teenaina manatu faavae sese ma aoaoga sese ma tumau ma le faamaoni i mea ua poloaia ai i tatou e le Atua.<sup>6</sup>

O le tele o leo i le lalolagi i le taimi nei o loo tuuaitiiti ai le taua o le fanauina o se fanau pe o fautua mai ina ia tolopo pe faaitiiti ia fanau i totonu o se aiga. Talu ai nei na faasino ai au e la’u fanau teine i se uepisaite na tusia e se tina Kerisiano (e le auai i le tatou faatuatua) e toallima le fanau. Sa ia faaaliga ai ni ona manatu: “[O le tuputupu ae] i lenei aganuu, ua matua faigata ai ona maua se vaaiga faale-tusipaia e uiga i le tulaga faatina. . . . O fanau e lei oo ina faatauaaina kolisi. E lei taitai faitaulia i femalagaaiga i le lalolagi, ua mautinoa lea tulaga. E lei oo i le taimi e tataua ai ona o e tafafao i po. E lei oo foi i le taimi e faamanaia ai lou fuaitino i le faletaalo. E lei oo foi i soo se galuega e te mauaina pe faamoemoe e maua.” Ona ia toe faapoopoo mai lea: “O le tulaga faatina e le o se mea e te faia e fai ma mea e te fiafia i ai, ae o se valaauga. E te le faaputupuutuina tamaiti ona e te manatu e aulelei nai lo le amiolelele. E le o se mea e te faia pe a fetau ma mea ua e faatulagaina. O le i ai o se fanau, o le



mea lea na tuu atu ai e le Atua ia te oe le taimi.”<sup>7</sup>

O le i ai o se fanau iti e le faigofie. E faigata i le tele o aso. Sa oso i luga o se pasi se tina talavou ma se fanau e toafitu. Sa fesili le ave pasi: “O lau fanau uma lea tamaitai? Po o se tafaoga?”

“O la’u fanau uma lava ia,” o le tali lea a le tina. “Ma e le o se tafaoga!”<sup>8</sup>

A o faateleina le tuu fesili mai o le lalolagi, “O lau fanau uma lea?” matou te faafetai atu mo le fausiaina i totonu o le Ekalesia o se nofoaga o le saogalemumu mo aiga, lea tatou te faamamalu ai ma fesoasoani i tina o loo i ai fanau.

E le lava ni upu, a se tama amio-tonu, e faailoa atu ai le agaga faafetai ma le alofa o loo ia lagonaina mo le meaalofo e le mafuatiaina a lona toalua o le fanauina ma le tausaiaina o fanau.

Sa i ai se aafiaga o Elder Mason i le taimi faatoa atoa ni nai vaiaso talu ona faaipoipo, lea na fesoasoani i lona faatulagaina muamua o ona tiutetauave faaleaiga. Fai mai a ia:

“Sa ma fetuutuunai ma Marie, ina ia faaumaina la’u aoga faafomai o le a talafeagai le faigaluega pea o Marie. E ui e le o se mea na ma [mananao] e fai, ae o le a faamulimuli le fai o ni tamaiti. [Ae a o ou matamata i se mekasini a

le Ekalesia i le fale o o’u matua] sa ou vaai ai i se tusiga a Elder Spencer W. Kimball, a o avea o ia i lena taimi ma se tasi o le Korama a le Toasefululua, [na faamamafaina ai] tiutetauave e fesootai ma le faaipoipoga. E tusa ai ma manatu o Elder Kimball, o se tasi o tiutetauave paia, o le faateleina ma faatumuina le lalolagi. Sa [latalata] le fale o o’u matua i le Ofisa o le Pulega a le Ekalesia. Sa ou savali faanatinati atu loa i le ofisa, ma e tolusefulu minute talu ona ou faitauina lana tusiga, ae ou saofai faafesagai ma Elder Spencer W. Kimball i luga o le kesi.” (E le faigofie lenei tulaga i le asō.)

“Sa ou faamatala atu i ai sa ou manao e avea ma se fomai. E leai se isi auala ae na o le tolopoina o le faia o se ma fanau. Sa faalogologo ma le onosai Elder Kimball ona tali mai lea o ia i se leo lemu, ‘Uso Mason, mata e finagalo le Alii e te solia se tasi o ana poloaiga taua ina ia avea ai oe ma se fomai? O le fesoasoani mai o le Alli, e mafai ai ona fanau mai se lua fanau ma avea foi [oe] ma se fomai. O fea lou faatuatua?’”

Sa faamatalaina pea e Elder Mason: “E le’i atoa le tausaga mulimuli ane ae fanau le ma pepe muamua. Sa ma galulue malosi ma Marie ma sa toina mai e le Alii pupuni o le lagi.” Sa faamanuiaina le au Mason i nisi tamaiti

se toalua a o lei faauu o ia mai le aoga faafomai i le fa tausaga mulimuli ane.”<sup>9</sup>

I le lalolagi atoa, e le o tulaga lelei le tamaoiga ma e le o mautu ia tulaga tautupe i lenei vaitaimi. Na saunoa mai Peresitene Thomas S. Monson i le konafesi aoao ia Aperila: “Afaio loo e popole e uiga i le tausiga i mea tau tupe o se avā ma se aiga, ou te fia faamautinoa atu ia te oe e leai ma se maasiasi i se ulugalii o loo tau faasoa-soa tatau ma teu se tupe. O le mea masani lava i le taimi o nei luitau o le a oulua tuputupu ae ai faatasi ma le vavalalata a o oulua aoao e ositaulaga ma faia ni faaiuga faigata.”<sup>10</sup>

O le fesili maatiati a Elder Kimball, “O fea lou faatuatua?” tatou te liliu atu ai i tusitusiga paia.

E le o le Faatoaga o Etena lea na fanau ai e Atamu ma Eva le la tama muamua. O le tuua o le faatoaga, “Sa amata ona galueaiina e Atamu [ma Eva] le laueleele. . . . Ma sa iloa e Atamu lana ava, ma sa [fanauina] . . . atalii ma afafine, ma sa amata ona latou fanafanau ma uluola i le lalolagi.”<sup>11</sup>

E le o le la fale i Ierusalem, lea sa i ai auro, siliva, ma mea taua, lea sa faaalai ai e Liae ma Sarai le faatuatua, ma fanau ai le la fanau tama o Iakopo ma Iosefa. Ae o le togavao. Sa talanoa



**Davao, Filipaina**

mai Liae e uiga i lona atalii o Iakopo o “lana ulumatua na fanauina i aso o lou puapuaga i le vao.”<sup>12</sup> Sa fai atu Liae e uiga ia Iosefa, “Sa fanauina oe i le vao o [ma] puapuaga; ioe, o aso o [lo ma] faanoanoa tele na fanauina ai oe e lou tina.”<sup>13</sup>

I le tusi o Esoto sa faaipoipo ai se tane ma se fafine, ma galulue i le faatuatua, ma fanau ai se pepe tama. E le’i i ai se faailo i le faitotoa o i luma e faafeiloai ai lona fanau mai. Sa la nana o ia aua na faatonuina e Farao ia pepe tama uma e fananau mai i tagata Isaraelu ina ia “lafo i le vaitafe.”<sup>14</sup> Tou te iloa le tala atoa: sa faataoto ma le alofa lenei pepe i totonu o se tamai ato laau, ma tuu i totonu o le vaitafe, sa vaavaaia e lona tuafafine, ma maua ai e le afafine o Farao, ma tausi ai e lona lava tina moni. Sa toe faafoi atu le tamaitiiti i le afafine o Farao, lea na ia tausia e fai ma ana tama ma faaigoa ia te ia o Mose.

O se tala e sili ona pele e faatatau i se pepe na fanau mai, e leai se potu teuteuina po o se moega pepe—ae na o se faatanoa e fafaga ai manu na avea ma moega mo le Faaola o le lalolagi.

I “taimi sili [ma] . . . taimi faigata,”<sup>15</sup> e le’i faagaloina e Au Paia faamaoni a le Atua, o loo galulue ma le faatuatua, pe lafoai, pe le’i popole i ai i “polo-aiga a le Atua . . . ina ia faateleina ma faatumuina le lalolagi.”<sup>16</sup> Tatou te agai i luma i le faatuatua—ma iloa ai

o le faaiuga i le aofai o le fanau ma le taimi e fananau ai e faia lea i le va o le tane ma le ava ma le Alii. E le tatau ona tatou faamasino atu le tasi i le isi e uiga i lenei mataupu.

O le fanauina o se fanau o se mataupu maaleale ma e mafai ona matua faatiga lava mo tamaitai amiotonu o e le maua le avanoa e faaipoipo ai ma faia se aiga. Mo outou na tamaitai faamamaluina, e silafia e lo tatou Tama Faalelagi a outou tatalo ma faanau-nauga. E ese lo matou faafetai mo a outou faatosinaga ofoofogia, e aofia ai le aapa atu ma lima alofa i tamaiti o e manaomia lo outou faatuatua ma malosiaga.

O le fanauina o se fanau e mafai foi ona avea ma se mataupu e nutimo-moia ai le lotu mo ulugalii amiotonu o e ua faaipoipo ae iloa ifo e le mafai ona maua sa laua lava fanau na la faamoemoeina ma le naunautai pe mo se tane foi ma le ava o e fuafua ia maua se aiga toatele ae e faamanuiaina i se aiga toalaiti.

Tatou te le o mafai ona faamatalaina i taimi uma ia faigata o lo tatou olaga faaletino. O nisi taimi ua foliga mai ua le talafeagai le olaga—aemaise lava pe afai o lo tatou naunautaiga sili o le faia o le mea tonu lava lea ua poloai mai ai le Alii. I le avea ai ma auauna a le Alii ou te faailoa atu ia te outou o lenei folafolaga e mautinoa: “O tagata faamaoni o le ekalesia o

ē e le faatagaina e o latou tulaga i latou ina ia maua ia faamanuiaga o le faaipoipoga e faavavau ma le tulaga faamatua i lenei olaga, o le a mauaina faamanuiaga folafolaina uma i le faavavau, [pe afai] latou te tausia feagaiga sa latou osia ma le Atua.”<sup>17</sup>

Sa faamatala mai ia te au e Peresitene J. Scott Dorius o le Misiona i Sisifo o Peru Lima le tala lenei. Fai mai a ia:

“Ua 25 tausaga talu ona ma faaipoipo ma Becky ma e le’i fanau lava [pe vaetamaina] se la fanau. Sa ma siitia solo i le tele o taimi. Ma o le faailoa atu o i maua i nei tulaga fou taitasi sa avea ma se tulaga maasiasi ma e o nisi o taimi e tiga. Sa mafau tagata o le uarota pe aisea [na le maua] ai se ma fanau. E le na o i latou sa mafau-fau i ai.

“Ina ua tofia au e avea ma se epikopo, sa [faaalia] le popole o tagata o le uarota i le leai o sou tomai e uiga i tamaiti ma le autalavou. Sa ou faafetai atu ia i latou mo le latou palota lagoon ma talosagaina i latou e faatagaina au e faaitaiti ni ou tomai i le tausia o se tamaitiiti i a latou fanau. Sa latou faatagaina au ma le alofa.

“Sa ma faatalitali, ma maua se vaaiga, ma aoao ai i le onosai. Ina ua mavae le 25 tausaga talu ona ma faaipoipo, na oo mai ai se pepe o le vavega i o maua olaga. Sa ma vaetamaina ia Nicole e lua tausaga ma Nikolai faatoa fanau. Ua faaamua mai ni tagata ese ia i maua i le fanau matagofie a le ma fanau. Sa ma ataata ma faapea atu, ‘O le ma fanau i latou. Sa ma ola i se olaga e agai i tua.’”<sup>18</sup>

Uso e ma tuafafine, e le tatau ona tatou ola faamasinosino le tasi i le isi i lenei tiutetauave paia ma le patino.

“Ona tago lea o [Iesu] i le tama itiiti . . . i ona lima [ma] fetalai atu . . .

“Ai se talia se tama itiiti faapenei i lou nei igoa, ua talia e ia o au: ai se



... talia au, e le o au ua ia talia ...  
a o ia na auina mai au.”<sup>19</sup>

O se faamanuiaga matagofie le taliaina o ni atalii ma ni afafine o le Atua i totonu o o tatou aiga.

Sei o tatou saili ma le lotomauualalo ma le agaga tatalo ina ia malamalama ma talia ia poloaiga a le Atua, ma faalogologo atu ma le migao i le siufoga o Lona Agaga Paia.

O aiga e ogatotonu i le fuafuaga e faavavau a le Atua. Ou te molimau atu e uiga i le faamanuiaga maoae o fanau ma le fiafia latou te aumaia ia i tatou i lenei olaga ma le faavavau, i le suafa o Iesu Keriso, amene. ■

#### FAAMATALAGA

1. Mose 1:39.
2. Kenese 1:28.
3. “O Le Aiga: O Se Folafolaga i le Lalolagi,” *Liahona*, Nov. 2010, 129.
4. E tusa ai ma le American Community Survey (Suesuega o Nuu o Amerika), sa faalauiloa mai e le U.S. Census Bureau, “O loo umia pea e Iuta le maualuga o le faitau aofai o aiga i le malo, le toatele o tamaiti e fanauina, maualalo le aofai o tagata faaleonolua le matutua, le talavou tele o tagata e faaipipo ma le toatele atu o tina e nonofo i le fale” (“Who Are Utahns? Survey Shows We’re Highest, Lowest, Youngest,” *Salt Lake Tribune*, Sept. 22, 2011, A1, A8).
5. O le i-meli na maua mai ia Elder James O. Mason, 25 Iuni, 2011.
6. Thomas S. Monson, “O Le Mana o le Perisitua,” *Liahona*, Me 2011, 66, 67.
7. Rachel Jankovic, “Motherhood Is a Calling (and Where Your Children Rank),” July 14, 2011, [desiringgod.org](http://desiringgod.org).
8. Tagai i le “Jokes and Funny Stories about Children,” [thejokes.co.uk/jokes-about-children.php](http://thejokes.co.uk/jokes-about-children.php).
9. O le i-meli na maua mai ia Elder James O. Mason, 29 Iuni, 2011.
10. Thomas S. Monson, *Liahona*, Me 2011, 67.
11. Mose 5:1–2.
12. 2 Nifae 2:1.
13. 2 Nifae 3:1.
14. Esoto 1:22.
15. Charles Dickens, *A Tale of Two Cities* (Signet Classic, 1997), 13.
16. *Liahona*, Nov. 2010, 129.
17. *Tusitaulima 2: Taitaiina o le Ekalesia* (2010), 1.3.3.
18. I-meli na aumai ia Peresitenet J. Scott Dorius, 28 Aok., 2011.
19. Mareko 9:36–37.



Saunia e Elder Ian S. Ardern

○ Le Fitugafulu

## ○ Se Taimi e Saunia Ai

*E tatau ona tuuto atu o tatou taimi i mea e sili ona taua.*

○ le mataupu lona valu o le *Talai La’u Talalelei* o loo taulai atu i lo tatou gauai atu i le faaogaina tatau o le taimi. O palakalafa amata o loo faamanatu mai ai e Elder M. Russell Ballard e tatau ona tatou faatulagaina ni sini ma aoao i le auala tatou te popoto ai e faaogaina metotia e ausia ai (tagai i le *Talai La’u Talalelei: O Se Taitala mo le Galuega Faafai-feautalalai* [2004], 146). O le popoto e faaogaina metotia e manaomia ai se faataunuuga o a tatou sini, e aofia ai le avea ma se tagata poto i le faafoeina o o tatou taimi.

Ou te faafetai mo le faataitaiga a Peresitene Thomas S. Monson. E ui i le tele o mea o loo ia faataunuaina i le avea ai ma se perofeta a le Atua, ae o loo ia faamautinoa mai, e pei ona faia foi e le Faaola, o loo lava pea le taimi e asiasi ai i e mamai (tagai i le Luka 17:12–14), ina ia siitia ae e faanoanoa, ma avea ma se auuina i tagata uma. Ou te faafetai foi mo faataitaiga a le toatele o nisi o e na tuuina atu o latou taimi e auuina atu ai i o outou uso-a-tagata. Ou te molimau atu e matagofie i le Atua le tuuina atu o o tatou taimi e auuina atu ai i isi ma o le a tatou faalatalata atili atu ai ia te Ia. E faamaoni foi le Faaola i Lana fetalaiga “o le e faamaoni ma atamai i le olaga nei e faitau ua agavaa e mautofi i maota ua saunia mo ia e lo’u Tama” (MF&F 72:4).

Ua faasoaso mai ia i tatou uma lava i soo se aso, e aunoa ma se tau, le tutusa o aofaiga o minute ma itula e faaogaina, ma e le pine ae o tatou iloa, e pei ona aoao mai ma le faaeteete e se viiga masani, “e vave lava taimi; e le toe foi mai” (“Faaaoga Taimi Uma,” *Viiga*, nu. 139). E tatau ona tatou faaogaina ma le tatau o tatou taimi. Na saunoa mai Peresitene Polika Iaga, “O loo tatou nofo aitalafu uma i le Atua mo le malosi e faaogaina ai le taimi e faamanuiaina ai ma o le a ia moomia mai ia i tatou uma taitoatasi se faamatalaga auiliili o loo tatou faaogaina o [lona] malosi” (*Aoaoga a Peresitene o le Ekalesia: Polika* [1997], 291).

Faatasi ai ma se poloaiga ua i o tatou luga, ua tatau ona tatou aoao e faatulaga a tatou filifiliga ina ia fetawai ma a tatou sini, a le o lea o le a lamatia i matagi o le fai meatuu ma feleleai solo mai lea gaoioiga faamaumau taimi i le isi. Ua uma ona aoaoina i tatou e le Faaoga Sili e uiga i le faatulagaina o mea e faamuamua ina ua Ia fetalai mai i Lana Lauga i luga o le Mauga, “Aua tou te saili mea o le lalolagi ae ia muai saili e fausia le malo o le Atua, ma faatuina Lana amiotonu” (Mataio 6:33, footnote a; from Joseph Smith Translation, Matthew 6:38). (Tagai foi Dallin H. Oaks, “Taulaiga ma Faamuamua,” *Liahona*, Iulai 2001, 99–102.)

Na talanoa mai Alema e uiga i mea e ao ona faamuamua ina ua ia aoao mai “o lea ua avea ai le olaga lenei ma tulaga nofovaavaaia; o se taimi e saunia ai e fetaiai ma le Atua” (Alema 12:24). O le auala sili e faaoga ai le meaalofo taua o le taimi e saunia ai e fetaiai ma le Atua, e ono manaomia ai ni taiala, peitai e moni o le a tatou tuuina i le pito i luga o le lisi le Alii ma o tatou aiga. Na toe faamanatu mai ia i tatou e Peresitene Uchtdorf “i sootaga faaleaiga o le sipelaga moni o le alofa o le t-a-i-m-i” (“E Uiga i Mea e Sili ona Taua,” *Liahona*, Nov. 2010, 22). Ou te molimau atu afai e saili ma le agaga tatalo ma le faamaoni se fesoasoani, o le a fesoasoani mai lo tatou Tama Faalelagi ina ia tuuina atu le faamamafa i mea e manaomia ai lo tatou taimi.

O le le lelei o le faaogaina o le taimi e tausoga lelei lava ma le paie. A tatou mulimuli i le poloaiga ina ia “tuu le faapaie” (MF&F 88:124), e tatau foi ona tatou faamautinoa o loo fesootai lelei le pisi ma le sogasoga. Mo se faataitaiga, e ese le manaia o le i ai o fesootaiga vavave i o tatou tamatamailima, ae sei o tatou faamautinoa tatou te le o faasoloatoa i le faaogaina o na fesootaiga vavave. Ou te lagona o nisi ua lamatia i se mausa fou faaalu taimi—lea e faapologaina i tatou ina ia vave ona siaki ma auina atu ni savali faagafesootai ma ua faafoliga mai ai o loo pisi ma o loo aoga.

E tele faamanuiaga ona ua faigofie ona maua ia fesootaiga ma faamatalaga. Ua ou iloa foi le aoga o le mauaina o tusiga o sailiiliga, lauga o konafesi, faamauga o tuua, ma le mauaina o i-meli, faamanatu mai o le Facebook, tweets, ma feau feaveai. Po o le a lava le lelei o nei mea, ae e le mafai ai lava ona tatou faatagaina e suia ai isi mea e sili ona taua. Oka se



faanoanoa pe afai o le a suia e le telefoni ma le komepiuta le tulaga faigofie o le tatalo faamaoni i se Tama o i le Lagi alofa. Ia vave ona tatou tootutuli e pei foi o le vave o a tatou feau feaveai.

O taaloga faaeletonika ma mafutaga i luga o le initoneti e le mafai ona suia ai mafutaga faaleuo moni lea e mafai ona tuuina mai ai se opo faamaalosiau, ma tatalo mo i tatou ma saili mea tatou te fiafia i ai. Ou te faafetai ua ou vaai i sui o le korama, vasega ma le Aualofo ua tuufaatasi i le lagoonosua o le tasi i le isi. O ia tulaga ua ou malamalama atili ai i le faaupuga a le Aposetolo a Paulo o faapea mai, “E le toe tagata ese outou, po o e ua aumau, a ua nuu faatasi ma le au paia” (Efeso 2:19).


Ou te iloa e oo mai lo tatou fiafiaga sili pe a tatou tulimatai atu i le Alii (tagai Alema 37:37) ma mea ia e aumaia ia i tatou se taui umi nai lo le faaaluina ma le le manatu i ai o le tele o itula i fesootaiga faagafesootai, ma isi taaloga le aoga i le initoneti. Ou te fautuaina outou taitasi ina ia ave na mea o loo gaoia o tatou taimi taua ma taumafai ina ia avea ma o latou matai, nai lo le faatagaina e ala i lo latou natura faalemausa e avea ma o tatou matai.

Ina ia maua le manuia lea na fetalai mai ai le Faola (tagai i le Ioane 14:27), e tatau ona tuuto atu o tatou

taimi i mea e sili ona taua, ma mea uma lava mai le Atua ua sili ona taua. A o tatou fesootai atu ma le Atua i le tatalo faamaoni, faitau ma suesue i aso taitasi mai tusitusiga paia, mafaufau i mea na tatou faitauina ma lagonaina, ma o le a tatou latalata atili atu ai ia te Ia. Na folafola mai e le Atua ina ia tatou saili ma le filiga i tusi sili ma “o le a [Ia] tuu atu ia te [outou] le poto e ala i lona Agaga Paia” (MF&F 121:26; tagai foi MF&F 109:14–15).

O le a faaosoosoina i tatou e Satani e faaoga sese o tatou taimi e ala i mea taufaa’ole’ole faatosina. E ui o le a oo mai faaosoosoga ae na aoao mai, Elder Quentin L. Cook o “[tagata o le] Au Paia o e tali atu i le savali a le Faaola, o le a le taitaieseina i latou e gaoioiga faalavelave ma le faataumaoui” (“O Oe o se [Tagata o le] Au Paia?” *Liahona*, Nov. 2003, 96). O Hiram Page, o se tasi o molimau e toavalu o le Tusi a Mamona na ia aoaoina i tatou i se lesona taua e uiga

### Salvador, Pasila



i mea faalavafau. Sa ia te ia se maa faapitoa ma sa faamaumau ai ni faaaliga na ia manatu o ni faaaliga mo le Ekalesia (tagai MF&F 28). Ina ua uma ona faasa'oina, fai mai le tala na ave le maa ma faamalūina ina ia aua nei toe avea ma mea faalavafau.<sup>1</sup> Ou te valaaulia i tatou ina ia matau ni faalavafau o faamaumau taimi i o tatou olaga ma ia matua faamalūina. O le a manaomia le faia ma le poto o a tatou faaiuga e faamautinoa ai le paleni lelei o le faaaogaina o le taimi ma ia aofia ai le Alii, aiga, galuega, ma gaioiga lelei ma le aoga. E pei ona silafia e le toatele, o le a faateleina le fiafia i le olaga pe a faaaogaina o tatou taimi e saili ai i na mea e “mama, matagofie, logoleleia pe tauleleia” (Mataupu Faavae o le Faatuatua 1:13).

E televave le aluga o le taimi. O le aso o se aso lelei, ao agaigai pea i luma o tatou olaga i le faaletino, e toe iloilo ai mea o loo tatou faia e saunia ai e fetai ai ma le Atua. Ou te molimau atu e maoae ni tau mo i latou o e faaaogaina le taimi i le olaga faaletino e saunia ai mo le tino ola pea ma le ola e faavavau. I le suafa o Iesu Keriso, amene. ■

#### FAAALIGA

1. Tagai i minute aoao o le Provo Utah Central Stake, Ape 6, 1856, vol. 10 (1855–60), Church History Library, Salt Lake City, 273 (ua faaonapo nei le sipelaga, faailoga, ma mataitusi tetele): Fai mai Father [Emer] Harris na ta'ua e le Aposetolo e tatau ona tatou tau e faasaga i pulega ma malosiaga i nofoaga maualuluga. Na eli mai e Bro. Hiram Page mai le elele se maa uliuli [ma] tuu i totonu o lana taga. Ina ua taunuu o ia i le fale, sa ia tilotilo i ai. Sa i ai se fuaiupu na tusia i se pepa e faatatau i ai. O le taimi lava na ia tusia ai se fuaiupu se tasi, sa toe oo mai se isi fuaiupu i luga o le maa, seia i'u ina ia tusia lautusi e 16. Sa ta'u atu ia Uso Iosefa le mea moni na tupu. Sa fesili se tasi tagata ia Iosefa pe sa'o. Sa ia fai mai na te le iloa, ae sa ia tatalo ma maua mai se faaaliga o le maa a le tiapolo. Ona nutipalaina ai lea o le maa ma sa susunuina tusiga sa i ai. O se galuega a le mana o le pouliuli. Amene.”



Saunia e Elder Carl B. Cook  
O Le Fitugafulu

## E Sili Atu Lava le Tepa Ae i Luga

*Afai tatou te faapei o Peresitene Monson, faaaoga lo tatou faatuatua ma tepa a'e i le Atua mo se fesoasoani, o le a le lofituina i tatou i avega o le olaga.*

I le faaiuga o se aso na patino lava le vaivai e agai atu i le faaiuga o lo'u vaiaso muamua o se Pulega Aoao, sa matuai faatumulia la'u atopa'u ma faatumulia foi lo'u mafaufau i le fesili “E mafai faapefea ona ou faia lenei mea?” Sa ou i ai i le ofisa o le Au Fitugafulu ma ulufale atu i le lifi o le Maota o le Pulega o le Ekalesia. A o agai atu i lalo le lifi, sa punou lo'u ulu ma ou sioa ma le aganoa i le fola.

Sa matala le faitotoa ma ulufale mai se tagata, ae ou te le'i tepa ae i luga. Ina ua tapuni le faitotoa, sa ou faalogo ua fesili mai se tasi, “O le a le mea ua e pulato'a ai i lalo?” Na ou iloina le siufofoga—o Peresitene Monson.

Sa vave ona ou tepa ae i luga ma tali atu, “Oi, e leai se mea.” (Ou te mautinoa o lona tali atamai na musuia ai le talitonuga i o'u tomai!)

Ae sa ia vaai mai i ou foliga toilalo ma la'u atopa'u mamafa. Sa ia ata ma fautua mai ma le agaalofa, a o tusi [lona aao] i le lagi, “E sili atu lava le tepa ae i luga!” A o ma malaga atu i lalo i le isi fogafale, sa ia faamatala mai ma le fiafia o ia lea e agai atu i le malumalu. Ina ua ia faatofa mai ma savali ese atu sa foliga mai i lana vaai

e pei o ia toe faapea mai, “Ia, manatua, e sili atu lava le tepa ae i luga.”

A o ma faamavae, na oo mai i lo'u mafaufau ni upu o se mau: “Ia talitonu i le Atua; ia talitonu o loo soifua o ia . . . ; ia talitonu ua ia te ia le poto uma, ma le mana uma i le lagi ma le lalolagi.”<sup>1</sup> A o ou mafaufau i le mana o le Tama Faalelagi ma Iesu Keriso, na maua e lo'u loto le mafanafana sa ou sailia ma le faatauvaa mai le fola o lona lifi na alu ifo i lalo.

Talu mai lona taimi ua ou mafaufau loloto ai lava i lenei aafiaga ma le matafaioi a perofeta. Sa ou mafatia ma sa punou lo'u ulu. Sa ia toe faatonutonuina le mea ou te taulai i aiia tape a'e i le Atua, lea e mafai ai ona faamaloloina ma faamalosisia a'u e ala i le Togiola a Keriso. O le mea lona a perofeta e fai mo tatou. Latou te taitaia i tatou i le Atua.<sup>2</sup>

Ou te molimau atu e le gata ina avea Peresitene Monson o se perofeta, tagatavaai, ma talifaaaliga; ae o ia foi o se faataitaiga maoae o le ola ai i mataupu faavae o le tepa ae i luga. Mai tagata uma lava, e mafai ona ia lagonaina le mamafatu o ona tiutetauave. Ae, o loo ia faatinoina se

faatuatua maoae ma ua faatumulia i le faamoemoe, potō, ma le alofa mo isi. O ona uiga faaalua o se tasi o le “e mafai ona fai” ma le “o le a fai.” Na te faatuatuaina le Alii ma faalagolago ia te Ia mo le malosī, ma o loo faamanu-iaina o ia e le Alii.

O aafiaga ua aoaoina ai a’u afai tatou te faaaogaina lo tatou faatuatua ma vaai i le Atua mo se fesoasoani, e pei o Peresitene Monson, o le a le lofituina i tatou i avega o le olaga. O le a tatou le lagonaina le le mafai ona faia le mea ua valaauina i tatou e fai pe ua manaomia foi ona fai. O le a faamalosia i tatou, ma o le a faatumuina o tatou olaga i le filemu ma le olioli.<sup>3</sup> O le a oo ina tatou iloa o le tele o mea o loo tatou popole ai e le o ni mea e i ai se taua e faavavau—ma afai o i ai, o le a fesoasoani mai le Alii ia i tatou. Ae e tatau ona i ai ia i tatou le faatuatua e tepa ae ai i luga ma le lototele e mulimuli i Lana taitaiga.

Aisea e avea ai le tepa ae pea i luga ma se luitau i o tatou olaga? Atonu tatou te le o maua le faatuatua i lea faatinoga faigofie e mafai ai ona foia o tatou faafitauli. Mo se faaitaitaiga, ina ua ū e gata ūogo le fanauga a Isaraelu, na poloaiina ia Mose ina ia siitia i luga se gata apamemea i luga o se pou. O le gata apamemea sa suitulaga ia Keriso, o i latou sa tepa ae i luga i le gata, e pei ona poloaiina ai e le perofeta, sa faamaloloina.<sup>4</sup> Ae e toatele isi na le mafai ona tepa ae i luga, ma na fano i latou.<sup>5</sup>

Na ioe Alema o le mafuaaga na le tetepa ai Isaraelu i le gata ona latou te le’i talitonu o le faia o lea mea o le a faamaloloina ai i latou. E talafeauga foi upu a Alema ia i tatou i aso nei:

“E, ou uso e, afai e mafai ona faamaloloina outou i le nao le tepa atu o o outou mata ina ia mafai ona faamaloloina outou, pe tou te le fia tetepa vave atu ea, pe sili atu ia te outou le



faamaaa o o outou loto i le le talitonu, ma . . . ?

“Afai o lea, o le a oo mai le malaia i o outou luga; ae afai e le o lea, ona tetepa ae lea o o outou mata ma amata ona talitonu i le Alo o le Atua, o le a afio mai o ia e togiola ona tagata, ma o le a mafatia ma maliu o ia e togiola mo a [tatou] agasala; ma o le a toetu mai o ia mai le oti.”<sup>6</sup>

O le uunaiga a Peresitene Monson ia tepa ae i luga o se faatusa lea mo le manatuaina o Keriso. A o tatou manatuaina o Ia ma faalagolago i Lona mana, tatou te mauaina le malosī e ala i Lana Togiola. O le auala lea tatou te mafai ai ona faamatuu ese atu o tatou popolega, a tatou avega, ma o tatou puapuaga. O le auala lea e mafai ona faamagaloina ai i tatou ma faamaloloina mai le tiga o a tatou agasala. O le auala lea e mafai ai ona tatou mauaina le faatuatua ma le malosī e onosaia ai mea uma.<sup>7</sup>

Talu ai nei lava, sa ma auai atu ai ma Sister Cook i se konafesi a tamaitai i Aferika i Saute. Ina ua maea ona matou faalogologo atu i nisi o savali musuia i le faaaogaina o le Togiola i o matou olaga, sa valaaulia tagata uma e le peresitene o le Aualofa o le Siteki e o atu i fafo. Sa tofi i matou ma se paluni ua feulaina i le kasa (helium). Sa ia faamalalamama mai o le a suitulaga a matou paluni i soo se avega lava, tofotofoga, po o mea faigata sa taofiofia ai o matou olaga. Sa faitau upu e tolu, sa faamamulu ese atu a matou paluni, po o a matou “avega.” A o matou tepa ae i luga ma vaavaai

atu i a matou avega o lelea ese atu, sa lagona ni leo manino “Ahhhh.” O lena faatinoga faigofie o le faamamulu atu o a matou paluni na maua ai se faamanatuga ofoofogia o le olioli e le mafaamatalaina lea e oo mai i le tepa ae i luga ma mafaufau ia Keriso.

E le pei la o le faamamulu atu o se paluni, o le tepa ae i luga faaleagaga e le o se aafiaga mo na o se taimi se tasi. Ua tatou aoao mai le tatalo o le faamanatuga e ao ona tatou manatua pea o Ia ma tausī Ana poloaiiga, ina ia tatou maua Lona Agaga e faatasi ma i tatou i aso uma e taialina i tatou.<sup>8</sup>

A o feseseai le fanauga a Isaraelu i le togavao, na taialina e le Alii la latou faigamalaga i aso taitasi a o latou tepa ae ia te Ia mo le taitaiga. I le Esoto tatou te faitau ai, “Ua afio Ieova i o latou luma i le ao faaniutu i le ao, e taitaiina ai i latou i le ala, a o le afi faaniutu i le po e faamalalamama a’i i latou.”<sup>9</sup> Sa tumau Lana taitaiga, ma ou te tuuina atu la’u molimau faatauvaa e mafai foi e le Alii ona faia lea lava mea e tasi mo i tatou.

E faapefea la ona Ia taitaia i tatou i le asō? E ala i perofeta, aposetolo, ma taitai perisitua ma e ala i lagona ia e oo mai ia i tatou pe a maea ona tatou sasaa atu o tatou loto ma agaga i le Tama Faalelagi i le tatalo. Na te taitaia i tatou pe a tatou lafoaia mea a le lalolagi, salamo, ma sui. Na te taitaia i tatou pe a tatou tausī Ana poloaiiga ma taumafai ia avea atili e faapei o Ia. Ma e Na te taitaia i tatou e ala i le Agaga Paia.<sup>10</sup>

Ina ia mafai ona taitaia i le malaga

o le olaga ma maua le mafutaga faifai pea a le Agaga Paia, e tatau ona tatou maua se “taliga e faalogo” ma se “mata e vaai,” ma ia taulai uma atu mea ia e lua i lugā.<sup>11</sup> E tatau ona tatou galulue e tusa ma le taitaiga tatou te maua. E tatau ona tatou tepa ae i luga ma siitia o tatou tulaga. Ma a o tatou faia na mea, ou te iloa o le a faafiafiaina i tatou, aua e finagalo le Atua ia tatou fiafia.

O i tatou o fanau a le Tama Faa-lelagi. E finagalo e avea o Ia ma se vaega o o tatou olaga, ina ia tatou manuia ai, ma fesoasoani ai ia i tatou. O le a Ia faamaloloina o tatou manua, solo o tatou loimata, ma fesoasoani ia i tatou i le gasologa o o tatou ala e toe foi atu ai i Lona afioaga. A o tatou tepa ae ia te Ia, o le a Ia taitai i tatou.

*O Iesu lo’u sulu; pe fefe i se a?  
O ao ma po uma e lata mai o Ia. . . .  
[O Ia] lo’u fiafia ma viiga.  
Na te taitai au i le ao atoa ma le po.*<sup>12</sup>

Ou te molimau atu e faamagaloina a tatou agasala ma faamāmāina a tatou avega pe a tatou tepa ae ia Keriso. “Ia tatou manatua o ia, . . . ma aua le faatautau i lalo o tatou ulu,”<sup>13</sup> e pei ona saunoa mai Peresitene Monson, “e sili atu lava le tepa ae i luga.”

Ou te molimau atu o Iesu o lo tatou Faaola ma le Togiola i le suafa o Iesu Keriso, amene. ■

#### FAAMATALAGA

1. Mosaea 4:9.
2. Tagai 2 Nifae 2:23, 26.
3. Tagai i le Mosaea 24:15.
4. Tagai i le Numera 21:8–9.
5. Tagai 1 Nifae 17:41.
6. Alema 33:21–22; tagai foi fuaiupu 19–20.
7. TagaiAlema 36:3, 17–21; 3 Nifae 9:13.
8. Tagai Mataupu Faavae ma Feagaiga 20:77.
9. Esoto 13:21.
10. Tagai 2 Nifae 9:52; 31:13; Mataupu Faavae ma Feagaiga 121:46.
11. Faataoto 20:12.
12. “O Iesu Lo’u Sulu,” *Viiga*, nu. 89.
13. 2 Nifae 10:20.



Saunia e Elder LeGrand R. Curtis Jr.

○ Le Fitugafulu

## Togiola

*E ala atu ia Keriso, e mafai ai e tagata ona suia o latou olaga ma maua le faaolataga.*

O loo i ai ni suafa eseese sa faa-aoga e faasino i le Alii o Iesu Keriso. O nei suafa tatou te maua ai se vaaiga manino i itu eseese o le misiona togiola a le Alii. Mo se faataitaiga, silasila i le suafa “Faaola.” E tofu tatou ma se lagona o le uiga o le faaolaina, aua na i ai ni taimi na faaolaina ai i tatou taitoatasi mai se mea. A o ma laititi, sa ma taaalo ai ma lo’u tuafafine i se vaitafe i se vaa laititi, ma na ma o ese faavalevalea mai le vaega saogalemu e taaalo ai ma iu ai ina ma tafefea atu i le tafe i faigata e le mailoa i lalo atu o le vai. O le tali mai i le ma feei, na momo’e mai ai lo ma tamā e laveai ma faasaoina i maua mai le matautia o le vaitafe. Pe a ou mafaufau i le faaolaina, ou te mafaufau lava i lena aafiaga.

O le upu “Togiola” o loo aumai ai ni vaaiga manino talitutusa. O le “faaola” o le faatau mai po o le toe faatau mai. I le avea ai ma se mataupu faaletulafono, e faaola mai se fanua i le totogiina atoa o mokesi po o isi nonogatupe e aofia ai. I taimi o le Feagaiga Tuai, na aumai ai e le tulafono a Mose ni auala eseese e mafai ai ona faasaolotoina, pe faaolaina, ia auauna ma fanua, e ala i le totogiina o ni tupe (tagai i le Levitiko 25:29–32, 48–55).

O se faaogaina iloga faaletusi-paia o le upu *faaola* e faatatau i le

aveeseina mai o le fanauga a Isaraelu mai lo latou nofopoloaga i Aikupito. Ina ua mavae lena laveaiga, sa ta’u atu e Mose ia i latou: “Ona ua alofa lava Ieova ia te outou, . . . ua aumai ai outou e [Ia] i le aao malosi, na ia faaolaina foi oe ai le mea sa nofo pologa ai, ai le lima o Farao le tupu o Aikupito” (Teuteronomie 7:8).

O le mataupu o le faaolaina e Ieova o tagata Isaraelu mai le nofopologa, o loo ta’ua faafia i tusitusiga paia. E masani lava, e faia lea mea ina ia faamanatu atu ai i tagata le agalelei o le Alii i le laveaiina o le fanauga a Isaraelu mai tagata Aikupito. Ae e faia foi e aoao ai i latou o le a i ai se isi, togiola e sili atu ona taua mo Isaraelu. Na aoao mai Liae: “Ma e afio mai le Mesia i le atoatoaga o taimi, ina ia mafai ona ia togiolaina le fanauga a tagata mai le pau” (2 Nifae 2:26).

Na tusia e le Fai Salamo: “Ae peitai e faaola e le Atua lo’u agaga ai le pule a le tuugamau” (Salamo 49:15).

Na folafola mai e le Alii e ala ia Isaia: “Ua ou soloia au solitulafono e pei o se ao uliuli, ma au agasala e pei o se ao: foi mai ia ia te au; aua ua ou faatauina oe” (Isaia 44:22).

Ioe, o le togiola o loo faatatau i ai nei mau e tolu, o le Togiola a Iesu Keriso. O le “faaolataga tele” leneni na tuuina mai e lo tatou Atua alofa



(Salamo 130:7). E le pei o le togiola i lalo o le tulafono a Mose po o aiaiga faaletulafono i ona po nei, o lenei togiola e le oo mai e ala i “mea e pala, o le ario ma le auro” (1 Peteru 1:18). “O [Keriso] foi ua tatou maua ai le togiola i lona toto, o le faamagaloina o agasala, e tusa ma le oloa faulai o lona alofa tunoa” (Efeso 1:7). Na aoao mai Peresitene Ioane Teila e faapea, ona o le taulaga a le Faaola, “ua totogiina ai le aitalafu, ua faia le togiola, ua faataunuina le feagagia, faamalieina le faamasinoga tonu, ma faia le finagalo o le Atua, ma o le mana uma ua . . . tuuina atu i aao o le Alo o le Atua” (*Aoaoga a Peresitene o le Ekalesia: Ioane Teila* [2001], 44).

O taunuuga o lenei togiola e aofia ai le faatoilaloina o le oti faaletino mo fanau uma a le Atua. O lona uiga, ua faatoilaloina le oti faaletino ma o le a toetutu tagata uma. O le isi itu o lenei togiolaina e Keriso, o le manumalo lea i le oti faaleagaga. E ala mai i Ona puapuaga ma [Lona] maliu, ua totogi ai e Keriso ia agasala a tagata uma ae faalagolago lea i le salamo o le tagata lava ia.

O lea la, afai tatou te salamo, e mafai ona faamagaloina a tatou agasala, aua ua uma ona totogi le tau e lo tatou Faaola. O se tala fiafia

lenei mo i tatou uma, “aua ua agasala tagata uma lava, ma ua le oo i le viiga mai le Atua” (Romans 3:23). O i latou o e ua matuai se ese mai ala o le amiotonu e matuai manaomia lava lenei togiola, ma afai latou te salamo atoatoa, o la latou lea mo le mauaina. Peitai o i latou o e sa galulue malosi e ola i ni olaga lelei latou te matuai manaomia foi lenei togiola, aua e leai se tasi e mafai ona oo atu i le afioaga o le Tama e aunoa ma le fesoasoani a Keriso. O lea la, o lenei togiola alofa ua mafai ai ona faamalieina tulafono o le faamasinoga tonu ma le alofa tunoa i olaga o i latou uma o e salamo ma mulimuli ia Keriso.

*Maeu, mamalu ma atoa,  
Le ata o le olataga,  
Faamasino tonu ma alofa,  
Ua tasi i Le paia!  
 (“Ma’eu le Poto ma le Alofa,”  
Viiga, nu. 109.)*

Na aoao mai Peresitene Boyd K. Packer: “O loo i ai se Togiola, se Fautua, o lē o loo tu ma le lotomalie ma le gafatia e faamalie manaoga o le faamasinoga tonu ma tuuina atu le alofa tunoa ia i latou o e e salamo” (“The Mediator,” *Ensign*, May 1977, 56).

Ua tumu tusitusiga paia, tusi

faitau, ma aafiaga o le olaga i tala o le togiola. E ala atu ia Keriso, e mafai ai e tagata ona suia o latou olaga ma maua le faaolataga. Ese lo’u fiafia i tala nei o le togiolaina.

E i ai sa’u uo sa le mulimuli i aoaoga a le Ekalesia a o talavou. Ina ua avea o ia ma se talavou matua, sa ia iloina le mea sa ia misia e ala i le le ola i le talalelei. Sa salamo o ia, sui lona olaga, ma tuuto atu ia lava i le ola amiotonu. I se tasi aso, i le tele o tausaga talu ona mavae atu a maua fegalegaleaiga faaletalavou, sa ma fetai ai i totonu o le malumalu. Sa susulu mai i ona foliga le malamalama o le talalelei, ma sa ou iloina o ia o se tagata faamaoni o le Ekalesia sa taumafai e ola atoatoa i le talalelei. O lana tala, o se tala o le togiolaina.

Sa ou faatalanoaina i se tasi taimi se tamaitai mo le papatisoga, o lē sa tausalaina i se agasala matuia lava. I le taimi o le faatalanoaga, sa ou fesili atu i ai pe na malamalama e le mafai ona ia toe faia lona agasala. Faatasi ai ma se salamo a’ia’i i ona foliga ma i lona leo, sa ia fai mai ai, “Peresitene ea, e le mafai ona ou toe faia lona agasala. O le mafuaaga lena ua ou fia papatiso ai—ia faamaga ai au mai taunuuga o lona agasala leaga.” O lana tala o se tala o le togiolaina.

A o ou asiasi atu i konafesi faalesiteki ma isi fonotaga i ni tausaga e le'i mamao atu, sa ou tauaveina le valaau a Peresitene Monson e laveai i tagata e le malolosi i le Ekalesia. I se tasi konafesi faalesiteki, sa ou faamatalaina ai se tala e uiga i se tagata le malosi o le Ekalesia o lē sa toe foi mai ma malosi atoatoa ina ua asia o ia e lona epikopo ma isi taitai i lona fale, ma ta'u atu ia te ia, sa manaomia o ia, ma valaauina o ia e galue i le uarota. Sa le gata ina taliaina e le alii o loo i le tala le valaau, ae sa suia foi lona olaga ma amioga ma avea ai ma tagata malosi atoatoa i le Ekalesia.

Sa i ai sa'u uo i le aofia lea sa ou faamatalaina ai le tala lena. Sa iloa lelei lava le suia o ona foliga a o faamatalaina le tala. Sa ia auina mai ia te au se i-meli i le aso na sosoo ai ma faamatala mai, na mafua ona faaalā ona lagona ootia i le tala, ona o le tala o le toe malosi mai o lona tamā faaletulafono i le Ekalesia sa tutusa lelei lava ma le tala sa ou faamatalaina. Fai mai o ia, o se taunuuga o se asiasiga faapena a le epikopo ma se valaauga e auauna atu i le Ekalesia, na toe iloilo ai e lona tamā faaletulafono lona olaga ma lana molimau, faia ni suiga tetele i lona olaga, ma taliaina le valaau. O lona tamalii na toe faatoagaina mai ua 88 tagata e tupuga mai ia te ia o loo avea ma ni tagata malolosi o le Ekalesia.

I se fonotaga i ni nai vaiaso mulimuli ane, sa ou faamatalaina ai na tala e lua. O le aso na sosoo ai, sa ou maua ai se isi i-meli sa amataina faapenei "O le tala foi lena a lo'u tamā." O lona i-meli, mai se peresitene o le siteki, na faamatala ai le auala na valaaulia ai lona tamā e auauna atu i le Ekalesia, e ui ina sa le'i toaga o ia ma sa i ai ni ana amioga sa manaomia ona suia. Sa ia talia le valaaulia, ma i le faagasologa, sa salamo, ma ui



ai ina avea o se peresitene o le siteki sosoo ai ma le avea ma se peresitene o le misiona, ma sa faataatia ai le faavae mo ana fanau e avea o ni tagata faamaoni o le Ekalesia.

O ni nai vaiaso mulimuli ane, sa ou faamatalaina ai ia tala uma e tolu i se isi konafesi faalesiteki. Ina ua uma le fonotaga, sa sau se alii ia te au ma ta'u mai, e le o se tala lena a lona tamā. Ae o lona tala lena. Sa ia faamatala mai e uiga i mea na tutupu lea na taitaiina atu ai o ia e salamo ma toe foi mai e auai atoatoa i le Ekalesia. Sa ou faalogo i lea tala ma lea tala o le togiolaina.

E ui ina e le mafai lava ona tatou toe totogia le Togiola mo le mea na Ia totogia mo i tatou, ae o le fuafuaga o le faaolataga e manaomia ai a tatou taumafaiga sili ona lelei ina ia salamo atoatoa ai ma fai le finagalo o le Atua. Sa tusia e le aposetolo o Orson F. Whitney:

*Faaoia, Togiola o lo'u agaga,  
O Lona aao malosi ua ou atoa ai,*

*O Lona mana matagofie ua siitia  
ai au*

*Ma tumu ai la'u ipu oona!  
Se a se upu faafetai ou  
te fai atu,  
Le Atua alofa o Isaraelu.*

*Le mafai na toe totogi atu, Le Alii e,  
Ou te alofa i lau afio. O Lau upu  
mama,  
O lo'u fiafia lea,  
Ou te olioli i le aso, o a'u miti  
i le po?  
Ia ou ta'uta'u atu pea,  
Ma atagia lou finagalo i lo'u olaga.  
("Savior, Redeemer of My Soul,"  
Hymns, no. 112)*

E tuuina atu la'u molimau i le mana o le Togiola a Keriso. A tatou salamo ma o mai ia te Ia, e mafai ona tatou maua faamanuiaga uma o le ola e faavavau. Ina ia tatou faia faapea, ma maua o tatou lava tala o le togiola, o la'u tatalo lea i le suafa o Iesu Keriso, amene. ■



Saunia e Elder D. Todd Christofferson

○ Le Korama a Aposetolo e Toasefululua

# ○ Le Meaalofa Paia o le Salamo

*Ua na o le salamo lava tatou te maua ai le avanoa i le alofa tunoa togiola o Iesu Keriso.*

○ loo i ai i le Tusi a Mamona le tala i se alii e igoa ia Neoa. E faigofie lava le malamalama i le mafuaaga na mafaufau ai Mamona, i le faapuupuaina o se afe tausaga o faamaumauga a sa Nifae, e taua le faaaofia ai o se mea e uiga i lenei alii ma le faatosinaga umi o ana aoaoga faavae. Sa saili Mamona e lapatai i tatou, ma le iloaina o lenei filosofia o le a toe aoaoina foi i o tatou aso.

Na muai ta'ua Neoa pe tusa o le 90 tausaga a o le'i fanau mai Keriso. Sa ia aoao mai "o le a faaolaina tagata uma i le aso mulimuli . . . ; ona na foafoa e le Alii tagata uma, ma ua togiola foi e ia tagata uma; ma, i le iuga, o le a maua e tagata uma le ola e faavavau" (Alema 1:4).

Pe tusa o le 15 tausaga mulimuli ane, na oo mai ai Korioa i sa Nifae ma talai atu ma faasalalau le aoaoga faavae a Ne'oa. O loo ta'ua i le Tusi a Mamona e faapea "o ia o se Aneti-Keriso, ona sa amata ona ia talai atu i tagata e faasaga i valoaga . . . e uiga i le afio mai o Keriso" (Alema 30:6). O le aafiaga o le talaiga a Korioa e faapea "e le mafai ona faia se togiola mo agasala a tagata, ae e lelei a tagata taitoatasi ia i le olaga

lenei e tusa ma le pulea e le tagata o ia lava; o lea e faamanuiaina tagata taitoatasi e tusa ma lona lava atamai, ma e manumalo tagata taitoatasi e tusa ma lona lava malos; ma o soo se mea sa fai e le tagata e le o se solitulafono (Alema 30:17). O perofeta pepelo ma e na mulimuli ia i latou sa "le talitonu i le salamo mai ia latou agasala" (Alema 15:15).

E pei ona i ai i aso o Neoa ma Korioa, ua tatou ola foi i se taimi e le o toe mamao ma le afio mai o Iesu Keriso—i o tatou tulaga o le taimi o sauniuniga mo Lona Afio Mai Faa-lua. Ma e faapena foi, o le savali o le salamo e le masani ona taliaina. Ua tautino nisi afai o i ai se Atua, Na te le faia ni poloaiga moni ia i tatou (tagai Alema 18:5). O isi i aso nei o loo taofimau pea o se Atua alofa e faamagalalo i agasala uma e tusa ma se ta'uta'uga faigofie o agasala, po o le, afai o i ai tonu se faasalaga mo agasala, "o le a sasa i tatou e le Atua i nai ta itiiti, ae o le a faaolaina lava i tatou i le malo o le Atua mulimuli" (2 Nifae 28:8). O isi, faatasi ma Korioa, ua faafitia le i ai moni o Keriso ma soo se mea e ta'ua o se agasala. O la latou aoaoga faavae e faapea o tulaga faatauaina, tulaga

faatonuina, e oo lava i upumoni e feāiāa'i uma. O lea, pe o le a lava le mea e lagona e se tasi e sa'o mo ia e le mafai ona faamasinoina e isi e sese po o se agasala.

A aunoa ma se iloiloga totoa, o ia filosofia ua foliga mai e faatosina ona latou te tuu mai ia i tatou se faatagaga e faananau ai i soo se tuinanau po o se manaoga e aunoa ma se popole mo taunuuga. E ala i le faaaogaina o ao-aoga a Neoa ma Korioa, tatou te mafai ai ona fetuutuunai ma ta'uamiotonuina soo se mea. Pe a alagaina e perofeta le salamo, e "le fiafia i ai i latou e le fia salamo." Ae o le mea moni lava, e tatau ona taliaina le alaga faaperofeta ma le olioli. A aunoa ma le salamo e leai lava se alualu i luma moni po o se siitaga o le olaga. O le faafoliga mai e leai se agasala e le faaititia ai ona avega ma tiga. O le puapuuga mo agasala e le mafai e na o ia lava ona suia soo se mea mo le lelei. Ua na o le salamo lava e taitai atu ai i se olaga sili atu. Ma, e moni lava, ua na o le salamo lava tatou te maua ai le avanoa i le alofa tunoa togiola a Iesu Keriso ma le faaolataga. O le salamo o se meaalofa paia, ma e tatau ona tatou fiafia pe a tatou talanoaina le salamo. Na te faasino atu i tatou i le saolotoga, talitonuga, ma le filemu. Nai lo le faalavefauina o le faafiatiaga, o le meaalofa o le salamo o le pogai lea o le faafiatiaga moni.

Ua mafua ona i ai le salamo ona o le Togiola a Iesu Keriso. O Lana taulaga le mafuatia lea ua "aumai ai ala i tagata e mafai ai ona latou maua o le faatua-tua e salamo ai" (Alema 34:15). O le salamo o le tulaga tatau lea, ma le alofa tunoa o Keriso o le mana lea e "mafai ai e le alofa mutimutivale ona faamalie manaoga o le faamasinotonu" (Alema 34:16). O la tatou molimau lenei:

"Ua [tatou] iloa o le tauamiotonuina [po o le faamagaloga o agasala] e ala



i le alofa tunoa o lo tatou Alii ma le Faaola o Iesu Keriso ua tonu ma moni;

“Ma ua [tatou] iloa foi, o le faapaia e ala i le alofa tunoa o lo tatou Alii ma le Faaola o Iesu Keriso ua tonu ma moni, ia i latou uma o e e alolofa ma auauna atu i le Atua ma o latou manatu atoa, mafaufau atoa, ma le malosi atoa” (MF&F 20:30–31).

O le salamo o se mataupu telē lava, ae o le asō ou te fia ta’ua ni vaega se lima o lenei mataupu faavae taua o le talalelei lea ou te faamoe-moe o le a aoga.

Muamua, o le valaaulia e salamo o se faailoaga o le alofa. Ina ua “afua ona talai atu Iesu, ua faapea atu, Ina salamo ia outou; aua ua latalata mai le malo o le lagi” (Mataio 4:17), o se savali o le alofa, le valaauliaina o tagata uma o le a agavaa e faatasia ma Ia “ma olioli i afioga o le ola faavavau i le lalolagi lenei, ma le ola faavavau [lava ia] i le lalolagi a sau” (Mose 6:59). Afai tatou te le valaauliaina isi ina ia sui ma pe afai foi tatou te le salamo i tatou lava ia, ua tatou toilalo i se tiute autu lea e tatau ona fai i le tasi ma le isi ma i tatou lava ia. O matua e tuu a latou fanau e agasala, se uo manatu faapito, se taitai palaai o le Ekalesia, o le mea moni lava ua sili atu ona latou popole mo i latou lava nai lo le tulaga lelei ma le fiafia o i latou e mafai ona fesoasoani atu i ai. Ioe, o le valaau inā salamo ia i nisi o taimi ua manatu i ai o le le onosaia po o le faatigā, ma e ono oo foi lava i le itagiaina, ae o le taialaina e le Agaga, o le tulaga moni lava o se faatinoga o le popole moni (tagai MF&F 121:43–44).

Lua, salamo o lona uiga o le taumafai ia sui. O le faifai i puapuaga o le Faaola i le Togalaa o Ketesemane ma luga o le satauro lo tatou manatu faapea, o Ia e tatau ona sui i tatou i tagata amiotonu e aunoa ma sa tatou taumafaiga moni. Nai lo lena, ia tatou



saili atu i Lona alofa tunoa e faaatoatoa ai ma tauia a tatou taumafaiga sili ona filiga (tagai 2 Nifae 25:23). Atonu e tatau ona tatou tatalo mo ni taimi ma ni avanoa e galulue ai ma taumafai ma faatoilaloina le agasala e pei ona tatou tatalo mo le alofa mutimutivale. E mautinoa lava e faamanuia e le Alii se tagata e manao ia oo mai i le faamasinoga ma le agavaa, o le e galue ma le filiga i lea aso ma lea aso ina ia suitulaga e le malosi ia vaivaiga. O le salamo moni, o le suiga moni e manaomia ai ni taumafaiga fai soo, ae o loo i ai se mea lelei atu ma paia i ia taumafaiga. O le faamagaloga ma le faamalologa paia e tafe fua mai lava i sea agaga, aua e moni, “e fiafia le amiomama i le amiomama; o le malamalama e pipii i le malamalama; [ma] o le alofa mutimutivale e agaalofo i le alofa mutimutivale ma āiā i ana lava” (MF&F 88:40).

Faatasi ai ma le salamo tatou te mafai ai ona siitia ma le mausali i o tatou gafatia e ola i le tulafono selesitila, aua ua tatou iloaina o “lē e le mafai ona ola i le tulafono o se malo selesitila e le mafai ona ia gafatia se mamalu selesitila” (MF&F 88:22).

Tolu, o le salamo o lona uiga e le gata ina lafoaia le agasala ae o le tuuto atu foi i le usiusitai. O loo ta’ua i le Bible Dictionary, “O le oo mai o le salamo o lona uiga o se liua o le agaga ma le loto i le Atua, [atoa ai ma] le lafoaia o agasala tatou te ono solia ona o lo tatou natura.”<sup>1</sup> O se tasi o le tele o faataitaiga o lenei aoaoga mai le

Tusi a Mamona o loo maua i upu a Alema i se tasi o ona atalii:

“O lea ou te poloai atu ai ia te oe, lo’u atalii e, i le matau i le Atua, ia e taofi mai au amioletonu;

“Ia e liliu atu i le Alii ma lou manatu atoa, mafaufau atoa, ma lou malosi atoa” (Alma 39:12–13; tagai foi i le Mosaea 7:33; 3 Nifae 20:26; Mamona 9:6).

Mo lo tatou liliu atu i le Alii ina ia faaatoatoaina, e tatau ona aofia ai ia le itiiti ifo ma se feagaiga o le usiusitai ia te Ia. E masani lava ona tatou talanoa e uiga i lenei feagaiga o le feagaiga o le papatisoga talu ona molimauina i le papatisoina i le vai (tagai Mosaea 18:10). O le papatisoga o le Faaola lava ia, ua maua ai le faataitaiga, sa faamauina ai Lana feagaiga o le usiusitai i le Tama. “Ae ui ina paia o ia, ua faaali mai e ia i le fanauga a tagata, ua ia faamaualaloina o ia lava e tusa ma la le tino i luma o le Tama, ma molimau atu i le Tama o le a ia usiusitai ia te ia i le tausia o ana poloaiga” (2 Nifae 31:7). A aunoa ma lenei feagaiga, e tumau pea le le atoatoa o le salamo ma lē faamagaloina ai lava agasala.<sup>2</sup> I le faamatalaga e manatua pea a Polofesa Noel Reynolds, “O le filifiliga ia salamo o se filifiliga lea e mu ai alalaupapa i itu uma [i le nau-nautai ai] e mulimuli e faavavau i le ala e *tasi*, le ala e *tasi* lea e tau atu i le ala faavavau.”<sup>3</sup>

Fa, o le salamo e manaomia ai faamoemoega moni ma se naunautauga e taumafai pea, e oo lava i tiga. O ni



Iaga le vaega muamua a paionia ma o ese mai Winter Quarters. I le taimi lea e tasi, i le 1,600 maila [2,575 km] i sisifo o loo o ifo ai lalo mai Atumauga o Sierra Nevada le Vaega mafatia a Donner e agai atu i le Vanu o Sacramento.

“Sa alu le taumalulu matautia atoa o saisaitia i latou i faaputuga aisa i lalo ifo o tumutumu mauga. Afai e sao mai ai se tasi i aso ma vaiaso ma masina o le fiaai ma puapuuga le mafaamatalaina e toetoe lava lē talitonuina.

“Sa i ai ia i latou se alii e sefululima tausaga le matua o John Breen. I le po o le aso 24 Aperila, sa savali atu ai o ia i le Faatoaga a Johnson. I tausaga mulimuli ane sa ia tusia ai:

“O le leva o le po na matou tau-nuu ai i le Faatoaga a Johnson, ma o le taimi muamua na ou vaai i ai o le taeao po lava. Na lagi lelei, sa ufitia uma le elelee i le vao lanulauava, sa tausagi mai manulele i tumutumu o laau, ma ua taunuu le malaga. Sa ou tau le talitonu o loo ou ola pea.

“O le vaaiga na ou vaai ai i lena taeao sa foliga mai ua pueina i lo’u mafaufau. O le tele o mea na tutupu ua le toe manatuaina, ae o loo mafai pea ona ou vaai i le togalauapi e latala i le Faatoaga a Johnson.”

Na saunua Peresitene Packer. “O le taimi muamua sa ou matua fenumiai lava i lena faamatalaga ‘ua le manatua ai le tele o le mea na tupu.’ Pe mafai faapefea ona mou atu mai le mafaufau ni masina uumi o le mafatiaga ogaoga ma le faanoanoa? E mafai faapefea e se taeao pupula se tasi ona aveesea le taumalulu faanoanoa ma le matautia.

“A o mafaufau ai pea, sa ou filifili e le o se lē mautonu lea. Ua ou vaai i se mea faapea o tupu i tagata ou te iloa. Sa ou vaai i se tasi sa faaalua se taumalulu umi o le tausalaina ma le fiaai faaleagaga ua mānu a’e i le taeao o le faamagaloga. “Pe a oo mai le taeao,

taumafaiga e fatu se lisi o ni laasaga patino o le salamo atonu e aoga i isi, ae e ono taitai atu ai foi i se metotia le mafaufauina o le salamo e aunoa ma se lagona moni po o se suiga. O le salamo moni e le o se mea papa’u. Na tuuina mai e le Alii ni mea autu se lua e manaomia: “O le mea lenei e mafai ai ona outou iloa pe afai ua salamo se tagata i ana agasala— faauta, e ta’uta’u atu e ia i latou ma lafoai i ai” (MF&F 58:43).

O le ta’uta’u atu ma le lafoai o ni manatu faavae mamana. E matua tele atu nai lo le na o se O le faanoanoa ma le salamo ma loimata oona e masani lava ona o mai faatasi ma se ta’uta’uga o agasala a se tasi, aemaise lava pe afai o ana amioga na mafua ai le tiga i se tagata, pe sili atu foi le leaga, o le taitaia ai o se isi tagata i le agasala. O le faanoanoa tele lea, o lena manatu o mea e pei ona i ai moni lava, e taitai atu ai se tasi e pei o Alema, e alaga atu, “E, Iesu e, oe le Alo o le Atua, ia e alofa mutimutivale mai ia te au, o se ua i ai i le au oona, ma ua siomia faataamilo e filifili tumau-faavavau o le oti” (Alema 36:18).

Faatasi ai ma le faatuatua i le Togiola alofa mutimutivale, ma Lona mana, o le faanoanoa e liua i le faamoemoe. E suia lava le loto ma manaoga o se tagata, ma oo ai ina faateleina le inosia o le agasala sa avea ma faatosinaga muamua. O se naunautaiaga malosi e lafoai ma faagalole agasala ma toe faalelei, i le mea sili e gata ai, o le leaga sa ia faia ua atiae nei i lena loto fou. O lena naunautaiaga malosi o le a vave ona tupu ae i se feagaiga

o le usiusitai i le Atua. Faatasi ai ma lena feagaiga ua osia, o le a aumaia ai e le Agaga Paia, le savali o le alofa tunoa paia, le toomaga ma le faamagaloga. E musuia se tasi e tautino mai mea na tautino atu e Alema, “Ma, oi, le olioli e, ma le malamalama ofoofogia tele na ou vaaia; ioe, sa faatumulia lo’u agaga i le olioli sa sili atu ona tele e pei o lo’u tiga!” Alema 36:20.

O soo se tiga lava e manaomia e le salamo o le a itiiti lava nai lo le puapuuga na manaomia e faamalie ai le faamasinotonu mo agasala e le’i salamoina. E le’i saunua tele le Faaola e uiga i le mea na Ia onosaia e faamalie ai manaoga o le faamasinotonu ma togiola ai a tatou agasala, ae sa Ia faia le fetalaiaga faaalaina lena:

“Aua faauta, o a’u le Atua na puapuagatia i nei mea mo tagata uma, ina ia latou le puapuagatia pe afai latou te salamo;

“Ae afai latou te le salamo, e ao ina latou tiga e pei o a’u;

“O le mafatia lea na oo ai ia te a’u lava, o le Atua lava lea, o le ua silisili i tagata uma, le gatete ona o le tiga, ma tafe toto ai i pu afu uma, ma mafatia ai i le tino atoa ma le agaga—ma manao ai ia Ou le inuina le ipu oona” (MFF 19:16–18).

Lima, pe o le a lava le tiga o le salamo, e le sili atu lava nai lo le olioli o le faamagaloga. I se lauga o le konafesi aoao sa faaauituina “O Le Taeao Pupula o le Faamagaloga,” na tuu mai ai e Peresitene Boyd K. Packer le faatusatusaga lena:

“Ia Aperila 1847, na taitai ai e Polika

latou te iloaina le mea lenesi:

“Faauta, o ia o le ua salamo i ana agasala, o ia lava lea ua faamagaloina, ma o A'u, o le Alii, e le toe manatuaina lava' [MF&F 58:42].”<sup>4</sup>

Ou te faailoa atu ma le faafetai ma molimau atu o puapuaga le mafaa-matalaina, o le maliu ma le Toetu o lo tatou Alii “ua faataunuu ai le tuutuuga o le salamo” (Helamana 14:18). O le meaalofa paia o le salamo o le ki lea i le fiafia iinei ma le olaga a sau. I fetalaiga a le Faaola ma i le lotomau-lalo tele ma le alofa, ou te valaaulia ai tagata uma ina ia “salamo: aua ua latalata mai le malo o le lagi” (Mataio 4:17). Ou te iloa e ala i le taliaina o lenesi valaaulia, o le a outou maua ai le olioli iinei ma le faavavau. I le suafa o Iesu Keriso, amene. ■

#### FAAMATALAGA

1. Bible Dictionary, “Repentance.”
2. O loo faatele ona talanoa le Tusi a Mamona e uiga i le “papatisoia o le salamo” (tagai Mosaea 26:22; Alema 5:62; 6:2; 7:14; 8:10; 9:27; 48:19; 49:30; Helamana 3:24; 5:17, 19; 3 Nifae 1:23; 7:24–26; Moronae 8:11). Sa faaogaina e Ioane le Papatiso upu lava ia e tasi (tagai Mataio 3:11), ma sa saunoa foi Paulo i le “papatisoa o le salamo” (Galuega 19:4). O loo aumai foi le fuaitau lea i le Mataupu Faavae ma Feagaiga (tagai Mataupu Faavae ma Feagaiga 35:5; 107:20). “Papatisoa o le, po o i le salamo” ua faigofie ona faasino i mea moni lava e faapea o le papatisoga faatasi ma lana feagaiga o le usiusitai o le laasaga mulimuli lea o le salamo. Faatasi ai ma le salamo atoatoa, e aofia ai le papatisoga, e agavaa ai se tasi mo le faaecina atu o lima mo le meaalofa o le Agaga Paia, ma e ala mai i le Agaga Paia e maua ai e se tasi le papatisoga a le Agaga (tagai Ioane 3:5) ma le faamagaloga o agasala: “Aua o le faitotoa e tatau ona outou ulu atu ai o le salamo ma le papatisoga i le vai; ona oo mai ai lea o se faamagaloga o a outou agasala i le afi ma i le Agaga Paia” (2 Nifae 31:17).
3. Noel B. Reynolds, “The True Points of My Doctrine,” *Journal of Book of Mormon Studies*, vol. 5, no. 2 (1996): 35; emphasis added.
4. Boyd K. Packer, i le Conference Report, Oct. 1995, 21; tagai foi “The Brilliant Morning of Forgiveness,” *Ensign*, Nov. 1995, 18.



Saunia e Elder L. Tom Perry

○ Le Korama a Aposetolo e Toasefululua

## ○ Le Alofa Atoatoa e Faateaeeseina ai le Fefe

*Afai o le a outou tali atu i valaaulia e faasoa atu o outou talitonuga ma lagona e uiga i le talalelei toefuataina a Iesu Keriso, o le a avea se agaga o le alofa ma se agaga o le lototele ma au soa tumau.*

Peresitene Monson, ua matua faagaetia i matou uma i le talafou matagofie o ni malumalu fou. Aemaise o se talafiafia mo le anoanoai o o tatou aiga i le setete o Wyoming.

E faia e le Ekalesia se mea i le lalolagi atoa pe a fausia se malumalu fou lea o se tu masani taatele i le Iunaite Setete ma Kanata—e tatalaina mo maimoaga. I le gasologa o vaiaso a o lumanai le faapaiaga o le malumalu fou, tatou te talaia ai faitotoa ma valaaulia ia taitai faalemalo ma faalelotu i le lotoifale, o tagata o le Ekalesia i le lotoifale, ma tagata o isi faatuatuaga ina ia maimoaina le malumalu fou faatoa fauina.

O mea matagofie nei o loo tutupu e fesoasoani ai i tagata e le o masani i la tatou Ekalesia e aoao ai sina mea itiiti e uiga i ai. E toetoe lava o tagata uma e asiasi atu i se malumalu fou e maofa i lona matagofie i fafo ma totonu. E faafiafiaina i latou i mamau ma gauai atu i auililiga o foliga uma o le malumalu. Ma le isi, o le toatele o tagata asiasi e lagonaina se mea uiga ese ma faapitoa a o taialaina i latou i

totonu o le malumalu e le'i faapaiaina. O tali masani uma nei a tagata asiasi e maimoaina, ae e le o tali masani taatele ia. O le mea e faagaetia ai le tele o tagata asiasi nai lo se isi lava mea, o tagata o le Ekalesia latou te feiloai i ai i le taimi o maimoaga. Latou te tuua ma le faagaetia pea ona o i latou na talimalo, o le Au Paia o Aso e Gata Ai.

O loo gauai atu pea tagata i le Ekalesia i le lalolagi atoa nai lo se isi lava taimi muamua. O loo tusitusi pea sui o ala o faasalalauga pe talanoa e uiga i le Ekalesia i aso uma, ma lipotia le tele o ana gaoioiga. O loo talanoaina pea e le tele o fale nusipepa e sili ona lauiloa i le Iunaite Setete le Ekalesia ma ona tagata. O loo tupu foi nei talanoaga i le lalolagi atoa.

Ua tosina atu foi tagata i le Ekalesia i luga o le Initoneti, e pei ona outou silafia, ua suia tele ai le ala e fefaasoai ai e tagata ia faamatalaga. I taimi uma lava o le aso i le lalolagi atoa, o loo talanoaina lava le Ekalesia ma ana aoaoga i luga o le Initoneti, o lautusi patino ma upega o fesoataiga e tagata e le'i tusitusi lava mo se nusipepa po



o se mekasini. O loo latou faia ni vitio ma faasoa atu i le initoneti. O tagata le tualoa nei—o tagata uma o lo tatou faatuatuaga ma isi foi faatuatuaga—o ē o loo talanoa e uiga i Le Ekalesia a Iesu Keriso o le Au Paia o Aso e Gata Ai.

O suiga i auala tatou te fesootai ai ua faamalamalama ai se vaega i le mafuaaga ua iloa atili ai tatou o “Mamona” nai lo se isi lava taimi. Ae o loo tuputupu ae foi le Ekalesia ma agai i luma. O le tele o tagata o loo i ai ni o latou tuaoi ma uo o ni tagata o le Ekalesia, ma o loo i ai ni tagata iloga o le Ekalesia i faigamalo, i pisinisi, i faafiatiaga, i aoaoga, ma soo se mea lava—e pei ona i ai. E oo lava ia i latou e le o ni tagata o le Ekalesia ua latou iloa lenei mea, ma latou tomanatu pe o le a se mea o tupu. E maofa i le toatele ua nofouta nei i le Ekalesia ma le Au Paia o Aso e Gata Ai.

A o faasolo pea ina iloa atili le Ekalesia, o loo toatele pea tagata e le o malamalama lava i ai. O nisi ua aoaoina ina ia masalosalo i le Ekalesia ma talitonu i talitonuga taatele lē lelei e uiga i le Ekalesia e aunoa ma le fesiligia o a latou punaoa ma le faamaoniga o a latou faamatalaga. O loo i ai foi le mau faamatalaga le sa’o ma le mautonu e uiga i le Ekalesia ma le mea o ia talitonu i ai. E moni lava lenei mea talu mai le taimi o le Perofeta o Iosefa Samita.

Na tusia e Iosefa Samita lona talafaasolopito i vaega “e faasa’o ai mafaufau o tagata lautele, ma tuu atu ai i tagata sailiili uma le mea moni ia maua tala sa’o” (Iosefa Samita — Talafaasolopito 1:1). E moni lava o le

a i ai pea i latou e suia ia upumoni ma avese ma le loto i ai ia aoaoga a le Ekalesia. Ae o le toatele o i latou e i ai fesili e uiga i le Ekalesia ua na ona fia mananao ia malamalama. O tagata mafaufau tonu nei o loo fia iloa moni lava i tatou.

O le faatupulaia o le iloaina ma le tauleleia o le Ekalesia ua tuu mai ai se avanoa maoae ia i tatou o ona tagata. E mafai ona tatou fesoasoani “e faasa’o ai mafaufau o tagata lautele,” ma faasa’o ai faamatalaga sese pe a faamatalaina i tatou i se mea sese. Ae o le mea e sili ona taua, o le mafai lea ona tatou faasoa atu o o tatou faasinomaga.

E tele ni mea e mafai ona tatou faia—e mafai ona outou faia—e faateleina ai le malamalama e uiga i le Ekalesia. Afai tatou te faia i le agaga lava lea e tasi ma pulea i tatou lava i le ala lava lea e tasi tatou te talimalo ai i maimoaga i malumalu, o le a malamalama atili a tatou uo ma tuaoi ia i tatou. O le a tafiese lo latou masalosalo, o le a mou ese talitonuga taatele lē lelei, ma o le a amata ona latou malamalama i le Ekalesia ma lona moni.

Se’i ou fautuaina atu ni manatu i mea e mafai ona tatou faia.

Muamua, e tatau ona tatou lotototoa i a tatou tautinoga e uiga ia Iesu Keriso. Tatou te mananao i isi ia iloa tatou te talitonu o Ia o le tamalii e sili ona taua i le talafaasolopito o tagata uma. O lona soifuaga ma aoaoga o le fatu lea o le Tusi Paia ma isi tusi ua tatou talitonu ua avea ma tusitusiga paia. Na saunia e le Feagaiga Tuai le ala mo le galuega i la le tino a Keriso. Ua faamatalaina

e le Feagaiga Fou Lana galuega i la le tino. Ua tuu mai e le Tusi a Mamona ia i tatou le molimau lona lua o Lana galuega i la le tino. Na afio mai o Ia i le lalolagi e folafola Lana talalelei e avea ma faavae mo tagata uma ina ia mafai e fanau uma a le Atua ona aoaoga i Ana aoaoga ma mulimuli ai. Ona Ia foai mai lea o Lona soifua e fai ma o tatou Faaola ma Togiola. Ua na o Iesu Keriso lava e auala mai ai lo tatou faaolataga. O le mafuaaga lea tatou te talitonu ai o ia o le tamalii e sili ona taua i le talafaasolopito o tagata uma. O se mea mamalu le talitonu ia te Ia ma talia o Ia o lo tatou Faaola, lo tatou Alii, ma lo tatou Matai.

Tatou te talitonu foi ua na o Keriso lava le auala e mafai ai ona maua le olioli sili, faamoemoe, ma le fiafia—i lenei olaga faapea ma le faavavau. O la tatou aoaoga faavae, e pei ona aoaoina i le Tusi a Mamona, o loo faamamafa mai ai: “O le mea lea, e tatau ai ona outou fetaomi atu i luma ma le tumau ia Kersio, ma se susulu atoatoa o le faamoemoe, ma le alofa i le Atua ma tagata uma. O le mea lea, afai tou te fetaomi atu i luma, ma taumamafa



fiafia i le afiga a Keriso, ma tumau e oo i le iuga, faauta, ua faapea ona fetalai mai le Tamā: O le a outou maua le ola e faavavau” (2 Nifae 31:20).

Tatou te tautino atu lo tatou talitonuga ia Iesu Keriso ma talia o Ia o lo tatou Faaola. O le a Ia faamanuiaina i tatou ma taitai i tatou i a tatou taumafaiga uma. A o tatou galulue ai iinei i lenei olaga, o le a Ia faamalosia i tatou ma aumai ia i tatou le filemu i taimi o tofotofoga. O tagata o Le Ekalesia a Iesu Keriso o le Au Paia o Aso e Gata Ai e savavali i le faatuatua ia te Ia o Lē ana le Ekalesia.

Lua, ia avea ma se faataitaiga amiotonu i isi. A uma la tatou tautinoga o o tatou talitonuga, e tatau ona tatou mulimuli i le fautuaga ua tatou maua i le 1 Timoteo 4:12: “A ia fai oe ma faaaaoa i e ua faatuatua, i le upu, ma le amio, ma le alofa, ma le loto, ma le faatuatua, ma le le gaioia.”

Na aoao mai le Faaola e uiga i le taua o le avea ma se faataitaiga o lo tatou faatuatua ina ua fetalai mai, “Ia faapea ona pupula atu lo outou malamalama i luma o tagata, ina ia latou iloa la outou amio lelei, latou te vivii atu ai i lo outou Tama o i le lagi” (Mataio 5:16).

E tatau ona avea o tatou olaga ma faataitaiga o le lelei ma uiga mama, a o tatou taumafai e mulimuli i Ana faataitaiga i le lalolagi. O galuega lelei a i tatou taitoatasi e mafai ona tauleleia uma ai le Faaola ma Lana Ekalesia. A o e aofia ai i le faia o mea lelei, i le avea ai ma alii ma tamaitai faamamaluina ma amiotonu, o le a atagia mai le malamalama o Keriso i o outou olaga.

O le isi, talanoa e uiga i le Ekalesia. I le gasologa o o tatou olaga i aso uma, ua faamanuiaina lava i tatou i le tele o avanoa e faasoa atu ai i isi mea ua tatou talitonu i ai. Pe a fesiligia e a tatou uo patino ma uo faalegaluega o tatou talitonuga faalelotu, o loo latou



valaauliaina i tatou e faasoa atu pe o ai i tatou ma mea ua tatou talitonu i ai. Atonu latou te fiafia pe le fiafia foi i le Ekalesia, ae latou te fiafia e fia iloa atili i tatou.

O la’u fuatuaga ia te outou ia talia a latou valaaulia. E le o valaauliaina oe e au uo ia e aoao atu, tala’i atu, faamalalama, ma apoapoai atu. Faaauai i latou i se talanoaga itu lua—faasoa atu se mea e uiga i ou talitonuga faalelotu ae ia fesili atu foi i ai i o latou talitonuga. Ia iloilo o latou tulaga o le fia iloa e ala i fesili latou te fesiligia. Afai latou te fesiligia ni fesili se tele, taulai atu le talanoaga i le taliina o a latou fesili. Ia manatua pea lava pea, e sili atu mo i latou le fesili mai nai lo lou ta’uina atu.

O nisi tagata e foliga mai e mananao e faalilolilo lo latou auai i le Ekalesia. E i ai a latou mafuaaga. Mo se faataitaiga, atonu latou te talitonu e le o so latou tiute le faasoa atu o o latou talitonuga. Atonu latou te fefefe ne’i o latou faia se mea sese pe fesiligia foi i se fesili e le mafai ona latou taliina. Afai e i ai ni manatu faapea ia te oe, e i ai sa’u fuatuaga mo oe. Tau lava ia manatua upu a Ioane: “E leai se fefe i le alofa, a o le alofa atoatoa e faateaseina ai le fefe” (1 Ioane 4:18). Afai tatou te alolofa i le Atua ma alolofa i o tatou tuaoi, ua folafola mai ia i tatou o le a faatoilaloina lo tatou fefe.

Afai na e asiasi talu ai nei i le Mormon.org, o le uepisaite lea a le Ekalesia mo i latou e fiafia e aoao e uiga i le Ekalesia, ua e vaai ai i tagata o le ekalesia ua tuuina i luga ni faamatalaga e uiga ia i latou. Ua latou fatuina ni talaaga i luga o le initoneti e faamalalama ai i latou ma le mafuaaga e taua ai o latou talitonuga faalelotu ia i latou. O loo latou talanoa mai e uiga i lo latou faatuatua.

E tatau ona tatou talisapia ma faia na talanoaga i le alofa faa-Keriso. O lo tatou leo, pe tautala pe tusitusi, e tatau lava ona faaaloalo ma migao, e tusa lava pe o a tali mai i isi. E tatau ona tatou faamaoni ma lotomatala ma taumafai ia manino mea tatou te ta’u atu. Tatou te mananao e aloese mai le fiafinau pe fiafaatautee i soo se itu.

Na faamalalama mai e le Apo-setolo o Peteru, “A e pei ona paia o ia na valaauina outou, ia faapea foi outou ona paia i a outou amio uma” (1 Peteru 1:15).

O “amio uma” o aso nei ua foliga mai o loo aofia ai pea lava pea le Initoneti. Matou te uunaia tagata, talavou ma matutua, ia faaogaga le Initoneti ma ala o agafesootai e aapa atu ai ma faasoa atu o latou talitonuga faalelotu.

A e faaogaina le Initoneti atonu e te tau ai i ni talanoaga faifai pea e uiga i le Ekalesia. Pe a taitaiina ai e le



**Saunia e Elder Jeffery R. Holland**

○ Le Korama a Aposetolo e Toasefululua

Agaga, aua le faatuai ona faaopoopo i ai sou leo i nei talanoaga.

O le savali o le talalelei a Iesu Keriso e le pei o soo se mea o le a e faasoaina atu i isi. I le tele o faamatalaga maua solo mai i lenei vaitaimi, o le faamatalaga sili lenei ona taua i faamatalaga uma i le lalolagi. E le fesiligaina lava lona taua. O se penina tau tele lava (tagai Mataio 13:46).

Pe a talanoaina le Ekalesia, tatou te le taumafai ia tauleleia atu nai lo le mea o i ai. Tatou te manaomia ona fesoootai tuusao atu ma le faamaoni le savali. Afai o le a tatou tatalaina ia ala o fesoootaiga, o le a tuuina e le savali o le talalelei toefuataiina a Iesu Keriso ia lava ia i latou ua saunia e taliaina.

O loo i ai i nisi taimi se esesega tele—se āva tele i le malamalama—i le va o le ala tatou te iloa ai le Ekalesia mai totonu ma le ala e iloa ai e isi le Ekalesia mai fafo. O le mafuaaga autu lea tatou te faia ai ni maimoaga i le malumalu a o le'i faapaiaina. O tagata galulue fua i maimoaga i le malumalu o loo taumafai e fesoasoani i isi ia iloaina le Ekalesia e pei ona latou iloaina mai totonu. Latou te iloaina o le Ekalesia o se galuega ofoofogia, o se mea e ofo ai, ma latou te mananao ia iloa foi e isi.

Ou te folafola atu ia te outou afai o le a outou tali atu i valaaulia e faasoa atu o outou talitonuga ma lagona e uiga i le talalelei toefuataiina a Iesu Keriso, o le a avea se agaga o le alofa ma se agaga o le lototele ma au soa tumau, aua o le “alofa atoatoa e faateleseina ai le fefe” (1 Ioane 4:18).

O se taimi lenei o avanoa ua faateleina e faasoa atu ai le talalelei a Iesu Keriso i isi. Ia tatou saunia i tatou lava e faaoga ia avanoa ua tuu mai ia i tatou taitoatasi e faasoa atu ai o tatou talitonuga, ou te tatalo ai ma le lotomaulalo i le suafa o Iesu Keriso, amene. ■

## Ua Tauto i Tatou Uma

*Ou te talosagaina alii uma, talavou ma matutua, o umia le perisitua ina ia malolosi atu ma tuuto atili e molimau atu, . . . o se molimau mo le lelei, se molimau mo le talalelei, se molimau mo le Atua.*

I le agaga o lena viiga mamana ma le ofoofogia, ma faatasi ai ma le tatalo mamana a Elder Richard G. Hinckley i lo'u loto, ua ou fia talanoa sa'o atu ai i le po nei, uso e, ma e faaafia ai i lena talanoa sa'o ia alii talavou o le Perisitua Arona.

Pe a tatou talanoa e uiga i le maoae tele o le Uluai Faaaliga a Iosefa Samita, o nisi taimi tatou te le talanoa tele i le feteenaiga taufaamata'u lea na muamua tupu, o se feteenaiga na faamoemoe e faaumatia ai le taulealea pe a mafai, ae a leai, ia taofia ai le faaaliga lea o le a oo mai. Tatou te le o toe talanoa tele e uiga ia Satani e sili atu nai lo le mea e tatau ai, ma ou te le o fia talanoa lava e uiga ia te ia, ae o aafiaga o le taulealea o Iosefa o loo faamanatu mai ai ia i tatou mea e manaomia e alii uma ona manatuaina, e aafia ai alii talavou uma, i lenei aofia.

Muamua, o Satani po o Lusifelo po o le Tama o Pepelo—pule a oe i se igoa e valaau ai—e moni o ia, o foliga moni lava o mea leaga. O ona faamoemoega ua i ai i tulaga faataumaoui uma, ma e gatete o ia pe a oo mai se malamalama togiola, i le tau lava o le mafaufau i le upumoni. Lua,

e faavavau lava lona tetee i le alofa o le Atua, le Togiola a Iesu Keriso, ma le galuega o le filemu ma le faaolataga. O le a ia faasagatau atu i nei mea i soo se taimi ma soo se mea na te mafai ai. Ua ia iloa o le a faatoilaloina o ia ma tulia i fafo i le iuga, ae ua naunau o ia e faaumatia i le mea na te mafai ai le toatele o isi faatasi ma ia.

O a la nisi o togafiti a le tiapolo i lenei taua a o lamatia le ola e faavavau? O i lea ua toe aoao ai i tatou i ni aafiaga sa i ai i le Vao Paia. Sa tusi faamaumauina e Iosefa e faapea i se taumafaiga e tetee atu i mea uma o le a oo mai, sa tuu mai ai e Lusifelo “i lea mana se malosi ofoofogia sa taofia ai lo'u laulaufaiva ina ia le mafai ona ou tautala.”<sup>1</sup>

E pei ona sa aoao mai e Peresitene Boyd K. Packer i le taeao nei, e le mafai e Satani ona fasiotia se tagata. O se tasi lena o mea e tele e le mafai ona ia faia. Ae foliga mai o lana taumafaiga e taofi le galuega o le a tau faamanuaina pe ana mafai ona ia taofia laulaufaiva o e faatuatua. Uso e, afai o le tulaga lena, o loo ou sailia i le po nei ni alii talavou ma matutua e popole tele i lenei taua i le va o le lelei ma le

leaga ina ia auai ma tautatala atu. O loo tatou i ai i le taua, ma i nai minute o sosoo ai, ou te manao ia faaauai ni tagata i le taua.

Pe manaomia ona ou usuina ni nai nota o le “Ua Tauto Tatou i le Taua”? Tou te silafia le laina e uiga i le “Matou faatali nei mo e ofo mai?”<sup>2</sup> Ioe, o le mea maoae e uiga i lenei valaau mo ē e o i le taua tatou te *le* talosagaina ni volenitia e faapa se fana pe togi se pomu. Leai, matou te mananao i ni fitafita o le a avea a latou auupega ma “afioga uma e tulei mai le fofoga o le Atua.”<sup>3</sup> O lea la o loo ou sailia i le po nei ni faifeautalai e le ofofuaina mai le taofia o o latou laulaufaiva ae o le a, faatasi ma le Agaga o le Alii ma le mana o o latou perisitua, e tatala ai o latou gutu ma tautatala atu i vavega. O ia saunoaga, na saunoa i ai uso ua maliliu atu, o le a avea ma ala e faatinoina ma o le a faatinoina ai e le faatuatua ia galuega silisili.”<sup>4</sup>

Ou te talosagaina faapitoa lava alii talavou o le Perisitua Arona ina ia nonofo sa’o i luga ma matau mai. Mo outou, se’i ou faafefiloia atu sina faatusatusaga faafeleti. O se taua lenei o le ola ma le oti o loo tatou i ai e faasaga i sē o tetee mai, e ita ia te outou ma ita i lenei galuega, o le a ou tu latalata i o outou luma, muāisu i le muāisu, faatasi ma se lagona o le faananau fiafia i lo’u leo—e pei o foliga o se faiaoga pe a uma se taaloga ma na o le pau le mea e sili ona taua o le manumalo. Faatasi ai ma le taunuuga o le taaloga, o le mea lea e ta’u atu e le faiaoga lenei, o le taaalo i le taaloga lenei, e tatau ai i nisi o outou ona ola mama ia sili atu nai lo le mama o outou i ai i le taimi nei. I le taua lenei i le va o le lelei ma le leaga, e le mafai ona outou taaalo mo le fili i soo se taimi lava e oo mai ai faaososoga, ona e faamoemoe lea e suti lelei mo le Faaola i le malumalu ma le taimi o le misiona e



pei lava e leai se mea na tupu. O le mea lena, au uo talavou, e le mafai ona outou faia. E le ulagia le Atua.

E i ai la sa tatou luitau tele, outou ma au. O loo i ai le faitau afe o alii talavou i le vaitausaga o le Perisitua Arona o loo i ai i faamaumauga o lenei Ekalesia ua faamoemoe e avea ma faifeautalai i le lumanai. Ae o le luitau, o le faatumauina lea o na tiakono, aoao, ma ositaulaga ia lava le toaaga ma lava le agavaa e faauuina ai o ni toeaina ma auauna atu ai o ni faifeautalai. Tatou te manaomia la alii talavou ia ua i ai i le ‘au ina ia *tumau* i le ‘au ma tuu le fai o mea sese aua matou te manaomia outou e o i totonu o le taaloga ma taaalo i le mea e gata ai le malosi! E toetoe lava o tauvaga afeleti uma ou te iloa, e vaseina ai laina tuaoi i luga o le fola po o le malae lea e tatau ona tumau ai i totonu tagata tauva uma. Ia, ua vaseina foi e le Alii laina o le agavaa mo i latou ua valaauina e galulue faatasi ma Ia i lenei galuega. E leai se faifeautalai e le o mafai ona salamo mai ni agasala o feusuaiga po o gagana masoa po o le matamata i ata ponokalafi e faamoemoe e luitau isi ia salamo mai na mea. O le a le faatasi le Agaga ma oe ma o le a apili na upu i lou faa’i a o e tautala atu ai. E le mafai ona outou malaga i ala ua ta’ua e Liae o “ala faasaina”<sup>5</sup> ma faamoemoe e taitai isi i le “ala lauitiiti ma le vaaapiapi”<sup>6</sup> e le—mafai ona faia faapena.

Ae o loo i ai se tali i lenei luitau mo outou e pei foi ona i ai ni tali i luitau o lena tagata sailiili o le a outou o atu i

ai. Pe o ai lava oe ma pe o le a se mea na e faia, e mafai ona faamagaloina oe. O outou uma taitoatasi e mafai ona lafoaia soo se solitulafono atonu o outou tauivi ai. Ae e le mafai ona outou faia e aunoa ma se tautinoga malosi i le talalelei, ma e le mafai ona outou faia e aunoa ma le salamo i le mea e manaomia ai. Ua ou talosagaina outou alii talavou ina ia mataalia ma ia mama. Pe a manaomia ai, ua ou talosagaina outou ia *e* mataalia ma ia *e* mama.

Ia, uso e, ua matou talanoa atu ma le toa ia te outou aua o soo se mea lava e le talanoaina malosi, e seasea lava aogā. Ua matou talanoa atu ma le toa ona o Satani o se tagata moni ua naunau e faaumatia outou ma ua outou fetaii ma ana faatosinaga i vaitausaga sili ona talavou. O lea ua matou taofimau mai ia te outou ma alaga atu i le malosi tele e pei lava ona matou iloa:

*Faalogo! i le leo ua valaau mai; Tatou auai! Tatou auai!*<sup>7</sup>

Au uo talavou, ua matou manaomia le faitau sefulu afe o nisi faifeautalai i masina ma tausaga o i luma atu. E tatau ona o mai mai se faitau aofai faatupulaia o le Perisitua Arona o le a faauuina, mataalia, mama, ma agavaa e auauna atu.

Ia i latou sa auauna atu pe o loo auauna atu i le taimi nei, matou te faafetai atu mo mea lelei ua outou faia, faapea ma soifua na outou pa’i atu i ai. Ia outou manuia! Matou te faailoa

atu foi o loo i ai nisi sa faamoemoe i o latou olaga atoa e fia auauna atu i ni misiona ae, mo mafuaaga faalesoifua maloloina po o isi faafitauli e le oo i ai lo latou malosi, ua le mafai ai ona fai. Tatou te faamamaluina ma le mitamita lenei vaega. Matou te iloa lo outou manao, ma e matou te faamalo atu i lo outou tuuto. Ua ia te outou lo matou alofa ma le faamemelo. Ua outou “i ai i le au” ma o le a outou i ai pea, e tusa lava pe ua aveesea outou ma le mamalu mai ni misiona faamamaluina. Ae ua matou manaomiaina le toatele o outou!

Ia, outou na le usoga o le Perisitua Mekisateko. Aua le ataata ma faalagolago i tua i le mafanafana o o outou nofoa. E le'i uma atu sa'u tala. Matou te manaomia le faitau afe o nisi ulugalii e auauna atu i misiona a le Ekalesia. O loo augani mai peresitene uma o misiona mo i latou. I soo se mea o latou auauna ai, o a tatou ulugalii e aumaia se tulaga faatagata matua i le galuega e le mafai e se aofaiga o ē ta'i 19 tausaga le matutua, pe o le a lava lo latou lelei, ona tuu mai.

Ina ia uunaia nisi ulugalii e auauna atu, ua faia e le Au Peresitene Sili ma le Korama a le Toasefululua se tasi o gaoioiga sili ona lototoa ma sili ona agalelei ua vaaia i le galuega faafaifeautalai i le 50 tausaga ua alu. Ia Me o lenei tausaga sa maua ai e taitai perisitua i le misiona se faasilasilaga e faapea o tau o fale mo ulugalii (ma e matou te talanoa atu *na o* tau o fale) o le a totogiina e tupe mo faifautealalai a le Ekalesia pe afai e sili atu le tau ma se aofaiga ua uma ona fuafuaina i le masina. O se faamanuiaga lava! O se fesoasoani lenei na auina mai le lagi e faaoga i pili sili ona taugata o loo feagai ma o tatou ulugalii i a latou misiona. Ua fuafuaina foi e le Usoga e mafai ona oo atu misiona a ulugalii i le 6 po o le 12 masina, faapea foi



ma le 18 po o le 23 e pei ona masani ai. I se isi tulaga matagofie, ua tuuina atu le faatagaga i ulugalii, ae totogi e i latou lava, e toe foi ai i le fale mo sina taimi puupuu mo ni faalavelave taua faaleaiga. Ma tuu le popole e faapea tou te o e tuitui i faitotoa pe tasi le faatulagaga lava lea e tasi e pei ona i ai i le au 19 tausaga! Matou te le o talosagaina outou e fai lena mea ae o loo i ai le tele o isi mea e mafai ona outou faia, faatasi ai ma se saolotoga tele i auala tou te faia ai na mea.

Uso e, mo mafuaaga faalesoifua maloloina, aiga, po o mea tau tupe, ua matou iloa o nisi o *outou*, o le a le mafai ona o i le taimi nei pe atonu foi e le mafai lava. Ae faatasi ai ma sina fuafuaga o le a mafai e le toatele o outou ona o.

Epikopo ma peresitene o siteki, ia talanoaina lenei manaoga i a outou fonotaga ma konafesi. Ia nonofo i luga o le tulaga i a outou sauniga ma vaavaai atu ma le agaga tatalo i le faapotopotoga mo ni uunaiga e uiga ia i latou e tataua ona maua se valaauga. Ona fautuaina lea o i latou ma fesoasoani i ai e faatulaga se aso mo lea auaunaga. Uso e, pe a tupu lena mea, ta'u atu i a outou avā afai e mafai ona outou tuua o outou nofoa faalua ma masini faatonutonu [mo TV] mo ni nai masina, e mafai foi ona latou tuua a latou fanau a fanau. O le a manuia lava na fanau pele, ma ou te folafola atu o le a outou faia mea mo i latou i le galuega a le Alii, i lalolagi

e lē uma, ia e le mafai lava ona outou faia pe afai tou te nonofo i le fale ma faaalu le tele o taimi ma i latou. O le a se faamanuiaga sili atu e mafai ona tuu atu e matua matutua i a latou fanau nai lo le fai atu e ala i galuega ma upu, “I le aiga lenei, tatou te o e faamisiona!”

O le galuega faafaifeautalai e le na o le pau lea o se mea e manaomia ona tatou faia i lenei Ekalesia tele ma le ofoofogia. Ae toetoe lava o isi mea uma e manaomia ona tatou faia, e faalagolago i tagata faatoa faalogo i le talalelei a Iesu Keriso ma ua auai mai i lo tatou faatuatua. E mautinoa lava o le mafuaaga autu lena o le poloaiga mulimuli a Iesu i

#### **Montreal, Quebec, Kanata**





le Toasefululua—“o lenei, ia outou o atu e fai nuu uma lava ma soo, ma papatiso atu ia te i latou i le suafa o le Tama, ma le Atalii, ma le Agaga Paia.”<sup>8</sup> Ma, seiloga lava e tupu lena mea, ona faatoa mafai lea ona oo mai le tele o faamanuiaga o le talalelei—lotogatasi o aiga, polokalama a le autalavou, folafolaga faaleperisitia, ma sauniga e taitai atu ai i tatou i le malumalu. Ae e pei ona molimau mai Nifae, e le mafai lava ona oo mai se mea o na mea seiloga e “ulu atu [se tasi] i le . . . faitotoa.”<sup>9</sup> Ona o na mea uma e ao ona fai i le savaliga i le ola e faavavau, ua tatou manao-mia ai le tele o faifeautalai e tatalaina lena faitotoa ma fesoasoani i isi e ulu atu i ai.

Ou te talosagaina alii uma, talavou ma matutua, o umia le perisitua ina ia malolosi atu ma tuuto atili e molimau atu, . . . o se molimau foi mo le lelei, se molimau mo le talalelei, se molimau mo le Atua. Uso e o vaitausaga uma, tatala o outou laulaufaiva ma vaai i vavega e fai e a outou upu i olaga o i latou “o e ua na o na taofia mai le upumoni ona ua latou le iloa le mea e maua ai.”<sup>10</sup>

*Vave i le taua ia le tuai;  
Pulou i le moni, talita ai.  
Tu i le fu'a ua agi mai!  
Savali ai fiafia i le nuu paia.*<sup>11</sup>

I le suafa o Iesu Keriso, amene. ■

#### FAAMATALAGA

1. Iosefa Samita—Talafaasolopito 1:15.
2. “Ua Tatou Tauto i le Taua,” *Viiga*, nu. 250.
3. Mataupu Faavae ma Feagaiga 84:44; tagai foi Teuteronomi 8:3; Mataio 4:4.
4. *Lectures on Faith* (1985), 74.
5. 1 Nifae 8:28.
6. 2 Nifae 31:18.
7. (*Viiga*, nu. 157).
8. Mataio 28:19.
9. 2 Nifae 33:9.
10. Mataupu Faavae ma Feagaiga 123:12.
11. (*Viiga*, nu. 157).



**Saunia e Epikopo Keith B. McMullin**  
Fesoasoani Lua i le Au Epikopo Pulefaamalumu

## O Le Mana o le Perisitua Arona

*O outou faatasi ma le tofi o le Perisitua Arona ua outou umia e taua tele i le galuega a le Tama Faalelagi faapea ma Ana fanau ma le sauniuniga o lenei lalolagi mo le Afio Mai Faalua.*

I se sauniga talu ai nei faaleaoaga mo le Au Pulega Aoa, sa toe faamamafa mai ai e Peresitene Thomas S. Monson ia tiute ma avanoa mo e o tauaveina le Perisitua Arona.<sup>1</sup> O le agaga o lena aoaga o le a ou talanoa atu ai ia te outou.

O tiute e faataunuuna lelei, e iloa ai le taunuuga o nuu ma malo. E matua taua lava le mataupu faavae o le tiute ua apoapoaiina ai ē o tauaveina le perisitua. “O le mea lea, ia tuu atu nei i tagata taitoatasi e aoao lona tiute, ma galue i le tofi ua tofi i ai o ia, i le filiga atoa”<sup>2</sup>

Sa faamalamalama mai e Peresitene Monson, “E mafai ona oo mai ma le filemu le valaau a le tiute pe afai tatou te faia tiute ua tatou maua o le perisitua ua tatou umia.”<sup>3</sup> Sa sii mai e Peresitene Monson le saunoaga a Siaosi Alapati Samita e faapea: “O lou tiute muamua lava o le iloa lea o mea e finagalo i ai le Alii ona e faalateleina lea o lou valaauga i le mana ma le malosi o lou perisitua paia i luma o ou uso a tagata i se ala o le a fiafia ai tagata e mulimuli ia te oe.”<sup>4</sup>

A o fetalai ai i Lona tiute, sa faapea mai le Alii: “Ou te le usiusitai i lo’u

lava loto, a o le finagalo o le Tama.”<sup>5</sup> “Aua ou te lei alu ifo mai le lagi e fai lo’u lava loto, a o le finagalo o le ua auina mai a’u.”<sup>6</sup> Ona sa faatinoina e Iesu Keriso Lona tiute, o lea ua “mafai ai ona faaolaina tagata uma, e ala i le usiusitai i tulafono ma sauniga o le Talalelei.”<sup>7</sup> Uso e, o le tulaga faatonuina lenei e tatau ona tatou mulimuli ai.

I lo’u aafiaga ua ou matauina ai outou o loo auuina atu o ni tiakono, aoao, ma ositulaga o loo outou naunau, faatuatua, ma agavaa i le faia o o outou tiute ua faamoemoeina mai ia te outou. Matou te faamemelo ia te outou. O lo outou mataalia ua matou mataalia ai foi, o o outou tomai ua ofoofogia, ua faamalosi i matou i a outou fegalegaleaiga. O outou faatasi ma le tofi o le Perisitua Arona ua outou umia e taua tele i le galuega a le Tama Faalelagi faapea ma Ana fanau ma le sauniuniga o lenei lalolagi mo le Afio Mai Faalua o Lona Alo paia. O la matou vaaiga mamao ia te outou e i talaatu o tausaga o lo outou matutua. Na saunoa Paulo e uiga ia te outou e faapea, “Aua ne’i inoino se tasi i lou taulealea; a ia fai oe ma faaaoao i e ua faatuatua, i le upu, ma le amio, ma le



alofa, ma le loto, ma le faatuatua, ma le le gaioia”<sup>8</sup>

*I alii anamua sa oo mai i ai i se taimi  
Le perisitua na faaigoaina ia Arona.  
Na auala mai ia sa Levī, ositaulaga,  
ma perofeta foi,  
Ua auuana atu e faamanuiaina  
fanau a le Atua.*

*Ona afio mai lea o le Faaola o le  
lalolagi  
Ma sailia le tasi e igoa ia Ioane,  
Ina ia papatisoina i lea lava mana  
e tasi  
Ma amata ai le galuega o le  
faaolataga.*

*I aso e gata ai sa toefuataiina mai ai  
I le lalolagi leni lava mana e tasi,  
Ina ia fanau mai i le agaga o se tasi  
Upumoni uma o le talalelei.*

*O le Perisitua Arona, o se upumoni  
ofoofogia,  
Ua aumaia e saunia ai—  
Le faataunuuina o le togiola  
E ala mai i le Alo Pele o le Atua!*

*Ma o le na te faaaogaina nei mana—  
‘E le soona faaaogaina e se tamaitiiti.  
O le i ai ia te ia o le mana o le  
perisitua  
Tatou te fai atu ai, “Faauta i le  
tamatanene!”<sup>9</sup>*

“O le mana ma le pule o le perisitua mau lalo, o le faaArona, o le taofia lea o ki o le auuana atu o agelu, ma le taitai i sauniga faaletino, o le tusi

o le tala lelei, o le papatisoga o le salamo, mo le faamagaloina o agasala e tusa ma feagaiga ma poloaiga.”<sup>10</sup> Na matauina e Peresitene Boyd K. Packer e faapea: “Ua tatou lelei tele i le faasa-fuaina atu o le *pule* o le perisitua. Ua toetoe soo le lalolagi o tatou faatula-gaina ai le pule o le perisitua. . . . Ae ou te manatu, ua televave tele lo tatou tuuina atu o le *pule* o le perisitua nai lo le tuuina atu o le *mana* o le perisitua.”<sup>11</sup> Mo le tulaga lelei tumau-faavavau o fanau a le Atua, e tatau ai ona faasa’o leni mea.

Ua ta’u mai e lo tatou perofeta ia i tatou le ala e faia ai leni mea. I le sii maia o le saunoaga a George Q. Cannon, sa saunoa ai Peresitene Monson e faapea: “Ou te manao e vaaia leni malosi ma le mana ua sosolo i le tino atoa o le Perisitua, mai lava i le taitai aupito mau luga e oo atu i le tiakono aupito faatauva ma sili ona lotomaulalo i le Ekalesia. E tatau i alii uma ona saili atu ma olioli i faaaliga a le Atua, o le malamalama o le lagi e susulu i lona agaga ma tuu atu ia te ia le malamalama e faata-tau i ona tiute, e faatatau i vaega o le galuega ua i ai i ona tiute o lona Perisitua.”<sup>12</sup>

O a mea e mafai ona faia e se tiakono, se aoao, po o se ositaulaga e maua ai le agaga o faaaliga, ma faalautele ai lona valaauga? E mafai ona ia ola i se auala e olioli ai i le mana faamama, faapaia, ma faamalalama a le Agaga Paia.

O le taua o leni mea o loo maua i upu nei mai ia Alema: “Ma o leni ou

te fai atu ia te outou o le faatulagaga leni ua valaauina i ai au, . . . e talai atu . . . i le tupulaga faia’e . . . ina [ia] latou salamo ma *toe fanauina*.”<sup>13</sup> Pe a toe fanauina se tasi, e suia lona loto. Ua le toe i ai sona manao mo mea leaga pe lē mama. Ua ia lagonaina se alofa loloto ma le usiusitai mo le Atua. Ua manao ina ia lelei, ia auuana atu i isi, ma tausi i poloaiga.<sup>14</sup>

Na faamatalaina e Peresitene Iosefa F. Samita lona aafiaga tele i leni suiga: “O le lagona na oo mai i ou luga o le filemu a’ia’i, o le alofa ma le malamalama. Sa ou lagona i lo’u loto afai sa ou agasala . . . ua faamagaloina au; auu ua faamama-ina moni lava au mai le agasala; na pa’i mai i lo’u loto, ma sa ou lagona lo’u le fia manao e faamanualia se iniseti sili ona itiiti i lalo o ou vae. Sa ou lagona e pei ua ou manao e fai le lelei i soo se mea, i tagata uma ma i mea uma. Sa ou lagona le ola faafouina, sa faafouina lo’u manao e fai le mea tonu. Sa leai lava se vaega e tasi o le naunautaiga mo le agasala o totoe i lo’u loto. E moni, ua na o au o se tama laitiiti, . . . ae o le uunaiga leni na oo mai i o’u luga, ma ou te iloa e mai le Atua, ma sa avea ma o loo avea pea ma molimau ola ia te au i lo’u taliaina o le Alii.”<sup>15</sup>

O lea ua matou valaau atu ai ia te outou uso talavou maoae ina ia tau-mafai ma le filiga ia “toe fanauina.”<sup>16</sup> Tatalo mo leni suiga telei lou olaga. Suesue i tusitusiga paia. Ia sili atu le manao e iloa le Atua nai lo se isi lava mea ma ia avea e faapei o Lona Alo paia. Olioli i lou talavou ae ia “tiai [ese] mea a tamaiti”:<sup>17</sup>

Ia taumamao mai talanoaga leaga ma le le aoga.

Sola ese mai mea leaga uma.

Aloese mai finauga.

Salamo pe a manaomia.<sup>18</sup>

O le a fesoasoani leni mea ia

te oe e te tula'i mai ai i lou tulaga malualii faatamatane. O uiga lelei o le lototele, faatuatua, lotomauualalo, faatuatua ma le lelei o le a fai mā oe. O le a faaaloologia oe e au uo, o le a viia oe e ou matua, o le a faalagolago atu uso o le perisitua ia te oe, ma o le a faamemelo tamaitai talavou ma oo ina lelei atili i latou ona o oe. O le a faamamaluina oe e le Atua ma faamanuiaina au auaunaga faaleperisitua i le *mana mai luga*.

O isi o i matou uma o le a faia la matou pitolaau. O le avea ai o ni matua, ma matua matutua, o le a matou saunia outou mo isi auaunaga lotototoa i le malo o le Atua. O le avea ai ma ni o outou uso, o le a avea ai i matou ma faataitaiga mo outou e faata'ita'i i ai. O le a matou faateleina le malosi o a outou korama. O le a matou lagolago i a outou au peresitene o korama a o latou faaaogaina a latou ki e pulefaamalumu ai. O le a matou tuuina atu ia te outou avanoa e faataunuu atoatoa ai tiute o le Perisitua Arona ma faalautele ai o outou valaauga o i ai.

E ala mai i la outou auaunaga, o le a oo mai ai faamanuiaga maoae i le Ekalesia. "E tautatala agelu i le mana o le Agaga Paia."<sup>19</sup> E mafai foi ona outou faia lena mea. A o outou tautatala atu i le mana o le Agaga Paia, ma faatautaia faatusa paia o le faamanatuga, o le a taumafai alii ma tamaitai, tama ma teine e salamo, ia faateleina lo latou faatuatua ia Keriso, ma ia mafuta ai pea le Agaga Paia ma i latou.

A o outou anapopogi ma aoina le taulaga anapogi, o le a uunaia tagata e mamanu a latou galuega e faataitai i le Faaola. Na tausia lelei e le Alii e matitiva, ma e na tuulafoaiina, ma sa Ia fetalai atu: "Mulimuli mai ia te au."<sup>20</sup> O la outou auaunaga i le tausia o ē le o faamanuiaina tele tatou te punouai ai i Lana galuega paia, ma fesoasoani



ai foi ia tatou faatumauiina le faamagaloga mo a tatou lava agasala ua te'a.<sup>21</sup>

A o outou "asiasi atu i fale o tagata taitoatasi,"<sup>22</sup> aua le fefefe pe matamumu. O le a tuu atu e le Agaga Paia ia te outou i le taimi tonu lava mea tou te tautatala atu ai, le molimau e ta'u atu, le auaunaga e tuu atu.

O a outou taumafaiga maelega e "leoleo . . . i . . . le ekalesia e le au-noa"<sup>23</sup> o le a faamanuiaina. O o outou uiga lotomauualalo ma le faamaoni o le a faamalūlūina ai loto e oo lava i ē le talitonu ma aveesea ai le pule a le fili. O a outou valaaulia mo isi e o mai tou te o faatasi i le lotu, tou te aai faatasi ma feinu i le faamanatuga, ma outou auauna atu faatasi o le a avea ma se faamanuiaga talileleia mo i latou ua leiloloa i mea pogisa o loo muiiti ai le malamalama o le talalelei pe ua le mumu ai foi.

E, o'u uso e talavou pele, "aua ne'i e faatalalē i le mea alofa na tuuina atu ia te oe,"<sup>24</sup> lea na e mauaina ina ua faaee atu ma faauuina oe i le Perisitua Arona.

"Aua ua le foaiina mai e le Atua ia te i tatou le Agaga e mata'u ai, a o le Agaga e faamalosi ai, ma alofa ai, ma mafaufau tonu ai.

"O lenei aua e te mā i le molimau i lo tatou Alii . . . A ia tiga faatasi i . . . le talalelei e tusa ma le mana o le Atua;

"O lē na . . . valaau mai [i tatou] i le valaau paia, . . . na foaiina mai ia i tatou ia Keriso Iesu talu mai le vavau."<sup>25</sup>

O lo tatou perofeta pele ua "valaauina outou i le tagavai [o le perisitua]"<sup>26</sup> Matou te faamamaluina outou, tatalo mo outou, olioli i le auauna faatasi ai ma outou, ma faafetai atu i le Atua mo le mana o la outou auaunaga faaola.

Ou te molimau atu, o le Atua lo tatou Tama e Faavavau o loo afio i le lagi i luga. O Iesu Keriso o le Alo paia o le Atua, o le Togiola o le lalolagi, ma o outou na o le au Perisitua Arona o Ana avefeau ia i le fogaeleele, i le suafa o Iesu Keriso, amene. ■

#### FAAMATALAGA

1. Thomas S. Monson, General Authority training meeting, Apr. 2010.
2. Mataupu Faavae ma Feagaiga 107:99.
3. Thomas S. Monson, "O Le Valaauga Paia o le Auauna Atu," *Liahona*, Me 2005, 54.
4. George Albert Smith, i le Conference Report, Apr. 1942, 14; tagai foi i le Thomas S. Monson, *Liahona*, Me 2005, 54.
5. Ioane 5:30.
6. Ioane 6:38.
7. Mataupu Faavae o le Faatuatua 1:3.
8. 1 Timoteo 4:12.
9. Solo saunia e Keith B. McMullin; tagai i le Keith B. McMullin, "Faauta i le Tagata," *Liahona*, Ian. 1998, 46.
10. Mataupu Faavae ma Feagaiga 107:20.
11. Boyd K. Packer, "O Le Mana o le Perisitua," *Liahona*, Me 2010, 7.
12. George Q. Cannon, *Deseret Weekly*, Nov. 2, 1889, 593; quoted by Thomas S. Monson in a General Authority training meeting, Apr. 2010.
13. Alema 5:49; faaopopo le faamamafa.
14. Tagai i le Marion G. Romney, "According to the Covenants," *Ensign*, Nov. 1975, 71-73.
15. Joseph F. Smith, i le Conference Report, Oct. 1902, 3.
16. Tagai i le Ioane 3:3-7; Alema 5:14-21, 49.
17. 1 Korinito 13:11.
18. Tagai i le 2 Timoteo 2:16, 22-26.
19. 2 Nifae 32:3.
20. Luka 18:22; tagai foi i le Ioane 14:12-14.
21. Tagai i le Mosaea 4:26.
22. Mataupu Faavae ma Feagaiga 20:47.
23. Mataupu Faavae ma Feagaiga 20:53.
24. 1 Timoteo 4:14.
25. 2 Timoteo 1:7-9.
26. Thomas S. Monson, General Authority training meeting, Apr. 2010.



Saunia e Elder W. Christopher Waddell

○ Le Fitugafulu

## ○ Le Avanoa i le Olaga

*E ala atu i lau auaunaga tuuto ma le ositaulaga lotomalie,  
o le a avea ai lau misiona ma eleele paia ia te oe.*

○ se mea taua i le olaga o se faifeautalai o lana faatalanoaga mulimuli, po o le, “faatalanoaga o le a alu [i le fale],” ma le peresitene o le misiona. I le fatu o le faatalanoaga, o se talanoaga lea o mea e foliga mai o se olaga atoa o aafiaga e manatuaina pea ma lesona autu na maua i le na o le 18 i le 24 masina.

E ui o le tele o nei aafiaga ma lesona e taatele i le galuega faafaifeautalai, ae o misiona taitasi e tulaga ese, i luitau ma avanoa o le a faloina ma tofotofoina ai i tatou e tusa ai ma o tatou lava manaoga faapitoa ma uiga patino.

I aso ua leva ae tatou te le'i taitai tuua o tatou aiga ma auaiga faalelalo-lagi e auauna atu i se misiona faafaifeautalai, sa tatou tuua ai o tatou matua faalelagi e faataunuu la tatou misiona i le olaga nei. O loo i ai so tatou Tama o le Lagi, na te silafia i tatou—o o tatou malosiaga ma vaivaiga, o tatou tomai ma gafatia. Na te silafia po o lē fea le peresitene o le misiona ma soa ma o lē fea foi au paia ma tagata sailiili tatou te manaomia ina ia mafai ona avea ai [tatou] ma faifeautalai, o le tane, ma le tamā, ma le perisitua e mafai ona avea ai i tatou.

E tofia e perofeta, tagatavaai, ma talifaaaliga ia faifeautalai i lalo o le taitaiga ma le musumusuga a le Agaga Paia. O peresitene musuia o misiona e taitaia siitaga [o faifeautalai] i le tai ono vaiaso ma vave ona iloa o loo silafia lelei lava e le Alii le mea e finagalo o Ia e auauna ai faifeautalai taitoatasi.

O ni nai tausaga ua mavae, sa auauna faamisiona ai Elder Javier Misiego, mai Madrid, Sepania, i Arisona. I lena taimi, o lona valaauga o le misiona i le Iunaite Setete sa foliga mai sa fai lava si ese, ona o le toatele o alii talavou mai Sepania sa valaauina e auauna atu i lo latou lava atunuu.

I le faaiuga o se faeasaita a le siteki, lea sa valaaulia ai i laua ma lana soa e auai, sa oo atu ai se tagata ua le toaga i le Ekalesia, o lē sa aumai e sana uo ia Elder Misiego. O le taimi muamua lea na faatoa oo ai lenei alii i totonu o le falesa talu mai le tele o tausaga. Sa fesiligia ia Elder Misiego pe na te iloaina se tagata e igoa ia José Misiego i Madrid. Ina ua tali atu Elder Misiego o le igoa o lona tama o Jose Misiego, sa toe fesili atu ma le fiafia le alii i nisi fesili e faamautu ai o le Jose Misiego sa'o lea. Ina ua iloa sa la talanoa e uiga i le tagata lava lea e tasi, sa amata

loa ona tagi le tagata lea ua le toaga i le Ekalesia. “Sa na o lou tamā le tagata na ou papatisoina i la'u misiona atoa,” sa ia fai atu ai ma faamatala le mea na i ai lana misiona, i lona mafaufau, o se toilalo. Sa ia tuuaia ona tausaga o le toaga i le lotu i nisi o lagona o le le atoatoa ma le popole, ma le talitonu i se isi itu, sa ia tuua i lalo le Alii.

Ona faamatala lea e Elder Misiego le taua o lenei faifeautalai lea ua manatu ua toilalo i lona aiga. Sa ia ta'u atu ia te ia, o lona tamā, sa papatisoina a o avea ma se talavou matua nofofua, sa faaipoipo i le malumalu, ma o Elder Misiego o le lona fa o lana fanau e toaono, ma o tama uma e toatolu ma se tuafafine sa auauna atu o ni faifeautalai faamisiona, ma sa toaaga uma i latou i le Ekalesia, ma o i latou uma o e ua faaipoipo ua faamauina i le malumalu.

Sa amata ona tagi lotulotu le faifeautalai lē toaga ua maea lana misiona. E auala mai i ana taumafaiga ua ia aoaoina ai nei, e toatele olaga ua faamanuiaina, ma sa auina atu e le Alii se alii faifeautalai mai Madrid, Sepania, e oo atu i se faeasaita i Arisona e ta'u atu ia te ia sa le'i toilalo o ia. E silafia e le Alii le mea e finagalo o Ia e auauna ai faifeautalai taitoatasi.

Po o le a lava le auala e filifilia ai e le Alii i tatou i le taimi o se misiona, o faamanuiaga o le galuega faafaifeautalai e le i fuafuaina e muta pe a faamaloloina i tatou e lo tatou peresitene o le siteki. O lau misiona o se nofoaga o aoaoga faamasani mo le olaga atoa. O aafiaga, lesona, ma molimau e maua e ala i auaunaga faamaoni ua fuafuaina e aumai ai se faavae e faaogatonu i le talalelei, o le a faapea ona tumau ai i le olaga nei ma oo atu i le faavavau. Ae peitai, ina ia faaauau pea faamanuiaga pe a maea le misiona, e i ai tulaga e ao ona ausiaina. I le Mataupu Faavae ma Feagaiga tatou te faitau ai faapea,

“Aua o i latou uma o e e fia mauaina se faamanuiaga i lo’u lima ia mau i le tulafono na tofia mo lena faamanuiaga, ma ona tulaga” (MF&F 132:5). O lenei mataupu faavae o loo aoaoina i le tala o le Esoto.

Ina ua uma ona maua mai lona faatonuga mai le Alii, sa toe foi atu Mose i Aikupito e aveese mai le fanauga a Isaraelu mai le nofopologa. Sa le mafai e lea mala ma lea mala ona faamautuina lo latou saolotoga, lea na oo atu ai i le mala lona 10 ma o le mulimuli foi lea: “Aua o le po nanei ou te ui ane ai i le nuu o Aikupito, ma ou taia ulumatua uma lava i le nuu o Aikupito” (Esoto 12:12).

Ina ia puipuia mai le “na te fasiotia” (fuaiupu e 23), na faatonuina ai e le Alii ia Lona nuu e osi se taulaga, o se tamai mamoe “ia sa’o ona lelei” (fuaiupu e 5), ma ia aumai le toto mai le taulaga. Ia latou “ave nisi toto” ma nini ai faitotoa o fale taitasi— “i pou e lua [o le faitotoa] ma . . . lona faalava i luga” (fuaiupu e 7)—faatasi ai ma le folafolaga lenei: “Ou te vaai atu foi i le toto, ona ou sosopo ai lea ia te outou, e le oo foi ia te outou le mala e fano ai” (fuaiupu e 13).

“Sa o loa le fanauga a Isaraelu, ma fai e pei ona sa poloaiina ai e le Alii” (fuaiupu e 28). Sa latou faia le taulaga, aumai le toto, ma nini ai o latou fale. “Ua oo i le tulua o po ma ao, ona fasi ai lea e Ieova o ulumatua uma lava i le nuu o Aikupito” (fuaiupu e 29). Sa puipuia Mose ma lona nuu, e tusa ai ma le folafolaga a le Alii.

O le toto na faaoga e tagata Isaraelu, o le faatusa o le Togiola i le lumanai a le Faaola, o se taunuuga o le taulaga sa latou osiaina. Ae peitai, o le taulaga ma le toto lava ia semanu e le lava mo le mauaina o le faamanuiaga folafolaina. *Ana le ninia le pou o le faitotoa i le toto, semanu e le aoga le taulaga.*



Na aoa mai Peresitene Thomas S. Monson: “O le galuega faafaifeautalai e faigata. E manaomia ai le malosi o se tagata, e uma i ai le malosi o se tagata, e manaomia ai le taumafaiga sili ona lelei a se tagata. . . . E leai se isi galuega e manaomia ai ni itula uumi po o le tuuto tele naua po o se ositaulaga faapena ma le tatalo faatauanau” (“That All May Hear,” *Ensign*, May 1995, 49).

O se taunuuga o lena taulaga, tatou te foi mai ai mai a tatou misiona ma a tatou lava meaalofo. O le meaalofo o le faatuatua. O le meaalofo o le molimau. O le meaalofo o le malamalama i le matafaioi a le Agaga. O le meaalofo o le suesue i aso uma i le talalelei. O le meaalofo o le tautuaina o lo tatou Faaola. O meaalofo ua teuina ma le faaeteete i tusitusiga paia ua mafo’efo’e, o kopi masaesae o le *Tala’i La’u Talalelei*, o api talaaga a le faifeautalai, ma ni loto faafetai. Ae peitai, e pei o le fanauga a Isaraelu, o faamanuiaga faifai pea e o faatasi ma le galuega faafaifeautalai e manaomia le faaagaina pe a maea le osigataulaga.

O ni nai tausaga ua mavae, a o ma pulefaamalumalu ai ma Sister Waddell i le Misiona a Sepania Paselona, ou te tuuina atu ai se tofiga mulimuli se tasi i faifeautalai taitoatasi i le taimi o a latou faatalanoaga mulimuli. A o latou foi atu i aiga, e talosagaina i latou ia vave ona faaalu se taimi e mafaufau ai i lesona ma meaalofo na tuuina atu ia i latou e se Tama oi le Lagi agalelei. Sa

talosagaina i latou e tusi ma le agaga tatalo se lisi ma mafaufau i ni auala e faaoga lelei ai na lesona i le olaga pe a uma le misiona—o lesona o le a aafia ai itu uma o o latou olaga: filifiliga faaleaoaoga ma faalegaluega, faaipopoga ma fanau, auaunaga i le lumanai i le Ekalesia ma le mea aupito sili ona taua, o ai o le a faaauau pea ona avea ai i latou, ma lo latou atinaega faifai pea o ni soo o Iesu Keriso.

E leai se faifeautalai ua maea se misiona e faapea, ua tuai tele ona mafaufau i lesona na maua mai e ala i le auaunaga faamaoni, ma ia atili faaagaina ma le maelega. A tatou faia faapea, o le a tatou lagonaina atoatoa le faatosinaga a le Agaga i o tatou olaga, o le a faamalolosa o tatou aiga, ma o le a tatou latalata atili atu i lo tatou Faaola ma le Tama oi le Lagi. I se konafesi aoa na muamua atu, sa tuuina atu ai e Elder L. Tom Perry le valaaulia lenei: “Ou te valaau atu ia te outou faifeautalai ua maea misiona ina ia toe tuuto atu outou lava, ina ia toe faaosofia i le naunau ma le agaga o le galuega faafaifeautalai. Ou te valaau atu ia te outou ia outou foliga i vaega, ia avea ma vaega, ma ia faatino le vaega o se auuana a lo tatou Tama oi le Lagi. . . . Ou te manao e folafola atu ia te outou o loo teuina ni faamanuiaga maoae mo outou pe afai e faaauau ona outou fetaomi atu i luma ma le naunautai lea sa ia te outou muamua o ni faifeautalai

faamisiona” (“O Faifeautalai ua Taliu Mai le Misiona,” *Liahona*, Ian. 2002, 88, 89; *Ensign*, Nov. 2001, 77).

O lenei la, i alii talavou o le taimi nei o le a auauna atu i se misiona faafaifeautalai, ou te faasoa atu le fautuaga a Peresitene Monson mai ia Oketopa o le tausaga ua te’a: “Ou te toe fai atu i mea ua loa ona aoao mai e perofeta—o alii talavou agavaa uma lava, malolosi e tataua ona saunia e auauna atu i se misiona. O le galuega faafaifeautalai o se tiute faaleperisitua—o se matafaiou ua faamoemoe le Alii mai ia i tatou ua tele naua mea ua tuuina mai i ai” (“A o Tatou Toe Potopoto Faatasi Ai,” *Liahona* Nov. 2010, 5–6).

E pei lava o faifeautalai i aso la ma aso nei, e silafia oe e le Alii, ma ua i ai se aafiaga faalemisiona ua saunia mo oe. Na te silafia lou peresitene o le misiona ma lona faletua lelei tele, o e o le a alolofa ia te oe e pei lava o le laua fanau, o e o le a sailia musumusuga ma taitaiga mo oe. Na te silafia au soa taitoatasi ma mea o le a e aoaoina mai ia i latou. Na te silafia eria taitasi o le a e galue ai, o le au paia o le a e feiloai i ai, o tagata o le a e aoaoina, ma olaga o le a i ai ou aafiaga mo le faavavau.

E ala atu i lau auaunaga tuuto ma le ositaulaga lotomalie, o le a avea ai lau misiona ma eleele paia ia te oe. O le a e molimauina le vavega o le liua a o galue le Agaga e ala atu ia te oe e pai atu i loto o i latou e te aoaoina.

A o e sauniuni e auana atu, e tele lava ni mea e tataua ona fai. O le avea ma se auauna mataalia a le Alii, o le a tele atu ni mea e manaomia ai nai lo na o le vaetofaina, faapiiina o se pine o le igoa, po o le ulufale atu i se nofoaga autu e aoaoina ai faifeautalai. O se faagasologa e vave lava ona amata mai a o lei ta’ua oe o se “Elder.”

Ia e taunuu atu i lau misiona ma lau lava molimau e uiga i le Tusi a Mamona, na maua e ala i le suesue ma le tatalo. “O le Tusi a Mamona o le faamaoniga mamana lea o le paia o Keriso. O le faamaoniga foi lea o le Toefuataiga e ala mai i le Perofeta o Iosefa Samita. . . . I le avea ai ma se faifeautalai, e ao lava ona muamua i ai sa oe lava molimau patino e moni le Tusi a Mamona. . . . O lenei molimau a le Agaga Paia o le a avea ma taulaiga tutotonu o lau aoao atu” (*Tala’i La’u Talalelei: O Se Taiala mo le Galuega Faafaifeautalai* [2004], 103).

Ia taunuu atu i lau misiona ma le agavaa i le mafutaga a le Agaga Paia. I upu a Peresitene Ezra Taft Benson: “O le Agaga o le elemene aupito taua e tasi i lenei galuega. Faatasi ai ma le faalauteleina e le Agaga o lou valaauga, e mafai ona e faia vavega mo le Alii i totonu o le misiona. A aunoa ma le Agaga, o le a le mafai ona faamanuiaina oe e tusa lava po o a au taleni ma tomai” (i le *Tala’i La’u Talalelei*, 176).

Ia taunuu atu i lau misiona ua e saunia e galue. “O lou faamanuiaina o se faifeautalai [o le a] muai fuatiaina i lou tautino e saili, aoao, papatiso, ma faamau.” O le a faamoemoeina oe e te “galue malosi i aso uma, i le [faia] o le mea sili e te mafaia ia aumai ai agaga ia Keriso” (*Tala’i La’u Talalelei*, 10, 11).

Ou te toe tuuina atu le valaaulia a Elder M. Russell Ballard, na tuuina atu i se vaega na muamua atu o alii talavou na sauni e auauna atu: “Matou te vaavaai atu ia te outou, o’u uso e, talavou o le Perisitua Arona. Matou te manaomia outou. E pei o le autau e 2,000 a Helamana, o outou foi o atalii agaga o le Atua, ma e mafai foi ona faaeina outou i le mana e fausia ai ma puipuia ai Lona malo. Matou te manaomia outou e osi feagaiga paia,

e pei foi ona sa latou faia. Matou te manaomia outou ia usiusitai lelei ma faamaoni, e pei foi ona sa i ai i latou” (“O Se Tupulaga Sili Ona Maoae o Faifeautalai,” *Liahona*, Nov. 2002, 46).

A o e taliaina lenei valaaulia, o le a e aoaoina se lesiona sili, e pei ona sa aoaoina e Elder Misiego ma i latou uma o e sa galulue ma le faamaoni, foi atu, ma faaaogaina. O le a e iloaina o tuleiga a lo tatou perofeta, o Peresitene Thomas S. Monson, ua moni ia: “O le avanoa faamisiona i le olaga atoa e a oe lea. O loo faatalitali mai faamanuiaga o le faavavau mo oe. O lou avanoa lea ia le avea oe ma se tagata matamata ae ia avea ma tagata e faatinoina le tulaga o le auaunaga faaleperisitua” (*Liahona*, Iul. 1995, 55). Ou te molimau atu ai i le moni o lenei mea i le suafa o Iesu Keriso, amene. ■





**Saunia e Peresitene Dieter F. Uchtdorf**  
Fesoasoani Lua i le Au Peresitene Sili

# O Le Faia i le Ala a le Alii

*O mataupu faavae o le uelefea a le Ekalesia ua le na o ni manatu lelei; ae o ni upumoni ua faaalua mai le Atua—o Ona ala ia e fesoasoani ai i e le tagolima.*

Ua onosefulu lima tausaga talu ai, faatoa maea lava le Taua Lona a le Lalolagi, sa ou iloa patino ai faamanuiga o le polokalama o le uelefea a le Ekalesia. E ui lava sa ou tamaitiiti, ae ou te manatua pea le suamalie o le tofo o apa pea faatasi ma polesi ua faavelaina ma le manogi faapitoa o lavalava na foai atu e tagata agaalofo o le Ekalesia mai le Iunaite Setete i le Au Paia Siamani ina ua mae’a le taua. O le a le galo lava ia te au ma o le a ou faamemelo pea i nei faatinoga o le alofa ma le agalelei ia i matou o e sa le tagolima tele.

O lenei aafiaga patino ma le faamanatuga o le 75 tausaga o le fuafuaga musuia o le uelefea ua mafua ai ona ou toe mafaufau i mataupu faavae autu o le tausaiaina o e matitiva ma e le tagolima, ina ia mafai ona ola faalagolago ia i latou lava, ma auauna atu ai i o tatou uso a tagata.

## I Le Faapogai o lo Tatou Faatuatuaga

O nisi taimi tatou te vaai ai i le uelefea ua na o se isi foi autu o le talalelei—o se tasi o le tele o lala o le laau o le talalelei. Ae ou te talitonu i le fuafuaga a le Alii, o lo tatou tautino atu

i mataupu faavae o le uelefea e tatau ona i ai i le faapogai tonu o lo tatou faatuatuaga ma le tuuto atu ia te Ia.

Talu mai le amataga o aso, sa fetalai ai lo tatou Tama Faalelagi ma le manino tele i lenei mataupu: e aofia ai se aioiga mālū, e pei o, “Afai e te alofa mai ia te au . . . ia e manatua e ua matitiva, ma ia faapaiaina mo lo latou tausiga ni mea mai au meatotino”;<sup>1</sup> faapea foi ma ni poloaiga tuusao, “Ma ia manatua i mea uma e ua matitiva ma e ua le tagolima, e ua mama’i ma e ua puapuagatia, ona o ia o le na te le faia ia mea, o ia lava lea e le o so’u soo”;<sup>2</sup> e faapena foi i le lapataiga malosi, “O lea, afai e ave e se tagata se mea mai le tele o mea uma ua Ou faia, ma lē tuu atu lana vaega, i e matitiva ma e ua le tagolima, e tusa ma le tulafono o la’u talalelei, o le a sii ae e ia ona mata faatasi ma e amioleaga i seoli, ua maua i le mafatia.”<sup>3</sup>

## O Le Faaletino ma le Faaleagaga ua Fusia Faatasi

O poloaiga sili e lua—ia alofa atu i le Atua ma o tatou tuaoi—o se tuufaatasiga lea o le faaletino ma le faaleagaga. E taua le manatua o nei poloaiga e lua ua ta’ua [o poloaiga]

“sili” ona e autu i ai isi poloaiga uma.<sup>4</sup> I se isi faaupuga, o a tatou mea faamuamua a le tagata lava ia, faaleaiga, ma faale-Ekalesia e ao ona amata ii. O isi sini uma ma faatinoga e tatau ona puna mai i vaipuna o nei poloaiga sili e lua—mai lo tatou alofofa i le Atua ma o tatou tuaoi.

E pei o itu e lua o se tupe, o le faaletino ma le faaleagaga e le mafai ona tuueseeseina.

Na folafola mai e le Puna o le ola uma, “Ua faaleagaga mea uma lava ia te a’u, ma Ou te lei tuuina atu lava ia te outou i soo se taimi se tulafono sa faaletino.”<sup>5</sup> O lona uiga ia te a’u “o le ola faaleagaga o le ola muamua lea o *ola* uma lava. E le na o se mea e tau ina iloa ma suesueina, ae ao ona ola ai.”<sup>6</sup>

Ae paga lea, e i ai tagata ua le manatu i le “faaletino” ona ua latou mafaufau e itiiti sona taua. Ua latou faapelepele i le faaleagaga ae faaitiiti i le faaletino. E ui e taua le taulai atu o o tatou manatu i le lagi, ae tatou te misia le uiga moni o la tatou tapuaiga pe afai e le taulai atu foi a tatou auu-naga i o tatou uso a tagata.

Mo se faataitaiga, sa fausia e Enoka se nuu o Siona e ala i faagasologa faaleagaga o le fatuina o se nuu e tasi le loto ma tasi le manatu *ma le* galuega faaletino o le faamautinoaina e le o i ai se mativa ia i latou.<sup>7</sup>

E pei lava ona masani ai, e mafai ona tatou vaai atu i lo tatou faataitaiga atoatoa, o Iesu Keriso, mo se mamamu. E pei ona aoao mai ia Peresitene J. Reuben Clark, “Ina ua afio mai le Faaola i le lalolagi e lua ni ana misiona tetele; o le tasi o le faataunuaina o lana matafaioi o se Mesia, le togiola mo le pa’u, ma le faataunuaina o le tulafono; o le isi o le galuega lea na ia faia i ona uso ma tuafafine i la le tino i le faamaloloina o o latou puapuaga.”<sup>8</sup>

I se ala tali tutusa lava, o lo tatou alualu i luma faaleagaga ua fusia

faatasi e le mavavaeeseina ma auu-naga faaletino tatou te faia i isi.

E faaatoaina e le tasi le isi. O le tasi e aunoa ma le isi o se mea taufaasese lea i le fuafuaga o le fiafia a le Atua.

### O Le Ala a le Alii

E toatele tagata lelei ma faalapopotoga i le lalolagi o loo taumafai e faafetaia'ia ia manaoga faavavave o e matitiva ma e le tagolima i soo se mea. Tatou te faafetai mo lea mea, ae o le ala a le Alii e tausia ai ē le tagolima e ese lava mai le ala a le lalolagi. Ua fetalai le Alii “E tatau ona faia i la’u lava ala.”<sup>9</sup> E le gata ina gauai mai o Ia i o tatou manaoga vave; ae o loo Ia popole foi mo lo tatou alualu i luma e faavavau. Mo lenei mafuaaga, ua i ai pea i le ala a le Alii le ola faalagolago o le tagata ia te ia lava ma o le auauna atu i o tatou tuaoi o se faaopoopoga lea i le tausia o e matitiva.

I le 1941 na pa ai le Vaitafe o Gila ma sa lolovaia ai le Vanu o Duncan i Arizona. O se peresitene talavou o se siteki e igoa ia Spencer W. Kimball na fono ma ona fesoasoani, iloilo mea sa faaleagaina, ma auina atu se feau faa-uaalesi i le Aai o Sate Leki e talosaga-ina ai se tupe tele.

Nai lo le auina atu o le tupe, sa auina atu e Peresitene Heber J. Grant ni alii se toatolu: o Henry D. Moyle, Marion G. Romney, ma Harold B. Lee. Sa latou fono ma Peresitene Kimball ma aoa ia te ia se lesona taua lava: “E le o se polokalama lenei o le ‘aumai ia te a’u” sa latou fai atu ai. “O le polokalama lenei o le ‘fesoasoani atu o le tagata lava ia.’”

I le tele o tausaga mulimuli ane, sa saunoa ai Peresitene Kimball: “Semanu o se mea faigofie lava, ou te manatu, mo le Usoga le aumai ia i matou [o le tupe] ma o le a le faigata lava le saofai i lo’u ofisa ma tufatufa atu; ae e maeu le tele o mea lelei na oo mai



**San Salvador, El Salvador**

ia i matou a o i ai le faitau selau o i [matou lava ia] na o atu i Duncan ma fausia ni pa ma taai vaomago ma faagatasi le palapala ma faia mea uma sa manaomia ona fai. O le fesoasoani atu lena o le tagata lava ia.”<sup>10</sup>

E ala i le mulimuli i le ala a le Alii, e le gata ina faafetaiaia manaoga vave o tagata o le siteki a Peresitene Kimball, ae sa latou atiina ae se ola faalagolago o le tagata ia te ia lava, faamāmāina puapuaga, ma ola ae i le alofa ma le lotogatasi a o auauna atu le tasi i le isi.

### Ua Tauto Atu i Tatou Uma

O le taimi nei e toatele tagata o le Ekalesia o loo puapuagatia. O loo fiaaai, o loo faigata mea tau tupe, ma o loo tauivi i tulaga uma faaletino, faalelagona, ma popolega faaleagaga. Latou te tatalo ma le malosi atoa o o latou loto mo se fesoasoani, ma se toomaga.

Uso e, faamolemole aua ne’i outou manatu o se tiutetauave lenei a se isi tagata. O la’u lava lea, ma o lau foi lena. Ua tauto atu i tatou uma. “Tatou uma” o lona uiga o *tatou uma*—o e uma e umia le Perisitua Arona ma le Mekisateko, mauoa ma mativa, i malo uma. I le fuafuaga a le Alii, o loo i ai se mea e mafai ona saofaga i ai tagata uma.<sup>11</sup>

O le lesona ua tatou aoaoina mai lea tupulaga i lea tupulaga o loo i ai *uma* e mauoa ma matitiva i lalo o lea lava matafaioi paia e tasi e fesoasoani atu i o tatou tuaoi. E manaomia uma i tatou e galulue faatasi ia faaoga ma le manuia ia mataupu faavae o le uelefea ma le ola faalagolago o le tagata ia te ia lava.

Ua tele lava ina tatou matauina

manaoga o siomia ai i tatou ma le faamoemoe o le a tu mai se tasi mai se mea mamao e faafetaia'ia na manaoga. Atonu tatou te faatalitali mo ni tagata tomai faapitoa e i ai se potu faapitoa e foiaina ni faafitauli maoti. A tatou faia lenei mea, ua tatou aveesea mai o tatou tuaoi le auaunaga sa tatau ona latou maua, ma ua tatou aveesea i tatou lava mai avanoa e auauna atu ai. E ui e leai se mea e leaga ai tagata tomai faapitoa, ae manatu i ai: o le a le mafai lava ona lava i latou e foiaina ia faafitauli uma. Ae, ua tuu e le Alii Lana perisitua ma ona faatulagaga i o tatou faitotoa i malo uma ua faatuina ai le Ekalesia. Ma, i ona autafa tonu, ua Ia tuu ai le Aualofa. E pei ona iloa e i tatou o e umia le perisitua, e leai ma se taumafaiga faaleuelefea e manuia pe a le faaogaina ia meaalofo ma taleni maoae a o tatou tuafafine.

O le ala a le Alii e le o le saofai i autafa o le vaitafe ma faatalitali i le taimi e pe ai le vai ona tatou kolosi lea. Ae e ala i le o mai faatasi, afe i luga lima o o tatou ofu, ma o e galulue, ma fausia se alalaupapa po o se vaa e kolosi ai le vai o o tatou luitau. Outou alii o Siona, outou o umiaina le perisitua, o outou ia e mafai ona taitai ma aumaia le toomaga i le Au Paia e ala i le faaogaina o mataupu faavae musuia o le polokalama o le uelefea! O la outou misiona o le pupula lea o o outou mata, faaoga o outou perisitua, ma o e galulue i le ala a le Alii.

### O Le Faalapopotoga Silisili i le Lalolagi

I le taimi o le pa’ū tele o le tamao-aiga, sa faatonuina ai Harold B. Lee e



le Usoga, a o avea o ia ma se peresitene o se siteki, e sue se tali i le ogaoga o le mativa, faanoanoa, ma le fiaai lea sa salalau i le lalolagi atoa i lena taimi. Sa tauivi o ia e saili se tali ma sa ia avatu le mataupu i le Alii ma ole atu, “O le a se ituaiga o faalapotopotoga e ao ona matou maua . . . e faia ai lenei mea?”

Ma “sa pei na fetalai atu le Alii [ia te ia]: ‘Vaai, atalii. E te le manaomiaina se isi lava faalapotopotoga. Ua ou tuu atu ia te oe le faalapotopotoga silisili i luga o le fogaeleele. E leai se mea e sili atu nai lo le faalapotopotoga a le au perisitua. O mea uma e manaomia ona e faia i le lalolagi o le faagalulue lea o le au perisitua. Pau a lena.’”<sup>12</sup>

O le vaega amata foi lena i o tatou taimi. O lea ua tatou maua le faalapotopotoga a le Alii ua faatulagaina. O la tatou lu’i o le iloa lea pe faapefea ona faaaogaina.

O le mea e amata ai o le faamasani lea o i tatou lava ia i mea ua uma ona faaalua mai e le Alii. E le tatau ona tatou manatu ua tatou iloa. E tatau ona tatou taulimaina lenei mataupu i se lotomaulalo faatamaitiiti. E ao i tupulaga uma ona aoaoina ni aooga faavae fou ia e faavae ai le ala a le Alii i le tausaiaina o ē le tagolima. E pei ona faatonuina ai i tatou e le tele o perofeta i le tele o tausaga, o mataupu faavae o le uelefea a le Ekalesia ua lena o ni manatu lelei; ae o ni upumoni ua faaalua mai le Atua—o Ona ala ia e fesoasoani ai i ē le tagolima.

Uso e, ia suesue muamua mataupu faavae ma aooga faavae faaalua. Faitau ia tusitaulima e faatatau i le uelefea a le Ekalesia;<sup>13</sup> faaoga le uepisaite o le Initoneti providentliving.org; toe faitau le tusiga o le *Liahona* o Iuni 2011 e uiga i le fuafuaga o le uelefea a le Ekalesia. Saili i le ala a le Alii e tausai ai Lana Au Paia. Aoa o mataupu faavae o le tausai o ē le tagolima, auauna atu i tuaoi, ma



**Leicester, Egelani**

ola faalagolago le tagata ia te ia lava lea e faaatoatoa ai e le tasi le isi. O le ala a le Alii e ola faalagolago ai le tagata ia te ia lava e aofia ai se ala paleni o le tele o elemene o le olaga, e aofia ai aooga, soifua maloloina, galuega, mea tau tupe a le aiga, ma le malosi faaleagaga. Faamasani oe lava ia i le polokalama faaonapo nei a le uelefea a le Ekalesia.<sup>14</sup>

O le taimi lava e te suesueina ai aooga faavae ma mataupu faavae o le uelefea a le Ekalesia aoao, ia saili atu e faaoga mea ua e aoaoina i manaoga o i latou ua i ai i lau tausiga. O le uiga o lenei mea e faapea, i se fuataga tele, o le a e fuafuaina lava e oe. E eseese uma aiga, faapotopotoga, ma nofoaga uma o le lalolagi. E le o i ai se tali aoao se tasi e talafeagai mo tagata uma i le uelefea a le Ekalesia. O se polokalama o le fesoasoani atu o le tagata lava ia lea e nafa ai tagata taitoatasi ma le ola patino faagalogalo o le tagata ia te ia lava. O a tatou punaoa e aofia ai tatalo patino, o a tatou lava taleni ma tomai na tuuina mai e le Atua, o a seta ua tatou maua e ala mai i o tatou lava aiga ma tagata o o tatou aiga lautele, o punaoa eseese mai le nuu, atoa ai ma le lagolago agaalofa a korama o le perisitua ma le Aualofa. O le a taitai atu i tatou e lenei mea i le mamanu musuia o le ola

faalagolago o le tagata ia te ia lava.

O le a tatau ona faataatia sau fuafuaga e ogatusa ma aooga faavae a le Alii ma ia tutusa ma tulaga i le faataatiaga faafaafanua. Ina ia faatoina ia mataupu faavae paia faaleulelefea, e le manaomia ona e vaai pea i le Aai o Sate Leki. Ae e manaomia ona e vaai i totonu o tusitaulima, i totonu o lou loto, ma i le lagi. Faalagolago i musumusuga a le Alii ma mulimuli i Lana ala.

I le faaiuga, e ao ina e faia i lau eria mea na faia e soo o Keriso i tisipenisione uma: fefautuaai faatasi, faaoga uma punaoa o loo maua, saili atu i le musumusuga a le Agaga Paia, ole atu i le Alii mo Lana faamautoinoaga, ona afe lea i luga o lima o lou ofu, ma alu e galue.

Ou te tuu atu ia te outou se folafolaga, afai tou te mulimuli i lenei mamanu, o le a outou mauaina taitaiga patino e faatatau i le *o ai, o le a, o afea*, ma pe o *gafea* o le faia i le ala a le Alii.

### **O Faamanuiaga o le Faia i le Ala a le Alii**

O folafolaga faaperofeta ma faamanuiaga o le uelefea a le Ekalesia, o le faia i le ala a le Alii, o nisi ia o mea e sili ona ofoofogia ma matagofie ua tuuina mai e le Alii i Lana fanau. Na Ia fetalai, “Afai foi e te alofa atu i le ua fiaai, ma e fafaga ia maona o le ua tiga; ona alu ae lea o lou malamalama i le pouliuli, ma lou pogisa e pei o le aoauli ia: e taitaiina foi oe e le aunoa e Ieova.”<sup>15</sup>

Pe tatou te mauoa pe matitiva, e tusa lava pe o fea tatou te nonofo ai, tatou te manaomia uma le tasi ma le isi, aua o loo i ai i le ositaulagaina o o tatou taimi, taleni, ma punaoa le faaagavaaina o o tatou agaga ma oo ai ina faamamaina.

O lenei galuega o le faia i le ala a le Alii ua le na o se isi mea i le lisi o polokalama a le Ekalesia. E le mafai

ona lafoaiina pe tuu ese. E totonugalemu i a tatou aoaoga faavae; o le uiga moni lea o la tatou tapuaiga. Uso e, o lo tatou avanoa sili lea ma le faapitoo o ni e umiaina le perisitua e galueaiina ai le perisitua. E le tatau ona tatou faasaga ese o tatou loto ma o tatou ulu mai le avea ai ma e sili atu ona ola faalagolago ia i tatou lava, tausaiaina sili o le tagolima, ma le tuuina atu o auauunaga agaalofo.

E femiloai faatasi le faaletino ma le faaleagaga. Ua tuuina mai e le Atua ia i tatou lenei aafiaga faale-olaga nei ma luitau faaletino e o mai faatasi e avea ma potu suesue e mafai ai ona tatou tuputupu ae i tagata e finagalo le Tama Faalelagi e avea ai i tatou. Tau ina ia tatou malamalama i le tiute sili ma faamanuiaga e oo mai i le mulimuli ai ma faia i le ala a le Alii o la'u tatalo lea i le suafa o Iesu Keriso, amene. ■

#### FAAMATALAGA

1. Mataupu Faavae ma Feagaiga 42:29, 30.
2. Mataupu Faavae ma Feagaiga 52:40.
3. Mataupu Faavae ma Feagaiga 104:18.
4. Tagai i le Mataio 22:36–40.
5. Mataupu Faavae ma Feagaiga 29:34.
6. Thomas Merton, *Thoughts in Solitude* (1956), 46.
7. Mose 7:18.
8. J. Reuben Clark Jr., i le Conference Report, Apr. 1937, 22.
9. Mataupu Faavae ma Feagaiga 104:16; tagai foi i le fuaiupu e 15.
10. Spencer W. Kimball, i le Conference Report, Apr. 1974, 183, 184.
11. Tagai i le Mosaea 4:26; 18:27.
12. Harold B. Lee, transcript of welfare agricultural meeting, Oct. 3, 1970, 20.
13. Tagai i le *Tusitaulima 1: Peresitene o Siteki ma Epikopo* (2010), mataupu 5, “Taitaiina o le Ueufeafa a le Ekalesia”; *Tusitaulima 2: Taitaiina o le Ekalesia* (2010), mataupu 6, “Mataupu Faavae o le Ueufeafa ma le Taitaiga”; *O Le Faia i le Ala a le Alii: O Se Taitala a le Taitai i le Ueufeafa* (tamaitusi, 2009).
14. Tusi a Elder Glen L. Rudd o le *Pure Religion: The Story of Church Welfare since 1930* (1995), o loo maua mai le Faletusi o le Ekalesia, o se tusi matagofie e suesue ai i aoaoga faavae ma le talafaasolopito o le polokalama o le ueufeafa a le Alii.
15. Isaia 58:10–11; tagai foi i fuaiupu e 7–9.



**Saunia e Peresitene Henry B. Eyring**

Fesoasoani Muamua i le Au Peresitene Sili

## Sauniuniga i le Perisitua: “Ou Te Manaomia Lau Fesoasoani”

*Aua le popole i sou le atamai o i ai ae mafaufau, faatasi ma le fesoasoani a le Alii, i le ituaiga o tagata o le a mafai ona avea ai oe.*

**O**u uso pele, o se olioliga mo a'u lo tatou mafuta ai i lenei sauniga mo le lalolagi atoa a le au perisitua a le Atua. Ou te talanoa atu i le po nei i le sauniuniga a le perisitua, mo i tatou lava faapea mea tatou te fesoasoani e tuuina atu mo isi.

O le toatele lava o i tatou e tau-manatunatu i taimi, “Pe ua ou saunia ea mo lenei tofiga i le perisitua?” O la'u tali o le “Ioe, ua e saunia.” O lo'u faamoemoega i le aso, o le fesoasoani atu lea ia e iloa lenei sauniuniga ma e maua mai ai le lototele.

E pei ona e iloa, o le Perisitua Arona ua atofaina o se perisitua sauniuni. O le toatele lava o tiakono talavou, aoao, ma ositaulaga e i le va o le 12 ma le 19 tausaga le matutua.

Atonu tatou te manatu o le sauniuniga a le perisitua e fai i tausaga o le Perisitua Arona. Ae na saunia lava i tatou e lo tatou Tama Faalelagi talu mai le taimi na aoaoina ai i tatou i Lona afoaga i Lona malo ae tatou te le'i fananau mai. O loo Ia saunia foi i

tatou i le po nei. Ma o le a Ia faaauau pea ona saunia i tatou pe afai tatou te faatagaina o Ia.

O le faamoemoega o sauniuniga uma a le perisitua, i le muai olaga ma lenei olaga, o le tapenaina lea o i tatou ma e tatou te tautuaina, mo le Alii mo le ola e faavavau. O nisi o lesonea muamua i le muai olaga e mautinoa lava na aofia ai le ata o le faaolataga, faatasi ai ma Iesu Keriso ma Lana Togiola i le totonugalemu. E le gata sa aoaoina i tatou i le fuafuaga ae sa tatou i ai foi i aufono ia na tatou filifilia ai le fuafuaga.

Ona sa tuu se veli o le le manatuina o mea i o tatou mafaufau ina ua tatou fananau mai, o lea e tatau ai ona tatou sailia se ala e toe aoao ai i lenei olaga mea sa tatou muai iloa ma puipuia. O se vaega o a tatou sauniuniga i lenei olaga o le sailia lea o lena upumoni taua ina ia mafai ai ona tatou toe tuuto atu i ai e ala i feagaiga. E manaomia ai e lena mea le faatuatua, lotomualalo, ma le lototele i la tatou

vaega atoa ai ma fesoasoaniga mai tagata ua mauaina le upumoni ona faasoa mai lea ia i tatou.

Atonu o matua, faifeautalai, po o ni uo. Ae o lena fesoasoani o se vaega o a tatou sauniuniga. O a tatou sauniuniga faaleperisitua e aofia ai lava isi ua uma ona sauniaina e ofo mai ia i tatou le avanoa e talia ai le talalelei ona filifili lea e faatino e ala i le tausaiina o feagaiga ina ia mauaa ai i o tatou loto. Mo i tatou ina ia agavaa mo le ola e faavavau, o la tatou auunaga i lenei olaga e tatau ona aofia ai le galulue ma o tatou loto atoa, mafaufau, ma le malosi atoa e taumafai ai e saunia isi e toe foi atu i le Atua faatasi ma i tatou.

O se vaega la o sauniuniga a le perisitua o le a tatou maua i lenei olaga o le maua lea o avanoa e auuna atu ai ma aoao isi. Atonu e aofia ai le avea ma ni faiaoga i le Ekalesia, ni tamā atamamai ma alolofa, ni uso o korama, ma ni faifeautalai mo le Alii o Iesu Keriso. O le a ofoina mai e le Alii ni avanoa, ae o le a faalagolago lava ia i tatou lo tatou saunia pe leai. O lo'u faanaunaga i le po nei o le faasino atu lea o nisi o filifiliga taua e manaomia mo sauniuniga faaleperisitua ina ia manuia ai.

O filifiliga lelei a le tagata o loo aoaoina ma le tagata ua aoaoina e faalagolago i sina malamalama i le auala e saunia ai e le Alii Ana auuna perisitua.

Muamua, na te valaauina tagata, talavou ma matutua, atonu e foliga mai o tagata o le lalolagi, ma e oo lava foi ia i latou, o e vaivai ma faatauva. E mafai e le Alii ona liua na vaivaiga ua matauina, e avea ma malosiaga. O le a suia ai le ala e filifili ai le taitai atamai po o ai e aoao ae pe faapefa foi ona aoao atu. Ma e mafai ai foi ona suia le auala e tali atu ai le o umia le perisitua i avanoa fatufatuai ua ofoina atu ia te ia.



Tatou mafaufau i nai faaitaiga. Sa avea a'u ma se ositaulaga e le'i i ai se potu masani i se uarota tele. Sa valaau mai lo'u epikopo ia te au i le telefoni i se tasi o aoauli o se Aso Sa. Ina ua ou tali atu, sa ia faapea mai, "E i ai sou taimi ta te o ai ma a'u? Ou te manaomia lau fesoasoani." Sa ia faamalalama mai e na ona ia manao lava e fai au ma ana soa e asiasi i se tamaitai ou te le'i iloa ina ae ua leai ni ana meaai ma ua manaomia ona aoao i auala e pulea lelei ai ana mea tau tupe.

Ia, sa ou iloa e i ai ni ona fesoasoani atamamai i lana au epikopo. O i laua uma o ni alii faatagata matutua e i ai ni potu masani sili. O se tasi o fesoasoani e i ai sana pisinisi tele lea na mulimuli ane avea ma se peresitene o se misiona ma se Pulega Aoao. O le isi fesoasoani o se faamasino lauiloa i le aai.

O a'u o le fesoasoani muamua faatoa valaauina o le epikopo i le korama a ositaulaga. Sa ia silafia e itiiti so'u malamalama i mataupu faavae o le uelefea. Ou te le'i tusia foi se siaki, leai sa'u teugatupe i le faletupe, ma ou te le'i vaai lava i se paketi patino. Ae, e ui lava i so'u le atamai, sa ou lagonaina le faamaoni o lana tala "Ou te manaomia lau fesoasoani."

Sa oo ina ou malamalama i le mea sa manao i ai lena epikopo musuia. Sa ia vaaia ia te au se avanoa faaauuro e saunia ai sē o umia le perisitua. Ou

te mautinoa na te le'i muai vaaia i lena taulealea e le'i aoaoina, o se sui o le Au Epikopo Pulefaamalumalu i le lumanai. Ae sa ia taulimaina a'u i lena aso, ma isi aso uma i le tele o tausaga, o se galuega faatino sauniuni o se folafolaga sili.

Sa foliga mai na ia fiafia ai, ae o se galuega mo ia. Ina ua ma toe foi i lo'u fale ina ua mae'a le ma asiasiga i le tina ua oti lana tane sa manaomia se fesoasoani, sa ia faatu le taavale. Sa ia tatala ana tusitusiga paia e faaaoaga soo ua makaina. Sa ia tuu mai ia te au ni faasao'ga agalelei. Ae masalo sa ia vaaia lo'u vaivai ma le faatauva e faigofie ai ona aoaoina. E oo mai i lenei aso, ou te manatuaina pea le mea sa ia aoao mai ia te au i lena aoauli. Ae e sili atu foi ona ou manatuaina lona talitonuga mautinoa o le a mafai ona aoaoina au ma lelei atili—ma o le a ou lelei ai atili.

Sa ia vaai i tala atu o tulaga moni o lo'u tagata i mea e mafai ona ou ausia i le lumanai, se tagata o loo lagonaina le lava o le vaivai ma le faatauva e manaomia ai le fesoasoani a le Alii e talitonu ai i mea o le a oo mai.

O epikopo, peresitene o misiona, ma tamā e mafai ona filifili e galulue i na mea e mafai ona ausia. Sa ou vaai o tupu talu ai nei i se sauniga anapogi, a o tuuina mai e se peresitene o se korama a tiakono lana molimau. Sa oo ina o le a avea ma

se aoao ma tuua uso o lana korama.

Sa ia molimau atu ma se lagona sili i lona leo o le tuputupu ae i le lelei ma le mana i uso o lana korama. Ou te lei faalogo lava i se tagata o matagofie se faaviivii i se faalapopotoga e pei ona sa ia faia ai. Sa ia viia a latou auaunaga. Ona ia faapea mai lea ua ia iloaina sa mafai ona ia fesoasoani atu i tiakono fou pe a latou lagonaina le lofituina ona sa lofituina foi o ia ina ua ulu atu i le perisitua.

O ona lagona o le vaivai na oo ai ina ia onosai atili, agaalofo atili, ma o lea sa mafai lelei ai ona ia faamalosa ma auauna atu i isi. I na tausaga e lua i le Perisitua Arona, sa foliga mai ia te au, sa oo ai ina ia maua le poto masani ma le atamai. Sa ia iloaina sa fesoasoani ia te ia o se peresitene o le korama, e ala i se malamalama susulu ma le manino i ona lava manaoga a o sefululua ona tausaga. O ona luitau ma o tatou luitau i le lumanai o le a oo mai pe a mou atu na manatua ma mu itiiti i le gasologa o taimi ma o tatou manuia.

Atonu na vaaia e Paulo lona mea matautia ma fautuina ai lana soa talavou i le perisitua, o Timoteo. Sa ia faamalosiau atu ma faatonuina o ia i ana lava sauniuniga faaleperisitua atoa ai ma le fesoasoani atu i le Alii i le sauniaina o isi.

Faalogo i le mea na ta'u atu e Paulo ia Timoteo, lana soa talavou:

“Aua nei inoino se tasi i lou tau-lealea; a ia fai oe ma faaaoao i e ua faatuatua, i le upu, ma le amio, ma le alofa, ma le loto, ma le faatuatua ma le le gaoia.

“Ia e faasaga i le faitau, ma le apoapoai atu, ma le aoao atu, seia ou alu atu.

“Aua nei e faatalale i le meaalofa na tuuina atu ia te oe i le valoaga, ma le faaee atu o lima. . . .

“Ia oe lava ia te oe, atoa ma lau e

aoao atu;<sup>1</sup> ia e tumau pea i ai: aua a e fai lona mea, e faaolaina ai oe e oe atoa ma e ua faalogologo ia te oe.”<sup>2</sup>

Na tuu mai e Paulo se fautuaga lelei mo i tatou uma. Aua le popole i sou le atamai o i ai ae mafaufau, faatasi ma le fesoasoani a le Alii, i le ituaiga o tagata o le a mafai ona avea ai oe.

O le aoaoga faavae o loo uunaia ai i tatou e Paulo e taumamafa ai i a tatou sauniuniga faaleperisitua, o afioga ia a Keriso ma ia agavaa mo le mauaina o le Agaga Paia. Ona mafai lea ona tatou iloaina mea ua finagalo le Alii tatou te faia i la tatou auaunaga ma maua ai le lototele e fai ai, pe o le a lava le tulaga e fetai ai ma i tatou i le lumanai.

Ua sauniaina i tatou mo auaunaga faaleperisitua o le a sili ona luitauina i taimi e oo mai ai. Mo se faataitaiga, e faasolo foi ina augatata o tatou musele ma tino a o tatou galulue. O lo tatou malosi e aoao ai ma manatuaina mea sa tatou aoaoina o le a faaitiitia. Ina ia tuuina ia auaunaga faaleperisitua ua faamoemoeina ai i tatou e le Alii o le a manaomia ai pea lava pea se loto pulea i aso uma o o tatou olaga. E mafai ona saunia i tatou mo lona tofo-tofoga e ala i le fausiaina o le faatuatua e ala i auaunaga i aso taitasi.

Ua tuuina mai e le Alii ia i tatou le avanoa e saunia ai i se mea ua Ia ta'ua “o le tautoga ma le feagaiga [o le] perisitua.”<sup>3</sup>

O se feagaiga tatou te osia ma le Atua e tausia Ana poloaiga uma ma tuu atu auaunaga semanu Na te tuuina atu pe ana faapea o i ai o Ia iinei. O le ola ai i lona tulaga faatonuina i le mea sili tatou te mafaia, e fausia ai le malosi faaleagaga o le a tatou manaomia e tumau ai e oo i le iuga.

Sa faaali mai e ni faiaoga maoae o le perisitua ia te au le auala e fausia ai lona malosi: o le fatuina lea o se mausa o le faatoilaloina o le vaivai ma

le fefe lea atonu e te tau mafaufau ai o le a togi le solo. Sa faaali mai e faiaoga maoae a le Alii ia te au e faapea o le mana faaleagaga e tumau ai, e maua mai i le galue ia pasia le tulaga lea ua mananao isi e malolo ai.

Outou na taitai perisitua maoae o e na fausiaina lona malosi faaleagaga i lo outou talavou e i ai pea ia te outou pe a vaivai le malosi faaletino.

Sa i ai lo'u uso laitiiti i se tamai aai i lona pisinisi. Sa ia maua se telefoni i lona faletalimalo mai ia Peresitene Spencer W. Kimball. Sa leva le po ina ua mavae se aso faigata o galuega mo lo'u uso ma sa mautinoa foi e faapena mo Peresitene Spencer W. Kimball, o le sa amataina le talanoaga i le telefoni faapenei. Sa ia faapea atu, “Sa ou faalogo o loo e i ai i le taulaga. Ou te iloa ua leva [le po] ma atonu ai ua e tofa, ae pe mafai ona e fesoasoani mai ia te au? Ou te manaomia oe e fai ma a'u soa a o ou alu atu i le aai e vaai i le tulaga o i ai o tatou falelotu uma.” Sa o lo'u uso ma ia i lona po, ma le leai o sona iloa e uiga i le tausiga o falelotu, e le iloa foi le mafuaaga ua mana'o ai Peresitene Kimball e fai se mea faapea ina ua mae'a se aso umi, ma pe aisea foi na te manaomia ai se fesoasoani.

I ni tausaga mulimuli ane sa ou maua ai foi se valaau faapea i le po i se faletalimalo i Iapani. O le taimi lona sa avea ai a'u ma Komesina fou o Aoga a le Ekalesia. Sa ou iloa o loo nofo Peresitene Gordon B. Hnckley i se vaipanoa o lona faletalimalo mo sana tofiga i Iapani. Sa ou taliina le telefoni sa tatagi ina ua ou faatoa taoto lava i lalo e moe, ma le vaivai tele ina ua mae'a ona faia o mea uma sa ou manatu sa ou maua le malosi e faia ai.

Sa fesili mai Peresitene Hnckley i lona leo fiafia, “Aisea ua e moe ai ae o lea ou te i o loo faituina se tusi sa talosagaina i tatou e toe iloilo?” O lea



**Davao, Filipaina**

sa ou nofo ai i luga ma galue loa e ui lava sa ou iloa e sili atu se iloiloga a Peresitene Hinckley o le tusi nai lo se mea e mafai ona ou faia. Ae i se ala sa ia faia ai na ou lagona ai sa ia manaomia la'u fesoasoani.

I faaiuga o fonotaga, toetoe lava o fonotaga uma, e fesili ai lava Peresitene Thomas S. Monson i le failautusi o le Au Peresitene Sili, "Pe ua faia uma a'u galuega?" Ma e ataata lava o ia pe a sau le tali: "Ioe, Peresitene." O le ataata fiafia a Peresitene Monson e aumai ai se feau ia te au. E faatupu manatu ai ia te au, "Pe i ai ea se isi mea e mafai ona ou faia i o'u tofiga?" Ona ou toe foi atu lea i lo'u ofisa e galue.

Ua faaali mai e faiaoga maoae ia te au le auala e saunia ai e tausia le tautoga ma le feagaiga pe a faafaigataina e le taimi ma le matua. Ua latou faaali mai ma aoao a'u i le auala e pulea ai au lava ia e galue malosi atili atu nai lo le mea ou te mafaufau ou te mafaia semanu o o'u maua le malosi.

Ou te le mafai ona avea ma se auauna atoatoa i itula uma, ae e mafai ona ou tuuina atu ni taumafaiga sili atu nai lo le mea ou te mafaufau ou te mafaia. Faatasi ai ma lena mausa na muai fatuina, o le a ou saunia ai mo tofotofoga o mulimuli mai. E mafai ona saunia oe ma au i le malosi e tausia ai a ta tautoga ma feagaiga e ala i tofotofoga ia e mautinoa o le a oo mai pe a lata i le iuga o le olaga.

Sa ou vaai se faamaoniga o lena

mea i se fonotaga a le Fono a le Au Faatonu o Aoaoga a le Ekalesia. E oo ifo i le taimi lena ua autausaga o auauna atu Peresitene Spencer W. Kimball a o onosaia ai le tele o faigata o le soifua maloloina lea e na o Iopu e malamalama i ai. Sa ia taitaia le fonotaga i lena taeao.

Sa faafuasei ona le gagana o ia. Sa faapa'u ifo i lona nofoa. Sa moeiini. Sa lafo ifo lona ao i lona fatafata. Sa ou nofo latalata ia te ia. Sa sosoo mai ai ma Elder Holland. Sa ma tutu i luga e fesoasoani ia te ia. O le leai o so ma'ua poto masani, sa ma manatu ai e sii o ia i lona ofisa o lata ane, a o nofo pea i lona nofoa.

Sa avea o ia ma o ma faiaoga i lena taimi sa matua mafatia ai. A o tofu i ma'ua ma le pito o lona nofoa o loo si'i, sa matou tuua le potu fonu ma agai atu i le ala savali. Sa tau pulapula mai o ia, ma sa iloagofie lava lona mea, ma fai mai, "Oi, faamolemole ia faaeteete. Vaai i tiga o oulua tua." A o matou latalata atu i le faitotoa o lona ofisa, sa ia fai mai, "Ua ou le fiafia lava ua ou faalavelave i le fonotaga." I nai minute talu ona matou i ai i lona ofisa, sa ia tepa mai ia i ma'ua ma fai mai, "Pe ua le tatau ea ona oulua toe foi atu i le fonotaga."

Sa ma tuua loa ma faanatinati atu, ma le iloaina o lo ma i ai iina atonu e taua i le Alii. E mai lava i le tamaitiiti o Peresitene Kimball e na te tuleia lava ia i tala atu o tapulaa o lona onosai

e auauna ai ma alofa i le Alii. O se mausa sa matuai mautu lea sa i ai i taimi sa ia manaomia ai. Sa saunia o ia. Ma o lea sa ia mafai ai ona aoao mai ma faaali mai ia i tatou le auala e saunia ai e tausia le tautoga ma le feagaiga, e ala i sauniuniga tumau i le aluga o tausaga lea e faaoga ai lo tatou malosi uma i mea e ono tulai mai o ni galuega iti e i ai ni taunuuga faatauvaa.

O la'u tatalo ia tau ina tatou tausia a tatou feagaiga o le perisitua e agavaa ai i tatou lava mo le ola e faavavau faapea ai ma i latou uma ua valaauina ai i tatou e aoao. Ou te folafola atu ia te outou afai tou te faia uma mea tou te mafaia, o le a faateleina e le Atua lou malosi ma lou atamai. O le a Ia saunia oe.

Ou te molimau atu o loo soifua le Atua le Tama ma e alofa ia te outou. Sa faaali atu o Ia ma Lona Alo toetu ma le mamalu, o Iesu Keriso, i se taulealea e le'i i ai se poto masani, o Iosefa Samita. Sa La faatuatuaina o ia i le Toefuataiga mai o le atoaga o le talalelei ma le ekalesia moni. Sa La faamalosiaina o ia pe a ia manaomia. Sa La tuuina atu ia ona lagonaina le aoaiga alofa pe a faamaualaloina ai o ia ina ia mafai ona siitia ai o ia i luga. Sa La sauniaina o ia, ma o loo La sauniaina i tatou, mo le malosi e galulue ai pea e agai atu i le mamalu selesitila, o le faamoemoe lena ma le mafuaaga o a tatou auaunaga uma faaleperisitua.

Ou te tuu atu a'u faamanuiaga ina ia mafai ai ona outou iloaina ia avanoa mamalu ua tuuina mai e le Atua ia te outou i valaauga, ma saunia ai outou mo Lana galuega ma le auaunaga i isi. I le suafa o lo tatou taitai alofa ma le faiaoga, o Iesu Keriso, amene. ■

#### **FAAMATALAGA**

1. Tagai 2 Nifae 32:3-6.
2. 1 Timoteo 4:12-14, 16.
3. Mataupu Faavae ma Feagaiga 84:39.



Saunia e Peresitene Thomas S. Monson

# Ia Lototele e Tu Na o Oe

*Tau ina ia tatou lototetele pea ma saunia e tutu mo mea ua tatou talitonu i ai.*

O uso pele e, o se avanoa matagofie le faatasi ai ma outou i le po nei. O i tatou o e ua umia le perisitua a le Atua ua fausiaina se sootaga maoae ma le usoga.

Ua tatou faitau i le Mataupu Faavae ma Feagaiga, vaega 121, fuaiupu 36, “o aia a le perisitua ua fesootai e le mavavaeeseina ma mana o le lagi.” O se meaalofa ofoofogia ua tuuina mai ia i tatou—e umia ai le perisitua, lea “ua fesootai e le mavavaeeseina ma mana o le lagi.” Peitai, o lenei meaalofa taua, ua le gata ua aumaia ai faamanuiaga faapitoe ae faapena foi ni tiute paia. E tatau ona tatou faatautaia o tatou olaga ina ia tatou agavaa pea mo le perisitua ua tatou tauaveina. Ua tatou ola i se taimi ua siosiomia ai i tatou e le tele o mea ua faamoemoe e faatosina atu ai i tatou i ala ia e mafai ona tau atu ai i lo tatou faafanoga. Ina ia aloese mai i ia ala, e manaomia se naunautaiaga ma se lototele.

Ou te manatua se taimi—ma o le a faapena foi i nisi o outou o iinei i le po nei—sa talitutusa ai lava ia tulaga faatonuina o le tele o tagata ma o tatou tulaga faatonuina. E le o toe moni lenei mea. Talu ai nei lava sa ou faitau ai i se tusiga i le *New*

*York Times* e faatatau i se suesuega na faia i le taimi o le taumafanafana o le 2008. O se tagata suesue lauiloa o uiga faaletagata mai Notre Dame sa taitaia se au sailiili i le faatautaia o ni faatalanoaga auiliili ma le 230 talavou matutua i le salafa o Amerika. Ou te talitonu e mafai ona tatou manatu i ai ma le mautinoa o le taunuuga o le a talitutusa lava ma le tele o vaega o le lalolagi.

Ou te faasoa atu ia te outou se vaega o lenei tusiga taua tele:

“Sa fai atu e le au suesue ni fesili tatala e uiga i le sa’o ma le sese, faafitauli o le amio mama ma le uiga o le olaga. I tali uumi ma le le mautonu, . . . tou te vaaia ai tagata talavou sa matua faigata ona tautala mai ma le atamai e uiga i nei mataupu. Ae sa latou le mauaina lava se manatu faavae po o se vaogagana e faamatala ai.

“Ina ua fesiligia e faamatala mai se faafitauli o le amio mama o loo feagai ma i latou, o le lua vaetolu o nei talavou, a le o le leiloa o se tali i le fesili ia po o le faamatala mai o ni faafitauli e le o ni amio mama, e pei o lo latou le gafatiaina ona totogi o se fale mautotogi po o le lava foi o ni tupe e totogi ai le mita o le paka o taavale.”

Faaauau pea le tusiga:

“O le talitonuga taatele lava, lea na toe foi mai i ai pea lava pea le toatele o i latou, o filifiliga o amio mama ua na o se mataupu tau i le tagata lava ia. ‘E patino lava,’ o le tali lautele lea a i latou. ‘E pule lava le tagata ia. O ai a’u e fai atu ai?’

“O le teenaina o le usiusitai e le fesiligia i le pule, ua toatele ai talavou ua o ese atu ai i isi mea matautia, [ma faapea mai]: ‘O le a ou faia mea ou te manatu ou te fiafia ai pe o mea ou te lagonaina. E le o i ai se isi lava ala ou te iloa ai se mea e fai vagana ai mea ou te lagonaina i lo’u loto.’”

O i latou na faatautaia ia faatalanoaga sa faamamafa atu e faapea o le toatele o tagata talavou ia na latou talanoa i ai sa “le’i tuu atua i ai ni punaoa—e a’oga, faalapotopotoga [po] aiga—e faafailele ai o latou tomai masani mo amio mama”<sup>1</sup>

Uso e, e leai ma se tasi o lagona maia lo’u leo e tatau ona i ai soo se masalosalo e uiga i mea e mama ma mea e lē mama, e leai foi se tasi e tatau ona masalosalo e uiga i mea ua faamoemoeina mai ia i tatou o ē o umia le perisitua a le Atua. Ua aoina i tatou ma o le a faaaauau pea ona aoina i tulafono a le Atua. E tusa lava po o a mea tou te vaaia pe faalogo i ai i soo se mea, e le masuia lava nei tulafono.

A o tatou ola ai mai lea aso i lea aso, e toetoe lava a muai iloina o le a luitauina lo tatou faatuatua. Atonu o nisi taimi tatou te iloa ai le siosiomia o i tatou lava e isi ae o loo tutu pea o ni vaega toalaiti pe oo foi lava i le tutu na o i tatou e tusa ma mea ua taliaina ma mea e le taliaina. Pe i ai ea so tatou lototele a’ia’i e tutu mausali ai mo o tatou talitonuga, e tusa lava pe afai o le faia o lea mea e tatau ai ona tatou tutu na o i tatou? I le aveai ai ma ē o umia le perisitua a le Atua, e taua



lo tatou gafatia ona fetaiai—faatasi ma le lototele—ma soo se luitau e oo mai ia i tatou. Manatua upu a Tennyson: “O lo’u malosi e pei o le malosi o le sefulu, aua e mama lo’u loto.”<sup>2</sup>

O loo faatupulaia pea, o nisi o tagata lauiloa ma isi o ē—mo soo se mafuaaga lava—ua taulai atu i ai tagata lautele, ma o i ai se lagona e taufaifai i tapuaiga i tulaga lautele ma, o nisi taimi, ua patino i le Ekalesia. Afai e le o matuai lava le mauaa o a tatou molimau, o ia faitioga e mafai ona tupu ai lo tatou masalosalo i o tatou talitonuga pe faatuai ai foi lo tatou naunautauga [e tausi poloaiga].

I le miti a Liae e uiga i le laau o le ola, o loo maua i le 1 Nifae 8, faatasi ma isi sa vaai i ai Liae, sa i ai i latou sa pipii atu i le ai uamea seia oo ina taunuu atu ma aai i le fua o le laau o le ola, lea ua tatou iloa o se faatusa o le alofa o le Atua. Ma o le mea e faanoanoa ai, ina ua uma ona latou aai i le fua, o nisi sa maasiasi ona o i latou sa i ai i le “fale tele ma le ateatea,” o le faatusa o le faamaualuluga o le fanau a tagata, o e sa tusitusilima atu ia i latou ma faatauemu ia i latou; ma latou pauu ese atu ai i ala faasaina ma sa leiloloa ai.<sup>3</sup> O se meafaigaluega malosi tele lena a le fili o le taufaifai ma le faatauemu! Ou te toe fai atu, uso e, pe tatou te lototelele ea e tutu malosi ma le mausali i tulaga o ia mea

faafeagai faigata?

Ou te talitonu o lo’u aafiaga muamua lava i le mauaina o le lototele i ou talitonuga na tupu a o ou tautua ai i le Neivi a le Iunaita Setete i le faaiuga o le Taua Lona Lua a le Lalolagi.

O aoaoga mo tagata fou i le Neivi sa le o se aafiaga faigofie mo au, pe mo soo se tasi foi sa onosaia. Aua mo vaiaso muamua lava e tolu sa ou lagonaina ua lamatia lo’u ola. E le o taumafai le Neivi e aoao au; o loo taumafai e fasioti au.

Ou te manatua pea le Aso Sa ina ua uma le vaiaso muamua. Sa matou maua ai se talafou fiafia mai le ofisa sinia. A o matou tutu sa’o ai ma faamalō i le malae o aoaoga i se savili mālū o Kalefonia, sa matou faalogo i lana faatonuga: “O le aso lenei e o uma ai tagata i le lotu—tagata uma lava, vagana ai a’u. O le a ou alu e malolo!” Ona ia alaga mai lea, “Outou uma o Katoliko, potopoto i le Camp Decatur—ma aua nei outou foi mai seia ta le itula e tolu. Savavali i luma!” Sa o ese atu se vaega tele o tagata. Ona toe alaga mai foi lea o le isi ana faatonuga, “O outou na o le au Iutaia, tou te potopoto i le Camp Henry—ma aua nei outou foi mai seia ta le itula e tolu. Savavali i luma!” Sa savavali ese atu sina vaega toalaiti o latou. Ona ia fai mai lea, “Outou uma na e totoe o Porotesano, tou te potopoto i le

falefaafiafia o le Camp Farragut—ma aua nei toe foi mai seia ta le itula e tolu. Savavali i luma!”

Na faafuasei ona oo mai le manatu i lo’u mafaufau, “Monson, e le o oe o se Katoliko; e le o oe o se Iutaia; e le o oe o se Porotesano. O oe o se Mamona, ia tu ai pea iina!” Ou te faamautinoa atu ia te outou sa ou lagona atoa le tuua na o a’u. O le lototele ma le naunautai, ioe—ae sa tuuatoatasi.

Ona ou faalogo atu lea i upu e sili ona mālū faato’a ou faalogo ai lava ua fai mai e se ofisa sinia. Sa ia tilotilo mai ia te au ma fesili mai, “A o le a le igoa e faaigoa ai outou alii?” I lena taimi faatoa ou iloa ai e i ai isi tagata o loo tutu i o’u tua atu i le malae o aoaoga. Toeitiiti lava matou tali faatasi atu uma, “Mamona!” E faigata ona faamatalaina le olioli sa faatumulia ai lo’u loto ina ua ou faliu atu ma vaaia sina vaega toaitiiti o isi seila.

Sa valu le ulu o le ofisa sinia i se faailoga o le le mautonu ona fai mai lea, “Ia, o e sue se mea tou te potopoto ai. Ma aua nei foi mai seia ta le itula e tolu. Savavali i luma!”

A o matou savavali ese atu, sa ou mafaufau i upu o se solo na ou aoaoina i le Peraimeri i tausaga na muamua atu:

*Lototele e aveva ma se Mamona;*

*Lototele e tu atu na o oe.*

*Lototele e faamausali se faamoemoe;*

*Lototele e faailoa atu oe.*

E ui lava sa ese se taunuuga o le aafiaga mai le mea sa ou faamoemoe i ai, ae sa ou loto lava e tu atu na o au, i le mea sa talafeagai ai.

Talu mai lena aso, na i ai taimi sa leai ai se tasi na tu i o’u tua atu ma o lea sa *ou* tu ai na o au. Ou te matua faafetai lava aua sa ou faia le faaiuga i se taimi ua leva ia tumau malosi ma le faamaoni, ia saunia i taimi uma



ma sauni e puipui la'u tapuaiga, pe a manaomia.

I ni tulaga tatou te lagonaina ai i soo se taimi le le atoatoa mo ni galuega o i o tatou luma atu, uso e, sei ou faasoa atu ia te outou se faamatalaga sa faia i le 1987 e le Peresitene o le Ekalesia i lene taimi o Ezra Taft Benson a o ia lauga atu i se vaega toatele o tagata o le ekalesia i Kalefonia. Fai mai Peresitene Benson:

“I tupulaga uma, sa vaavaai mai ai le au perofeta i le gasologa mai o tausaga i o tatou aso. E faitau piliona e ua maliliu ma e o le a fananau mai o loo vaavaai mai ia i tatou.” Aua ne'i e sasi ai—o outou o se tupulaga filifilia. . . .

Mo le toetoe lava atoa le ono afe tausaga sa taofiofia ai outou e le Atua ma faapolopolo ina ia fananau mai i aso mulimuli a o le'i oo i le afio mai faalua o le Alii. O nisi tagata o le a pauu ese atu [ma le Ekalesia], ae o le a tumau pea le atoatoa o le malo o le Atua e faafeiloaia le toe foi mai o lona Taitai—o Iesu Keriso.

E ui o lenei tupulaga ua tali tutusa lava ma le amioleaga i vaitaimi o Noa, ina ua faamamaina e le Alii le lalolagi i le lolo, ae o loo i ai se eseese tele lava i le taimi lenei. O lene eseese, ua faasoaia ai e le Atua nisi o Ana fanau malolosi mo le taimi mulimuli, o e o le a fesoasoani e tauave ma le manumalo le malo.<sup>4</sup>

Ioe, uso e, ua avea i tatou ma nisi o Ana fanau malolosi. O lo tatou tiutetauave o le agavaa lea mo faamanuiaga mamalu uma ua faapolopolo e lo tatou Tama i le Lagi mo i tatou. Soo se mea tatou te o i ai, tatou te o

ma lo tatou perisitua. O tatou tutu ea i nofoaga paia? Faamolemole, ae e te le'i tuua oe lava ia ma lou perisitua i se tulaga lamatia e ala i lou alu i nofoaga po o le auai i gaoioiga ia e le talafeagai mo oe ma lene perisitua, ia e tu ma toe mafaufau i taunuuga. O i tatou uma lava ua uma ona faaee i ai le Perisitua Arona. I le faagasologa, sa tatou maua uma ai le mana lea e umia ia ki o auaunaga a agelu. Sa saunoa mai Peresitene Gordon B. Hinckley:

“E le tatau ona outou faia se mea e atiae ai se pa i le va o outou ma le galuega a agelu mo outou.

“E le mafai ona outou faia ni amioaga le mama i soo se itu. E le mafai ona outou lē faamaoni. E le mafai ona outou faaimamago pe talapepelo. E le mafai ona outou ta'u fua le suafa o le Atua pe tautatala i gagana eleelea ae maua pea le aiā tatau i auaunaga a agelu.”<sup>5</sup>

Afai o i ai se tasi o outou o loo i ai ni agasala i o outou olaga, ou te manao ia outou malamalama e aunoa ma se fesili po o se isi lava mea, o loo i ai se ala e toe foi atu ai. O le faagasologa ua ta'u a o le salamo. Sa foai mai e le Faaola Lona soifua ina ia tatou maua ai lene meaalofa faamanuiaina. E ui lava o le mea moni o le ala i le salamo e le faigofie, ae o folafolaga e moni. Ua uma ona ta'u mai ia i tatou, “E ui lava ina pei o ofu mumu a outou agasala, e sisina ia e pei o le kiona.”<sup>6</sup> “Ma ou le toe manatua [na agasala].”<sup>7</sup> E maeu lea faamatalaga. E maeu lea faamanuiaga. E maeu lea folafolaga.

Atonu o loo i ai nisi o outou o loo mafaufau ia te outou lava, “Ia, ou te le

o tausia uma ia poloaiga ma ou te le o faia mea uma e tatau ai, ae o lea lava o loo sologa lelei pea lo'u olaga. Ou te manatu e mafai ona ou fiafia i le olaga e aunoa ma le tausia o poloaiga.” Uso e, ou te folafola atu o le a le aoga lea i le faavavau.

I nai masina talu ai sa ou maua ai se tusi mai se alii sa manatu e mafai ona ia ola e aunoa ma poloaiga. Ua salamo nei o ia ma toe faafoi lona olaga ia ogatasi ma mataupu faavae o le talalelei ma poloaiga. Ou te fia faasoa atu ia te outou se parakalafa mai lana tusi, aua o se faatusa lea o le moni o mafaufauga sese: “Sa tatau ona ou aoaoina mo au lava ia (i le ala faigata) e faapea sa matuai sa'o lava le Faaola ina ua Ia fetalai, 'E leai se na te mafaia ona auauna i alii e toalu; aua e inoino o ia i le tasi, a e alofa atu i le tasi, a le o lea, e faapipii atu ia te ia i le tasi, a e faaleaoga i le tasi. Tou te le mafaia ona auauna i le Atua atoa ma mamone.”<sup>8</sup> Sa ou taumafai i le mea e gata ai, e fai mea uma e lua. I le iuga,” sa ia fai mai ai “sa ou maua ai le tuuaunoaina, pogisa, ma le tuuatoatasi lea e aumai e Satani ia i latou o e talitonu i ana togafiti, faatosinaga ma pepelo.”

Ina ia mafai ona tatou malolosi ma tetea atu i malosiaiga uma o loo tosoina ai i tatou i le itu sese po o leo uma o loo uunaia i tatou e o i ala sese, e tatau ona i ai ni a tatou lava molimau. Pe ua e 12 pe 112—po o soo se mea lava i le va—e mafai ona e iloaina mo oe lava ia o le talalelei a Iesu Keriso e moni. Faitau i le Tusi a Mamona. Mafaufau loloto i ana aoga. Ole atu i le Tama Faalelagi pe moni. Ua tatou maua le folafolaga e faapea “afai tou [te] ole atu ma le loto faamaoni, ma le manatu moni i ai, ma le faatuatua ia Keriso, o le a ia faaali mai le moni o ia mea ia te outou, i le mana o le Agaga Paia.”<sup>9</sup>

Pe a tatou iloa le moni o le Tusi a Mamona, ona tatou iloa foi lea o





# O Le Au Pulega Aooa o Le Ekalesia a lesu Keriso o le Au Paia o Aso e Gata Ai

Oketopa, 2011

## O LE AU PERESITENE SILI



Henry B. Eyring  
Fesoasoani Muamua



Thomas S. Monson  
Peresitene



Dieter F. Uchtdorf  
Fesoasoani Luo

## O LE KORAMA A APOSETOLO E TOASEFULUIA



Boyd K. Packard



L. Tom Perry



Russell M. Nelson



Dallin H. Oaks



M. Russell Ballard



Richard G. Scott



Robert D. Hales



Jeffrey R. Holland



David A. Bednar



Quentin L. Cook



D. Todd Christofferson



Neil L. Andersen

## O LE AU PERESITENE O FITUGAFULU



Ronald A. Rasband



Steven E. Snow



Walter F. González



L. Whitney Clayton



Joy E. Jensen



Donald L. Hallstrom



Tad R. Callister

O LE KORAMA MUAMUA A FITUGAFULU (I LE FAASOLOGA FAAALAFAPETA)



Marcos A. Adikanitis



Jose L. Alonso



Carlos H. Amado



Ian S. Adern



Mervyn B. Arnold



David S. Baxter



Shayne M. Bowen



Gerald Causse



Yoon Hwan Choi



Craig C. Christensen



Don K. Clarke



Carl B. Cook



Lawrence E. Conhige



Claudio R. M. Costa



LeGrand R. Curtis Jr.



Benjamin De Hoyos



John B. Dickson



Kevin R. Duncan



David F. Evans



Enrique R. Faldella



Eduardo Gavaret



Carlos A. Goady



Christoffel Golden Jr.



Gerrit W. Gong



C. Scott Gow



James J. Hamula



Keith K. Hibbig



Martin K. Jensen



Daniel L. Johnson



Paul V. Johnson



Patrick Kearon



Paul E. Koelliker



Erich W. Kopschke



Richard J. Moynnes



Marcus B. Nash



Brent H. Nielson



Allan F. Pucker



Kevin W. Pearson



Anthony D. Perkins



Paul B. Pieper



Raimel E. Pino



Bruce D. Porter



Dale G. Renlund



Michael T. Ringwood



Lynn G. Robbins



Joseph W. Sitari



Ulisses Soares



Gary E. Stevenson



Michael John U. Teh



Jose A. Taxeira



Octaviano Tenorio



Juan A. Uceda



Francisco J. Vinos



W. Christopher Waddell



William R. Walker




F. Michael Watson



Kazuhiko Yamashiro



Jorge F. Zeballos



Claudio D. Zivic



W. Craig Zwick



Wilford W. Andersen



Koichi Aoyagi



Randall K. Bennett



Craig A. Cardon



Bruce A. Carlson



J. Deen Connish



Keith R. Edwards



Stanley G. Ellis



Bradley D. Foster



Larry W. Gibbons



O. Vincent Haleck



Larry R. Lawrence



Per G. Molin



James B. Martino



Jairo Marzagrandi



Kent F. Richards



Gregory A. Schwitzer



Kent D. Watson



Larry Y. Wilson

O LE AU EPIKOPO PULEFAAMALUMALU



Richard C. Egleley  
Fesoosani Muamua



H. David Burton  
Epikopo Pulefaamalumalu



Keith B. McMullin  
Fesoosani Lua

O LE KORAMA LUA A FITUGAFULU (I LE FAASOLOGA FAAALAFAPETA)



***Sa faapotopoto le Au Paia o Aso e Gata Ai i nofoaga i le lalolagi atoa e faalogologo ai i saunoaga o le konafesi "i [la] latou lava gagana" (MF&F 90:11). O ata mai le itu aga-vale mai luga o tagata o le Ekalesia i Johannesburg, Aferika i Saute; Salvador, Pasila; San Salvador, El Salvador; Montreal, Quebec, Kanata; Montalban, Filipaina; Gómez Palacio, Meksiko; ma Tokyo, Iapani***



Iosefa Samita o se perofeta moni ma sa ia vaai i le Atua le Tama ma Lona Alo, o Iesu Keriso. Ona tatou iloa foi lea ua toefuataiina mai le talalelei i aso nei e gata ai e ala mai ia Iosefa Samita—e aofia ai le toefuataiga o le Perisitua Arona ma le Mekisateko.

O le taimi lava tatou te maua ai se molimau, o lo tatou tiute la o le faasoa atu o lena molimau i isi. O le toatele o outou uso sa auauna atu o ni faifeautalai i le lalolagi atoa. O le toatele o outou alii talavou o le a o atu e talai. Ia saunia outou lava ia i le taimi nei mo lena avanoa. Ia mautinoa ua outou agavaa e auauna atu.

Afai ua tatou saunia e faasoa atu le talalelei, ua tatou sauni foi e tali atu i le fautuaga a le Aposetolo o Peteru, o le na augani mai, “Ia saunia pea lava outou e tali atu . . . ia i latou uma o e fesili mai ia te outou i le uiga o le faamoemoe o loo ia te outou.”<sup>10</sup>

O le a tatou maua pea avanoa i o tatou olaga e faasoa atu ai o tatou talitonuga, e ui lava tatou te le iloa pea le taimi o le a valaauina ai tatou e faia lena mea. O sea avanoa faapea na oo mai ia te au i le 1957 a o ou faigaluega ai i se pisinisi lomitusi ma sa faatonuina au ou te alu i Dallas, Texas, o nisi taimi sa ta’ua ai “o le aai o lotu,” ou te lauga i se fonotaga faapisinisi. Ina ua maea le fonotaga, sa ou alu ai i se maimoaga e malaga i le pasi i nuu tau lalata ane i le aai. A o matou pasia le tele o lotu, e faapea mai le avepasi, “I le itu agavale tou te vaai ai le lotu Metotisi,” po o le “I le itu taumatau o le falesa Katoliko.”

A o matou pasia se fale matagofie piliki mumu sa tu mai se maupuepue, sa valaau mai le avepasi, “O le fale le la e potopoto ai le Au Mamona.” Sa valaau mai se tamaitai i le pito i tua o le pasi, “Avepasi, e mafai ona e ta’u mai ia i matou se mea e uiga i le Au Mamona?”



Sa faatu e le avepasi le pasi i autafa o le ala, faliu mai i lona nofoa ma tali mai, “Tamaitai, na o le pau le mea ou te iloa e uiga i le Au Mamona e potopoto i le fale pikili mumu le la. Pe i ai se tasi i luga o lenei pasi e iloa se mea e uiga i Mamona?”

Sa ou faatali mo se tasi e tali mai. Sa ou sioa atu i foliga vaai o tagata taitasi mo sina faailoga lava e iloa ai, sina manao e faamatala mai. E leai ma se mea. Sa ou iloa ai e pule lava la a’u pe fai e pei ona fautua mai le Aposetolo o Peteru, ina “ia saunia pea lava outou e tali atu . . . ia i latou uma o e fesili mai ia te outou i le uiga o le faamoemoe o loo ia te outou” Sa ou iloa ai foi le moni o le muagagana, “A oo mai le taimi mo faaiuga, ua le toe i ai se taimi e sauni ai.”

Mo le isi 15 minute pe ā, sa ou maua ai le avanoa e faasoa atu ai ia i latou i luga o le pasi la’u molimau e uiga i le Ekalesia ma o tatou talitonuga. Sa ou faafetai mo la’u molimau ma faafetai foi sa ou saunia e faasoa atu.

Faatasi ai ma lo’u lotu atoa ma lo’u agaga atoa, ou te tatalo ai mo alii uma o loo umia le perisitua ina ia faamamaluina lena perisitua ma faamaoni i le faatuatua lea na tuuina atu i le taimi na faaee atu ai. Tau ina ia iloa e i tatou uma o umia le perisitua a le Atua, mea ua tatou talitonu i ai. Tau ina ia tatou lototetele pea ma saunia e tutu mo mea ua tatou talitonu i ai, ma afai e tatau ona tatou tutu na o i tatou i le faagasologa, tau ina ia tatou faia ma le lototele, ua faamalosia e lo tatou iloa, e moni lava e le o tuua na o i tatou pe

a tatou tutu faatasi ma lo tatou Tama o i le Lagi.

A o tatou mafaufau i meaalofo sili ua tuuina mai ia i tatou—“o aia a le perisitua ua fesootai e le mavavaeeseina ma mana o le lagi”—tau ina ia avea pea lo tatou naunautaiga e leoleo ma puipui le perisitua ma ia agavaa mo ana folafolaga sili. Tau ina ia tatou mulimuli i faatonuga a le Faaola mo i tatou, o loo maua i le 3 Nifae: “Ia tuu i luga lo outou malamalama ina ia susulu atu i le lalolagi. Faauta, o au o le malamalama lea e tatau ona outou tuu i luga—mea ia na outou vaai ua ou faia.”<sup>11</sup>

Ia tatou mulimuli pea i lena malamalama ma tuu i luga mo le lalolagi uma ina ia vaai i ai, o la’u tatalo lea atoa ma a’u faamanuiaga i luga o outou uma o lagona mai lo’u leo, i le suafa o Iesu Keriso, amene. ■

#### FAAMATALAGA

1. David Brooks, “If It Feels Right . . .,” *New York Times*, Sept. 12, 2011, nytimes.com.
2. Alfred, Lord Tennyson, “Sir Galahad,” i le *Poems of the English Race*, sel. Raymond Macdonald Alden (1921), 296.
3. Tagai i le 1 Nifae 8: 26–28.
4. Ezra Taft Benson, “In His Steps” (Church Educational System fireside, Feb. 8, 1987); tagai foi i le “In His Steps,” i le 1979 *Devotional Speeches of the Year: BYU Devotional and Fireside Addresses* (1980), 59.
5. Gordon B. Hinckley, “O Le Agavaa Patino e Faaaoga ai le Perisitua,” *Liahona*, Iulai 2002, 58.
6. Isaia 1:18.
7. Ieremia 31:34.
8. Mataio 6:24.
9. Moronae 10:4.
10. 1 Peteru 3:15.
11. 3 Nifae 18:24.



**Saunia e Peresitene Henry B. Eyring**  
Fesoasoani Muamua i le Au Peresitene Sili

## O Se Molimau

*O le Tusi a Mamona o le taiala sili lea e iloa ai pe o faape'i lo tatou lelei ma le auala e lelei atili ai.*

Ou te faafetai mo lenei avanoa e lauga atu ai ia te outou i lenei Sapati i se konafesi aoao o Le Ekalesia a Iesu Keriso o le Au Paia o Aso e Gata Ai. Ua i ai i tagata uma o le Ekalesia lea lava tiute paia e tasi. Sa tatou taliaina ma folafola atu e faataunuaina ina ua tatou papatiso. Ua tatou aoao mai i upu a Alema, le perofeta o le Tusi a Mamona, mea na tatou folafola atu i le Atua o le a avea ai i tatou: “Loto e faanoanoa faatasi ma e e faanoanoa; ioe, ma faamafanafana atu ia te i latou o e e manaomia le faamafanafanaga, ma tutu o ni molimau a le Atua i taimi uma ma i mea uma, ma i nofoaga uma atonu tou te i ai, seia oo lava i le oti, ina ia mafai ona togilaina outou e le Atua, ma faitauina faatasi ma i latou o le uluai toetutu, ina ia mafai ona outou maua le ola e faavavau”<sup>1</sup>

O se tiute paia lena ma se folafolaga mamalu mai le Atua. O la'u savali i le asō, o se savali faamalosiua. E pei lava ona faamanino mai e le Tusi a Mamona le tiute ia i tatou, ua faapena foi ona faasino atu ai i tatou i luga o le ala i le ola e faavavau.

Muamua, ua tatou folafola atu o le a tatou agaalofa. Lua, sa tatou folafola atu o le a avea ma molimau a le Atua.

Ma le tolu, sa tatou folafola atu o le a tatou tumau. O le Tusi a Mamona o le taiala sili lea e iloa ai pe o faape'i lo tatou lelei ma le auala e lelei atili ai.

Tatou amata i le avea ai ma tagata agaalofa. O le a ou faamanatu atu ia te outou ni aafiaga talu ai nei. O le toatele o outou sa auai i se aso o auaunaga. E faitau afe na auaunaga sa faatulagaina i le salafa o le lalolagi.

O se aufono o o outou uso a Au Paia sa tatalo ia iloa pe o le a se auaunaga e fuafua. Sa latou fesili atu i le Atua ia iloa pe o ai e tatau ona tatou auauna atu i ai, o a auaunaga e tuuina atu, ma pe o ai e valaaulia ia auai. Atonu foi sa latou tatalo ia aua ne'i galo suō po o vaiinu. Ae o le mea sili ona taua, sa latou tatalo ina ia lagona e ē na tuu atua auaunaga ma ē na taliaina le alofa o le Atua.

Ou te iloa o na tatalo sa taliaina se tasi o uarota. E silia ma le 120 tagata na ofo atu e fesoasoani. I totonu o le tolu itula na latou faamamaina ai le lotoa o se falesa i lo matou nuu. O se galuega faigata ma le fiafia. Sa lagona e taitai o lea ekalesia le faafetai. O tagata uma na galulue i lena aso sa lagona le lotogatasi ma se alofa sili atu. Fai mai nisi sa latou lagonaina le fiafia a o latou veleina le vao ma teu ia laau.

O upu mai le Tusi a Mamona na fesoasoani ia i latou ia iloa ai le mafuaaga na latou lagona ai lena olioli. O le Tupu o Peniamina lea na fai atu i lona nuu, ia “Aoaoina, pe a outou auauna atu i o outou uso-a-tagata, ua nao lo outou auauna atu lava lea i lo outou Atua.”<sup>2</sup> Ma o Mamona lea na aoao mai i ana upu i le Tusi a Mamona, “O le alofa mama o le alofa lē pona lea o Keriso, ma e tumau e faavavau; ma o soo se tasi e maua ua i ai ia te ia i le aso gataaga, o le a lelei ia te ia.”<sup>3</sup>

O loo tausia e le Alii Ana folafolaga ia te oe pe a e tausia foi au folafolaga. A o e auauna atu i isi mo Ia, Na te faatagaina oe ia e lagonaina Lona alofa. Ma o le taimi lea, o le a avea ai lagona o le alofa mama o se vaega o o lava natura. Ma o le a e mauaina le faamautinoaga a Mamona i lou loto a o e faaauau ai ona auauna atu i isi i le olaga, o le a lelei mea uma ia te oe.

E pei lava ona e folafola atu i le Atua o le a e agaalofa atu, ua e folafola atu ai foi o le a avea oe ma Ana molimau i soo se mea e te i ai i lou olaga. Ou te toe faapea atu, o le Tusi a Mamona o le taiala sili lea ua ou iloa e fesoasoani ia i tatou e tausia lena folafolaga.

Sa i ai se taimi na valaaulia ai a'u ou te lauga i se sauniga o le faauuga i se iunivesite. Sa manao le peresitene e valaaulia Peresitene Gordon B. Hinckley, ae sa maua e le avanoa o ia. O lea sa ou maua ai le valaaulia. O le taimi lena o avea au o se sui fou o le Korama a Aposetolo e Toasefululua.

Sa oo ina popole le tagata lea na valaauliaina a'u e lauga, ina ua ia iloa atili e uiga i la'u matafaioi, o se Aposetolo. Sa ia valaau mai i le telefoni ma faapea mai ua ia malamalama nei i lo'u tiute o se molimau a Iesu Keriso.

I se leo manino lava sa ia faapea mai ai e le mafai ona ou faia lena mea pe a ou lauga atu. Sa ia faamalalama mai

e faaaloologia e le iunivesite ia tagata o talitonuga faalelotu uma, e aofia ai i latou e faaftitia le i ai o se Atua. Sa ia toe faapea mai, “E le mafai ona e faatau-nuina ou tiute iinei.”

Sa ou tuu i lalo le telefoni ma ni fesili taua i lo’u mafaufau. Pe tatau ea ona ou ta’u atu i le iunivesite o le a ou le tausia la’u ioega e lauga ai? Ua toe o ni nai vaiaso ona oo lea i le faamoemoe. Ua uma ona faasilasila lo’u auai atu. O le a se aafiaga o le igoa tauleleia o le Ekalesia ona o lo’u le tausia o la’u maliega?

Sa ou tatalo ia iloa le mea e finagalo le Atua ou te faia. Sa ou iloa o faataitaiga a Nifae, Apinati, Alema, Amoleka, ma atalii o Mosaea sa uunaia mea na ou oo i ai. O i latou o ni molimau totoa a Iesu Keriso ina ua fetaii ma tulaga lamatia o le oti.

O lea sa na o le pau le filifiliga e fai o le auala e saunia ai. Sa ou sailiili i mea uma sa mafai e aoao ai e uiga i le iunivesite. A o latalata mai le aso o le lauga, sa faatupulaia lo’u popole ma sa faateleina a’u tatalo.

Sa faamamaluina le iunivesite mo le faia o mea o loo faia foi e le Ekalesia i ana taumafaiga o galuega alofa i le salafa o le lalolagi. Ma i la’u tautalaga sa ou faamatalaina ai mea sa tatou faia ma sa latou faia e siitia ai tagata o loo manaomia tele le fesoasoani. Sa ou faapea atu ou te iloa o Iesu Keriso o le punavai o faamanuiga ma ua oo mai lena i olaga o i latou na tatou auuina atu i ai, ma latou auuina atu foi i ai.

Ina ua maea le fonotaga sa tutulai le aofia ma patipati, lea sa foliga mai sa fai si o’u le masani ai. Sa ou maofa ae o loo i ai pea sina popole. Sa ou manatua le mea na tupu ia Apinati. Na o Alema sa taliaina lana molimau. Ae o lena po, i se taumafataga aloaia tele, sa ou faalogo ai i le peresitene o le iunivesite o saunoa e faapea i lena tautalaga sa ia faalogo ai i afioga a le Atua.



O lena tuuina atu faavavega lea e tulaga ese i o’u aafiaga o se molimau a Keriso. Ae o le aafiaga o le Tusi a Mamona i ou uiga, mana ma le lototele e avea ai ma se molimau mo le Atua ua mautinoa. O aoaoga faavae ma faataitaiga lototoa o i lena tusi o le a siitia ai, talalaina ai, ma faamalositia ai oe.

O faifeautalaina uma o loo folafolaina atu le suafa ma le talalelei a Iesu Keriso o le a faamanuaina e ala i le taumamafa i aso uma mai le Tusi a Mamona. O matua o loo tauivi e faavae se molimau i le Faaola i le loto o se tamaitiiti, o le a maua le fesoasoani a o latou saili atu mo se auala e aumai ai upu ma le uunaiga a le Tusi a Mamona i totonu o le fale ma olaga uma o lo latou aiga. Ua faamaonia le moni o lena mea mo i tatou.

Ou te vaaia o loo tupu lena mea i sauniga faamanatuga uma ma vasega a le Ekalesia ou te auai. O loo faaalaina e failauga ma faiaoga se alofa ma se malamalama loloto i tusitusiga paia, aemaise le Tusi a Mamona. Ma o molimau patino ua aumai manino lava mai le taele o o latou loto. Latou te aoao atu i se talitonuga ua faateleina ma molimau atu i le mana.

Ua ou vaai foi i faamaoniga ua lelei

atu lo tatou faatinoina o le vaega lona tolu o le folafolaga sa tatou faia i le papatisoga. Ua tatou osifeagaiga ia tutumau, ia tausia poloaiga a le Atua a o tatou ola.

Sa ou asiasi atu i le potu o le falemai o se uo matua ua maua i le ma’i e le toe foi i se lelei o le kanesa. Sa ou alu ma ave o’u afafine e toalua. Ou te lei faamoemoeina e na te iloina i la’ua. Sa tutu lona lava aiga ma siomia lona moega a o matou ulu atu i totonu.

Sa ia tepa mai i luga ma ata. O le a ou manatua pea ona foliga ina ua ia vaai mai ua ma o atu ma avatu o ma afafine. Sa ia geno mai ia i laua e soso atu ia te ia i luga o le moega. Sa ia nofo i luga, opo i la’ua, ma faailoa i la’ua i lona aiga. Sa ia talanoa i le maoae o na teineiti laiti e toalua. Sa pei o loo ia faailoa atua ni purinise e i se aiga tupu.

Sa ou faamoemoe e vave maea le matou asiasiga. Sa ou manatu, e mautinoa lava, ua le lavā o ia. Ae a o ou vaavaai atu sa pei ua mou atu ni tausaga. Sa fiafia o ia ma sa iloagofie le faatumuina o ia i le alofa mo i matou uma.

Sa foliga mai o loo ia olioli i le

taimi lea e pei ua taofi le taimi. Sa ia faaalaina le tele o lona taimi e tausia ai fanau mo le Alii. Sa ia iloa mai le tala o le Tusi a Mamona sa ave e le Faola ia fanau laiti, taitoatasi, ma faamanuia i latou, ona tutulu lea i le olioli.<sup>4</sup> Ma sa umi se taimi na oo ai o ia lava i lena olioli lea sa mafai ai ona tumau i Lana auaunaga aagalofa e oo i le iuga.

Sa ou vaaia foi lena lava vavega e tasi i le potumoe o se alii sa lava ni auaunaga faamaoni na ia tuu atu sa ou manatu ai ua lava ana galuega ma ua ao ai ona malolo.

Sa ou iloa sa faia ni ona togafitiga uumi ma le tigaina mo se faamai lea na ta'u atu e fomai ia te ia o se faamai oti. Latou te le'i toe tuuina atua se isi togafitiga po o se faamoemoe.

Na avatu a'u e lona toalua i se potumoe i lo latou fale. Sa i ai o ia iina, na taoto o ia i luga o se moega ua teu lelei. Sa ia laeiina se ofutino paepae faatoa uma ona auli, se fusiua, ma ni seevae fou.

Sa ia vaaia lo'u te'i ma ata lemu ma faamalalama mai, "A uma ona e tuu maia ia te au se faamanuiaga, ou te manao ia ou saunia e tali atu i le valaau e tulai i luga ma ave lou moega." Sa ou iloa ai ua ia saunia mo le faatalanoaga o le a vave oo mai ma le Matai, o le na ia galue ai ma le faamaoni tele.

Sa avea o ia ma se faataitaiga o ni Au Paia o Aso e Gata Ai na liua atoatoa na ou feiloai i ai ina ua uma ona latou tuuina maia se olaga o auaunaga tuuto. Sa latou agai pea i luma.

Sa faamatala e Peresitene Marion G. Romney i lenei ala: "O le tagata ua liua atoatoa, o lona uiga ua mate moni lona manao i mea e feteenai ma le talalelei a Iesu Keriso ma o lea ua suia ai i se alofa i le Atua, faatasi ma se naunautaiga moni ia tumau i le tausiga o ana poloaiga."<sup>5</sup>

O lena naunautaiga tumau e

masani lava ona faatupulaia pea e soo poto masani o Iesu Keriso. E pei o le tuafafine na faafeiloaia o'u afafine ma le alii i ona seevae fou ua sauni e tulai ma savavali mo le Alii, sa mulimuli i Ana poloaiga e oo i le iuga. Ua outou tagai uma i lena mea.

E mafai ona e toe tagai i ai pe a e toe susueina le Tusi a Mamona. O loo ou lagonaina pea le faamemelo i lo'u loto pe a ou faitau i nei upu a se auauna ua matua le soifua ma naunautai a le Atua: "Ona e oo lava i lenei taimi, ua gatete tele lava lo'u tino atoa a'o ou taumafai e tautala atu ia te outou; peitai ua lagolagoina a'u e le Alii . . . ma ua ia tuu mai a'u ou te tautala atu ia te outou."<sup>6</sup>

E mafai ona faalototeleina outou e pei o au mai le faataitaiga o le tumau na tuuina mai ia i tatou e Moronae. Sa na o ia i lana galuega. Sa ia silafia ua lata mai le iuga o lona soifua. Ae se'i faalogo lava i le mea sa ia tusia mo tagata e le'i fananau mai ma tupuaga o ona fili i la le tino: "Ioe, o mai ia Keriso, ma faaatoatoaina ia te ia, ma faafiti

outou lava mai mea uma e le faale-atua, ma alolofa i le Atua ma o outou manatu atoa, mafaufau ma le malosi atoa, ona lava lea o lona alofa tunoa mo outou, ma o lona alofa tunoa e mafai ai ona outou atoatoa ia Keriso."<sup>7</sup>

Na tuu mai e Moronae lena moli-mau o se lauga faamavae mo lona soifua ma lana galuega. Sa ia uunaia le alofa mama e pei ona faia e perofeta i le Tusi a Mamona atoa. Sa ia faa-opoopo atu lana molimau i le Faola a o latalata lona maliu. Sa avea o ia ma atalii liua moni lava o le Atua, e pei ona tatou mafaia foi: faatumuina i le alofa mama, avea ma se molimau maumaututu ma le le fefe a le Faola ma Lana talalelei, ma naunau e tumau e oo i le iuga.

Na aoao mai e Moronae ia i tatou le mea e manaomia mai ia i tatou. Sa ia fai mai o le laasaga muamua lava i le liua atoatoa, o le faatuatua. O le sutesue ma le agaga tatalo i le Tusi a Mamona o le a fausia ai le faatuatua i le Atua le Tama, i Lona Alo Pele, ma i Lana talalelei. O le a fausia ai lou





faatuatua i perofeta a le Atua, o anamua ma ona po nei.

E mafai ona e latalata atili ai i le Atua nai lo se isi lava tusi. E mafai ona suia ai se olaga mo le lelei. Ou te uunaia outou ia fai le mea sa faia e sa'u soa faifeautalai. Ina ua ia sola ese mai lona aiga a o laitiiti, sa tuu e se tagata se Tusi a Mamona i se pusa na ia aveina i lana sailiga mo se fiafia e sili atu.

Sa mavae tausaga. Sa ia si'i atu mai lea nofoaga i lea nofoaga i le salafa o le lalolagi. Sa tuua na o ia ma le le fiafia i se tasi o aso ma sa vaaia ai le pusa lea. Sa tumu le pusa i mea sa ia feaveaia. I le taele o le pusa, sa ia maua ai le Tusi a Mamona. Sa ia faitau i le folafolaga na i ai ma faataitai ai. Sa ia iloa e moni. O lona molimau sa suia ai lona olaga. Sa ia maua le fiafia e sili atu nai lo ana miti na faamemelo i ai.

Atonu e le o faitauina lau Tusi a Mamona i le tele o taimi e tatau ai ona o le tele o ou tiute ma gaoioiga o loo e taulai atu i ai i aso uma. Ou te augani atu ia te outou ina ia e inu soo mai le loloto o ona itulau. Ua i ai i totonu le atoaga o le talalelei a Iesu Keriso, le ala e tasi e toe foi atu ai i le Atua.

Ou te tuu atu ia te outou la'u molimau mautinoa o loo soifua le Atua ma o le a tali mai i au tatalo. O Iesu Keriso o le Faaola o le lalolagi. O le Tusi a Mamona o se molimau moni ma le mautinoa o loo soifua o Ia ma o Ia o loo tatou Faaola toetu ma o loo soifua.

O le Tusi a Mamona o se molimau taua. Ou te tuua nei outou ma la'u molimau i le suafa paia o Iesu Keriso, amene. ■

#### FAAMATALAGA

1. Mosaea 18:9.
2. Mosaea 2:17.
3. Moronae 7:47.
4. Tagai i le 3 Nifae 17:21–22.
5. Marion G. Romney, i le Conference Report, Oct. 1963, 23.
6. Mosaea 2:30.
7. Moronae 10:32.



Saunia e Elder Robert D. Hales

○ Le Korama a Aposetolo e Toasefululua

# Faatalitali i le Alii: Ia Faia Lou Finagalo

*O le faamoemoega o loo tatou olaga i le lalolagi ia tatou ola, tuputupu ae, ma ia faamalolosia e ala i o tatou lava aafiaga.*

I lenei taeao o le Sapati, tatou te faafetai ai ma molimau atu i le mea moni o loo soifua loo tatou Faaola. Ua toefuatai mai Lana talalelei e ala i le Perofeta o Iosefa Samita. E moni le Tusi a Mamona. O loo taitaiina i tatou e se perofeta soifua i aso nei, o Peresitene Thomas S. Monson. Ae o le mea aupito taua, tatou te molimau atu ma le faamaoni a'ia'i i le Togiola a Iesu Keriso atoa ai ma faamanuiaga e faavavau ia e tafe mai ai.

I nai masina ua tuanai atu, sa ou maua ai le avanoa e suesue ma aoao ai e uiga i le taulaga togiola a le Faaola ma Lona saunia o Ia lava e faataunuu lona taulaga e faavavau mo i tatou taitoatasi.

O Ana tapenaga sa amataina i le muai olaga i le taimi, sa faatalitali ai o Ia i Lona Tama, ma fetalai atu, "Ia faia Lou finagalo, ma e a oe pea le mamalu e faavavau."<sup>1</sup> Na amata mai i lona taimi ma faaauau ai lava e oo mai i le asō, na te faaaogaina ai Lona faitalia e talia ma faataunuu ai le fuafuaga a loo tatou Tama Faalelagi. O loo aoao mai tusitusiga paia e faapea, a o laitiiti o Ia, sa i ai o Ia "i le fale o [Lona] Tama"<sup>2</sup> ma "faatalitali ai i le Alii mo le oo mai o le taimi o lana galuega."<sup>3</sup> Ina ua 30

tausaga o lona soifuaga, sa puapuagatia o Ia i faaososoga faigata ae sa fili-fili lava e teena, ma fetalai atu, "Satani e, ina aluese ia oe i o'u tua."<sup>4</sup> I Ketese-manee, sa Ia faatuatuaina ai Lona Tama, i le fetalai atu, "Aua le faia lo'u loto, a o loo finagalo,"<sup>5</sup> ona ia faaaogaina ai lea o Lana faitalia e puapuagatia ai mo a tatou agasala. Na ala atu i le faalua-maina i se faamasinoga faalauaitele ma le matuitui o le faasatauroga, sa Ia faatalitali ai i Lona Tama, ma ioe ai ina ia "manua ona o a tatou solitulafono . . . [ma] momomo o ia ona o a tatou amio leaga."<sup>6</sup> Peitai, a o alaga atu o ia, "Lo'u Atua e, lo'u Atua e, se a le mea ua e tuulafoai mai ai au?"<sup>7</sup> Sa faatalitali o Ia i Lona Tama—i le faaaogaina o Lona faitalia e faamagalaga ai Ona fili,<sup>8</sup> vaaia Lona tina,<sup>9</sup> ma tumau e oo i le iuga seia oo ina uma Lona soifua ma Lana misiona i le olaga nei.<sup>10</sup>

E masani ona ou mafaufau loloto, Aisea e oo ai tofotofoga ma faigata i le Alo o le Atua ma Ana perofeta paia ma le Au Paia faamaoni uma, e ui ina latou taumafai e fai le finagalo o le Tama Faalelagi? Aisea ua faigata tele ai, ae maise lava mo i latou?

Ou te mafaufau ia Iosefa Samita, o lē na tigaina i ma'i a o laitiiti ma



sauaga i lona olaga. E pei foi o le Faaola, sa ia alaga atu, “Le Atua e, o fea o i ai oe?”<sup>11</sup> Ae e ui lava ina sa foliga mai sa tuua na o ia, sa ia faaaogaina lava lana faitalia e faatalitali ai i le Alii ma faataunuu le finagalo o lona Tama Faalelagi.

Ou te mafaufau i o tatou tuua pai-onia, sa tuliese faamalosi mai Navu ma sopoia ai lafanua valevalenoa—sa faaaoga a latou faitalia e mulimuli ai i se perofeta e ui lava ina sa latou tiginia i ma’i, mativa, ma o nisi na maliliu. Aisea na latou oo ai i na tofotofoga leaga? Mo le a le taunuuga? Mo le a le faamoemoega?

A o tatou fesiligia nei fesili, tatou te iloa ai o le faamoemoega o lo tatou olaga i le lalolagi ia tatou ola, tupu-tupu ae, ma ia faamalolosia e ala i o tatou lava aafiaga. E faapefea ona tatou faia leni mea? Ua tuuina mai e tusitusiga paia ia i tatou se tali i se fuaitau faigofie se tasi: tatou “faatalitali ia Ieova.”<sup>12</sup> E oo mai tofotofoga ma faaososoga ia i tatou uma lava.

O nei luitau o le olaga nei e mafai ai e i tatou ma lo tatou Tama Faalelagi ona iloa pe tatou te faaaogaina a tatou faitalia e mulimuli ai i Lona Alo. Ua uma ona Ia silafia, ma ua tatou maua le avanoa e iloa ai, e tusa lava pe o le a le faigata o tulaga tatou te i ai, “o nei mea uma e [mo lo tatou] poto masani, ma lo . . . [tatou] lelei.”<sup>13</sup>

Pe o le uiga la o leni mea o le a tatou malamalama i taimi uma i o tatou luitau? Pe o le a leai la se mafua-aga e fesili ai i tatou uma, i se taimi, “Le Atua e, o fea o i ai oe?”<sup>14</sup> Ioe! A maliu se toalua, o le a tuufesili se soa. Pe a oo mai se faafitauli tautupe i se aiga, o le a fesili se tamā. Pe a se ese le fanau mai le ala, o le a fetagisi se tina ma se tama i le faanoanoa. Ioe, “e afe ane le tagi i le afiafi, a o le alaga fiafia i le taeao.”<sup>15</sup> Ona, oo lea i le amataga o lo tatou faatuatua ma le malamalama faateleina, tatou te tutulai ma filifili e faatalitali i le Alii, ma faapea atu, “Ia faia lou finagalo.”<sup>16</sup>

O le a la, le uiga o le faatalitali

i le Alii? I tusitusiga paia, o le upu *faatalitali* o lona uiga ia faamoemoe, ia tepa taulai, ma ia faalagolago. O le faamoemoe ma le faalagolago i le Alii e manaomia ai le faatuatua, onosai, lotomaulalo, agamalu, faapalepale, tausia o poloaiga, ma le tumau seia oo i le iuga.

O le faatalitali i le Alii, o lona uiga o le totoina o le fatu o le faatuatua ma tausia “ma le filiga tele, ma le . . . onosai.”<sup>17</sup>

O lona uiga o le tatalo e pei ona faia e le Faaola—i le Atua, lo tatou Tama Faalelagi—na faapea atu ai, “Ia oo mai Lou malo. Ia fai Lou finagalo.”<sup>18</sup> O se tatalo tatou te tuuina atu ma o tatou agaga atoa, i le suafa o lo tatou Faaola, o Iesu Keriso.

O le faatalitali i le Alii o lona uiga o le mafaufau loloto i ai i o tatou loto ma “maua[ina] le Agaga Paia” ina ia mafai ona tatou iloa “mea uma e tatau ona [tatou] faia.”<sup>19</sup>

Pe a tatou mulimuli i uunaiga a le Agaga, tatou te iloa ai o “puapuaga e tupu ai le onosai”<sup>20</sup> ma tatou te aoao ai ia “faaaauu pea i le onosai seia faatoatoaina [tatou].”<sup>21</sup>

O le faatalitali i le Alii o lona uiga o le “tutumau mausali”<sup>22</sup> ma “fetaomi atu i luma” i le faatuatua, “ma se susulu atoatoa o le faamoemoe.”<sup>23</sup>

O lona uiga “ua na o galuega a Keriso . . . ua faalagolago i ai”<sup>24</sup> ma “faatasi ai ma le fesoasoani o [Lona] alofa tunoa ia te i [tatou, e fai atu ai]: Ia faia lou finagalo, le Alii e, ae le o matou loto.”<sup>25</sup>

A o tatou faatalitali i le Alii, ua tatou “le mafaagaetia i le tausiga o poloaiga,”<sup>26</sup> ma le iloaina o le a tatou “mapu mai i o [tatou] puapuaga uma i se aso.”<sup>27</sup>

Ma “aua le lafoai ai . . . lo [tatou] faamalosi”<sup>28</sup> ma o “mea uma sa [tatou] puapuagatia ai o le a galulue faatasi mo lo [tatou] lelei.”<sup>29</sup>

O na puapuaga o le a oo mai i soo se ituaiga ma soo se malosī. O le aafiaga o Iopu e faamanatu mai ai ia i tatou mea e ono manaomia ona tatou onosaia. Sa aveesea mea uma a Iopu, e aofia ai lona fanua, fale, ma manu vaefa; tagata o lona aiga; lona igoa tauleleia; lona malosī faaletino; faapea foi ma lona manuia faalemafau. Peitai, sa faatalitali lava o ia i le Alii ma sa tuuina atu se molimau patino mamana: Fai mai a ia:

“Aua ua ou iloa, o loo soifua le na te togiolaina au, o aso amuli foi e tulai mai ai o ia i luga o le elelee:

“E ui lava foi ina . . . faaumatia lenei tino, ae ou te iloa atu le Atua i lo’u tino.”<sup>30</sup>

“E ui lava ina fasioti o ia ia te a’u, ou te faamoemoe pea ia te ia.”<sup>31</sup>

E ui lava i faataitaiga matagofie a Iopu, o perofeta, ma le Faaola, o le a tatou iloa lava e faigata le faatalitali i le Alii, aemaise lava pe a tatou le malamalama atoatoa i Lana fuafuaga ma faamoemoega mo i tatou. O lona malamalama e masani lava ona tuu mai soo i “lea fuaitau i luga o lea fuaitau, ma lea mataupu i luga o lea mataupu.”<sup>32</sup>

I lo’u olaga ua ou aoao ai o nisi taimi ou te le maua ai se tali i se tatalo ona ua silafia e le Alii ou te le o sauni. Ae a tali mai o Ia, e masani lava “o si mea itiiti i i ma sina mea itiiti i o”<sup>33</sup> aua na pau na o mea e mafai ona ou tauaveina po o mea ua ou naunau e fai.

E masani ona tatou tatalo ia maua le onosai, ae tatou te mananao i ai i le taimi nei lava! A o talavou, sa tatalo ai Peresitene Tavita O. MaKei mo se molimau i le moni o le talalelei. O ni tausaga se tele mulimuli ane, a o faamisiona o ia i Sikotilani, na faatoa oo mai ai lona molimau. Sa ia tusia mulimuli ane, “Sa o se faamautinoaga ia te au e faapea, o tatalo faamaoni e taliina mai ‘i se taimi, i soo se mea.”<sup>34</sup>

Atonu tatou te le iloa po o afea pe faapefea foi ona tuuina mai tali a le Alii, ae i Lana lava taimi ma Lana lava ala, o le a oo mai ai tali. Mo nisi o tali atonu tatou te faatalitali ai seia oo i le olaga a sau. Atonu e moni lenei mea i nisi o folafolaga i o tatou faamanuiaga faapeteriaka ma mo nisi o faamanuiaga mo tagata o aiga. Ia aua nei o tatou fiu i le Alii. O Ana faamanuiaga e faavavau, ae le mo na o sina taimi.

O le faatalitali i le Alii tatou te maua ai se avanoa le au maua e iloa ai e toatele o loo faatalitali mai ia i tatou. E faatalitali mai a tatou fanau ia i tatou e faaali atu le onosai, alofa ma le loto malamalama ia i latou. E faatalitali mai o tatou matua ia i tatou e faaali atu le agaga faafetai ma le agaalofa. E faatalitali mai o tatou uso ma tuafafine ia i tatou ia tatou loto malamalama, lotoalofa, ma loto faamagalō. E faatalitali o tatou taitoalua ia i tatou ia alolofa atu ia i latou e pei ona alofaina i tatou taitoatasi e le Faaola.

Pe a tatou onosaia puapuaga faaletino, e faateleina lo tatou nofouta i le toatele o loo faatalitali mai ia i tatou taitoatasi. Mo Maria ma Mareta uma, mo Samaria agalelei uma o e auuina atu i e mama’i, fesoasoani i e vaivai, ma tausua e e gasegase faalemafau ma faaletino, ou te faailoa atu le agaga faafetai o se Tama Faalelagi alofa ma Lona Alo Pele. I au galuega faa-Keriso i aso uma, o loo faatalitali ai i le Alii ma faia le finagalo o lou Tama Faalelagi. Ua manino lava Lana fetalai ia te oe: “Aua na faia e outou i le tasi o e aupito itiiti o o’u uso nei, o a’u lea na outou faia i ai.”<sup>35</sup> O loo Ia silafia au osigataulaga ma ou faanoanoaga. E faafofoga mai o Ia i au tatalo. O Lona filemu ma [Lona] malologa o le a fai mo oe pe a tumau pea ona e faatalitali mo Ia i le faatuatua.

O i tatou uma taitoatasi ua sili atu ona alofagia e le Alii nai lo le mea

e mafai ona tatou malamalama pe manatu i ai. O lea ia tatou agalelei atili ai o le tasi i le isi ma agalelei atili ia i tatou lava. Ia tatou manatua a o tatou faatalitali i le Alii, ua avea i tatou “ma tagata paia e ala i [Lana] togiola, . . . e usiusitai, agamalu, lotomauualalo, onosai, ma tumu i le alofa, loto ina usitai uma ua silafia e le Alii e tatau ona faaoo mai i [o tatou] luga, e pei ona usitai atu se tamaitiiti i lona tama.”<sup>36</sup>

Na faapena le usiusitai o lo tatou Faaola i Lona Tama i le Faatoaga o Ketesemane. Sa Ia augani atu i Ona soo, “Tatou mataala faatasi ma au,” ae e faatolu ona foi mai o Ia ia i latou ae tau mai ua gase la latou moe.”<sup>37</sup> O le leai o se mafutaga a nei soo ma le le i ai o Lona Tama, sa filifili ai le Faaola e mafatia i “tiga ma puapuaga ma faaososoga o ituaiga eseese.”<sup>38</sup> Faatasi ai ma se agelu na auina mai e faamalosi ia te Ia,<sup>39</sup> E “le’i faafiti o Ia e inu le ipu oona.”<sup>40</sup> Sa faatalitali o Ia i Lona Tama i le fetalai atu, “Ia faia lou finagalo,”<sup>41</sup> ma sa Ia solia toatasi ma le lotomauualalo le soligavine.<sup>42</sup> O lea, i le avea ai ma se tasi o Ana Aposetolo e Toasefululua i nei aso e gata ai, ou te tatalo ina ia faamalolosia i tatou e mataala faatasi ma Ia ma faatalitali ia te Ia i o tatou aso uma.

I lenei taeao o le Sapati, e faailoa atu lo’u agaga faafetai auā “i lo’u Ketesemane”<sup>43</sup> ma a outou Ketesemane, e le o tuua ai na o i tatou. O Ia o lē e leoleo mai ia i *tatou* “e le tulemoē ia, e le moe lava.”<sup>44</sup> O Ana agelu iinei ma tua atu o le veli o loo “si’o faataamilo [tatou], e sapaapai [tatou] i luga.”<sup>45</sup> E tuuina atu la’u molimau faapitoa e moni Lana folafolaga aua na Ia fetalai, “A o e faatalitali ia leova e toe faafouina lo latou malosī; latou te sii ae apaau e pei o aeto; latou te femoeai, a e le vaivai; latou te savavali, a e le tigaina.”<sup>46</sup> Talosia ia tatou faatalitali ia te Ia e ala i le fetasomi atu i luma ma

le faatuatua, ina ia mafai ona tatou faapea atu i a tatou tatalo, “Ia faia lou finagalo,”<sup>47</sup> ma toe foi atu ia te Ia ma le mamalu. I le suafa paia o lo tatou Faaola ma le Togiola, o Iesu Keriso, amene. ■

#### FAAMATALAGA

1. Mose 4:2.
2. Luka 2:49.
3. Joseph Smith Translation, Matthew 3:24, i le Bible appendix.
4. Luka 4:8.
5. Luka 22:42.
6. Isaia 53:5; Mosaea 14:5.
7. Mataio 27:46; Mareko 15:34.
8. Tagai i le Luka 23:34.
9. Tagai i le Ioane 19:27.
10. Tagai i le Ioane 19:30.
11. Mataupu Faavae ma Feagaiga 121:1.
12. Salamo 37:9; 123:2; Isaia 8:17; 40:31; 2 Nifae 18:17.
13. Mataupu Faavae ma Feagaiga 122:7.
14. Mataupu Faavae ma Feagaiga 121:1.
15. Salamo 30:5.
16. Mataio 6:10; 3 Nifae 13:10; tagai foi i le Mataio 26:39.
17. Alema 32:41.
18. Mataio 6:10; Luka 11:2.
19. 2 Nifae 32:5.
20. Roma 5:3.
21. Mataupu Faavae ma Feagaiga 67:13.
22. Alema 45:17.
23. 2 Nifae 31:20.
24. Moronae 6:4.
25. Mataupu Faavae ma Feagaiga 109:44.
26. Alema 1:25.
27. Alema 34:41.
28. Eperu 10:35.
29. Mataupu Faavae ma Feagaiga 98:3.
30. Iopu 19:25–26.
31. Iopu 13:15.
32. 2 Nifae 28:30.
33. 2 Nifae 28:30.
34. *Aoaoga a Peresitene o le Ekalesia: Tavita O. MaKei* (2003), xviii.
35. Mataio 25:40.
36. Mosaea 3:19.
37. Mataio 26:38; tagai foi i fuaiupu 39–45.
38. Alema 7:11.
39. Tagai i le Luka 22:43.
40. “Mo Ia o Le na Faalavaau,” *Viiga*, no. 105; tagai foi i le 3 Nifae 11:11; Mataupu Faavae ma Feagaiga 19:18–19.
41. Mataio 26:42.
42. Tagai i le Mataupu Faavae ma Feagaiga 76:107; 88:106; 133:50.
43. “O Fea le Filemu?” *Viiga*, nu. 68.
44. Salamo 121:4.
45. Mataupu Faavae ma Feagaiga 84:88.
46. Isaia 40:31.
47. Mataio 26:42.



**Saunia e Elder Tad R. Callister**

○ Le Au Peresitene o Fitugafulu

## ○ Le Tusi a Mamona—o se Tusi mai le Atua

*Faatasi ma le Tusi Paia, o le Tusi a Mamona o se molimau e le mavavaeeseina o aoaoga faavae a Keriso ma Lona paia.*

○ ni tausaga se tele ua mavae, sa tago ai mo le taimi muamua lava le tamā, o le tamā, o le tamā o lo’u tina i se kopi o le Tusi a Mamona. Sa ia sueina i le ogatotonu ma faitau ni nai itulau. Ona ia fai mai lea, “O le tusi lena a le o le Atua, o le tiapolo sa tusiaina, ma o le a ou sueina po o ai na tusia.” E faalua ona ia faitauina atoa i aso e 10 na sosoo ai, ona ia tautino mai lea, “E le mafai e le tiapolo ona tusia lea [tusi]—e tatau lava la ona mai i le Atua.”<sup>1</sup>

O le tulaga maoae lena o le Tusi a Mamona—e leai se vaega e faavaeluaā ai. A le o le afioga a le Atua e pei ona folafola mai ai, ia po o se mea taufaasese atoa foi. O lenei tusi e le na ona tautino maia o ni aoaoga lelei po o se manatu faalelotu po o se tuufaatasiga o ni tusiga manino. Ua tautino mai o le afioga a le Atua—o fuaiupu uma, faasologa uma, itulau uma. Sa tautino mai e Iosefa Samita sa taialaina o ia e se agelu a le Atua i papatusi auro, lea sa i ai tusitusiga a perofeta i Amerika anamua, ma sa

ia faaliliuina na papatusi e ala i mana faalelagi. Afai e moni lena tala, o lona uiga la, o le Tusi a Mamona o se tusitusiga paia, e pei lava ona tautino mai ai; afai e leai, o se taufaasese e susua faaupuga ae leaga.

Sa ta’ua e C. S. Lewis se faafitauli talitutusa faapena lea e oo i ai se tasi e tatau ona filifili pe taliaina pe teena le paia o le Faaola—lea e faapena foi ona leai se mea e ta’u o se faavaeluaā-tai: “O loo ou taumafai i i e taofi mai soo se tasi mai le faia o le faaupuga faavalevlea lea e masani ona fai e tagata e uiga ia te Ia: ‘Ua ou saunia e talia Iesu o se faiaoga sili o mea lelei, ae ou te le taliaina Lana tautinoga e faapea o le Atua.’ O le mea e tasi lena e le tatau ona tatou tautatala ai. O se tagata sa na o se tagata ma tautala i ituaiga mea na fai mai ai Iesu, o le a le o se faiaoga sili o mea lelei. . . . E tatau ona fai lau filifiliga. A le o lenei tagata sa avea, ma o le Alo o le Atua: ia po o se tagata ululeaga po o se mea e sili atu le leaga. . . . Ae aua nei o tatou o mai ma soo se manatu faavalevlea e



faapea o Ia o se tagata faiaoga sili. Na te le'i tuu maia lena faaliliuga ia i tatou. Na te le'i fuafuaina foi.”<sup>2</sup>

E faapena foi ona tatau ona tatou faia se filifiliga faigofie i le Tusi a Mamona: a le mai le Atua, o le tiapolo. E leai lava se isi filifiliga. Ou te valaaulia outou mo sina taimi e fai ai se suega e fesoasoani e te iloa ai le natura moni o lenei tusi. Fesili ifo ia te oe lava pe tata'i atu oe e mau nei mai le Tusi a Mamona ia e latalata atili ai i le Atua po o le tiapolo:

“Ia taumamafa fiafia i afioga a Keriso; aua faauta, o afioga a Keriso o le a ta'u mai ai ia te outou mea uma e tatou ona outou faia” (2 Nifae 32:3).

Po o upu nei a se tamā alofa i ona atalii: “Ma o lenei, ou atalii e, ia manatua, ia manatua o luga lava o le papa o lo tatou Togiola, o le Keriso lea, le Alo o le Atua, e ao ina oulua atinae ai lo oulua faavae” (Helamana 5:12).

Po o upu nei a se perofeta: “O mai ia Keriso, ma faaatoatoaina ia te ia” (Moronae 10:32).

Pe mafai ea e le tiapolo ona tusia nei faamatalaga mai le Tusi a Mamona? Ina ua uma ona tuliese e le Faaola nisi o tiapolo, sa fai mai le au Faresaio sa Ia faia lea e ala “i a Pelesepulo le alii o temoni.” Sa tali atu le Faaola e faapea, o se faaiuga faapena o se mea faavalevlea lea: “O malo uma,” Na fetalai ai o Ia, “ua fevaevaeai e faaumatia ai; o aiga . . . e fevaevaeai e le tumau ia.” Ona sosoo ai lea ma Lona manatu mulimuli: *“Afai foi e tulia e Satani ia Satani, ona*

*fevaevaeai lea o ia ia te ia; pe faapefea foi ona tumau o lona malo?”* (Mataio 12:24–26; faaopoopo le faamamafa).

Afai ua aoao mai i tatou e mau na faatoa ou ta'ua mai le Tusi a Mamona e tapuai ma alofa ma auauna atu i le Faaola (o loo faapena ona aoao mai ai), e faapefea la ona mai le tiapolo? Afai o lea, e fevaevaeai o ia lava ma faapea ona faaumatia ai lona lava malo, le tulaga tonu lea na fetalai ai le Faaola e le mafai ona i ai. O se faitauga faamaoni, ma le manatu mama, o le Tusi a Mamona o le a aumai ai se tasi i le faaiuga lava e tasi e pei ona maua e le tamā, o le tamā, o le tamā o lo'u tina, o le: “E le mafai ona tusia e le tiapolo—e tatou lava ona mai i le Atua.”

Ae aisea lava e matuai taua ai le Tusi a Mamona pe afai ua tatou maua le Tusi Paia tatou te aoao ai e uiga ia Iesu Keriso? Pe na e tuufesili pe aisea ua tele ai ekalesia Kerisiano i le lalolagi i aso nei, pe afai e maua mai a latou aoaoga faavae mai lea Tusi Paia lava e tasi? Ona e eseese a latou faauigaga o le Tusi Paia. Ana faapea e tutusa a latou faauigaga, semanu e tutusa lava le ekalesia. E le o se tulaga lenei e finagalo ai le Alii, aua na tautino mai e le Aposetolo o Paulo e faapea, e “tasi le Alii, e tasi le faatuatuaga, e tasi le papatisoga” (Efeso 4:5). Ina ia fesoasoani ia oo mai lenei tasi, ua faatulagaina ai e le Alii se tulafono faalelagi o molimau. Na aoao mai Paulo, “E mautu upu uma i le mau a le toalua po o le toatolu” (2 Korinito 13:1).

O le Tusi Paia o se molimau e tasi

ia Iesu Keriso; o le Tusi a Mamona o le isi lea. Aisea e matuai taua ai lenei molimau lona lua? Atonu o le a fesoasoani le faataitaiga vaaia lenei: E fia ni laina sasao e mafai ona e tusia e ui atu i se vaega se tasi i luga o se fasipepa? O le tali e le mafaitaulia. A faapea la mo se taimi, o lena vaega e tasi ua faatusa i le Tusi Paia, ma o le faitau selau o na laina sasao e tusia e ui atu i lena vaega e faatusa i faauigaga eseese o le Tusi Paia, ae o na faauigaga taitasi e faatusa i ekalesia eseese.

Ae peitai, o le a se mea e tupu, pe afai e i ai se vaega lona lua i luga o lena fasipepa, e faatusa i le Tusi a Mamona? E fia ni laina sasao e mafai ona e tusia i le va o nei vaega e lua: le Tusi Paia ma le Tusi a Mamona? E na o le tasi lava. E na o le tasi le faauigaga o aoaoga faavae a Keriso e mafai ona i ai ona o le molimau a nei molimau e lua.

Ma ua faafia ona fai le Tusi a Mamona ma se molimau faamaonia, faamanino, ma autasi o aoaoga na aoaoina i le Tusi Paia, o lea la e na o le “tasi le Alii, e tasi le faatuatuaga, e tasi le papatisoga.” Mo se faataitaiga, o loo fenumiai nisi tagata pe alagatatau le papatisoga mo le faaolataga e ui ina sa fetalai atu le Faaola ia Nikotemo, “Afai e le fanau se tasi i le vai ma le Agaga, e le mafai ona sao o ia i le malo o le Atua” (Ioane 3:5). Ae peitai, ua aveese e le Tusi a Mamona na faanunumi uma e uiga i lena mataupu: “Ma ua ia poloaiina tagata uma e ao ina latou salamo, ma papatiso i lona suafa, . . . po o le a le mafai ona faaolaina i latou



**Jundiai, Pasila**

i le malo o le Atua” (2 Nifae 9:23).

O loo i ai ni faiga eseese o le papatisoga i le lalolagi i aso nei e ui ua ta’u mai e le Tusi Paia le ala na papatisoina ai le Faaola, lo tatou Faaitaiga sili: “Ona maliu ae loa lea o [Ia] nai le vai” (Mataio 3:16). E mafai faapefea ona Ia maliu ae nai le vai seiloga na alu ifo muamua o Ia i totonu o le vai? Ina nei i ai se feteenaiga i le mataupu lenei, ua aveese e le Tusi a Mamona i le faamatalaga tuusao lenei o le aoaoga faavae i le faiga sao o le papatisoga: “Ma ona outou faatofu lea o i latou i totonu o le vai” (3 Nifae 11:26).

E talitonu le toatele e faapea ua muta faaaliga i le Tusi Paia e ui lava o le Tusi Paia lava ia o se molimau i le mamana o faaaliga a le Atua ua silia ma le 4,000 tausaga o le i ai o le tagata. Peitai o se aoaoga faavae sese e tasi e pei o lenei, e pei lava o se maa tomino e faaminoi ma mafua ai le toulu o isi maa pe i le tulaga lenei, o le toulu o aoaoga faavae sao. O se talitonuga i le muta o faaaliga e mafua ai le toilalo o le aoaoga faavae e faapea “o le Atua ua tutusa lava ia o ananafi, i le aso, ma le faavavau” (Mamona 9:9); e mafua ai ona solo i lalo le aoaoga faavae lea na aoao mai e Amosa e faapea “e le faia lava se mea e le Alii o Ieova, a e faaaliga lona finagalo i ana auuuna o perofeta” (Amosa 3:7); ma mafua ai le pa’u o le aoaoga faavae e faapea “e le faailoga tagata le Atua” (Galuega 10:34) ma o lea e fetalai mai ai i tagata uma o augatupulaga uma. Ae o le mea e lelei ai, o loo faamaonia e le Tusi a

Mamona ia upumoni faale-Tusi Paia o faaaliga faifai pea:

“Ma ou te toe tautala atu ia te outou o e e faafitia faaaliga a le Atua, ma fai mai ua mavae atu na mea, ua leai ni faaaliga. . . .

“Pe ua tatou le faitauina ea o le Atua ua tutusa lava o ia o ananafi, i le aso, ma le faavavau . . . ?” (Mamona 9:7, 9).

I nisi faaupuga, afai o le Atua, o lē e le fesuisuia, na fetalai mai i aso anamua, o le a faapena foi ona fetalai mai o Ia i aso nei.

E alu pea lava pea le lisi o faamaoniga ma faamalamalamaga o aoaoga faavae, ae e leai se mea e sili atu ona mamana, pe faagaetia, nai lo aoaoga a le Tusi a Mamona e uiga i le Togiola a Iesu Keriso. E te manao e tusi i lou loto se molimau e le faafitia e faapea, na alu ifo le Faaola i lalo o au agasala ma e leai se agasala, leai se mea faigata o le olaga nei e le mafai ona oo atu i ai le alofa tunoa o Lana Togiola—ma mo au tauiviga taitasi ua i ai Sana fofa o le mana maoae faamalolo? Ia faitau laia o le Tusi a Mamona. O le a aoao atu ia te oe ma molimau atu ia te oe, o le Togiola a Keriso e le iu aua e aofia ai ma manatulia ai ma e sili atu nai lo vaivaiga uma o le olaga nei ua silafia e le tagata. O le mafuaaga lena na tautino mai ai le perofeta o Mamona, “Tou te faamoemoe e ala i le togiola a Keriso” (Moronae 7:41).

E leitioa a folafola mai ma le lototele e le Tusi a Mamona, “Ma afai

tou te talitonu ia Keriso o le a outou talitonu i nei upu, ona o afiga i latou a Keriso” (2 Nifae 33:10). Faatasi ma le Tusi Paia, o le Tusi a Mamona o se molimau e le mavavaeseina o aoaoga faavae a Keriso ma Lona paia. Faatasi ai ma le Tusi Paia, ua “aoao mai i tagata uma ia latou faia mea lelei” (2 Nifae 33:10). Ma faatasi ai ma le Tusi Paia, ua aumaia ai i tatou i le “e tasi le Alii, e tasi le faatuatuaga, e tasi le papatisoga.” O le mafuaaga lena e matuai taua ai le Tusi a Mamona i o tatou olaga.

O ni nai tausaga ua tuanai, sa ou auai i se tasi o a tatou sauniga lotu i Toronto, Kanata. Sa lauga ai se tamaitai e 14-tausaga le matua. Fai mai o ia sa la talanoa ma se tasi o ana uo i le a’oga e uiga i mea tau lotu. Sa fai atu lana uo ia te ia, “O le a le lotu e te auai ai?”

Sa tali atu o ia, “O Le Ekalesia a Iesu Keriso o le Au Paia o Aso e Gata Ai, po o le Mamona.”

Sa tali ane lana uo, “Ou te iloa le ekalesia lena, ma ou te iloa e le moni.”

“E faapefea ona e iloa?” na tali atu ai.

“Aua,” o le tala lea a lana uo, “Sa ou sailiili i ai.”

“Na e faitauina le Tusi a Mamona?”

“Leai,” o le tali mai lea. “Ou te le’i faitaua.”

Ona tali atu lea o lenei tamaitai talavou lelei, “O lona uiga la e te le’i sailiili i la’u ekalesia, aua ua ou faitauina itulau uma o le Tusi a Mamona ma ua ou iloa ai e moni.”

Ua ou faitauina foi itulau uma o le Tusi a Mamona, ma toe faitau ma toe faitau, ma e tuuina atu la’u molimau faamaoni, e pei o le tamā, o le tamā, o le tamā o lo’u tina, e mai le Atua lea. I le suafa o Iesu Keriso, amene. ■

#### **FAAMATALAGA**

1. Willard Richards, in LeGrand Richards, *A Marvelous Work and a Wonder*, rev. ed. (1972), 81, 82.
2. C. S. Lewis, *Mere Christianity* (1952), 40–41.



**Saunia e Elaine S. Dalton**  
Peresitene Aoao o Tamaitai Talavou

## Alofa i Lona Tina

*E faapefea ona tausia e se tamā se afafine fiafia, e maufetuuna'ia lelei i se lalolagi ua matua matautia tele? Ua uma ona aoao mai e perofeta a le Alii le tali.*

E le mafai e upu ona faamatala le taimi paia e sapaia ai e se tamā fou se afafine pepe i ona lima mo le uluai taimi. O le tausaga nei na avea ai le ma fanau tama e toatolu o ni tamā fou o ni pepe teine. A o ou matauina lo ma atalii taalo lakapi malosi, o Jon, o siiina lona afafine pepe muamua i ona lima, sa ia tilotilo ifo ia te ia ma se vaaiga faamomoioto faaloalo ona tilotilo mai lea ia te au e foliga o fai mai—“E faapefea ona ou tausia se teineitiiti?”

O le taeao nei ou te fia talanoa atu i le ma fanau tama ma tamā uma lava. E faapefea ona tausia e se tamā se afafine fiafia, e maufetuuna'ia lelei i se lalolagi ua matua matautia tele? Ua uma ona aoao mai e perofeta a le Alii le tali. O se tali faigofie, ma e moni lava—“O le mea aupito taua e mafai e se tama ona faia mo sona [afafine] o le alofa lea i [lona] tina.”<sup>1</sup> O le ala e te alofa ai i lona tina, o le a e aoaoina ai lou afafine e uiga i le agavaivai, faamoni, faaloalo, agaalofo, ma le tuuto. O le a ia aoao mai i lau faataitaiga le mea ua faamoemoeina mai alii talavou, ma pe o a uiga auaumama e sailia i se toalua i le lumanai. E mafai ona e faaali atu i lou afafine i le ala e te alofa ai ma faamamalu lau ava ina ia faaiipoipo ai foi o ia i se e alofa ma faamamalu ia te

ia. O lau faataitaiga o le a aoao ai lou afafine e faataua le tulaga faatamaitai. O loo e faaali atu ia te ia o ia o se afafine o lo tatou Tama Faalelagi, o lē e alofa ia te ia.

Ia matua lava lou alofa i lona tina ina ia selesitila la oulua faaiipoipoga. O se faaiipoipoga i le malumalu mo le olaga nei ma le faavavau atoa, e matua aoga ai lava au taumafaiga silisili ma faamuamua aupito mauualuga. Ina ua faatoa faamae'aina e Nifae le malumalu i le vao, sa ia fai mai, “Ma . . . sa matou ola e tusa ma le ala o le fiafia<sup>2</sup> O le “ala o le fiafia” e maua i le malumalu. O le tausia o feagaiga. Aua lava ne'i faatagaina se faatosinaga e lou olaga po o lou aiga o le a mafua ai ona e faamelea au feagaiga po o lau tautinoga i lou toalua ma lou aiga.

I le polokalama a Tamaitai Talavou matou te fesoasoani ai i lou afafine ia malamalama i lona faasinomaga o se afafine o le Atua ma le taua o le tumau ai i le amiomama ma agavaa e maua faamanuiga o le malumalu ma se faaiipoipoga i le malumalu. Matou te aoaoina lou afafine i le taua o le faia ma le tausia o feagaiga paia. Matou te aoaoina lou afafine ina ia tautino atu nei e ola ina ia mafai ai ona agavaa pea lava e ulu atu i le malumalu, ma aua lava nei faatagaina se mea

e faatuai ai, faalavelavea ai, pe le agavaa ai o ia mo lena sini. O lau faataitaiga, o lona tamā, e leotele atu nai lo a tatou upu taua. E popole tamaitai talavou i o latou tamā. E toatele e fai mai o lo latou naunauga silisili o le faatasia lea e faavavau o se aiga. Latou te mananao ia te outou ia outou i ai iina, pe a latou o atu i le malumalu pe faaiipoipo i le malumalu. Ia e tumau vavalalata i lou afafine ma fesoasoani ia te ia e tumau le agavaa mo le malumalu. A oo ina 12 ona tausaga, alu ma ave soo o ia i le malumalu e faatino papatisoga mo ou tuua ma isi. O le a na ia faatauaina na manatua e faavavau.

O loo taumafai agaanu lauiloa i le taimi nei e faataumaoia mālīe ma ta'ufaatauvaaina lau matafaioi e faavavau o se peteriaka ma se tamā ma tuutiitiiti ou tiutetauave e aupito taua. Ua tuuina atu nei mea ia te oe “i se mamanu faalelagi,” ma i le avea ai o ni tamā e tataua ona outou “pulefaa-malumalu i [o outou] aiga i le alofa ma le amiotonu ma tuuina atu mea e manaomia o le olaga ma le puipuiga mo o [outou] aiga.”<sup>3</sup>

Tamā, o outou o leoleo o o outou aiga, o a outou ava, ma a outou fanau. O le taimi nei, “e le o se mea faigofie le puipua o se aiga o se tagata mai le ofi mai o mealeaga i [o latou] mafau-fau ma agaga. . . . E mafai e nei uuna-iga ona ulu sa'o mai i le fale. E [poto tele] Satani. Na te le tau talepeina se faitotoa e ulufale mai ai.”<sup>4</sup>

E tataua ona avea outou ma leoleo o le amiomama. “O sē e umia le perisitua e amiomama *amiomama*. O amio-ga mama e ta'u mai ai e mama [ou] mafauauga ma mama au faatinoga. . . . O le mama . . . o le uiga faaleatua. E “faatusa i le paia.”<sup>5</sup> O le mea e faataua-ina e Tamaitai Talavou o uiga faa-Keriso ia e aofia ai le mama. Matou te valaau atu nei ia te outou ina ia tatou



auai faatasi i le taitaiga o le lalolagi ina ia toe foi i le mama. Ina ia faia lena mea, e tatau ona outou “faatinoia le amiomama ma le paia”<sup>6</sup> e ala i le aveeseina mai lou olaga o soo se mea e leaga ma le tusa ai ma se o loo umia le perisitua paia a le Atua. “Ia tuu le amiomama e teuteuina ai ou mafaufauga e le aunoa; ona solo malosi ai lea o lou lototele i luma o le Atua; ma . . . o le a avea le Agaga Paia ma au soa e le aunoa.”<sup>7</sup> O lea, ia faaeteete i mea e te matamata ai i mea faafiafia i ala o faasalalauga po o tusi ma mekasini. O lau lava amiomama o le a avea ma faataitai mo ou afafine, faapea foi ou atalii, ma le malosiaga moni ma le lototoa faamaoni. O le avea ai ma leoleo o le amiomama i lou lava olaga, i lou aiga, ma olaga o lau fanau, o lou faaali atu foi lena i lou toalua ma ou afafine o le mea tonu e ta’u o le alofa moni. O lou lava mama, o le a e maua ai le mana.

O oe o le leoleo o lou afafine i se uiga moni o lena faaupuga. Ia avea oe o se vaega o le olaga o lou afafine. Tuu atu ia ona iloaina mea e te faalagolago i ai, o mea e te taulai i ai, o ou faamoemoga ma miti mo lona manuia ma le fiafia. Faatalanoa o ia, ia e iloa ana uo, ma ana uo tama pe a oo i lena taimi. Fesoasoani ia malamalama o ia i le mataupu faavae o le tusaafia, o se puipuiga lea. Fesoasoani ia te ia e

filifili ia musika ma ata e valaaulia ai le Agaga ma e ogatusa ma lona faasino-maga paia. Ia avea oe o se vaega ola o ia. Ma i ona tausaga o le talavou, afai e alu e tafao ae le sau tonu i le taimi, alu e sue mai. O le a musu o ia ma fai atu ia te oe, ua e faaleagaina lona olaga faaagafesootai, ae o le a ia iloa i lona loto e te alofa ia te ia ma o oe o lona leoleo.

E le o outou o ni alii faatauva. Ona o lo outou totoia i le lalolagi o le muai olaga, ua outou agavaa ai e avea ma taitai ma umiaina le mana o le perisitua. O iina sa outou faaalii ai le “faatuatua tele ma galuega lelei,” ma ua outou i ai iinei i le taimi nei e faia lena mea e tasi.<sup>8</sup> O lou perisitua ua vaetofia ai oe.

I ni nai vaiaso, o le a tuuina atu ai e le ma fanau tama e toatolu i o latou afafine pepe se igoa ma se faamanuiaga. Ou te faamoemoe o le uluai faamanuiaga lea o le mau faamanuiaga faaleperisitua latou te mauaina mai o latou tama, aua o le a latou manao-mia na faamanuiaga i le lalolagi o le a latou ola a’e ai. O le a faatau e lou afafine le perisitua ma naunau ai i lona loto o le mea lea e manao i ai i lona aiga ma le auaiga. Ia manatua e le aunoa “o aia a le perisitua ua fesootai e le mavavaeseina ma mana o le lagi” ma e mafai “na o . . . mataupu autu o

le amiotonu e pulea ai.”<sup>9</sup>

Tamā, o oe o le toa manumanu a lou afafine. O lo’u tama o lo’u toa manumanu lea. E masani ona ou faatalitali i le faasitepu o lo matou fale mo ia se’i manava mai i po uma. Na te siiina ma faataamilomilo a’u ona faatutu lea o ‘u vae i luga o ona tamatamaivae lapopoa ma faasiva a’u i totonu o le fale. Sa ou fiafia lava i le lu’i o le taumafai e mulimuli i ana laa uma. O lea lava ou te faia.

Tou te silafia e i ai i lau molimau se uunaiga mamana mo ou afafine. Sa ou iloaina e i ai se molimau a lo’u tama. Sa ou iloaina e alofa o ia i le Alii. Ma talu ai e alofa lo’u tama i le Alii, sa ou alofa ai foi. Sa ou iloa sa amanaiaina e ia fafine ua oti a latou tane, aua sa na faaaluina ona aso malolo e vali ai le fale o le fafine ua oti lana tane sa matou tuaoi. Sa ou manatu o le aso malolo aupito sili lea a lo matou aiga, aua na ia aoaoina ai a’u i le ala e vali ai! O le a e faamanuiaina le olaga o lou afafine mo tausaga a sau, pe afai e te sailia ni auala e faaalu faatasi ai ma ia se taimi ma faasoa atu lau molimau ia te ia.

I le Tusi a Mamona, sa liua ai Apiso ina ua faamatala i ai e lona tama se faaaliga vaaia maoae. Mo le tele o tausaga, sa ia tausia lana molimau i lona loto ma sa ola amiotonu i se nuu ua matuai amioleaga. Ona oo mai lea o le taimi ua na le toe mafaia ai ona taofiofi, a ua tamoe atu mai lea fale i lea fale e faasoa atu lana molimau ma vavega sa ia molimauina i le maota o le tupu. Na avea le mana o le liua o Apiso ma lana molimau, ma meafaigaluega e suia ai se nuu atoa. O tagata sa faalogo atu o ia molimau mai, sa avea ma se nuu sa “faaliliuina i le Alii, [ma] ua le toe pauu ese lava,” ma na avea o latou atalii ma au fitafiti talavou!<sup>10</sup>

E pei ona fai mai le viiga “Rise up, O men of God!”<sup>11</sup> O se valaau leneni mo outou, o alii o loo umia le perisitua



paia a le Atua. Ia faaupu outou e faapei ona ta'ua ai le Taitaiu o Moronae:

“O [ia] o se tagata malosi ma tau-taua tele; . . . o se tagata ua atoatoa le malamalama; . . . o se tagata sa mau-sali i le faatuatua ia Keriso. . . .

“ . . . A na pei tagata uma sa i ai, ma o i ai, ma o le a i ai, o Moronae, faauta, po ua luluina i lalo e faavavau mana o seoli; . . . po ua le maua e le tiapolo se mana i luga o loto o le fanauga a tagata.”<sup>12</sup>

Tuaganē, tamā, alii talavou, “Ia outou faamaoni i le perisitua tautupu ua ia te outou.”<sup>13</sup>

Ia e faapefea la ona e tausia se teineineitiiti? Alofa i lona tina. Taitai lou aiga i le malumalu, ia avea ma leoleo o le amiomama, ma faalautele lou perisitua. Tama, ua tuuina atu ia te outou afafine tautupu o lo tatou Tama Faalelagi. E mama i latou ma ua filifilia. Ou te tatalo ia outou vaavaaia lelei i latou, faamalolosia i latou, faataitai i ai le amiomama, ma aoao i latou ia mulimuli i tulagaaao o le Faola—aua o loo soifua o Ia! I le suafa o Iesu Keriso, amene. ■

#### FAAMATALAGA

1. Peresitene Tavita O. MaKei e tele ina ia sii maia lenei faamatalaga a Theodore Hesburgh, in “Quotable Quotes,” *Reader's Digest*, Jan. 1963, 25; tagai foi *Richard Evans' Quote Book* (1971), 11.
2. 2 Nifae 2:27.
3. “O Le Aiga: O Se Folafolaga i le Lalolagi,” *Liahona*, Nov. 2010, 129.
4. A. Theodore Tuttle, “The Role of Fathers,” *Ensign*, Jan. 1974, 67.
5. Ezra Taft Benson, “Godly Characteristics of the Master,” *Ensign*, Nov. 1986, 46.
6. Mataupu Faavae ma Feagaiga 46:33.
7. Mataupu Faavae ma Feagaiga 121: 45:45, 46.
8. Alema 13:3; tagai foi fuaiupu e 2.
9. Mataupu Faavae ma Feagaiga 121:36.
10. Alema 23:6; tagai foi Alema 19:16–17; 53:10–22.
11. “Rise Up, O Men of God,” *Viiga*, nu. 323.
12. Alema 48:11, 13, 17.
13. In Harold B. Lee, “Be Loyal to the Royal within You,” in *Speeches of the Year: BYU Devotional and Ten-Stake Fireside Addresses 1973* (1974), 100.



Saunia e Elder M. Russell Ballard

○ Le Korama a Aposetolo e Toasefululua

## ○ Le Taua o se Igoa

*Sei o tatou atiina ae se mausa . . . e faamanino atu ai o Le Ekalesia a Iesu Keriso o le Au Paia o Aso e Gata Ai, o le igoa lea na faatonuina ai i tatou e le Alii Lava Ia ina ia tatou lauiloa ai.*

Elder Hales, e avea ai ma sui o i matou uma, matou te faailoa atu ai lo matou alofa tele ma le agaga faafetai ua e faatasi mai i lenei taeao.

Talu mai le konafesi aoao mulimuli ia Aperila, o loo faaauau pea ona tau-lai atu lo'u mafaufau i le mataupu o le taua o se igoa. I nai masina ua mavae atu, ua tele fanau o fanau a le ma fanau ua fananau mai i lo matou aiga. E ui e foliga mai ua sili atu le vave o lo latou o mai nai lo la'u faitau, ae o tamaiti taitasi o se faaopoopoga fiafia lea i lo matou aiga. Ua tofua maua uma e i latou taitoatasi se igoa faapitoa na filifilia e o latou matua, o se igoa e lauiloa ai i o latou olaga atoa, e iloagofie ai o ia mai soo se tasi. E moni lea tulaga i soo se aiga, ma e moni foi i ekalesia i le lalolagi.

Na silafia e le Alii o Iesu Keriso le taua o le faaigoaina lelei o Lana Ekalesia i nei aso e gata ai. I le vaega e 115 o le Mataupu Faavae ma Feagaiga, na Ia faaigoa ai Lana Ekalesia: “Aua o le a faapea ona ta'ua o la'u ekalesia i aso e gata ai, “O Le Ekalesia a Iesu Keriso o le Au Paia o Aso e Gata Ai” (fuaiupu e 4).

Ma na aoaoina e le Tupu o Peni-amina lona nuu i le vaitaimi o le Tusi a Mamona:

“Ou te manao ai ia outou ave i o outou luga le suafa o Keriso, outou uma ua ulu atu i le feagaiga a le Atua o le a outou usiusitai e oo i le iuga o o outou ola. . . .

“Ma ou te manao ia outou manatua foi, o le igoa lenei sa ou fai atu o le a ou avatu ia te outou e le tatau lava ona soloiesea, vagana ai i le solitulafono; o lea, ia outou faaeteete ai ia outou le solitulafono, ina ia le soloiesea le suafa mai o outou loto” (Mosaea 5:8, 11).

Tatou te ave i o tatou luga le suafa o Keriso i le vai o le papatisoga. Tatou te faafouina aafiaga o lena papatisoga i vaiaso taitasi pe a tatou aai ma feinu i le faamanatuga, ma faailoa atu ai lo tatou naunautai e ave i o tatou luga Lona suafa ma folafola atu tatou te manatua pea o Ia (tagai i le MF&F 20:77, 79).

Pe o tatou iloa ea le faamanuaina o i tatou i le ave i o tatou luga o le suafa o le Alo Pele e Toatasi na Fanaua o le Atua? Pe o tatou malamalama ea i le taua o lena mea? Ua na o le suafa o le Faaola i lalo ifo o le lagi e mafai ona faaolaina ai le tagata (tagai i le 2 Nifae 31:21).

Pe afai o tou manatuaina, sa saunoa Peresitene Boyd K. Packer i le taua o le igoa o le Ekalesia i le konafesi aoao



ia Aperila ua tea atu. Sa ia faamatalaina faapea “o le usiisitai i faaaliga, ua tatou faaigoaina ai la tatou lava ekalesia o Le Ekalesia a Iesu Keriso o le Au Paia o Aso e Gata Ai ae le o le Ekalesia Mamona” (“Taialaina e le Agaga Paia,” *Liahona* Me 2011, 30).

Ona e taua tele le igoa atoa o le Ekalesia, o lea ou te toe faaleo atu ai ia faaaliga mai tusitusiga paia, faatonuga a le Au Peresitene Sili i tusi i le 1982 ma le 2001, ma saunoaga a isi Aposetolo o e na uunaia ia tagata o le Ekalesia ina ia tausia ma aoao atu i le lalolagi ua faaigoa le Ekalesia i le suafa o le Alii o Iesu. O le igoa lea o le a valaau ai i tatou e le Alii i aso e gata ai. O le igoa lea ua iloga ai Lana Ekalesia mai isi [ekalesia] uma.

Sa ou mafaufau soo lava i ai pe aisea ua faaigoa ai e le Faaola Lana Ekalesia toefuataiina i se igoa e sefulu-lima upu. Atonu e foliga e umi, ae ou te mafaufau i ai o se vaaiga lautele e faamatala ai le ituaiga Ekalesia, ma na vave lava ona avea ma se mea puupuu matagofie, faamaoni, ma faigofie. Pe faapefea ona tuusao atu ma le manino lenei faamatalaga ae ua faamatalaina i nai upu laiti?

E manino ma taua upu uma. O le upu *O Le* e faailoa mai ai le tulaga ese o le Ekalesia toefuataiina mai isi ekalesia i le lalolagi.

O upu *Ekalesia a Iesu Keriso* o loo tautino mai ai o Lana Ekalesia lenei. I le Tusi a Mamona na aoao mai ai

Iesu: “Ma e faapefea ona avea ma a’u ekalesia vagana ai ua faaigoaina i lo’u igoa? Aua afai e faaigoaina se ekalesia i le igoa o Mose o lona uiga o le ekalesia lea a Mose; pe afai e faaigoaina i le igoa o se tagata [pei o Mamona] o lona uiga o le ekalesia lea a le tagata; ae afai e faaigoaina i lo’u igoa o lona uiga o la’u ekalesia lea, pe afai ua atiae i latou i luga o la’u talalelei” (3 Nifae 27:8).

O upu *o Aso e Gata Ai* o loo faamalamalama mai ai e tutusa lava lenei Ekalesia ma le Ekalesia lea na faatuina e Iesu Keriso i le taimi o Lana galuega talai faaletino ae ua toefuatai mai i nei aso e gata ai. Tatou te iloa ai sa i ai se pau ese, po o le liliuese, lea e manao-mia ai le toefuatai mai o Lana Ekalesia moni ma le atoatoa i lo tatou vaitaimi.

O le *Au Paia* o lona uiga e mulimuli ia te Ia tagata o le ekalesia ma taumafai e faia Lona finagalo, tausii i Ana poloaiga, ma sauni e toe nonofo faatasi ma Ia ma lo tatou Tama Faalelagi i le lumanai. O le *Au Paia* o loo faasino lea ia i latou o e saili e faapaiaina o latou olaga e ala i le osi feagaiga e mulimuli ia Keriso.

O le igoa na faaigoa ai e le Faaola Lana Ekalesia o loo ta’u tonu mai ai lava ia i tatou ia ituaiga tagata tatou te i ai ma mea tatou te talitonu i ai. Tatou te talitonu o Iesu Keriso o le Faaola ma le Togiola o le lalolagi. Na Ia togiola tagata uma o e salamo mai a latou agasala, ma na Ia motusia ai noataga o le oti ma saunia le toetu mai le oti. Tatou

te mulimuli ia Iesu Keriso. Ma e faapei ona ta’u atu e le Tupu o Peniamina i lona nuu, ma ou te toe faamautu atu ia te outou i le asō: “Ia outou manatua ia taofi [Lona] suafa ia tusia pea i o outou loto” (Mosaea 5:12).

Ua poloaia i tatou e tutu atu e avea ma molimau ia te Ia “i taimi uma ma i mea uma, ma i nofoaga uma” (Mosaea 18:9). O lona uiga e ao ona tatou naunautai e faailoa atu i isi po o ai o loo tatou mulimuli i ai ma po o ai e ana le Ekalesia lea tatou te auai: o le Ekalesia a Iesu Keriso. E mautinoa lava tatou te fia faia lenei mea i le agaga o le alofa ma le molimau. Tatou te fia mulimuli i le Faaola e ala i le tautino atu i se ala faigofie ma le manino, ae ia faia ma le lotomauualalo, o i tatou o tagata o Lana Ekalesia. Tatou te mulimuli ia te Ia e ala i le avea ai ma Au Paia o Aso e Gata Ai—o soo [o Keriso] o aso e gata ai.

E masani lava ona tuuina atu e nisi ni igoa tauvalaau i tagata ma faalapotopotoga. Atonu o se igoa tauvalaau o se faapuupuua lea o se igoa, pe e mafua mai se mea na tupu po o nisi uiga faaletino po o nisi foi amioga. E ui e le tutusa uma tulaga po o le taua o igoa tauvalaau e pei o igoa moni, ae e mafai ona faaaogaina ma le talafeagai.

Sa i ai igoa tauvalaau o le Ekalesia a le Alii i aso anamua faapea foi i nei vaitaimi. Sa valaauina le Au Paia i le vaitaimi o le Feagaiga Fou o ni *Tagata*



*Kerisiano* aua sa latou talitonu ia Iesu Keriso. O lena igoa, sa le lelei le faaigoaina muamua ai e ni tagata faitio, ae ua avea nei ma se igoa taua; ma ua faamamaluina i tatou e ta'ua o se ekalesia Kerisiano.

O loo ta'ua o tatou tagata o ni *Mamona* aua tatou te talitonu i le Tusi a Mamona: O Se Tasi Molimau ia Iesu Keriso. Atonu na taumafai foi nisi e faaoga le upu *Mamona* i se tulaga lautele e aofia ai ma i latou o e na o ese mai le Ekalesia ma faatuina ni a latou lava faapotopotoga. O ia faaogaaga [o igoa tauvalaau] e na ona taitai atu ai i le le mautonu. Matou te faafetai atu i taumafaiga o ala o faasalalauga i le aloese mai le faaaogaina o le upu *Mamona* i se auala e ono mafua ai le le mautonu o tagata lautele, e uiga i le Ekalesia ma isi faalapotopotoga o loo tumau lava i aoaoga faavae anamua e pei o le tele o āvā. Sei ou faamatala faamanino atu, e leai se faalapotopotoga e tele āvā, e aofia ai ma i latou e ta'ua i latou o Fundamentalist Mormons po o nisi ua faata'ita'i i lo tatou igoa, e i ai se sootaga ma Le Ekalesia a Iesu Keriso o le Au Paia o Aso e Gata Ai.

E ui o le upu *Mamona* e le o se igoa sa'o atoa o le Ekalesia, ma e ui foi na tuuina mai anamua e tagata na faitio i le Ekalesia i le vaitaimi o sauaga, ae ua avea ma igoa tauvalaau ua taliaina pe a faatatau lea i tagata o le

ekalesia ae le o le lotu. E leai se mea tatou te taofia ai fua le faaaogaina o le igoa *Mamona* pe afai e talafeagai ai, ae e tatau ona tatou tuuina atu le faamamafa i le igoa sa'o atoa o le Ekalesia lava ia. I nisi upu, e tatau ona tatou aloese mai ma faaitiitia le faaaogaina o le faaupuga "Ekalesia Mamona."

I le aluga o tausaga sa ou faataunuina ai ni tofiga i le salafa o le lalolagi, ma sa fesiligia au i le tele o taimi pe ou te auai i le Ekalesia Mamona. O la'u tali atu, "O au o se tagata o Le Ekalesia a Iesu Keriso. Talu ai matou te talitonu i le Tusi a Mamona, lea ua faaigoaina i se taitai-perofeta Amerika anamua ma o se tasi molimau ia Iesu Keriso, o lea ua ta'ua ai i matou i nisi taimi o ni Mamona." O taimi uma e talia lelei ai lava lenei tali ma o le mea moni lava ua tatalaina ai le tele o avanoa mo a'u ou te faamatalaina ai le Toefuataiga o le atoaga o le talalelei i nei aso e gata ai.

Uso e ma tuafafine, tau lava o lou mafaufau i se aafiaga e mafai ona tatou oo i ai pe afai e tau lava ina tatou tali atu e ala i le faaaogaina o le igoa atoa o le Ekalesia e pei ona tautinoa mai e le Alii e tatau ona tatou faia. Ma afai e le mafai ona e faaaogaina vave le igoa atoa, ia tau lava o lou faapea atu, "Ou te auai i Le Ekalesia a Iesu Keriso" ma faamalamalama mulimuli atu "o le Au Paia o Aso e Gata Ai."

Atonu e fesili nisi, ae faapefea ia saite o le Initoneti e pei o le Mormon

.org faapea foi ma le tele o polokalama o ala o faasalalauga ua amatalia e le Ekalesia? E pei ona ou fai atu, o le faasinoina i tagata o le ekalesia o ni *Mamona* e talafeagai i nisi taimi. O se tulaga aoga, na o mai ai nisi e le auai i lo tatou faatuatuaga ma sailia i matou e sailiili i lena faaupuga. Ae o le taimi lava e tatala ai le Mormon.org, o loo faamatala mai ai le igoa talafeagai o le Ekalesia i le itulau autu, ma o loo i ai i itulau faaopoopo taitasi i luga o le saite. E le o se tulaga le talafeagai le faamoemoe i tagata e taina i totonu le igoa atoa o le Ekalesia pe a saili e su'e i tatou pe alu foi i totonu o la tatou uepisaite.

E ui e ono faaaauu pea nei tulaga, ae e le tatau ai ona latou taofia tagata o le ekalesia mai le faaaogaina o le igoa atoa o le Ekalesia i soo se taimi lava e talafeagai ai. Sei o tatou atiina ae se mausa i totonu o o tatou aiga ma i gaoioiga fai a la tatou Ekalesia ma i a tatou fesootaiga o aso uma e faamanino atu ai o Le Ekalesia a Iesu Keriso o le Au Paia o Aso e Gata Ai, o le igoa lea na faatonuina ai i tatou e le Alii Lava Ia ina ia tatou lauiloa ai.

O se faamaumauga o manatu faaaliala lata mai na faailoa mai ai ua matua toatele lava ia tagata e le o malamalama lelei o le igoa *Mamona* o loo faatatau lea i tagata o la tatou Ekalesia. Ma o le toatele o tagata e le o mautinoa lava pe o Mamona o ni tagata Kerisiano. E oo lava pe a

latou faitau i a tatou galuega o Lima Fesoasoani i le lalolagi atoa pe a mavae ni afa, mafuie, lologa, ma oge, latou te le o faafesootaia lava a tatou taumafaiga agaalofa e avea ai i tatou o se faalapotopotoga Kerisiano. E moni o le a faafaigofie ona latou malamalama, o tatou e talitonu ma mulimuli i le Faaola pe afai tatou te faatatau ia i tatou lava o ni tagata o Le Ekalesia a Iesu Keriso o le Au Paia o Aso e Gata Ai. O lenei auala o le a faafesootaia ai e e faalogologo le igoa *Mamona* ma lo tatou igoa faaalua ma tagata o e mulimuli ia Iesu Keriso.

E pei ona talosagaina mai e le Au Peresitene Sili i la latou tusi o le aso 23 o Fepuari, 2001: “O le faaaogaina o le igoa ua faaalua, O Le Ekalesia a Iesu Keriso o le Au Paia o Aso e Gata Ai . . . , ua faateleina ai le avea ma o tatou tiutetauave le faalauiloa atu o le suafa o le Faaola i le lalolagi atoa. E faapena foi, matou te talosaga atu pe a tatou faatatau i le Ekalesia ia tatou faaaogaina lona igoa atoa i soo se taimi e mafai ai.

Sei o tatou toe tepa i le 1948 i le konafesi aoao ia Oketopa, lea sa saunoa ai Peresitene Siaosi Alapati Samita faapea, “Uso e ma tuafafine, pe a outou tuua iinei, o le a outou fegalegaleai ma le tele o isi faatuatua i le lalolagi, ae ia outou manatua e na o le tasi lava le Ekalesia i le lalolagi atoa, e ala i se poloaiga paia, o loo tauaveina le suafa o Iesu Keriso, lo tatou Alii” (i le Conference Report, Oke. 1948, 167).

O’u uso e ma tuafafine, ia tatou manatuaina foi lenei mea pe a tuua lenei konafesi i le aso. Ia faaleo atu a tatou molimau e uiga ia te Ia, ma ia i ai pea lo tatou alofa mo Ia i o tatou loto, ou te tatalo ai i le agaga lotomaualalo i Lona suafa, o le Alii o Iesu Keriso, amene. ■



Saunia e Peresitene Thomas S. Monson

## Tutu i Nofoga Paia

*O fesootaiga ma lo tatou Tama i le Lagi—e aofia ai a tatou tatalo ia te Ia ma Ana musumusuga ia i tatou—e taua ina ia tatou mafai ai ona taulimaina faigata ma tofotofoga o le olaga.*

O’u uso e ma tuafafine pele, ua tatou faalogo i savali matagofie i lenei taeao, ma ou te faamalo atu ia i latou uma na saunoa. Ua tatou fialia faapitoa ina ua toe mafuta ai ma Elder Robert D. Hales ua toe malosi mai lona gasegase. Matou te alolofa ia te oe Bob.

A o ou mafaufau loloto pe o le a se mea ou te fia ta’u atu ia te outou i lenei taeao, sa ou lagonaina le faagaetia e faasoa atu ni manatu ma ni lagona patino ia ou te manatu e taua ma talafeagai. Ou te tatalo ina ia taiala ina a’u i la’u tautalaga.

Ua ou ola i lenei lalolagi mo le 84 nei o tausaga. Ou te tuu atu ia te outou sina vaaiga, sa ou fanau i le tausaga lava lea e tasi na lele atu ai Charles Lindbergh na o ia i se malaga e lē malolo mai Niu Ioka i Pale i se vaalele e tasi le afi, ma se nofoa se tasi. Ua tele mea ua suia i totonu o le 84 tausaga talu mai lena taimi. Ua umi foi talu ona tulaeleele tagata i le masina ma toe foi mai. O le mea moni, o mea sa na o ni masalosaloga faasaienitisi ananafi ua avea ma mea moni i aso nei. Ma o lena mea moni, e faafetaia ai tekinolosi o o tatou taimi, ua matua televave ai le suiga ua tau le mafai ona tatou taulimaina—pe afai

tatou te faia uma na mea. Mo i tatou e manatuaina ia telefoni vili ma laau lomitusi ta lima, o tekinolosi o nei aso ua sili atu nai lo o se mea ofoofogia.

Ua faapena foi le matuai televave o suiga o amioga mama a tagata. O amioga sa manatu muamua i ai e le talafeagai ma lē mama, i le taimi nei ua le gata ina onosaia ae ua manatu foi le toatele o tagata ua taliaina.

Talu ai nei sa ou faitau ai i le *Wall Street Journal* i se tusiga a Jonathan Sacks, o le a’oa’o [Iutaia] sinia o Peretania. I le tele o isi mea na ia tusia—ou te sii maia le: “I le toetoe lava o malo uma i Sisifo i le 1960 sa i ai se suiga faafuasei i amioga mama, o se lafoaiga o ona seti masani o tulafono e pulea ai e tagata a latou lava amio. Sa usuina e le Beatles le pese, na o le pau le mea e te manaomia, o le alofa. O tulaga faatonuina o amioga mama faa-Iutaia ma faa-Kerisiano ua lafoaia. I lona tulaga na oo mai ai se faaupuga: *[Fai] soo se mea e talafeagai ma oe.*

O Poloaiga e Sefulu sa toe tusiaina o Fautuaga Fatufatuai e Sefulu.”

Sa faaauau le faamatalaga faanoanoa a A’oa’o Sacks:

“Ua tatou lafoaia ma le lē faautauta a tatou mataupu faavae o le amio mama e pei o tatou

faamaimauina a tatou tupe. . . .

O loo tele vaega o [le lalolagi] ua le o toe amanaia ai tapuaiga ma ua leai se leo e tali atu i manatu faaleaganuu o [tagata] e faatau ni mea, faaalu tupe, ma ofu i ofu taugata, ma faaālia, ona e faapea ua tatau ai mo i latou. O le savali ua faapea mai o le amio mama ua le toe taulia, o le lotofuatiaifo e mo tagata vaivai, ma o le poloaiga e sili ona taua o le ‘Aua ne’i maua oe’”<sup>1</sup>

O’u uso e ma tuafafine, paga lea—o lenei mea—ua faamatalaina ai le tele o le lalolagi ua siomia ai i tatou. Pe tatou te popole ea ma le atuatuvaile ma manatunatu pe faapefea ona tatou ola i se lalolagi faapea? O le mea moni, ua tatou maua i o tatou olaga le talalelei a Iesu Keriso, ma ua tatou iloa o le ola mama e le o se mea ua le toe taulia, o loo i ai lo tatou lotofuatiaifo e taialaina i tatou, ma e faamasinoina i tatou i a tatou amioga.

E ui lava ua suia le lalolagi, ae o loo tumau pea ia tulafono a le Atua. E le’i suia lava; ma o le a le suia lava. O Poloaiga e Sefulu e tonu—o poloaiga lava. E *le* o ni fautuaga. Ua tutusa lelei lava lo latou taua i aso nei e pei ona i ai foi i le taimi na tuu atu ai e le Atua i le fanauga a Isaraelu. Afai tatou te faalogo tonu, tatou te lagonaina le siuleo o le siufofoga o le Atua, o loo fetalai mai ia i tatou iinei i le taimi nei:

“Aua ne’i fai mo oe ni atua ese i o’u luma.

“Aua e te fai mo oe se tupua ua ta. . . .

“Aua e te ta’u fua le suafa o Ieova lou Atua. . . .

“Ia e manatua le aso Sapati e te faapaiaina. . . .

“Ia e ava i lou tama ma lou tina. . . .

“Aua e te fasioti tagata.

“Aua e te mulilua.

“Aua e te gaoui.

“Aua e te molimau pepelo. . . .

“Aua e te manao.”<sup>2</sup>



O la tatou alāfua o le amio ua mautu; e le fetuunaia. Ua le gata ina maua i Poloaiga e Sefulu ae faapena foi i le Lauga i luga o le Mauga, na tuuina mai ia i tatou e le Faaola a o femaliua’i o Ia i le lalolagi. O loo maua i Ana aoaoga uma. O loo maua i upu o faaaliga o ona po nei.

O loo tumau pea lo tatou Tama Faalelagi o ananafi, o le asō, ma le faavavau. Ua ta’u mai e le perofeta o Mamona ia i tatou o le Atua e “le feliuliuai o ia mai le faavavau atoa i le faavavau atoa.”<sup>3</sup> I lenei lalolagi lea e toetoe lava foliga mai ua suia mea uma, o Lona tumau o se mea e mafai ona tatou faalagolago i ai, o se taula lea e mafai ona tatou pipiimau i ai ma maua ai le saogalemu, ina ia le tafiaesea i tatou i sami matautia.

Atonu e foliga atu ia te oe i nisi taimi e faapea o i latou i le lalolagi o loo sili ona fiafia nai lo oe. O nisi o outou atonu e lagonaina le saisaitia i alāfua o le amio lea e tausia e i tatou i le Ekalesia. Peitai, o’u uso e ma tuafafine, ou te tautino atu ia te outou, e *leai lava se mea* e mafai ona aumaia le olioli sili i o tatou olaga po o le filemu sili i o tatou agaga nai lo le Agaga lea e mafai ona tatou maua pe a tatou mulimuli i le Faaola ma tausia i poloaiga. E le mafai ona i ai lena Agaga i ituaiga o gaoiiga lea o loo auai ai le toatele o le lalolagi. Na tautino mai e

le Aposetolo o Paulo le upumoni: “Ae le talia e le tagata faaletino o mea a le Agaga o le Atua; aua o mea vaea ia ia te ia, na te le mafai foi ona iloa, aua e faamasinoina faaleagaga.”<sup>4</sup> O le faaupuga *tagata faaletino* e mafai ona faasino i soo se tasi o i tatou pe afai tatou te faatagaina i tatou lava ia avea ai [ma tagata o le lalolagi].

E tatau ona tatou faaeteete i se lalolagi ua mamao ese lava mai mea faaleagaga. E taua lo tatou teenaina o soo se mea e le ogatusa ma o tatou tulaga faatonuina, teenaina i le faagasologa ina ia lafoaia ai le mea e sili ona tatou manaomiaina—le ola e faavavau i le malo o le Atua. O le a i ai pea matagi o faafitauli i o tatou aiga mai lea taimi i lea taimi, aua o mea ia e le mafai ona tatou sosola ese mai ai i lenei olaga faaletino. Peitai, o le a saunia lelei atili ai i tatou e taulimaina ia mea, ia aoa mai ai, ma faatoilaloina ai pe afai o i ai le talalelei i le faavae o o tatou olaga atoa ai ma le alofa mo le Faaola i o tatou loto. Na tautino mai le perofeta o Isaia, “O le mea e tupu i le amiotonu o le manuia lea; e tupu mai foi i le amiotonu le filemu ma le saogalemu e faavavau.”<sup>5</sup>

I le avea ai ma ala o le *i ai* i le lalolagi ae le ni o o le lalolagi, e taua lo tatou fesootai ma lo tatou Tama Faalelagi e ala i le tatalo. Ua finagalo o Ia ia tatou faia lena mea; o le a tali



mai o Ia i a tatou tatalo. Na apoapoi mai le Faaola ia i tatou, e pei ona tusia i le 3 Nifae, mataupu 18, ia “mataala ma tatalo e le aunoa nei outou ulu atu i faaososoga; ona ua mana'o Satani ia te outou. . . .

“O lea e tatau ai ona outou tatalo atu pea i le Tama i lo'u igoa;

“Ma o soo se mea tou te ole atu ai i le Tama i lo'u igoa, e sao, ma talitonu o le a outou maua, faauta, o le a tuuina atu ia te outou.”<sup>6</sup>

Na ou maua lo'u molimau i le mana o le tatalo pe tusa o le 12 o o'u tausaga. Sa ou galue malosi ia maua sina tupe ma sa mafai ai ona ou sefeina se lima tala. O le taimi tonu lea o le Pa'u Tele o le Tamaoaiga, lea o le lima tala o se tupe tele lava—aemaise mo se tamaitiiti e 12. Sa ou tuu atu a'u siliva uma, lea na atoa ai le lima tala, i lo'u tama, ma sa ia tuu maia ia te a'u se tupe pepa lima tala. E ui sa ou iloa na i ai se mea faapitoa sa ou fuafua e faatau i le lima tala, ae ona o le tele o tausaga mulimuli ane ai, ua ou le manatua ai pe o le a. Ua na ona ou manatuaina o le taua tele o lena tupe ia te au.

I lea taimi sa leai sa matou masini ta lavalava, o lea na ave ai e lo'u tina o matou lavalava na manaomia ona tata i le faletamea i vaiaso taitasi. A mavae ni nai aso, ona faafoi mai lea o se uta o mea na matou ta'ua o se “tagamea susu” ona faatautau lea e

Tina i le uaea i tua o le matou fale e faamamago ai.

Sa ou tuuina la'u lima tala i totonu o le taga o lo'u ofuvae, ma atonu e mafai ona outou taumate maia, na ave lo'u ofuvae i le faletamea faatasi ma le tupe i le taga. Ina ua ou iloa le mea ua tupu, sa ou ma'i i lo'u popole. Sa ou iloa e siaki faasolosolo na taga i le faletamea a o le'i tataina. Ae afai e le toe mauaina la'u tupe ma aveina [e se isi] i le taimi na tatā ai, sa ou iloa ma toetoe lava ina a ou mautinoa o le a pa'u ese le tupe i le taimi e tata ai ma o le a mauaina e se tagata faigaluega i le faletamea ma o le a na le iloina pe o ai e tatau ona faafoi i ai le tupe, e tusa lava pe mana'o ia e faia lea mea. O avanoa o le toe maua mai o la'u lima tala sa matuai mamao lava—o se mea moni lea na faamautu mai e lo'u tina ina ua ou ta'u i ai sa galo le tupe i la'u taga.

Sa ou mana'o i lena tupe; sa ou moomia lena tupe; sa ou matua galue malosi ia maua lena tupe. Sa ou iloa e na o le tasi lea o le mea e mafai ona ou faia. I lo'u naunautai tele na ou liliu atu ai i lo'u Tama i le Lagi ma aioi atu ia te Ia ia tausia ma le saogalemu la'u tupe i lena taga seia toe faafoi mai la matou tagamea susu.

I aso uumi e lua mulimuli ane, ina ua ou iloa ua oo i le taimi e sau ai le loli e tiliva mai la matou tagamea, sa ou nofo i talaane o le faamalama, ma faatalitali. Ma sa tu mai le loli i le auala, sa tātāvale lo'u fatu. O le taimi lava na tuu ai lavalava susu i totonu o le fale, sa ou tosoina mai loa lo'u ofuvae ma tamoe atu i lo'u potu. Sa ou tago atu i la'u taga ma lima ua gatete. Ina ua ou le mauaina vave se mea, sa ou manatu loa ua leiloa. Ona pai atu ai lea o o'u tamai lima i lena tupe pepa lima talā susu. A o ou aumaia i fafo mai le taga, sa lofituina au i se toafilemu. Sa ou ofoina atu se tatalo

o le faafetai mai le loto i lo'u Tama i le Lagi, aua ua ou iloa ua Ia tali mai i la'u tatalo.

Talu mai lena taimi ua leva lava, ua le mafaitaulia a'u tatalo ua taliina. E leai se aso ua alu ou te le fesootai atu ai i lo'u Tama i le Lagi e ala i le tatalo. O se sootaga ou te faamemelo i ai—o le a ou le iloa pe a aunoa ma lea sootaga. Afai e le o i ai ia te oe i le taimi nei sea sootaga ma lou Tama i le Lagi, ou te aioi atu ia te oe ia galue agai i lena sini. A o e faia lena mea, o le a e aiā ai i Ana musumusuga ma le taitaiga i lou olaga—o mea e manaomia mo i tatou uma taitoatasi pe afai tatou te fia ola faaleagaga i taimi o la tatou malaga iinei i le lalolagi. O ia musumusuga ma taitaiga o ni meaalofa Na te foai fua mai ia i tatou pe afai tatou te saili atu i ai. O ni oa maoae lava na!

E faamaualaloina pea lava a'u ma faafetai pe a fesootai mai lo'u Tama Faalelagi ia te au e ala i Ana musumusuga. Ua ou aoao e iloina, faatua-tuaina, ma mulimuli ai. I lea taimi ma lea taimi ou te mauaina ai lava ia musumusuga. O se tasi o ia aafiaga maoae na tupu ia Aokuso o le 1987 i le taimi o le faapaiaga o le Malumalu o Frankfurt Siamani. Sa i ai Peresitene Ezra Taft Benson ma i matou mo le uluai aso pe lua o le faapaiaga ae na toe foi atu i le fale, ma sa ou maua ai le avanoa e taitai ai ia sauniga na totoe.

I le Aso Toonai sa fai ai se sauniga mo tatou tagata Take sa i ai i le itulagi o le Malumalu o Frankfurt. Sa ou masani lelei i se tasi o o tatou taitai maoae mai Netherlands, o Uso Peter Mourik. A o le'i amataina le sauniga, sa ou maua se uunaiga uigaese e valaulia ia Uso Mourik e lauga atu i ona tagata Take i le taimi o le sauniga ma, o le mea moni, e tatau ona avea o ia ma failauga muamua. E le'i vaaia o ia i le malumalu i lena taeao, o lea sa ou

tusi ai se tamai tusi ia Elder Carlos E. Asay, lo tatou Peresitene o le Eria, ma fesili atu pe o auai ia Peter Mourik i le sauniga. A o ou sauni e tu atu e amata le sauniga, sa ou maua se faaaliga mai ia Elder Asay e faailoa mai ai e *le* o auai atu ia Uso Mourik, o loo i ai o ia i se isi mea, ma o loo ia fuafua e auai i le sauniga o le faapaiaga o le malumalu i le aso e sosoo ai faatasi ma siteki o le militeli.

A o ou tu ai i le pulelaa e faafeiloai ia tagata ma faailoa atu le polokalama, sa ou toe maua foi se musumusuga lē mafaaseseina ina ia ou faasilasila atu o Peter Mourik o le failauga muamua. Ua feteenai nei lenei mea ma o'u lagona uma, aua o lea faatoa uma ona ta'u mai e Elder Asay e *le* o i ai ia Uso Mourik i le malumalu. Peitai, o le faalagolago i le musumusuga, sa ou faasilasila atu ai le viiga a le aufaipese, le tatalo, ma ou faailoa atu ai o lo matou failauga muamua o Uso Peter Mourik.

Ina ua ou toe foi atu i lo'u nofoa, sa ou tepa atu ia Elder Asay ma vaaia i ona foliga se vaaiga o le popole. Mulimuli ane sa ia ta'u mai ia te au ina ua ou faasilasila atu Uso Mourik o le failauga muamua, sa ia le talitonu i lana faalogo. Sa ia fai mai sa ia iloa ua ou maua lana faaaliga ma sa ou faitauina lava, ma sa ia le malamalama pe aisea na ou faasilasila atu ai pea o uso Mourik o le failauga, ma le iloina e le o i ai o ia i le malumalu.

I le taimi atoa o loo tupu ai lenei mea, o loo i ai Peter Mourik i se fonotaga i le ofisa o le eria i Porthtrasse. A o faagasolo lana fonotaga, sa faafuasei ona ia liliu atu ia Elder Hawkes, le sa aveave i lena taimi ma Sui o le Itulagi, ma fai atu, "O le a le vave e mafai ona e aveave ai au i le malumalu?"

O Elder Hawkes, sa lauiloa i le aveave saosaoa i lana tamai taavale tutuu, sa tali atu, "E mafai ona ou aveave



oe i le 10 minute! Ae aisea ua e manao ai e te alu i le malumalu?"

Sa tautino atu Uso Mourik na te le iloa pe aisea ua ia manao ai e alu i le malumalu ae ua ia iloa e tatau ona alu. Sa malaga loa i la'ua i le malumalu.

I le taimi o le viiga matagofie a le aufaipese, sa ou autilotilo solo, ma le manatu o le a ou vaaia ia Peter Mourik i se taimi vave lava. Ae leai. Peitai, e maeu lava, ou te le'i lagonaina lava se popole. Sa ou maua lava le faamautinoaga mālū ma le lē faafitia o le a lelei mea uma.

Sa ulu atu Uso Mourik i le faitotoa i luma o le malumalu ae faaiu loa le tatalo amata, ma lona le iloina lava pe aisea ua alu atu ai i le malumalu. A o ia faataalise atu i le ala savali, sa ia vaaia lo'u ata i luga o le lau ma faalogo mai

ua ou faasilasila atu, "O le a tatou faafofoga atu nei ia Uso Peter Mourik."

I le maofa tele o Elder Asay, sa faafuasei ona savali atu i totonu o le potu ia Peter Mourik ma tu i le pulelaa.

Ina ua maea le sauniga, sa ma talanoaina ma Uso Mourik le mea sa tupu a o lumanai lona avanoa e lauga ai. Sa ou mafaufau loloto i le musumusuga lea na oo mai i lena aso, e le gata ia te a'u ae faapena foi ia Uso Mourik. O lena aafiaga ofoofogia ua tuuina mai ai ia te a'u se molimau e le mafaafitia i le taua o le agavaa mo le mauaina o ia musumusuga, ona faalagolago lea i ai—ma mulimuli i ai—pe a oo mai. Ou te iloa e aunoa ma le fesiligiaina sa finagalo le Alii mo i latou sa i ai i lena sauniga o le faapaiaga o le Malumalu o Frankfurt e faafofoga i le molimau

mamana, ma faamomoloto a Lana auauna o Uso Peter Mourik.

O'u uso e ma tuafafine pele, o fesootaiga ma lo tatou Tama i le Lagi—e aofia ai a tatou tatalo ia te Ia ma Ana musumusuga ia i tatou—e taua ina ia tatou mafai ai ona tau-limaina faigata ma tofotofoga o le olaga. Ua valaauliaina i tatou e le Alii, “Faalatalata mai ia te a'u ma o le a Ou faalatalata atu ai ia te outou; saili mai ia te a'u ma le filiga ma o le a outou maua ai a'u.”<sup>7</sup> A o tatou faia lea mea, o le a tatou lagonaina Lona Agaga i o tatou olaga, ma tuuina mai ia i tatou le manao ma le lototele e tu ai ma le malosi ma le mausali i le amiotonu—ia “tutu ai i nofoaga paia, ma aua le masii ese.”<sup>8</sup>

A o fesuisuia i le lalolagi i o tatou talaane, ua tatou vaaia pea i o tatou lava mata le faavaivaiina o mataupu faavae o le amio mama, tau ina ia tatou manatuaina ia folafolaga taua a le Alii ia i latou e faalagolago ia te Ia: “Aua e te fefe, aua ou te ia te oe; aua le fetepatepa'i, aua o a'u o lou Atua; ou te faamalosi oe; e moni ou te fesoasoani ia te oe; e moni, ou te taofia oe i lo'u lima taumatau e i ai le amiotonu.”<sup>9</sup>

Se folafolaga ina a matagofie! Ia avea na ma o tatou faamanuiaga, ou te tatalo ai ma le faamaoni i le suafa o lo tatou Alii ma le Faaola, o Iesu Keriso, amene. ■

#### FAAMATALAGA

- Jonathan Sacks, “Reversing the Decay of London Undone,” *Wall Street Journal*, Aug. 20, 2011, online.wsj.com; emphasis added. *Note:* Lord Sacks is the chief rabbi of the United Hebrew Congregations of the Commonwealth.
- Esoto 20:3–4, 7–8, 12–17.
- Moronaē 8:18.
- 1 Korinito 2:14.
- Isaia 32:17.
- 3 Nifae 18:18–20.
- Mataupu Faavae ma Feagaiga 88:63.
- Mataupu Faavae ma Feagaiga 87:8.
- Isaia 41:10.



**Saunia e Elder Russell M. Nelson**

○ Le Korama a Aposetolo e Toasefululua

## Feagaiga

*Pe a tatou iloa o i tatou o fanau o le feagaiga, ua tatou loa ai pe o ai i tatou ma mea ua faamoemoeina e le Atua mai ia i tatou.*

I na ua tuanai se vaiaso se tasi talu ona uma so'u tofiga lata mai nei o le faatuina o le siteki muamua i Moscow, Rusia,<sup>1</sup> sa ou auai atu ai i se konafesi faaleitu i St. Petersburg. A o ou faasoa atu e uiga i lo'u agaga faafetai mo uluai faifeautalai ma taitai i le lotoifale o e na aumaia le malo-siaga i le Ekalesia i Rusia, sa ou ta'ua ai le suafa o Vyacheslav Efimov. O ia lea o le tagata Rusia muamua na liliu mai sa avea ma se peresitene o le misiona. Sa maoae le lelei o le la tautua ma lona faletua i lona tofiga. E le'i leva ona uma le la misiona, o se faanoanoaga tele, ona sa maliu faafuasei Peresitene Efimov.<sup>2</sup> Sa na o le 52 tausaga o lona soifua.

A o ou talanoa e uiga i lenei ulugalii paionia, sa musuia au e fesili atu i le faapotopotoga pe mata o auai mai Sister Efimov. Sa tulai ae se tamaitai i le pito lava i tua. Sa ou valaaulia o ia e susu mai i le masini faaleotele leo. Ioe, o Sister Galina Efimov lava lea. Sa saunoa o ia ma le mautinoa ma tuuina atu se molimau mamana e uiga i le Alii, o Lana talalelei, ma Lana Ekalesia toefuataiina. Sa faamauiina o ia ma lana tane i le malumalu paia. Fai mai a ia, ua faatasia i laua e faavavau. Sa

avea pea i laua ma se soa faifeautalai, o ia i lenei itu ae o lana tane i le isi itu.<sup>3</sup> Faatasi ai ma loimata o le fiafia, sa ia faafetai ai i le Atua mo feagaiga paia o le malumalu. Sa ou tagi foi au, faatasi ai ma le iloa lelei o le tuufaatasia e faavavau na faaalai e lenei ulugalii faamaoni, o se taunuuga amiotonu lea o le osia, tausia, ma le faamamaluina o feagaiga paia.

O se tasi o manatu faavae aupito taua o le ekalesia moni, o le manatu lea e uiga i se feagaiga paia. I le gagana faaletulafono, e masani lava, o se feagaiga o lona uiga o se maliega i le va o ni itu se lua pe sili atu. Ae i se anotusi faalelotu, o se feagaiga o se mea e sili atu ona taua. O se tautoga paia ma le Atua. O Ia e filifilia tuutuuga. E mafai e tagata taitoatasi ona filifili e talia na tuutuuga. Afai e talia e se tagata ia tuutuuga o le feagaiga ma usitai i le tulafono a le Atua, e maua e ia faamanuiaga e o faatasi ma le feagaiga. Ua tatou iloa “a tatou maua se faamanuiaga mai le Atua, e maua i le usiusitai i lona tulafono ua faavae ai i luga.”<sup>4</sup>

I augatupulaga uma, na osia ai e le Atua ia feagaiga ma Lana fanau.<sup>5</sup> O Ana feagaiga na faia i le fuafuaga atoa





- O Iesu le Keriso o le a soifua mai i le gafa o Aperaamo.
- O le a toatele le fanau a Aperaamo, e agavaa i se faatoateleina e faavavau ma agavaa foi e umia le perisitua.
- O le a avea Aperaamo ma tama o atunuu e tele.
- O le a maufi lana fanau i ni lauelele faapitoa.
- O le a faamanuiaina malo uma o le lalolagi e ana fanau.<sup>16</sup>
- Ma o lena feagaiga o le a faavavau—e oo lava “i le afe o tupulaga.”<sup>17</sup>

O nisi o nei folafolaga ua faataunuina; o isi o loo tatalia pea. Ou te sii maia mai se valoaga anamua i le Tusi a Mamona: “E le na o tatou fanau sa tautala i ai lo tatou tama [Lia], ae o le aiga uma foi o Isaraelu, e faasino i le feagaiga lea o le a faataunuina *i aso e gata ai*; o le feagaiga lea na faia e le Alii i lo tatou tama o Aperaamo.”<sup>18</sup> Pe le o se mea ofoofogia ea lena? O le 600 tausaga *a o le*’i soifua mai Iesu i Peteleema, sa silafia ai e perofeta o le a iu lava ina faataunuina le feagaiga Faa-Aperaamo *i aso e gata ai*.

Ina ia fesoasoani i le faataunuina o lena folafolaga, na faaali mai ai le Alii i nei aso e gata ai e toe faafou lena feagaiga Faa-Aperaamo. Sa tautino atu e le Matai i le Perofeta o Iosefa Samita:

“Na maua e Aperaamo folafolaga e faatatau i ana fanau, ma e faatatau i le fua o ona sulugatiti—o lē o ona sulugatiti ua e sau ai, . . . la’u auauna o Iosefa. . . .

“O lenei folafolaga e o outou foi, aua o outou e tupuga mai ia Aperaamo.”<sup>19</sup>

Faatasi ai ma lenei faafouga, ua tatou maua ai, e pei foi o aso anamua, le perisitua paia ma le talalelei e faavavau. O loo ia i tatou le aia tatau e maua ai le atoatoaga o le talalelei,

o le ata o le faaolataga ma o lea e avea ai o se vaega o le atoatoaga o Lana talalelei.<sup>6</sup> Mo se faataitaiga, sa folafola mai e le Atua e auina mai se Faaola o Lana fanau,<sup>7</sup> ma talosaga atu ai e fai ma tau i lo latou usiusitai i Lana Tulafono.<sup>8</sup>

I le Tusi Paia tatou te faitau ai e uiga i alii ma tamaitai i le Lalolagi Tuai o e na ta’ua o fanau o le feagaiga. O le a le feagaiga? “Le feagaiga sa faia e le Atua ma o [latou] tama, ua faapea mai ia Aperaamo, o so lau fanau foi e manuia ai aiga uma lava o le lalolagi.”<sup>9</sup>

I le Tusi a Mamona tatou te faitau ai i tagata o le Lalolagi Fou o e foi sa ta’ua o fanau o le feagaiga.<sup>10</sup> Sa faailoa atu e le Alii toetu ia i latou: “Faauta foi, o outou o fanau a perofeta;

ma o outou o lo le aiga o Isaraelu; ma o outou o lo le feagaiga lea na faia e le Tama ma o outou tama, na fetalai atu ai ia Aperaamo: Ma o lau fanau o le a manuia ai aiga uma o le lalolagi.”<sup>11</sup>

Sa faamatala atu e le Faola le taua o lo latou faasinomaga o ni fanau o le feagaiga. Sa fetalai o Ia, “Ua faatu mai au e le Tama e muamua ia te outou, . . . auina mai au e faamanuia ia te outou le liliu ese o outou taitoatasi mai i ana amioletonu; ma o le pogai ona o outou o fanau o le feagaiga.”<sup>12</sup>

O le feagaiga na osia e le Atua ma Aperaamo<sup>13</sup> ma mulimuli ane toe faamautuina ma Isaako<sup>14</sup> ma Iakopo<sup>15</sup> e matuai sili ona taua. Na i ai ni isi o folafolaga, e aofia ai le:



**Stockholm, Suetena**

olioli i faamanuiaga o le perisitua, ma agavaa ai mo faamanuiaga silisili a le Atua—o le ola lea e faavavau.<sup>20</sup>

O nisi o i tatou o suli moni o Aperaamo; o isi ua faapotopotoina mai i lona aiga e ala i le vaetamaina. E le faailogaina e le Alii se tagata.<sup>21</sup> Tatou te maua faatasi nei faamanuiaga folafolaina—pe a tatou saili le Alii ma usitai i Ana poloaiga.<sup>22</sup> Ae afai tatou te le usiusitai, e aveesea mai ia i tatou faamanuiaga o le feagaiga.<sup>23</sup> Ina ia fesoasoani ia i tatou, ua tuuina mai ai e Lana Ekalesia ia faamanuiaga faapeteriaka ina ia tuuina atu ai i tagata taitoatasi e mauaina se vaaiga mamao mo lona lumanai, faapea ai foi ma se sootaga ma aso ua tuanai, e oo lava foi i se folafolaga o lona tupuaga e tau atu i tua ia Aperaamo, Isaako, ma Iakopo.<sup>24</sup>

Ua i ai i uso o le feagaiga le aia tatau e agavaa ai mo le tautoga ma le feagaiga o le perisitua.<sup>25</sup> Afai e te “faamaoni i le mauaina o ia perisitua e lua . . . ma le faalateleina [outou] valaauga, e faapaiaina [outou] e le Agaga i le faafouina o [outou] tino.”<sup>26</sup> E le na o le pau lena. O alii o e taliaina ma le agavaa le perisitua, ua talia foi le Alii o Iesu Keriso, ma o i latou o e talia le Alii ua talia le Tama.<sup>27</sup> Ma o i latou o e talia le Tama, e maua mea uma ua i ai ia te Ia.<sup>28</sup> E tafe mai faamanuiaga silisili mai lenei

tautoga ma le feagaiga i alii, tamaitai, ma fanau agavaa i le lalolagi atoa.

O lo tatou tiutetauave o le fesoasoani e faataunuu le feagaiga Faa-Aperaamo. O i tatou o le fanau na muai faauuina ma saunia e faamanuia ai tagata uma o le lalolagi.<sup>29</sup> O le pogai lena ua aofia ai le galuega faafaifeautalai i tiute o le perisitua. Ina ua mavae ni tausaga e 4,000 pe ā o le nofo faatalitali ma sauniuniga, o le taimi atofaina lenei e tatau ona avatu ai le talalelei i tagata uma o le lalolagi. O le taimi lenei o le faapotopotoina lea na folafolaina mo Isaraelu. Ma ua tatou maua le avanoa e auai ai! E le o se mea matagofie ea lena? O loo faamoe-moe mai le Alii ia i tatou ma o tatou atalii—ma e matuai faafetai o Ia mo o tatou afafine—o e o auauna atu ma le agavaa o ni faifeautalai i lenei taimi maoae o le faapotopotoina o Isaraelu.

O le Tusi a Mamona o se faailoga vaaia na amata ai ona faapotopotoina mai e le Alii Lana fanau o le feagaiga o Isaraelu.<sup>30</sup> O lenei tusi, na tusia mo o *tatou* aso, o loo taua ai o se tasi o ona faamoemoega o le ia “outou iloa lea ua amata ona faataunuuina le feagaiga lea na faia e le Tama faatasi ma le fanauga a Isaraelu. . . . Aua faauta, o le a manatua e le Alii lana feagaiga lea na ia faia i lona nuu o le aiga o Isaraelu.”<sup>31</sup>

Ioe, e le’i galo i le Alii! Ua Ia

faamanuiaina i tatou ma isi i le lalolagi atoa i le Tusi a Mamona. O se tasi o ona faamoemoega e mo “le faatalitoniina o tagata Iutaia ma Nuu Ese o Iesu o le Keriso.”<sup>32</sup> E fesoasoani tatou te osia ai feagaiga ma le Atua. E valaulia ai i tatou ia manatua o Ia ma ia iloa Lona Alo Pele. O se tasi molimau ia Iesu Keriso.

Ua i ai i fanau o le feagaiga le aia tatau e maua ai Ana aoaoga faavae ma ia iloa ai le ata o le faaolataga. E *fai* mo i latou e ala i le osia o feagaiga paia ma taua. Fai mai Polika Iaga: “E ulufale atu tagata uma o le Au Paia o Aso e Gata Ai i le feagaiga fou faavavau pe a latou ulufale mai i lenei Ekalesia. . . . Latou te ulu atu i le feagaiga fou faavavau e lagolago le Malo o le Atua.”<sup>33</sup> Latou te *tausia* le feagaiga e ala i le usiusitai i Ana poloaiga.

I le papatisoga tatou te osifeagaiga ai e auauna atu i le Alii ma tausii Ana poloaiga.<sup>34</sup> A tatou fetagofi atu i le faamanatuga, tatou te faafou lena feagaiga ma tautino atu lo tatou naunautauga e tauave i o tatou luga le suafa o Iesu Keriso. O lea la, ua vaetamaina ai i tatou o ni Ona atalii ma afafine ma ua ta’ua o uso ma tuafafine. O Ia o le tama o lo tatou olaga fou.<sup>35</sup> Mulimuli ane, i totonu o le malumalu paia, e mafai ona avea ai i tatou o ni suli faatasi i faamanuiaga o se aiga e faavavau, e pei ona folafola atu ia Aperaamo, Isaako, Iakopo ma a latou fanau.<sup>36</sup> O lea la, o le faaipoipoga faaselesitila o le feagaiga lea o le faaeaga.

Pe a tatou iloa o i tatou o fanau o le feagaiga, ua tatou iloa ai pe o ai i tatou ma mea ua faamoemoeina e le Atua mai ia i tatou.<sup>37</sup> Ua tusia Lana tulafono i o tatou loto.<sup>38</sup> O Ia o lo tatou Atua ma o i tatou o Lona nuu.<sup>39</sup> O fanau tuuto o le feagaiga e tumau mausali, e tusa lava po o totonugalemu o faigata. A tatou teufatuina loloto lena aoaoga

faavae, e oo lava foi i le tui o le oti e faapea ona faamāmāina ma faamalosia ai lo tatou tumau faaleagaga.

O le faamālo sili e mafai ona ausia iinei i lenei olaga, o le ia ta'ua o se tagata tausi feagaiga. O taui mo se tagata tausi feagaiga o le a maua uma iinei ma le olaga a sau. Ua tautino mai i tusitusiga paia e faapea, “ia outou manatunatu i le tulaga manuia ma le fiafia o i latou o e e tausi i poloaiga a le Atua. Aua faauta, e faamanuiaina i latou i mea uma, . . . ma afai latou te tutumau i le faamaoni e oo i le iuga, e talia i latou i le lagi . . . [ma] mau faatasi ma le Atua i se tulaga o le fiafia e le gata.”<sup>40</sup>

O loo soifua le Atua. O Iesu o le Keriso. Ua toefuatai mai Lana Ekalesia e faamanuia ai tagata uma. O Peresitene Thomas S. Monson o Lana perofeta i aso nei. Ma o i tatou, i le avea ai ma ni fanau *faamaoni* o le feagaiga, o le a faamanuiaina i le taimi nei ma le faavavau. Ou te molimau atu ai i le suafa o Iesu Keriso, amene. ■

#### FAAMATALAGA

1. Sa faavaeina le Siteki a Moscow Rusia i le Aso Sa, 5 o Iuni, 2011.
2. Sa avea ia Vyacheslav Efimov ma peresitene o le Misiona a Rusia Yekaterinburg mai le 1995 i le 1998. Sa maluu o ia i le aso 25 o Fepuari, 2000.
3. Tagai i le Mataupu Faavae ma Feagaiga 138:57.
4. Mataupu Faavae ma Feagaiga 130:21.
5. Mo se faataitaiga, ina ua mavae le Lologa, sa Ia ta'ua e faapea “ma ua iloa le nuanua i le ao; ona ou manatua lea o la'u feagaiga ua ou osia ma outou . . . e le toe avea le vai ma lolo e faaumatia ai mea ola uma” (Kenese 9:14–15, vaefamatalaga b; mai le Faaliliuga a Iosefa Samita, Kenese 9:20).
6. Tagai i le Mataupu Faavae ma Feagaiga 66:2; 133:57.
7. Tagai i le Ioane 3:16.
8. Tagai i le Aperamo 3:25.
9. Galuega 3:25.
10. Tagai i le 3 Nifae 20:26.
11. 3 Nifae 20:25.
12. 3 Nifae 20:26.
13. Tagai i le Kenese 17:1–10, 19; Levitiko 26:42; Galuega 3:25; Bible Dictionary, “Abraham, Covenant of.”



14. Tagai i le Kenese 26:1–5, 24.
15. Tagai i le Kenese 28:1–4, 10–14; 35:9–13; 48:3–4.
16. Aagai i mau faasino o loo lisiina atu i luga i endnotes 13–15.
17. Teuterenome 7:9; 1 Nofoaiga a Tupu 16:15; Salamo 105:8.
18. 1 Nifae 15:18; faapoopo le faamamafa.
19. Mataupu Faavae ma Feagaiga 132:30–31. Na tau atu foi e le Alii i le Perofeta o Iosefa Samita: “Ma e pei ona Ou fai atu ia Aperamo e faataua i ituaiga o le lalolagi, e faapea foi ona Ou fai atu i lau auaua o Iosefa: O le a faamanuiaina ia te oe ma au fanau ituaiga o le lalolagi” (MF&F 124:58).
20. Tagai i le Mataupu Faavae ma Feagaiga 14:7.
21. Tagai i le Galuega 10:34–35.
22. Tagai i le Esoto 19:5.
23. Na tautino mai e tusitusiga paia e faapea “O A'u o le Alii, e noatia au pe a outou faia mea Ou te fai atu ai; ae a outou le faia mea Ou te fai atu ai, e leai folafolaga mo outou” (MF&F 82:10).
24. I le aso 21 o Setema, 1823, na muai faaali atu ai ia Iosefa Samita le manatu faavae lenei o le feagaiga. Sa tautino atu le Agelu o Moronae o le a oo mai le perofeta o Elia o se avefeau mai le lagi e toto i loto o le fanau se malamalama o folafolaga na muai faia ma tamā o le aiga o Isaraelu (tagai i le Mataupu Faavae ma Feagaiga 2:1–3).
25. Tagai i le Mataupu Faavae ma Feagaiga 84:33–34, 39–40.
26. Mataupu Faavae ma Feagaiga 84:33.
27. Tagai i le Mataupu Faavae ma Feagaiga 84:35, 37.
28. Tagai i le Mataupu Faavae ma Feagaiga 84:38.
29. Tagai i le Alema 13:1–9.
30. Tagai i le 3 Nifae 29.
31. 3 Nifae 29:1, 3.
32. Itulau autu o le Tusi a Mamona: O Se Tasi Molimau ia Iesu Keriso.
33. *Aoaoga a Peresitene o le Ekalesia: Polika Iaga* (1997), 62.
34. Tagai i le Mataupu Faavae ma Feagaiga 20:37.
35. “Ua matou tautalatala e uiga ia Keriso, ua matou olioli ia Keriso, ua matou talai atu Keriso, ua matou vavalo e uiga ia Keriso, . . . ina ia mafai ona iloa e a matou fanau po o le a le puna e mafai ona latou tepa taulai i ai mo se faamagaloga o a latou agasala” (2 Nifae 25:26).
36. Tagai i le Kalatia 3:29; Mataupu Faavae ma Feagaiga 86:8–11.
37. O lenei manatu faavae ua faasino ia i tatou: “Ma tupulaga e tele pe a mavae ona faaali mai o le Mesia i le tino i le fanauga a tagata, ona oo atu lea o le atoatoaga o le talalelei a le Mesia i Nuuese, ma mai Nuuese i le toe vaega o a latou fanau—ma i lenei aso o le a iloa ai e le toe vaega o a tatou fanau, o i latou o lo le aiga o Isaraelu, ma o i latou o tagata o le feagaiga a le Alii; ma ona latou iloa ai lea ma o mai i le malamalama e uiga i o latou muātua'a, ma i le malamalama foi o le talalelei a lo tatou Togiola, lea sa tauaoo atu e ia i o latou tama; o le mea lea, o le a latou malamalama ai i lo latou Togiola ma matautu tonu lava o Lana mataupu faavae, ina ia mafai ona latou iloa le ala e oo mai ai ia te ia ma faaalaina” (1 Nifae 15:13–14).
38. Tagai i le Isaia 55:3; Ieremia 31:33; Roma 2:15; 2 Korinito 3:2–3; Eperu 10:16.
39. Tagai i le Salamo 95:7; 100:3; Ieremia 24:7; 31:33; 32:38; Esekielu 11:20; 37:23, 27; Sakaria 8:8; 2 Korinito 6:16; Eperu 8:10.
40. Mosaea 2:41.



**Saunia e Elder Dallin H. Oaks**

○ Le Korama a Aposetolo e Toasefululua

# ○ Aoaoga a Iesu

*O Iesu Keriso o le Atalii e Toatasi na Fanaua ma o le Alo Pele o le Atua. . . . O Ia o lo tatou Faaola mai agasala ma le oti. O le malamalama sili lea ona taua i le lalolagi.*

**S**e a la outou taofi i le Keriso?” (Mataio 22:42). O na upu a Iesu na fememea’i ai le Au Faresaio o Ona aso. O na lava foi upu ou te fesili atu ai i a’u uo o le Au Paia o Aso e Gata Ai ma isi Kerisiano, po o le a tonu lava so outou talitonuga ia Iesu Keriso ma pe o le a foi la outou mea o fai ona o lena talitonuga.

O le tele lava o a’u mau o le a sii mai le Tusi Paia, aua ua masani ai le toatele o Kerisiano. Ae o a’u faaliliuga o le a aumai i mea o aoao mai e tusitusiga paia o ona po nei, aemaise lava o le Tusi a Mamona, i le faauigaga o mau mai le Tusi Paia lea e matua le manino lava ma ua eseese ai manatu o Kerisiano i lo latou faauigaga. Ou te talanoa atu i ē talitonu ae faapea foi ma isi. E pei ona sa aoaoina ai i tatou e El der Tad R. Callister i le taeao nei, o nisi ua latou ta’ua i latou lava o Kerisiano, latou te viia atu ia Iesu o se faiaoga sili ae ua latou taumamao mai le faamautuina o Lona paia. Ina ia talanoa atu ia i latou, ua ou faaaogaina ai upu a Iesu lava Ia. E tatau ona tatou mafaufau uma i mea sa Ia aoao mai pe o ai o Ia ma pe o le a foi le mea na auina mai ai o Ia i le lalolagi e fai.

## **Alo e Toatasi na Fanaua**

Na aoao mai e Iesu o Ia o le Alo e Toatasi na Fanaua. Na Ia fetalai:

“Aua ua faapea lava ona alofa mai o le Atua i le lalolagi, ua ia au mai ai lona Atalii e toatasi, ina ia le fano se tasi e faatuatua ia te ia, a ia maua e ia le ola e faavavau.

“E lei auina mai e le Atua lona Atalii i le lalolagi ina ia faasala i le lalolagi; a ia faaolaina le lalolagi ia te ia” (Ioane 3:16–17).

Na faamautu mai e le Atua le Tama lenei mea. I le faaiuga o le aafiaga paia i luga o le Mauga o Liua, na Ia tautino ai mai le lagi, “O lo’u Atalii pele lena, ou te fiafia ia te ia; ia outou faalogo ia te ia” (Mataio 17:5).

Na aoao mai foi e Iesu o Lona foliga mai e tutusa lava ma Lona Tama. Na Ia fetalai atu i Ana Aposetolo:

“Ana iloa e outou o a’u, po ua iloa foi e outou lo’u Tama: e amata nei foi ona iloa o ia e outou, tou te vaai foi ia te ia.

“Ua fai mai Filipino ia te ia, Le Alii e, ia e faailoa mai le Tama ia te i matou, ona gata ai lea o o matou manao.

“Ua fetalai atu Iesu ia te ia, Filipino e, ua loa lava ona ou i ai ia te outou, a e te lei iloa ea a’u? O le ua vaai mai ia te au, ua vaai o ia i le Tama” (Ioane 14:7–9).

O lea na faamatala ai e le Aposetolo o Paulo le Alo “e tusa lava ma [le Atua le Tama]” (Eperu 1:3; tagai foi i le 2 Korinito 4:4).

## **O Lē Foafoa**

Na tusia e le Aposetolo o Ioane e faapea o Iesu, o lē ua ia faaigoaina “o le Upu,” “sa i le Atua i le amataga. Na faia mea uma lava; e leai foi se mea e tasi na faia e lei faia e ia” (Ioane 1:2–3). O le mea lea, i le fuafuaga a le Tama, o Iesu Keriso o le Foafoa o mea uma.

## **O Le Alii le Atua o Isaraelu**

I Lana misiona i Ona tagata i Paletina, sa tautino atu ai e Iesu o Ia o Ieova, le Alii le Atua o Isaraelu (tagai i le Ioane 8:58). Mulimuli ane, sa Ia auauna atu ai, o le Alii toetu, i Ona tagata i le konetineti o Amerika. O iina na Ia tautino atu ai:

“Faauta, o Au o Iesu Keriso, o le na molimau i ai perofeta o le a sau i le lalolagi. . . .

“. . . O Au o le Atua o Isaraelu, ma le Atua o le lalolagi uma” (3 Nifae 11:10, 14).

## **O Le Mea Sa la Faia mo i Tatou**

I se konafesi faalesiteki i le tele o tausaga ua mavae, sa ou feiloai ai i se tamaitai sa fai mai na talosagaina o ia e toe foi mai i le ekalesia ina ua mavae le tele o tausaga sa alu ese ai, ae sa le mafai ona ia mafaufau i se mafuaaga e tatau ona ia toe foi mai. Ina ia faamaalosi atu ia te ia, sa ou fai atu ai, “A e mafaufau i mea uma sa faia e le Faaola mo i tatou, pe ua le tele ea ni mafuaaga e te toe foi mai ai i le ekalesia e tapuai ma auauna atu ia te Ia?” Sa ou te’i i lana tali: “O le a Lana mea sa fai mo au?” Mo i latou e le o malamalama i le mea sa faia e lo tatou Faaola mo i tatou, o le a ou tali atu i lena fesili i Ana lava upu faatasi ai ma la’u lava molimau.



### **Ola o le Lalolagi**

O loo tusia i le Tusi Paia aoaoga a Iesu: “Ua ou sau ina ia latou maua le ola, ia maua atili ai lava” (Ioane 10:10). Mulimuli ane, i le Lalolagi Fou, na Ia tautino mai ai, “O Au o le malamalama ma le ola o le lalolagi” (3 Nifae 11:11). O Ia o le Ola o le Lalolagi aua o Ia o lo tatou Foafoa ma e ala mai i Lona Toetu, ua tatou mau-tinoa ai o le a tatou toe ola uma. O le ola foi Na te tuuina mai ia te i tatou, e le na o se ola faaletino. Na Ia aoao mai, “Ou te avatu foi le ola e faavavau ia te i latou; latou te le fano lava e oo i le faavavau, e le mafai lava e se tasi ona fao ia te i latou ai lo’u lima” (Ioane 10:28; tagai foi Ioane 17:2).

### **Malamalama o le Lalolagi**

Na aoao mai foi e Iesu, “O a’u nei o le malamalama o le lalolagi: o le mulimuli mai ia te au, e le savali o ia i le pouliuli” (Ioane 8:12). Na Ia tautino mai foi, “O a’u nei le ala, ma le upu moni, ma le ola” (Ioane 14:6). O Ia o le Ala ma o Ia foi o le Malamalama aua o Ana aoaoga e faamalamalama ai lo tatou ala i le olaga nei, ma faaali mai ai le ala e toe foi atu ai i le Tama.

### **Faia o le Finagalo o le Tama**

E faamamaluina lava e Iesu i taimi uma le Tama ma mulimuli ia te Ia. E oo lava foi a o avea o se talavou, sa Ia tautino atu i Ona matua faalelalolagi, “Lua te le iloa ea e tatau ona ou i le

fale o lo’u Tama?” (Luka 2:49). Mulimuli ane sa ia aoao mai, “Aua ou te lei alu ifo mai le lagi e fai lo’u lava loto, a o le finagalo o le ua auina mai a’u” (Ioane 6:38; tagai foi i le Ioane 5:19). Sa aoao mai foi e le Faaola, “E le alu atu lava se tasi i le Tama, pe a le ui mai ia te au” (Ioane 14:6; tagai foi i le Mataio 11:27).

Tatou te toe foi atu i le Tama e ala i le faia o Lona finagalo. Na aoao mai Iesu, “E le sao atu i le malo o le lagi i latou uma o e fai mai ia te au, Le Alii e, le Alii e; na o le na te faia le finagalo o lo’u Tama o i le lagi” (Mataio 7:21). Na Ia faamatalaina mai:

“E toatele latou te fai mai ia te au i lea aso, Le Alii e, le Alii e, matou te lei perofeta ane ea i lou igoa, o lou igoa foi na matou tulia ai temoni? o lou igoa foi na matou fai ai vavega e tele?”

“Ona ou tautino atu ai lea ia te i latou, Ou te lei iloa lava outou; ina o ese ia outou ia te au, o outou o e fai amio leaga” (Mataio 7: 22–23).

O ai la o le a ulufale atu i le malo o le lagi? E le o i latou o e na ona faia o galuega ofoofogia e faaoga ai le suafa o le Alii, lea na aoao mai ai Iesu, ae na o “le na te faia le finagalo o lo’u Tama o i le lagi.”

### **O Le Faaitaiga Sili**

Na faaali mai e Iesu ia i tatou le ala e faia ai lenei mea. Ua faafia ona Ia valaaulia i tatou e mulimuli atu ia te Ia: “O a’u mamoe e faalogo mai i latou i lo’u leo, ua ou iloa foi i latou, ua latou mulimuli mai foi ia te au” (Ioane 10:27).

### **Mana o le Perisitua**

Na Ia tuuina atu le mana o le perisitua i Ana Aposetolo (tagai i le Mataio 10:1) faapea ma isi. Na Ia fetalai atu ia Peteru, le Aposetolo sinia, “Ou te avatu foi ia te oe ki o le malo o le lagi; o se mea foi e te fusifusia i le lalolagi,

e fusifusia foi lea i le lagi; o se mea foi e te tala i le lalolagi, e tatalaina foi lea i le lagi” (Mataio 6:19; tagai foi i le Mataio 18:18).

Na tusia e Luka “Ua tofia e le Alii ni . . . fitugafulu, ua aauina atu i latou e taitoalua ua muamua atu ia te ia, i aai uma ma mea uma o le a maliu atu i ai o ia” (Luka 10:1). Mulimuli ane ona ta’u atu lea ma le olioli e nei Fitugafulu ia Iesu, “Ua usiusitai mai temoni ia te i matou ona o lou suafa” (Luka 10:17). O a’u o se molimau o le mana o lona perisitua.

### **Taitai e le Agaga Paia**

I le faaiuga o Lana misiona i le lalolagi, sa aoao atu ai e Iesu Ana Apotetolo, “A o le Fesoasoani, o le Agaga Paia lea, e auina mai e le Tama i lo’u igoa, o ia lava na te aoao ia te outou i mea uma lava; e faamanatu mai foi o ia ia te outou i mea uma ua ou fai atu ai ia te outou” (Ioane 14:26), ma “e taitai e ia ia te outou i upu moni uma” (Ioane 16:13).

### **Taitai e Ana Poloaiiga**

Na te taitai foi i tatou e ala i Ana poloaiiga. O lea, na Ia poloaiina ai sa Nifae e le tatau ona toe i ai ni fefinau-aiga e uiga i aoaoga faavae, aua na Ia fetalai:

“O le e i ai le agaga o le finauga ua le mai ia te au o ia, ae ua mai le tiapolo ia, o le o le tamā o le finauga, ma ua faaoso e ia loto o tagata ia fefinau ai ma le ita, o le tasi i le isi.

“Faauta, e le o la’u mataupu lea, le faaoso o loto o tagata i le ita, o le tasi e faasaga i le isi; ae o la’u mataupu lenei, ia aveesea mea faapena” (3 Nifae 11:29–30).

### **Taulai atu i le Ola Faavavau**

Ua Ia lu’iina foi i tatou e taulai atu ia te Ia, ae le o mea o le lalolagi. I Lana lauga maoae e uiga i le areto

o le ola, sa faamatalaina ai e Iesu le eseese o le fafagaina i le tino ma le faavavau. “Aua tou te galulue i mea e ‘ai e pala,” na Ia fetalai ai, “a o mea e ‘ai e tumau i le ola e faavavau, e foaiina atu ia te outou e le Atalii o le tagata” (Ioane 6:27). Na aoao mai le Faaola o Ia o le Areto o le Ola, o le faapogai o meaai o le faavavau. I le ta’ua ai o meaai faaletino e ofo mai e le lalolagi, e aofia ai le manai na auina mai e Ieova e fafaga ai le fanauga a Isaraelu i le vao, na aoao mai ai e Iesu o i latou sa faalagolago i lona areto ua maliliu nei (tagai i le Ioane 6:49). I se eseese, o le meaai sa Ia ofoina mai “o le areto ola na alu ifo mai le lagi,” ma sa aoao mai foi Iesu, “Pe a ‘ai se tasi i lenei areto ona ola ai lea o ia e faavavau” (Ioane 6:51).

Fai mai nisi o Ona soo o se “upu faigata lenei,” ma mai lea taimi i lea taimi o le toatele o Ona soo “na toe foi ma e lei toe feoa’i i latou ma ia” (Ioane 6:60, 66). E manino lava latou te lei taliaina Ana uluai aoaoga e faapea e tatau ona latou “saili . . . muamua le malo o le Atua” (Mataio 6:33). E faapena foi i le taimi nei, o nisi ua tautino mai o ni Kerisiano ae ua sili atu ona tosina atu i mea o le lalolagi—o mea e lagolago ai le olaga i le lalolagi ae e le fafagaina ai le ola e faavavau. Mo nisi, ua avea lava Ana “upu faigata” o se mafuaaga ua le mulimuli ai ia Keriso.

### **O Le Togiola**

O le tauluga o le misiona i le olaga nei a le Faaola o Lona Toetu mai ma Lana Togiola mo agasala a le lalolagi. Sa valoia e Ioane le Papatiso lenei mea ina ua ia fai mai, “Faauta i le Tamai Mamoe a le Atua, na te aveese le agasala a le lalolagi” (Ioane 1:29). Mulimuli ane, sa aoao mai e Iesu e faapea “na sau le Atalii o le tagata . . . e auauna atu, ma ofo atu lona ola e sui a’i tagata e toatele” (Mataio 20:28).

I le Talisuga Mulimuli, sa faamanino ai e Iesu, e tusa ai ma le tala a Mataio, o le uaina sa Ia faamanuiaina o “lo’u toto lenei, o le toto o le feagaiga fou, ua faamaligiina mo tagata e toatele e faamagalo a’i agasala” (Mataio 26:28).

Ina ua afio atu i tagata sa Nifae, sa valaaulia ai e le Alii toetu i latou e o mai ma tagotago atu i manu’a sa i Lona itu ma mea na tutui ai fao i Ona lima ma Ona vae. Na Ia faia lona mea, ma sa Ia faamatala atu, “ina ia outou iloa ai o Au o le Atua o Isaraelu, ma le Atua o le lalolagi uma, ma sa fasiotia mo agasala a le lalolagi” (3 Nifae 11:14). Na faaauau le tala, sa faapauu “i lalo [le motu o tagata] i vae o Iesu ma tapuai atu ia te ia” (fuaiupu e 17). O lona mea, o le a iu ai ina ifo atu le lalolagi uma ia te Ia.

Na aoao mai foi e Iesu nisi upu-moni e uiga i Lana Togiola. O loo ta’ua mai e le Tusi a Mamona, lea o loo faapupula atili mai ai aoaoga a le Faaola ma aumaia ai se faamatalaga sili o Lana misiona, ma lipotia mai ai lenei aoaoga:

“Na auina mai au e lo’u Tama ina ia sii ae au i luga o le satauro . . . , ina



ia mafai ona ou aumai o tagata uma ia te au, . . .

“. . . ina ia faamasinoina i latou e tusa ma a latou galuega.

“Ma . . . o le a faatumuina soo se tasi e salamo ma papatiso i lo’u igoa; ma afai e tumau o ia seia oo i le iuga, faauta, o ia lea o le a ou le tausalaina i luma o lo’u Tama i lena aso pe a ou tu e faamasino i le lalolagi. . . .

“Ma e leai se mea le mama e mafai ona ulu atu i le malo [o le Tamal]; o lea e leai se mea e ulu atu i lona malologa vagana ai i latou o e ua faamamaina o latou ofu i lo’u toto, ona o lo latou faatuatua, ma le salamo i a latou agasala uma, ma lo latou faamaoni e oo i le iuga” (3 Nifae 27:14–16, 19).

Ma o lea ua tatou malamalama ai o le Togiola a Iesu Keriso tatou te maua ai le avanoa e faatoilalo ai le oti faaleagaga lea na afua ona o le agasala ma, e ala i le osia ma le tausia o feagaiga paia, e maua ai faamanuiaga o le ola e faavavau.

### Lu’i ma le Molimau

Na tuuina mai e Iesu le lu’i “Se a la outou taofi i le Keriso?” (Mataio 22:42). Na tuu atu foi e le Aposetolo o Paulo le lu’i i tagata i Korinito ina ia “tofotofo ia outou ia te outou, po ua outou i le faatuatua” (2 Korinito 13:5). E tatau ia i tatou uma ona tali atu i nei lu’i mo i tatou lava. O fea o i ai lo tatou lotonuu faamaoni? Pe o pei ea i tatou o Kerisiano o loo i ai i le faamatalaga e le galo a Elder Nea A. Maxwell, o e ua mauu atu o latou fale i Siona ae o la lava e taumafai e tausii se isi fale i Papelonia.<sup>1</sup>

E leai se vaega e faavaeluatatai ai. O i tatou o soo o Iesu Keriso. O tatou o tagatanuu o Lana Ekalesia ma Lana talalelei, ma e le tatau ona tatou faaagaina se visa e asiasi ai i Papelonia pe amio foi e faapei o se tasi o ona tagatanuu. E tatau ona tatou faamamaluina



Lona suafa, tausii Ana poloaiga, ma “aua le sailia mea o le lalolagi ae saili . . . muamua le malo o le Atua ma lana amiotonu” (Mataio 6:33, vaefaa-matalaga a; mai le Faaliliuga a Iosefa Samita, Mataio 6:38).

O Iesu Keriso o le Atalii e Toatasi na Fanaua ma o le Alo Pele o le Atua. O Ia o lo tatou Foafua. O Ia o le Malamalama o le Lalolagi. O Ia o lo tatou Faaola mai agasala ma le oti. O le malamalama aupito taua leni i le lalolagi, ma e mafai ona e iloaina leni mea mo oe lava, e pei ona ou iloaina foi mo a’u lava. O le Agaga Paia, o le molimau mai i le Tama ma le Alo ma taitai i tatou i le upumoni, ua faaali

mai nei upumoni ia te au, ma o le a Ia faaali atu ia te outou. O le ala, o le naunau ma le usitai. Na aoao mai e Iesu, “Ia outou ole atu, ona foaiina mai ai lea ia te outou; ia outou saili, ona outou maua ai lea; ia outou tu’itu’i atu, ona toina ai lea ia te outou.” (Mataio 7:7). E tusa ai ma le usiisitai, sa Ia aoao mai, “Ai se tasi e fia fai lona finagalo, e iloa ai e ia le mataupu, pe mai le Atua, pe ou te tautala fua lava a’u” (Ioane 7:17). Ou te molimau atu i le moni o nei mea i le suafa o Iesu Keriso, amene. ■

### FAAMATALAGA

1. Tagai i le Neal A. Maxwell, *A Wonderful Flood of Light* (1990), 47.



Saunia e Matthew O. Richardson

Fesoasoani Lua i le Au Peresitene Aoao o le Aoga Sa

# Aoao Atu e Tusa ai ma le Agaga

*E ui o i tatou uma o ni faiaoga, ae e tatau ona tatou iloa lelei o le Agaga Paia o le faiaoga moni lea ma o le molimau i upumoni uma.*

I le tele o tausaga ua mavae, a o ma faatasi ai ma la'u soa i le nofoaga autu o aoaoga mo faifeautalai sa ou faalogoina ai se leo o se tamaitiiti o faapea mai, "Tina matua, o ni faifeautalai *moni* i laua la?" Sa ou liliu ma tilotilo atu i se teineitiiti o loo uuina se lima o lona tina matua ma faasino mai ia i maua ma la'u soa. Sa ou ataata, ma tuu atu lo'u lima, ma pupula sao atu lava i ona mata, ma fai atu, "Talofa, o au o Elder Richardson, ma o maua o ni faifeautalai *moni*." Sa susulu ona foliga a o toe vaai mai ia te au, ua fiafia ua faatasi ma ni faifeautalai *moni*.

Sa ou savali ese mai lona aafiaga ma se talitonuga toe faafouina. Sa ou fia pei o le ituaiga faifeautalai lea e faamoemoe mai i ai le Faaola, lo'u aiga, ma lenei teineitiiti. Mo tausaga e lua na sosoo ai, sa ou galue malosi ina ia faafoliga ai, mafaufau, galue, amio ai, ma aemaise lava ia aoao atu e pei o se faifeautalai *moni*.

Ina ua ou toe foi i le aiga, na manino lava le tulaga na i ai, e ui ua maea la'u misiona, ae o aafiaga o la'u misiona na i ai lava ia te au. O le mea *moni*, e tusa lava pe ua mavae le tele o tausaga, ae ou te lagonaina lava o la'u

misiona sa avea o ni tausaga se lua sili lea *mo* lou olaga. O se tasi o lesona mai lau misiona o le leo o lona teineitiiti. I le taimi la lenei o loo ou faalogoina i lo'u mafaufau, "Tina matua, o se tagata *moni* lona o umia le perisitua?" "Tina matua, o se toalua *moni* lona po o se tamā *moni*?" po o le "Tina matua, o se tagata *moni* lona o le Ekalesia?"

Ua ou iloina o le ki i le avea ai ma tulaga *moni* i soo se vaega o o tatou olaga o le tomai lea e aoao atu ai i se auala e le taofia ai le aoaoina. Tou te iloa, o se *olaga moni* e manaomia ai ni *aoaoga moni*, lea e faalagolago ai i ni *faiaoga moni*. O le tiutetauave e aoao atu ma le talafeagai e le o faatapulaa-ina ia i latou o e o loo i ai ni valaauga aloaia e avea ma ni faiaoga."<sup>1</sup> O le mea *moni*, o soo se tagata lava o le aiga, taitai o le Ekalesia, ma tagata o le Ekalesia (e aofia ai ma le autalavou ma tamaiti) o loo i ai se tiutetauave ina ia aoao atu.

E ui o i tatou uma o ni faiaoga, ae e tatau ona tatou iloa lelei o le Agaga Paia o le faiaoga *moni* lea ma o le molimau i upumoni uma. Mo i latou o e le malamalama atoa i lenei mea atonu o loo latou taumafai e suitulaga i le Agaga Paia ma faataunuu e i latou

lava mea uma, ae ia valaaulia ma le faaaloalo le Agaga ina ia faatasi ma i latou i se tulaga o le lagolagosua, pe ua talitonu foi ua latou tuu atu atoa a latou aoaoga i le Agaga, ae, o le mea *moni*, na o lo latou aoao atu "ae aunoa ma se suesue." Ua i matua, taitai, ma faiaoga uma le tiutetauave ina ia aoao atu "ma le Agaga."<sup>2</sup> E le tatau ona latou aoao atu "e aunoa ma le Agaga" pe ua "tuua foi e le Agaga" ae ia "i ai le Agaga" ina ia mafai e le Agaga ona aoao atu le upumoni e aunoa ma le taofiofi.

O loo fesoasoani mai Moronae ina ia tatou malamalama i le auala e mafai ai ona tatou "aoao atu ma le Agaga" e aunoa ma le suitulaga, tuuaitiiti, po o le tetee i le Agaga Paia o le faiaoga *moni* lea. Na fai mai Moronae na faatino e le Au Paia a latou aafiaga "e tusa ma galuega a le Agaga."<sup>3</sup> E manaomia e lenei tulaga mea e sili atu nai lo le tau na ona mauaina o le Agaga e faatasi ma i tatou. Ina ia faatulagaina i tatou lava "e tusa ai" ma le Agaga Paia o lona uiga e ono manaomia le suia o auala o a tatou aoaoga ina ia faaitaitai i le auala o loo aoao mai e le Agaga Paia. Afai tatou te faatusatusaina a tatou auala i auala o le Agaga Paia, o le a mafai ona aoao mai le Agaga Paia ma molimau mai e aunoa ma se faatapulaa. O lenei faatusatusa taua e mafai ona faailoa mai e ala i faaitaitaiga nei.

I le tele o tausaga ua mavae sa matou sopo ai ma la'u fanau i luga o le South Sister, o se mauga e 10,358-futu (3,157 m) i Oregon. Ina ua mavae ni nai itula sa matou feagai ma se a'ega umi e 45-tikeri o tamai maa ninii o le mauga mu. Sa matou iloa atu le mauga, ma sa matou fetaomi atu i luma ma iloa ai o laa taitasi sa matou faia na magoto ai o matou vae i maa ninii, na mafua ai ona matou sesee agai tua i nai inisi. Na mamao lava i luma lo'u atalii e 12-tausaga a o ma o atu ma lo'u afafine e valu tausaga. O le le lavā ma le





faavaivai na vave ona oo mai, ma sa nutimomoia, ma mafaufau ne'i le mafai ona ia faatasi atu ma lona tuagane i luga o le [mauga]. O lo'u faanaunauga muamua lava o le fafaina lea o ia. Na manao i ai lo'u loto, a o le mea e faanoanoa ai ua vaivai lava lo'u tino. Sa ma nonofo i lalo i luga o maa, ma iloilo o ma tulaga, ma seti se fuafuaga fou. Sa ou fai atu ia te ia e tuu ona lima i totonu o taga o loo i tua o lou ofuvae, pipiimau, ma—o le mea e sili ona taua—o le taimi lava e sii ai i luga lo'u vae e laa i luma, e tatau ona vave tuu i ai lona vae i lea tulaga. Sa ia faataitaia nei mea uma ma sa ia faalagolago i le taimi e masii ai i luga lea na oo mai i lona pipiimau ai i a'u taga. Ina ua mavae sina taimi umi lava, sa ma taunuu i luga o le mauga. Sa taua lona faaalua o le manumalo ma le fiafia. Ma ioe, sa avea i laua ma lona tuagane, i o'u lava manatu, o ni tagata sopo *moni*.

O le faamanuiaina o lo'u afafine o se taunuuga lea o lana taumafaiga maelega ma le lelei o lana sopo *e tusa ai ma le auala* na ou sopo ai. A o ia faaogatusaina ana gaoioiga ia te au, sa ma ausia se pā'o e tasi, ma mafai ai ona ou faaogaina atoa lo'u malosii. O le tulaga foi lea pe a tatou aoao atu "e tusa ma galuega a le Agaga." Afai tatou te faaogatusa a tatou aoaoga ina ia fetau ma aoaoga a le Agaga Paia, o le a faamalosia i tatou e le Agaga ma, i lona lava taimi, o le a le taofiofia. Faatasi ai la ma lenei mea i lou mafaufau, faamolemole ia mafaufau i manatu autu e lua o le "galuega a le Agaga" e taua ona tatou faataitaia.

O le mea muamua, e aoaoina e le Agaga Paia ia tagata taitasi i se auala patino. O lenei auala ua mafai ai ona tatou iloa ina patino mo i tatou lava ia upumoni. Ona o le eseese o o tatou manaoga, tulaga, ma le alualu i luma, o lea e aoao mai ai e le Agaga Paia mea e tatau ona tatou iloa ma faia ina ia tatou oo atu ai i le tulaga e tatau ona tatou i ai. Faamolemole ia matau mai, e ui o loo aoao mai e le Agaga Paia "le moni o mea uma lava,"<sup>4</sup> ae Na te le aoao maia upu moni uma i le taimi e tasi. O loo aoao mai e le Agaga le upumoni "i lea mataupu i luga o lea mataupu, o sina mea itiiti i i ma sina mea itiiti i o."<sup>5</sup>

O i latou o e aoao atu e tusa ai ma le tulaga o le Agaga, ua latou malamalama o loo latou aoao atu ia tagata, ae le o lesonea. O lea tulaga, latou te foia ai le naunautaiga ina ia faasoa atu mea uma o i le tusi lesonea pe aoao atu mea uma na latou aoaoina e uiga i le autu nai lo le taulai atu i mea ia e manaomia ona iloa ma faia e o latou aiga po o tagata o le vasega. O matua, taitai, ma faiaoga o e faataitai i le auala o loo aoao mai ai le Agaga Paia, o le a vave ona iloa, o aoaoga *moni* e aofia ai nisi mea e sili atu nai lo le tautala ma le faamatala atu. O se taunuuga la, o le a latou faalogologo, matau ma le faaeteete, ma iloaitino ai le mea o le a sosoo ai.<sup>6</sup> Afai latou te faia lenei mea, o le a i ai le Agaga Paia i se tulaga e aoao atu ai uma ia tagata ma faiaoga i mea e tatau ona latou faia ma tautatala ai.<sup>7</sup>

Lona lua, o le a aoao mai le Agaga Paia e ala i le valaauliaina, uunaiaina, faamalosiaiuina ma le musuiaina o i

tatou e faatino. Na faamautinoa mai e Keriso ia i tatou o le a tatou iloa le upumoni pe a tatou ola i aoaoga faavae ma faatino e pei ona tatau ai.<sup>8</sup> E taitai, taiala, ma faaali mai e le Agaga ia i tatou mea e ao ona tatou faia.<sup>9</sup> Ae peitai, o le a le mafai ona Ia faataunuuina mo i tatou mea e na o i tatou lava e mafai ona faataunuuina. Ua outou iloa la, e le mafai ona aoao le Agaga Paia *mo* i tatou, lagona *mo* i tatou, pe galue *mo* i tatou aua o le a le ogatasi ma le aoaoga faavae o le faitalia. E mafai ona Ia faafaigofieina ni avanoa ma valaaulia i tatou ina ia aoao, lagona, ma galue.

O i latou o e aoao atu e tusa ai ma le tulaga o le Agaga, o le a fesoasoani atu i isi ina ia valaauliaina, uunaiaina, ma tuu atu ia i latou avanoa e faaoga ai lo latou faitalia. Ua iloa e matua, taitai, ma faiaoga e le mafai ona latou lagona *mo*, aoao *mo*, pe salamo foi *mo* o latou aiga, aulotu, po o tagata o le vasega. Nai lo le fesili atu, "O le a se mea ou te faia mo lau fanau, vasega, po o isi" ae ia latou fesili atu faapea, "Pe faapefea ona ou valaaulia ma fesoasoani ia i latou o loo siomia au ina ia latou aoao mo i latou lava?" O matua o e faataitai i galuega a le Agaga Paia ua latou fausiaina ni aiga lea e aoao ai tagata o le aiga i le faatautaina ae le na o le aoao e uiga i le taua. I lea lava tulaga, nai lo le na ona talanoa e uiga i aoaoga faavae, ae ia fesoasoani faiaoga i tagata suesue ina ia malamalama ma ola i aoaoga faavae o le talalelei. E le taofiofia le Agaga Paia a o faatinoina e tagata taitasi ma le talafeagai lo *latou* faitalia.

Faatasi ai la ma tulaga o i ai nei le lalolagi, tatou te matau manaomia lava ni aoaoga *moni* i totonu o o tatou aiga, fonotaga, ma vasega o le talalelei. Ou te iloa o la outou sailiiliga ina ia faalelei e ono foliga lofituina i taimi. Faamolemole ia aua nei outou lotovai i lo

outou alualu i luma. Ou te toe manatua lo matou aafiaga i le savaliga sopo ma la'u fanau. Sa matou malilie, soo se taimi lava matou te tutu ai e to lo matou sela, matou te vave liliu atu i tua ma tilotilo agai i lalo o le mauga nai lo le taulai atu pe toe fia se umi e manaomia matou te fe'a'ei ai. Matou te matamata i le vaaiga ma fai atu i le tasi ma le isi, "Vaai i le mamao ua tatou oo mai i ai." Ona matou toe manava faatopetope lea, liliu faavave agai i luga o le mauga, ma amata ona sopo atu i lea laa ma lea laa. Uso e ma tuafafine, e mafai ona avea oe ma matua, taitai, ina ia aoao atu e tusa ai ma galuega a le Agaga. Ou te iloa e mafai ona outou faia lenei mea ma o le a suia olaga.

Ua faamanuiaina lava lo'u olaga e ni faiaoga *moni* o e na aoaoina au e tusa ai ma le tulaga o le Agaga aemaise ai foi ma le Agaga. Ou te valaaulia outou ina ia faaogatusa a outou aoaoga e tusa ai ma tulaga o le Agaga Paia i mea uma tou te faia. Ou te molimau atu o Iesu Keriso o lo tatou Faaola ma ua toefuatai mai Lana talalelei. Ona o lea tulaga ua tatau ai ona avea i tatou ma ni matua *moni*, taitai *moni*, faiaoga *moni*, ma ni tagata aoao *moni*. Ou te molimau atu o le a fesoasoani mai le Atua i a outou taumafaiga, i le suafa paia o lo tatou Faaola, o Iesu Keriso, amene. ■

#### FAAMATALAGA

1. *Aoao Atu e Leai Se Isi Valaauga e Sili Ai: O Se Punaoo Taiala mo le Aoaoina Atu o le Talalelei* (1999), 3.
2. Mataupu Faavae ma Feagaiga 50:14.
3. Moronae 6:9..
4. Moronae 10:5; tagai foi i le Mataupu Faavae ma Feagaiga 50:14; *Faamonia i le Faatuatua: O Se Tusitaiala o le Talalelei* (2004), 7.
5. 2 Nifae 28:30.
6. Tagai i le David A. Bednar, "Saili e Aoao e Ala i le Faatuatua," *Liahona*, Sete. 2007, 16–24.
7. Tagai i le Luka 12:12.
8. Tagai i le Ioane 7:17.
9. Tagai i le 2 Nifae 32:1–5.



Saunia e Elder Kazuhiko Yamashita  
○ Le Fitugafulu

## ○ Faifeautalai o Ni Oa o le Ekalesia

*Ou te faafetai ona o le valaauina o faifeautalai e le Alii, ma latou te tali atu i lena valaau, ma o loo latou auauna atu i le lalolagi atoa.*

I se tasi po i ni nai tausaga ua tuanai, sa asiasi mai ai se alii faifeautalai fou e suafa ia Elder Swan ma lana soa sinia Iapani i lo matou aiga. O le mea na lelei ai, sa ou i ai i le fale, o lea sa ou valaaulia ai i laua i totonu. Ina ua ou faafeiloaia i laua i le faitotoa, sa tosina atu la'u vaai i le ofutele sa laeiina e Elder Swan. E aunoa ma le mafaufauina, sa ou faapea atu ai ia te ia, "Matuai manaia lou ofutele o loo fai!" Ae peitai, sa le o se ofutele fou, ma sa fai si matafi. Sa ou faapea o le ofutele, o se ofu sa tuu ai e se tasi o faifeautalai sa i ai muamua i le falemautotogi o faifeautalai.

Sa vave ona tali mai Elder Swan i la'u tala, ma sa matuai faafeagai lava ma le mea sa ou mafaufau i ai. I lana faa-Iapani taupanuapanu sa ia tali mai ai: "Ioe, o se ofutele lelei lenei. Sa ofu e lo'u tamā le ofutele lenei a o avea o se faifeautalai i Iapani i le 20 tausaga ua mavae."

Sa galue lona tamā i le Misiona a Iapani Okayama. Ma ina ua alu lona atalii e auauna faamisiona i Iapani, sa ia tuuina atu ia te ia lona ofutele. O le ata lenei o le ofutele ua lua tupulaga o Elder Swans na laeiina i Iapani.

Sa faagaetia au ina ua ou faalogo i upu a Elder Swan. Ma ua ou malamalama nei i le pogai sa laeiina ai e Elder Swan le ofutele o lona tamā a o talai. Sa amata e Elder Swan lana misiona ma ua ia mauaina le alofa o lona tamā mo Iapani ma ona tagata.

Ou te mautinoa o nisi o outou sa oo foi i ai se aafiaga e talitutusa ma lenei. Sa ta'u mai e nisi o faifeautalai o loo galulue i Iapani e faapea, sa faamisiona foi nisi o o latou tama, o latou tina, o latou tama matutua po o tamaloloa o o latou aiga i misiona i Iapani.

Ou te fia faailoa atu lo'u alofa faamaoni, faaaloalo, ma le lagona o le agaga faafetai tele mo faifeautalai uma ua maea misiona o e sa auauna atu i le lalolagi atoa. Ou te mautinoa e le o galo outou ia i latou sa outou fesoasoani e faaliliuina mai. "E matua matagofie i luga o mauga o vae o le ua fai mai le tala lelei . . . !"¹

O au o se tasi o na tagata liliu mai. Sa ou liliu mai i le 17 o o'u tausaga, a o ou aoga i se aoga maualuga. O le faifeautalai sa faia lo'u papatisoga o Elder Rupp mai Idaho. E le'i mamao atu talu ona faamalolo o ia mai le

avea ma se peresitene o le siteki i Idaho. Ou te lei toe vaai ia te ia talu mai le taimi na faotoa papatisoina ai au, ae sa ma fesootai i i-meli ma talanoa atu ia te ia i le telefoni. E lei galo lava o ia ia te au. O lona agalelei, foliga ataata sa tumau i lo'u manatua. Sa matuai fiafia o ia ina ua ia iloa o loo o'u manuia lava.

A o 17 ou tausaga, sa lei i ai so'u malamalamaaga lelei i savali sa aoina ai au e faifeautalai. Ma sa ou lagonaina lo latou alofa loloto ma le tumau. Ae peitai, sa ou maua se lagona faapitoa e uiga i faifeautalai. Sa ou fia avea e faapei o i latou. Ma sa ou lagonaina lo latou alofa loloto ma le tumau.

Sei ou faamatala atu i le aso sa ou papatiso ai. O le aso 15 o Iulai, ma sa o se aso vevela tele. Sa papatisoina ai foi ma se tamaitai i le aso lena. O le faatanoa o le vai papatisoga sa fauina e faifeautalai, ma sa le o se vaaiga manaia tele.

Sa faia le faamauga i le taimi lava na uma ai o ma papatisoga. Sa muamua faamauina le tuafafine e Elder Lloyd. Sa matou saofafai faatasi ma isi tagata o le au paia, moeiini ou mata, ma faalogologo ma le filemu. Sa faamauina o ia e Elder Lloyd, ona amata lea ona ia tuuina atu ni faamanuiaga i ona luga. Ae peitai, sa le toe gagana Elder Lloyd, o lea na pupula ai ou mata ma vaai atu ia te ia ma se pulatoa loloto.

E oo mai lava i le aso, o loo ou manatuina lelei lena vaaiga. Sa maligi loimata o Elder Lloyd. Ma mo le uluai taimi i lo'u olaga, sa ou maua ai se aafiaga o le fusua i le Agaga Paia. Ma na ala mai i le Agaga Paia, sa ou maua ai se iloa mautinoa na alofa Elder Lloyd ia i maua ma sa alofa le Atua ia i maua.

Ona oo lea i le taimi e faamauina ai au. Ma o Elder Lloyd foi sa faia.



Sa tuu ona lima i luga o lo'u ulu ma faamauina au o se tagata o le Ekalesia, tuuina mai le meaalofo o le Agaga Paia, ona amata loa lea ona fofogaina se faamanuiaga. Ma sa toe le gagana foi o ia. Ae peitai, sa ou malamalama nei i le mea na tupu. Sa ou iloina moni e ala i le Agaga Paia, sa alofa faifeautalai ia te au, ma sa alofa foi le Atua ia te au.

Ou te fia fai atu ni nai upu i faifeautalai o loo auauna atu i le taimi nei i misiona i le lalolagi atoa. O ou uiga faaalua, ma le alofa e te faaali atu i isi, o ni savali sili ona taua. E ui lava ina sa le'i vave ona ou malamalama lelei i aoaoga faavae uma sa aoina ai au e faifeautalai, ae sa ou lagonaina lo latou alofa tele ma a latou faatinoga e tele o le agalelei, na aoa mai ai ia te au ni lesona taua. O lau savali o le savali o le alofa, o se savali o le faamoe-moe, ma o se savali o le faatuatua.

O ou uiga faaalua ma au amioga e valaaulia ai le Agaga, ma o le Agaga e mafai ai ona tatou malamalama i mea e taua. O le mea ou te manao e faapupula atu ia te outou o le, e ala atu i lou alofa, o loo e faasafuaina atu ai le alofa o le Atua. O oe o se oa o lenei Ekalesia. Ou te matuai faafetai lava ia te outou uma mo a outou osigataulaga ma lo outou tuuto.

Ou te fia talanoa atu foi ia te outou o faifeautalai i le lumanai. I totonu o lo'u lava aiga, e toafa le ma fanau sa faamisiona, ma o le a ulufale le ma faifeautalai lona lima i le Nofoaga Autu e Aoao ai Faifeautalai i Provo i le faaiuga o le masina lenei. O le tausaga a sau, ua fuafua ai le ma uii e fai se misiona pe a uma ona faauu mai i le aoga mauulaga.

O lea la, ou te talanoa atu i o'u atalii ma outou uma o loo sauniuni

e fai ni misiona. E taua lou sau ma aumai ni mea se tolu i lau misiona:

1. O se manao e talai atu le talalelei. O loo finagalo le Alii e te sailia Ana mamoe, ma sue i latou.<sup>2</sup> O loo faatalitali mai tagata uma o le lalolagi ia te outou. Faamolemole ia faanatinati atu i mea o i ai i latou. E leai ni tagata e sili ona taumafai malosi atu nai lo faifeautalai e o e laveai isi. O a'u le isi o i latou na laveaiina.
2. Atiina ae lau molimau. E manaomia e le Alii lou "loto ma se mafaufau malie."<sup>3</sup>
3. Alofa i isi, e pei foi o Elder Swan, o lē na aumaia le ofutele ma le alofa o lona tamā mo Iapani ma ona tagata i lana misiona.

Ma mo outou e le o iloa pe faapefea ona tapena e fai se misiona, faamolemole alu e vaai lou epikopo. Ou te mautinoa o le a fesoasoani atu o ia ia te oe.

Ou te faafetai ona o le valaauina o faifeautalai e le Alii, ma latou te tali atu i lena valaau, ma o loo latou auauna atu i le lalolagi atoa. Sei ou fai atu ia te outou uma o faifeautalai faapelepele ua maea misiona. Ou te matuai faafetai mo a outou taumafaiga uma. O outou o ni oa o lenei Ekalesia. Ma ia faaauau pea ona outou avea ma ni faifeautalai ma amio e faapei o ni soo o Keriso.

Ou te molimau atu o i tatou o fanau a lo tatou Tama oi le Lagi, e alofa o Ia ia i tatou, ma na Ia auina mai Lona Alo e Toatasi, o Iesu Keriso, ina ia mafai ona tatou toe foi atu i Lona afioaga. Ou te fai atu ai i nei mea i le suafoa o Iesu Keriso, amene. ■

#### FAAMATALAGA

1. Isaia 52:7.
2. Esekielu 34:11.
3. Mataupu Faavae ma Feagaiga 64:34.



Saunia e Elder Randall K. Bennett

○ Le Fitugafulu

## Filifili le Ola e Faavavau

*O o outou taunuuga e faavavau o le a lē o se taunuuga o se avanoa ae o se filifiliga. E le o tuai lava ona amata ona filifili le ola e faavavau!*

I tausaga ua mavae, a o matou i ai ma lo'u aiga i le matafaga, sa ou vaaia ni faailo ma ni fu'a o lapataia ai matou e uiga i ni galu malolosi o loo agai ese atu mai le matafaga i le sami loloto ma le sousou. E le iloa e o'u mata e le'i aoaina peitai na faigofie lava ona iloa e leoleo faaola o loo i luga o olo matamata o lata ane, ia galu malolosi ia o loo lamatia ai i latou o e tuua le tulaga saogalemu o le matafaga ma agai atu i le sami. Ou te manatua lo'u taumafai e fetuutuunai o'u manatu faapea, "O au o se tagata e aau malosi. O le a avea ma se faamalositino lelei le aau. O le a ou saogalemu lava i le vaega e papa'u."

O le le amanaiaina o lapataiga ma le lagonaina o le talitonuina o a'u lava faaiuga, sa ou alu atu ai loa i le sami e fai se auau "manaia." Ina ua mavae ni nai minute sa ou tepa ae i luga e tau vaai atu i lo'u aiga i le matafaga latalata ane, ae peitai ua mamao ese atu le matafaga! O le galu faasese tagata lea na lapataia ai au, na pueina au ma tosoese faavave atu ai au mai lo'u aiga.

Sa ou taumafai e aau agai i le matafaga, i le taimi muamua sa ou maua le to'a ona ou faatopetope lea, peitai sa

atili ai ona toso au e le galu lē alofa i le itu loloto ma le sousou o le sami. Sa ou vaivai ma ua amata ona ou laoa i vai sa ou inumia. O le mea moni lava o le malemo le mea lea ua oo mai. Na leai so'u malosi, ma na iu lava ina ou valaau atu ma le popole mo se fesoasoani.

Na foliga mai, na pei o se vavega, le vave oo mai o le leoleo faaola i o'u autafa. Ou te lei iloa sa ia matauina lo'u alu atu i le sami. Sa ia iloa o le a pu'e au e le galu, ma sa ia iloa le mea o le a ave i ai au. I le taumafaiga e aloese mai le galu, sa ia aau faataamilo mai i le itu tonu lava lea sa ou tauivi ai; ma sa ia faatali ai ma le onosai i sa'u valaau mo se fesoasoani. Ona o lo'u vaivai tele e aau toatasi i le matafaga, sa ou faafetai ai mo lana laveai. Pe ana leai lana fesoasoani semanu ou te le toe foi mai i lo'u aiga.

O lena aso sa ou faia ai se filifiliga le lelei lea na maua ai se taunuuga matautia mo au ma lo'u aiga. A o tatou mafaufau faatasi nei e uiga i le meaalofa o le filifili, ou te tatalo ina ia fesoasoani mai le Agaga Paia ia i tatou taitoatasi ina ia iloilo a tatou filifiliga o loo faia.

Na aoao mai lo tatou perofeta pele o, Peresitene Thomas S. Monson: “E le o lava la’u faamamafa atu, o filifiliga e fuafua ai se taunuuga. E le mafai ona e faia ni faaiuga e faavavau e aunoa ma ni taunuuga e faavavau.”<sup>1</sup>

O outou taitoatasi—e pei ona aoaoina ai tatou i lenei konafesi—o se atalii po o se afafine agaga faapelepele a ni matua faalelagi. Ua i ai sa outou natura ma se taunuuga paia.<sup>2</sup> I lou olaga i le muai olaga sa e aoao ai ia fiafia i le upumoni. Sa e faia ni filifiliga sao e faavavau. Sa e iloa o iinei i le olaga faaletino, o le i ai ni puapuaga ma ni faigata, faanoanoaga ma ni mafatiaga, tofotofoga ma luitau e fesoasoani i lou tuputupu ae ma le alualu i luma. Sa e iloa foi e mafai ona faaaauu pea le faia o ni au filifiliga sao, ma e ala mai i le Togiola a Iesu Keriso, o le a mautofi ai i le ola e faavavau.

O le a se mea na aoao mai e le perofeta o Liae e faatatau i le filifiliga? Sa ia fautua mai ua tatou “saoloto e *filifili* le saolotoga ma le *ola e faavavau*, e ala i le Puluvaiga sili o tagata uma, pe filifili le faatagataotauaina ma le oti, e tusa ma le faatagataotauaina ma le mana o le tiapolo.” Sa ia toe aoao mai, “Ia outou tepa taulai i le Puluvaiga sili, ma faalogologo i ana poloaiga silisili, ma faamaoni i ana afioga, ma *filifili le ola e faavavau*.”<sup>3</sup>

Uso e ma tuafafine, i mea o loo tatou filifili e mafaufau i ai, lagona, ma faia, pe o tatou *filifili ea le ola e faavavau?*

Ua aoaoina le fanau a le ma fanau afai latou te faia se filifiliga, ua latou filifili foi sona taunuuga. Talu ai nei lava sa musu ai se tasi o fanau teine e tolu tausaga a le ma fanau e ‘ai lana meaai o le afiafi. Sa faamatala atu i ai e lona tina, “Ua toetiiti lava oo i le taimi moe. Afai la e te filifili e ai, ua e filifili foi e ai le aisa kulimi. Afai e te



**Montreal, Quebec, Kanata**

filifili e te le ai, ua e filifili foi e alu sao loa e moe i le taimi nei, e aunoa ma se aisa kulimi.” Sa iloilole e le tamaitai lea ana filifiliga ona fai mai lea ma le mautinoa, “Ou te manao i le filifiliga *lenei*—e taalo *ma* ai na o le aisa kulimi *ma* ou te le fia alu e moe.”

Uso e ma tuafafine, pe o tatou mananao ea tatou te taaalo, taumafana o le aisa kulimi, aua nei momoe, ma i sea ala tatou te aloese ai mai taunuuga e pei o le le lelei o le soifua maloloina ma le le lavā?

O le mea moni lava e na o le lua lava a tatou filifiliga e faavavau, e tofu ma ni taunuuga e faavavau: filifili e mulimuli i le Faaola o le lalolagi ona e filifili lea o le ola e faavavau faatasi ma lo tatou Tama Faalelagi po o le filifili e mulimuli i le lalolagi ua e filifilia e vavaeeseina ai e faavavau i tatou mai le Tama Faalelagi.

E le mafai ona tatou filifili ma le manuia mea uma ia e lua o le saogalemumu o le amiotonu ma le tulaga lamatia o le lalolagi. O le savalivali atu i le lalolagi e ono foliga e le lamatia, ae na faapena foi la’u auauga “malu”!

Faapei o le galu lea semanu e suia ai le ala o olaga o lo’u aiga, o galu o le lalolagi i le asō, o talitonuga taufaasese, aoaoga pepelo, ma le ola le

mama ua le taofiofia o loo saili e tosoese atu ma le faavavau i tatou mai i o tatou aiga ma lo tatou Tama Faalelagi.

O loo silasila mai ma saili e o tatou perofeta soifua, tagatavaai, ma talifaaaliga e lapataia i tatou mai galu aave matautia o le lalolagi ua faamata’uina ai i tatou. O loo latou valaaulia, faamaalosiua, aoao, toe faamanatu mai, ma lapatai mai i tatou ma le alofa. Ua latou silafia e faalagolago lo tatou saogalemumu i le filifili e mulimuli i le (1) malamalamaaga tatou te maua mai i le suesuega o tusitusiga paia ma mafaufau loloto, ma le tatalo i aso uma; (2) o le taitaiga a le Agaga Paia; ma (3) a latou fautuaga faaperofeta. Ua latou silafia ua na o loo tatou Faaola o, Iesu Keriso, ma le ola ai i Lana talalelei tatou te maua ai le saogalemumu ma le olioli sili. E pei ona aoao mai ia Elder Dallin H. Oaks, sa tautinoa ma e loo tatou Faaola, “O Au nei le ala, ma le upu moni, ma le ola: e le alu atu lava se tasi i le Tama, pe a le ui mai ia te au.”<sup>4</sup>

I le taimi o le faigata ma mafatiaga sa i ai i Soviet Rusia, sa filifili ai Anatoly ma Svetlana Reshetnikov i le amiotonu nai lo mea o le lalolagi. Ina ua la auai i le Ekalesia, sa sauaina i laua. Sa tuutiitia lona tulaga i le galuega. Sa la mafaufau ma le lototetele,

“O lea la ua tele le taimi ta te auuuna ai i le Atua!” Sa faaauau pea ona faa-mata’uina i laua, ae peitai sa la filifili e ola i ni olaga e taulai atu i le talalelei. O Elder Anatoly Reshetnikov sa tofia e avea ma uluai Fitugafulu Eria o Rusia. O a la’ua filifiliga, sa faaauau ai pea e le au Reshetnikov ona *filifili le ola e faavavau*.

Tatou te feagai uma lava ma faigata. E faaososoina uma foi i tatou. E tofu foi i tatou ma ni mea sese. Ae e le o faigata tele pe ua tuai tele ona faia ni filifiliga sao. O le salamo o se tasi lea o na filifiliga sao taua.

Na aoao mai Peresitene Dieter F. Uchtdorf:

“O nai mea sese laiti ma nai se’e ese laiti mai aoaoga faavae o le talalelei a Iesu Keriso e mafai ona aumaia ai ni taunuuga faanoanoa i o tatou olaga. O lea e matuai taua ai lava lo tatou lotopulea ma vave faia ni faaiuga e faasa’o ai ina ia toe foi atu ai i luga o le ala sao ae aua le faatalitali pe faamoemoe o le a faasa’oina e mea sese i latou lava.

“O le umi ona tatou faatuai e faasa’o, o le tele foi lena o le a oo i ai ni suiga e moomia, ma o le umi foi lena ona toe foi mai luga o le ala sao—e oo lava i le tulaga e ono faamalumalu mai ai ni faigata.”<sup>5</sup>

O loo faaloaloa mai pea aao o le alofa mutimutivale o le Faaola ia i tatou taitoatasi.<sup>6</sup> Pe a tatou salamo faamaoni ma le atoatoa, o le a mafai ona faamagaloina atoatoa a tatou mea sese ma o le a le toe manatuaina e le Faaola a tatou agasala.<sup>7</sup>

I le iloiloaina o au filifiliga ma o latou taunuuga, atonu e mafai ona e fesili ifo ia te oe lava faapea:

- Pe o ou sailia se taitaiga paia e ala i suesuega o tusitusiga paia ma le tatalo i aso uma, pe o ou filifili ina ia ou matua pisi lava pe le fiafia i



ai ma ou le faaoga ai se taimi e suesue ai i afioga a Keriso, mafau-fau loloto i ai, ma talanoa atu i lo’u Tama Faalelagi?

- Pe o ou filifili e mulimuli i fautuuga a perofeta a le Atua, pe o ou mulimuli i ala o le lalolagi ma manatu o isi o loo tetee i fautuuga a perofeta?
- Pe o ou sailia le taitaiga a le Agaga Paia i aso uma i mea o loo ou filifili e mafau-fau i ai, lagona, ma faia?
- Pe o ou aapa atu pea ea e le aunoa e lagolago, auauna atu, pe fesoa-soani e lavea’i isi?

Ou uso e ma tuafafine pele, o o outou taunuuga e faavavau o le a le o se taunuuga o se avanoa ae o se filifiliga. E le o tuai lava ona amata ona *filifili le ola e faavavau!*

Ou te molimau atu ona o le

fuafuaga sili o le fiafia a le Tama Faalelagi, ua mafai ai e i tatou taitoatasi ona faaatoatoaina e ala i le Togiola a Iesu Keriso. Faatasi ma o tatou aiga, ua mafai ona tatou mau faatasi ma lo tatou Tama Faalelagi i le faavavau ma maua le atoaga o le fiafia. Ou te molimau atu ai i nei mea uma i le suafa o Iesu Keriso, amene. ■

#### FAAMATALAGA

1. Thomas S. Monson, “Decisions Determine Destiny” (Church Educational System fireside for young adults, Nov. 6, 2005), institute.lds.org.
2. Tagai i le “O Le Aiga: O Se Folafolaga i le Lalolagi,” *Liahona*, Nov. 2010, 129.
3. 2 2 Nifae 2:27, 28; faaopoopo le faamamafa.
4. Ioane 14:6.
5. Dieter F. Uchtdorf, “Na o Ni Nai Tikeri Lava,” *Liahona*, Me 2008, 59.
6. Tagai i le Alema 5:33.
7. Tagai i le Mataupu Faavae ma Feagaiga 58:42.



Saunia e Elder J. Devn Cornish

○ Le Fitugafulu

# ○ Le Faamanuiaga o le Tatalo

*O le tatalo o se tasi lea o meaalofo aupito taua a le Atua i le tagata.*

○'u tuafafine ma uso pele, o le Atua lo tatou Tama e le o se lagona po o se manatu po o se malosiaga. O Ia o se tamalii paia, e pei ona aoao mai tusitusiga paia, e i ai se foliga ma ni aao ma se tino toetu faamamaluina. E moni o Ia, Na te silafia i tatou uma taitoatasi, ma e alofa o Ia ia i tatou uma lava. E finagalo o Ia e faamanuia i tatou.

Na fetalai Iesu:

“O ai foi se tagata o outou pe a ole mai lona atalii i se areto, na te avane ea ia te ia se maa?

“A ole mai foi i se i'a, na te avane ea ia te ia se gata?

“O lenei, o outou e leaga, afai ua iloa e outou ona avatu o mea lelei ma a outou fanau, e le sili ea ona foaiina mai e lo outou Tama oi le lagi o mea lelei i e ole atu ai ia te ia?” (Mataio 7:9–11).

Atonu o le a fesoasoani se aafiaga patino e faamalalama ai le mataupu faavae. A o avea au ma se fomai talavou sa faia ni aoaoga faamasani i le Falemai mo Tamaiti i Boston, sa ou faigaluega ai mo ni itula se tele ma sa tele lava ina ou malaga i le va o le falemai ma lo'u aiga i Watertown, Massachusetts, i se uila vilivae ona

sa manaomia e lo'u toalua ma lo ma aiga laiti la matou taavale. I se tasi afaifi sa ou tietie atu ai i le fale ina ua maea se taimi umi i le falemai, ma sa ou lagonaina le lēlavā tele ma le fiafi ma sina lotovaivai teisi. Sa ou iloina e le gata sa manaomia ona ou tuuina atu i lo'u toalua ma le ma fanau laiti e toafa lo'u taimi ma le malosi pe a ou taunuu atu i le fale, ae faapena foi ma se uiga auuumama o le loto fiafia. O le mea moni sa faigata ia te au le na o le viliiina o le uila.

O lo'u auala o le a ou ui atu ai i se faleoloa e faatau ai moa falai, ma sa ou lagonaina o le a sili atu ona tuuititia lo'u fiafi ma lo'u lēlavā pe afai ou te malolo e 'ai sa'u fasimoa a o ou agai atu i le fale. Sa ou iloina sa fai se pa'ū o le tau o alagamoā po o vaemoa i le 29 sene i le fasimoa e tasi, ae ina ua ou siakia la'u atotupe, na pau la'u tupe sa i ai na o le limasene. A o vilivili atu la'u uila, sa ou ta'u atu i le Alii lo'u tulaga ma ole atu pe mafai, i Lona alofa tunoa, ona Ia faia ia ou maua se kuata [luasefululima sene] i le auala. Sa ou fai atu ia te Ia ou te le manaomia lenei mea ia avea ma se faailoga, ae o le a matuai ou faafetai lava pe afai e finagalo o Ia e tuuina mai ia te

au lenei ituaiga faamanuiaga.

Sa amata ona ou vaavaai ma le totoa i le elelee ae sa leai se mea na ou vaaia. O le taumafai ai ia tumau pea se uiga e tumu i le faatuatua ae ia usiusitai a o ou tietie atu i la'u uila, sa ou latalata atu i le faleoloa. Ma, na toeitiiti lava a feagai tonu ma le auala mai le nofoaga e faatau ai moa, sa ou vaaia ai se kuata i luga o le elelee. Faatasi ai ma le agaga faafetai ma le maua o le toomaga, sa ou pikiina ae ai, faatau mai le vaemoa, ma 'ai ma le susua ia mea uma, ma sa ou vilivili atu loa ma le fiafia i le fale.

I Lona alofa tunoa, na faafogaina ai e le Atua o le lagi, Lē Foafoa ma le Pule o mea uma i soo se mea, se tatalo e uiga i se mea faatauvaa. Atonu e fesili se tasi pe aisea o le a faapopoleina ai o Ia lava i sea mea matuai laitiiti. Na taitaiina au e talitonu e alofa naua lo tatou Tama Faalelagi ia i tatou ma o lea, o mea e taua ia i tatou e avea ma mea e taua ia te Ia, ona o Lona alofa ia i tatou. O le a le tele atu o Lona finagalo e fesoasoani ia i tatou i mea tetele tatou te ole atu ai e sa'o (tagai i le 3 Nifae 18:20)?

Le fanau laiti, tupulaga talavou, faapea ma tagata matutua, faamolemole ia outou talitonu i le tele naua o le naunau o lou Tama Faalelagi e faamanuia oe. Ae ona o le a Ia le faalavelave i lo tatou faitalia, o lea e ao ai ona tatou ole atu mo Lana fesoasoani. O lenei mea e masani lava ona faia e ala i le tatalo. O le tatalo o se tasi lea o meaalofo aupito taua a le Atua i le tagata.

I se tasi mea na tupu, na fesili ai le au soo o Iesu, “Le Alii e, ia e aoao mai ia te i matou i tatalo” (Luka 11:1). O le tali, ua tuuina mai ai e Iesu ia i tatou se faaitaiga lea e mafai ona avea o se taiala i mataupu faavae autu o le tatalo (tagai i le Russell M. Nelson, “O Lesona mai le Tatalo a le Alii,”



*Liahona*, Me 2009, 46–49; tagai foi i le Mataio 6:9–13; Luka 11:1–4). E tusa ai ma le faataitaiga a Iesu:

Tatou te amata i le talanoa atu i lo tatou Tama Faalelagi: “Lo matou Tama e o i le lagi” (Mataio 6:9; Luka 11:2). O lo tatou faamanuiaga le talanoa sa’o atu i lo tatou Tama. Tatou te le tatalo i se isi lava tagata. Manatua ua fautuaina i tatou e aloese mai le tautu i upu, e aofia ai le faaaoga soo o le suafa o le Tama pe a tatou tatalo.<sup>1</sup>

“Ia paia lou suafa” (Mataio 6:9; Luka 11:2). Sa talanoa Iesu i Lona Tama ma se uiga auaumama o le tapuai, iloaina o Lona silisili ese ma tuuina atu ia te Ia le viiga ma le faafetai. E mautinoa lava o lenei tulaga o le faaaloalo i le Atua ma le tuuina atu o le faafetai i le loto faamaoni ma le patino o le tasi lea o mea autu i tatalo mataalia.

“Ia oo mai Lou malo. Ia faia Lou finagalo” (Mataio 6:10; Luka 11:2). Tatou te faailoa atu ma le saoloto lo tatou faalagolago i le Alii ma faaali atu lo tatou naunau e fai Lona finagalo, e tusa lava pe le tutusa ma o tatou loto. Ua faamalalama mai e la tatou

Lomifefiloi o le Tusi Paia: “O le tatalo o le faatinoga lea e faaogatusa ai le finagalo o le Tama ma le loto o le tamaitiiti. O le faamoemoega o le tatalo e le o le suia o le finagalo o le Atua, ae ia faamautuina mo i tatou lava ma mo isi ia faamanuiaga ua uma ona finagalo le Atua e foai mai, ae seiloga tatou te ole atu mo na faamanuiaga” (Bible Dictionary, “Prayer”).

“Ia e foai mai ia te i matou i le aso nei a matou mea e ai e tatau ma le aso” (Mataio 6:11; tagai foi i le Luka 11:3). Tatou te ole atu mo na mea tatou te manaomia mai le Alii. O le faamaoni e taua i le talosagaina o mea mai le Atua. Mo se faataitaiga, e le o se faamaoni atoatoa le ole atu i le Alii mo le fesoasoani i se suega i le aoga pe afai ou te le’i faalogo lelei i le vasega, fai meaaoga atofaina, pe suesue foi mo le suega. E masani lava a ou tatalo, e uunaia lemu lava au e le Agaga ia ou tautino e tele atu mea e tatau ona ou faia ia maua ai le fesoasoani o loo ou talosagaina mai le Alii. Ona tatau lea ona ou tuuto ma fai la’u vaega. E le tusa ai ma le fuafuaga a le lagi le faia e le Alii mo i tatou o mea e mafai ona

tatou faia mo i tatou lava.

“Ia e faamagalo ia te i matou i a matou agasala” (Mataio 6:12) po o le, i se isi faaupuga, “Faamagalo ia te i matou i a matou agasala” (Luka 11:4). O se vaega taua o tatalo faaletagata lava ia, ae o nisi taimi e galo ai, o le salamo. Ina ia aoga le salamo, e tatau lava ona fitoitonu, faamaoni, ma tumau.

“E pei o i matou foi ona matou faamagaloina atu i e ua agaleaga mai ia te i matou” (Mataio 6:12; tagai foi i le Luka 11:4). Sa faia e le Faaola se sootaga manino i le va o le faamagaloina o a tatou agasala ma le faamagalo atu i isi o e na faia ni mea sese ia i tatou. O nisi taimi o mea sese na faia e isi ia i tatou, e matuai tiga ma faigata tele ona faamagalo pe faagalo. Ou te faafetai mo le faamafanafanaga ma le faamalogua ua ou maua i le valaaulia a le Alii e lafoai o tatou tiga ma lafo atu ia te Ia. I le Mataupu Faavae ma Feagaiga vaega e 64, Ua Ia fetalai ai:

“O Au, o le Alii, Ou te faamagalo i lē o le a Ou faamagaloina, ae o outou ua poloaiina ia faamagalo atu i tagata uma.

“Ma e tatau ona outou fai ifo i o outou loto—ia tuu i le Atua e faamasino i le va o a’u ma oe, ma tau i te oe e tusa ma au galuega” (fuaiupu 10–11).

Ona tatau loa lea ona tatou faataaiaese atoa le mataupu, ae tuu atu loa i le Alii, pe afai tatou te mananao e faamaloloina [i tatou].

“Aua ne’i taitaiina i matou i le tofotofoga, a ia e laveai ia i matou ai le leaga” (Mataio 6:13, vaefaamatalaga a; mai le Faaliliuga a Iosefa Samita, Mataio 6:14; tagai foi i le Luka 11:4, vaefaamatalaga c; mai le Faaliliuga a Iosefa Samita). O lea la, i a tatou tatalo e mafai ona tatou amataina le faagasologa o le puipuiga i le faamauluina o le ofutau atoatoa o le Atua (tagai i



le Efeso 6:11; MF&F 27:15) e ala i le tulimatai atu i le aso o i luma atu ma ole atu mo se fesoasoani i mea ia o nisi taimi e taufaamatau mai tatou te ono fetai. Faamolemole, au uo e, aua nei galo ona ole atu i le Alii e puipui ma faatasi ma outou.

“Aua e ou le malo, ma le mana, atoa ma le viiga, e faavavau lava” (Mataio 6:13). E ese le aoga o le faaiuina e Iesu o lenei tatalo i le toe viiaina o le Atua ma faaali atu Lona faaaloalo ma le usitai i le Tama. A tatou talitonu moni e pulea e le Atua ia Lona malo ma e ia te Ia le mana ma le viiga uma, ua tatou faailoa atu o Ia moni lava e pule, e alofa o Ia ia i tatou i se alofa e atoatoa, ma e finagalo o Ia ina ia tatou fiafia. Ua ou iloa o se tasi o mealilo o se olaga fiafia o le iloa lea o le faia o mea i le ala a le Alii o le a atili ai lo’u fiafia nai lo le faia o mea i la’u lava ala.

E i ai se tulaga lamatia o le ono lagona e se tagata e le agavaa o ia e tatalo. O lenei manatu e sau mai lena agaga leaga, o ia lea e aoa mai i tatou e aua le tatalo (tagai i le 2 Nifae 32:8). E tutusa lava le leaga o le mafaufau ua tatou agasala tele ma ua le tatau ai ona tatalo, ma se tagata ma’i tigaina e talitonu ua ma’i tigaina tele o ia e le mafai ai ona alu i le fomai!

E le tatau ona tatou faapea, o soo se ituaiga o tatalo, e le afaina pe faape’i lona faamaoni, o le a mataalia pe afai na pau lava le mea tatou te faia o le tatalo. E le gata i le tatau ona fai o a tatou tatalo, ae e tatau foi ona tatou ola ai. E sili atu le fiafia o le Alii i le tagata e tatalo ona galue loa lea nai lo le tagata e na ona tatalo lava. E pei lava o vai mai le fomai, e pau lava le auala e aoga ai le tatalo o le fai lea e pei ona faatonuina mai.

Pe a ou fai atu o le tatalo o se faamanuiaga matagofie, e le ona e faapea ua ou faafetai i le mafai ona ou talanoa i le Tama Faalelagi ma lagona



Lona Agaga pe a ou tatalo. Ae ona e tali moni mai o Ia ma talanoa mai ia i tatou. Ioe, o le ala e talanoa mai ai o Ia ia i tatou e masani lava e le o se leo tatou te faalogoina. Na faamalamalama mai e Peresitene Boyd K. Packer: “E oo mai lena leo matagofie, mālū o musumusuga e pei o se lagona nai lo o se leo. E mafai ona faaleo atu le atamai mamā a’ia’i i le mafaufau. . . . O lea taiala e oo mai o ni mafaufauga, o ni lagona, e ala mai i musumusuga ma uunaiga” (“Tatalo ma Uunaiga,” *Liahona*, Nov. 2009, 44).

O nisi taimi e foliga mai tatou te le maua ni tali ia tatou tatalo faamaoni ma faatauanau. E manaomia le faatuatua e manatua ai e tali mai le Alii i Lana lava taimi ma i Lana lava ala, ia sili ona faamanuiaina ai i tatou. Po o le, pe a manatunatu atili i ai, o le a tele ina tatou iloa ua uma lava ona tatou iloa lelei le mea e tatau ona tatou faia.

Faamolemole ia aua nei lotovaiwai pe a le vave ona tupu lenei mea mo oe. E pei foi o le aoaoina o se gagana ese, e manaomia ai le fai soo ma taumafaiga. Ae, ia silafia, e mafai ona e aoaoina le gagana a le Agaga, ma a e mafaia loa, o le a tuuina atu ia te oe le faatuatua tele ma le mana i le amiotonu.

Ou te faatauina le fautuaga a lo tatou perofeta pele, o Peresitene Thomas S. Monson, o lē na saunoa mai: “Ia i latou o loo faafofoga mai i lo’u leo, o e o tauivi ma luitau ma

faigata, pe tetele pe laiti, o le tatalo e maua ai le malosi faaleagaga; o le tusifolau lea i le filemu. O le tatalo o le auala lea tatou te faalatalata atu ai i le Tama i le Lagi, o lē e alofa ia te i tatou. Talanoa atu ia te Ia i le tatalo ona e faalogo lea mo le tali. E mamanu mai vavega i le tatalo” (“Ia Avea ma Tagata Sili e Mafai ona Avea ai Oe,” *Liahona*, Me 2009, 68).

Ou te faafetai lava mo le faamanuiaga o le alu atu i lo’u Tama Faalelagi paia i le tatalo. Ou te faafetai mo le anoanoai o taimi ua Ia faafofogaina ma tali mai ai ia te au. Ona e tali mai o Ia ia te au, e aofia ai i nisi taimi i auala e muai faaali mai ma faavavega, ua ou iloa ai o loo soifua o Ia. Ou te molimau atu foi ma le lotomauualalo o Iesu, o Lona Alo paia, o lo tatou Faola soi-fua. O Lana Ekalesia ma [Lona] malo leni i luga o le fogaeleele; e moni leni galuega. O Thomas S. Monson, o lē tatou te tatalo faatauanau mo ia, o Lana perofeta; ou te molimau atu ai i ia mea ma le mautinoa atoa i le suafa o Iesu Keriso, amene. ■

#### FAAALIGA

1. Tagai i le Francis M. Lyman, “Proprieties in Prayer,” i le Brian H. Stuy, comp., *Collected Discourses Delivered by President Wilford Woodruff, His Two Counselors, the Twelve Apostles, and Others*, 5 vols. (1987–92), 3:76–79; B. H. Roberts, comp., *The Seventy’s Course in Theology*, 5 vols. (1907–12), 4:120; *Encyclopedia of Mormonism* (1992), “Prayer,” 1118–19; Bruce R. McConkie, *Mormon Doctrine*, 2nd ed. (1966), 583.



Saunia e Elder Quentin L. Cook

○ Le Korama a Aposetolo e Toasefululua

# ○ Pese e Le Mafai Ona Latou Usuina

*E ui tatou te le iloa ia tali uma, ae ua tatou iloa ni mataupu faavae taua e faatagaina ai i tatou e fetaiiai ma faalavelave faatasi ma le faatuatua ma le mautinoa.*

E toatele tagata o loo feagai ma faafitauli tuga po o ni faalavelave matuia i lenei olaga faaletino. I le lalolagi atoa ua tatou vaai ai i faaitaiga o tofotofoga ma faafitauli.<sup>1</sup> Ua tatou lagonaina le nutimomoia i o tatou agaga ona o ata o maliu i luga o televise, puapuaga matuia, ma le leai o se faamoemoe. Ua tatou vaaia tagata Iapani o loo tauivi ma le lotototoa ona o le faatafunaga mai se mafuie ma le galulolo. O vaaiga e le galo o le faatafunaga o fale tetele o le World Trade Center, ia na tatou maimoa talu ai nei sa toe faaolaola mai ma le tiga. E nutimomoia o tatou lagona pe a tatou iloina ia ituaiga o faalavelave, aemaise lava pe a mafatia ai ē ta'umamāina.

O nisi taimi e patino i le tagata nei mala. E maliu se atalii po o se afafine a o talavou lava pe mafatia tele i se faamai faataumaoui. E maliu se matua agaalofa ona o se faatinoga e le'i mafauina po o se faalavelave. Pe o le a lava le faalavelave e tupu, tatou te faanoanoa ma tauivi e tauaveina avega a le tasi ma le isi.<sup>2</sup> Tatou te faanoanoa ona o mea o le a le faataunuuna ma pese o le a le usuina.

O nisi nei o fesili e tele na fesili-gia soo ai taitai o le Ekalesia, Aisea e faatagaina ai e se Atua amiotonu mea leaga e tutupu, aemaise lava i tagata lelei? Aisea e le laveiina ai i latou o e amiotonu ma o loo auauna i le Alii, mai ia faalavelave?

E ui tatou te le iloa ia tali uma, ae ua tatou iloa ni mataupu faavae taua e faatagaina ai i tatou e fetaiiai ma faalavelave faatasi ma le faatuatua ma le mautinoa o loo i ai se lumanai sili atu ua fuafuaina mo i tatou taitoatasi. O nisi nei o ia mataupu faavae e sili ona taua:

Muamua, e i ai so tatou Tama i le Lagi, e silafia ma alofa patino ia i tatou ma e malamalama atoatoa i o tatou puapuaga.

Lua, o Lona Alo, o Iesu Keriso, o lo tatou Faaola ma le Togiola, lē ana le Togiola e le gata ina maua ai le faaolataga ma le faaeaga ae o le a totogi uma ai mea e le atoatoa o le olaga.

Tolu, o le fuafuaga o le fiasia a le Tama mo Ana fanau e le gata e aofia ai le muai olaga ma le olaga faitino ae faapena foi se olaga e faavavau, e aofia ai se toe faatasiga sili ma le mamalu faatasi ma i latou ua maliluu. O mea sese uma o le a faasa'oina, ma o le a

tatou vaai i ai i se manino atoatoa ma se vaaiga lē ponā ma le malamalama.

Mai se vaaiga faatapulaa a i latou e leai so latou iloa, malamalama, po o se faatuatua i le fuafuaga a le Tama—o ē e na ona vaai lava i le lalolagi i tioata o le olaga faaletino i ana taua, misa, faamai, ma le leaga—e mafai ona foliga mai lenei lalolagi i le faanoanoa, le mautonu, le talafeagai, ma leai se uiga. Ua faatusatusa e taitai o le Ekalesia lenei vaaiga i se tagata e savali atu i le ogatotonu o se tala e tolu ona vaega.<sup>3</sup> O i latou e aunoa ma se iloa o le fuafuaga a le Tama e le malamalama i le mea na tupu i le vaega muamua, po o le muai olaga, ma faamoemoe na faavaeina iina; e le malamalama foi i le faamaninoga ma folafolaga e oo mai i le vaega lona tolu, o le faataunuuga mamalu lea o le fuafuaga a le Tama.

E toatele e le malamalama e faapea i lalo o Lana fuafuaga alofa ma le atoatoa, o i latou e foliga mai e le atoatoa le malosi ona e le o so latou lava faaletonu, e le faasalaina i le iuga.<sup>4</sup>

I ni nai masina o lumanai o le a atoa i ai le 100 tausaga talu le tofatumoanaina o le vaa la'u pasese o le *Titanic*. O tulaga lamatia na siomia ai lenei mea matautia na tupu, o loo i ai pea se aafiaga malosi i tagata mo tausaga e selau talu ona tupu. O tagata na faalauiloaina le vaa la'u pasese maoae, lea e 11 fogafale le maualuga ma toetoe lava a 3 malae lakapi le umi,<sup>5</sup> sa latou faia ni tautinoga sili ma le le faavae e uiga i le saogalemu o le *Titanic* i sami malulu e tumu i poloka aisa tetele. Sa mafau-fauina e le goto lenei vaa; ae ina ua goto ifo i le taele o le Vasa Atalana aisā, e silia ma le 1,500 agaga na maimau o latou ola faaletino.<sup>6</sup>

I le tele o tulaga, o le goto o le *Titanic* o se faatusa lea mo le olaga ma le tele o mataupu faavae o le talalelei. O se faaitaiga atoa lea o le faigata o le tau na ona vaai i tioata o

lenei olaga faaletino. O le maimau o le ola sa matautia tele i ona taunuuga ae o se faalavelave faalenatura. I le tele o tagata na maliliu i taua e lua o le lalolagi ma lea faatoa pasia foi le 10 tausaga o le faatafunaga o fale tetele o le World Trade Center, ua tatou vaaia ai i o tatou lava taimi se faamalama i le faate'ia, tigā, ma faafitauli o le ola mama o loo siomia ai mea o tutupu e mafua mai i faatinoga leaga o le filifiliga saoloto. O loo i ai taunuuga matautia i aiga, uo, ma malo ona o se taunuuga o nei faalavelave, e tusa lava po o le a le mafuaaga.

E tusa ai ma le *Titanic*, na aoaoina ai ni lesona e uiga i le matautia o le faamaualuga ma le malaga i vasa matautia ma “e le faailogaina tagata e le Atua.”<sup>7</sup> O i latou na aafia e o mai i soo se atunuu. O nisi na mauoa ma lauiloa, e pei o John Jacob Astor; ae sa i ai foi ni tagata faigaluega leipa, tagata malaga, fafine, tamaiti, ma tagata o le auvaa.<sup>8</sup>

Sa i ai foi ni sootaga e le itiiti ifo ma le lua a le Au Paia o Aso e Gata Ai ma le *Titanic*. Ua faaalua uma i [sootaga] ia e lua o tatou luitau i le malamalama ai i tofotofoga, faafitauli, ma faalavelave ma maua ai ni malamalamaaga e uiga i le auala e mafai ai ona tatou taulimaina na mea. O le sootaga muamua o se faataitaiaga o le talisapaiaina o faamanuiaga tatou te maua atoa ai ma luitau tatou te aloese mai ai. Na aafia ai Alma Sonne, o lē na mulimuli ane avea ma se Pulega Aoao.<sup>9</sup> Ou te fanau mai i Logan, Iuta, o loo avea o ia ma o’u peresitene o le siteki. Sa faia le ma faatalanoaga o le misiona ma Elder Sonne. I aso na o faifeautalai uma e sauniuni, e faatalanoa e se Pulega Aoao. O ia o se uunaiga tele i lo’u olaga.

A o avea Alma o se alii talavou, sa i ai sana uo sa le toaga i le Lotu, e igoa ia Fred. Sa tele ni a la talanoaga e uiga i le ō e faamisiona, ma mulimuli ane na faatalitonuina e Alma Sonne



ia Fred e sauni ma auuuna atu. Na valaauiina uma i la’ua i le Misiona a Peretania. Ina ua mae’a a la misiona, sa faia ai e Elder Sonne, o le failautusi a le misiona, ni fetuunaiga o faigamalaga mo lo latou toe foi atu i le Iunaite Setete. Sa ia faatauina ni pepa malaga e o ai i le *Titanic* mo ia, o Fred, ma isi faifeautalai e toafa ua faamaeaina foi a latou misiona.<sup>10</sup>

Ina ua oo mai le taimi e malaga ai, sa leiloa le mafuaaga na tuai mai ai Fred. Na faaleaogaina e Elder Sonne ia pepa malaga uma e ono e folau ai i le vaa la’u pasese fou ma le maoae i lana uluai malaga, ae faatau ia pepa malaga i se vaa e folau i le aso e sosoo ai.<sup>11</sup> Sa faailoa e faifeautalai e toafa ia na fiafia o le a malaga i le *Titanic*, lo latou lē fiafia. O le tali a Elder Sonne sa tali tutusa lava ma le tala a Iosefa ma ona uso i Aikupito o loo tusia i le Kenese: “E mafai faapefea ona tatou foi atu i o tatou aiga ae e le o i ai le tama ma i tatou?”<sup>12</sup> Sa ia faamalalama atu i ana soa na latou o mai faatasi uma i Egelani ma e tatau ona latou toe foi faatasi uma atu i le fale. Mulimuli ane na iloa e Elder Sonne le goto o le *Titanic* ma faapea atu ma le agaga faafetai ia Fred, “Ua e laveaia lo’u ola.”

Sa tali mai Fred, “Leai, e ala i lo’u sau i lenei misiona, ua e laveaia ai lo’u ola.”<sup>13</sup> Sa faafetai atu uma ia faifeautalalai i le Alii mo le faasaoina o i latou.<sup>14</sup>

O nisi taimi, e pei o le tulaga na oo i ai Elder Sonne ma ana uo faifeautalalai, e oo mai ia faamanuiaga tetele ia i latou o ē faatuatua. E tatau ona tatou faafetai mo le alofa mutimutivale agamalu e oo mai i o tatou olaga.<sup>15</sup> Tatou te le o nofouta lava i le tele o faamanuiaga o loo tatou mauaina mai lea aso i lea aso. E matuai taua lava lo tatou mauaina o se agaga o le faafetai i o tatou loto.<sup>16</sup>

O loo manino lava tusinga paia: o i latou e amiotonu, mulimuli i le Faaola, ma tausia Ana poloaiga o le a manuia i le nuu.<sup>17</sup> O se elemene taua o le faamanuiaina o le mauaina lea o le Agaga i o tatou olaga.

Peitai, o le amiotonu, tatalo, ma le faamaoni o le a le taunuu pea i ni taunuuga fiafia i la le tino. E toatele o le a oo i tofotofoga matuia. A tupu lenei mea, o le mauaina tonu o le faatuatua ma le saili atu i faamanuiaga faaleperisitua ua faamaoniaina e le Atua. Na tautino mai le Alii, “Ia valaauiina ni toeaina . . . e tatalo mo i latou ma faaee o latou lima i luga o i latou i lo’u

igoa; ma afai e oti i latou e oti i latou ia te a'u, ma afai e ola i latou e ola i latou ia te a'u."<sup>18</sup>

Sa faailoa mai o le sootaga lona lua a le Au Paia o Aso e Gata Ai ma le *Titanic* e le'i i ai se taunuuga fialia i la le tino. O Irene Corbett sa 30 tausaga le matua. O ia o se avā ma se tina talavou mai Provo, Iuta. Sa i ai ni ana taleni maoae o se tusiata ma se tagata musika; sa avea foi o ia ma se faiaoga ma se tausima'i. I se uunaiga o se matata faafomai i Provo, sa ia auai atu ai i se kosi siesue o tomai faatosaga mo le ono masina i Lonetona. O lona manao tele sa i ai ina ia faia se suiga i le lalolagi. Sa ia faaeteete, mafaufau lelei, loto tatalo, ma lototoa. O se tasi o mafuaaga na ia filifili ai le *Titanic* e toe foi atu ai i le I.S. ona sa ia manatu o le a latou malaga faatasi ma faifeautalai ma o le a maua ai sona saogalemu faaopoopo. O Irene o se tasi o nai tamaitai e le'i faasaoina mai lenei faalavelave matautia. O le tele o tamaitai ma tamaiti na tuu i vaafaaoa ma laveaiina mulimuli ai. E le'i lava ni vaafaaoa mo tagata uma. Ae ua talitonuina e le'i i ai o ia i totonu o se vaafaaoa ona, faatasi ai ma ona tomali faapitoa, sa faatasi atu o ia i manaoga o le toatele o le pasese na manunua ina ua feti'i ai le vaa ma le aisa tele.<sup>19</sup>

E tele ia ituaiga o luitau o i ai. O nisi tatou te maua ai ni aafiaga taua. O ni taunuuga tigā i lenei olaga faaletino e le o ni faamaoniga o le leai o se faatuatua po o se lē atoatoa i le fuafuaga aoao a lo tatou Tama i le Lagi. E moni lava le afi a le tunu auro, ma le tulaga lelei o uiga faaalii ma le amiotonu ia e tutupu mai e ala i mafatiaga e faaatoatoa ai ma faamamāina ai i tatou ma saunia ai i tatou e feiloai ma le Atua.

A o avea le Perofeta o Iosefa Samita ma se pagota i le Falepuipui i Liperate, na tautino atu le Alii ia te ia e tele faalavelave e mafai ona tutupu i tagata.

Sa ta'ua e le Faaola i vaega, "Afai e lafo oe i le loloto; afai e taupulepule galulolo o le sami e faasaga mai ia te oe; afai e avea matagi malolosi ma ou fili . . . ma afaatasi elemene uma e pupuni le ala; . . . o nei mea uma e te maua ai le potu masani, ma o le a avea ma ou lelei."<sup>20</sup> Sa faaiuina e le Faaola Ana faatonuga: "Ua iloa ou aso, ma o ou tausaga o le a le faitauina itiiti mai; o lea, aua le mata'u . . . , aua o le a faatasi le Atua ma oe e faavavau ma faavavau lava."<sup>21</sup>

O nisi luitau e mafua mai i filifiliga saoloto a isi. E taua le filifiliga saoloto mo le tuputupu a'e faaleagaga ma le atinaega o tagata taitoatasi. O le amio leaga o se elemene o le filifiliga saoloto. Na faamalamalama mai e Kapeteni Moronae lenei aoaoga faavae taua tele: "E tuu e le Alii ē amiotonu ia fasiotia, ina ia mafai ona oo mai o lona faamasinotonu ma lana faamasinoga i luga o ē amioleaga." Na ia faamanino mai e le o malaia ē amiotonu, ae "latou te ulu atu i le malologa o le Alii lo latou Atua."<sup>22</sup> O le a faamasinoina ē amioleaga mo mea leaga latou te faia.<sup>23</sup>

O nisi luitau e oo mai i le lē usi-usitai i tulafono a le Atua. O faa-fitauli tau le soifua maloloina e mafua mai i le ulaula tapaa, ava malosi, ma le faatautala o fualaa, ua lofituina. O le faapagotaina i falepuipui ona o se taunuuga o solitulafono e fesootai ma le ava malosi ma fualaa faasaina ua maualuga tele foi.<sup>24</sup>

O le saosaoa o le tatalaga o faaipoipoga ona o le mulilua ua maoae foi. E mafai ona aloese mai le tele o nei tofotofoga ma faa-fitauli e ala i le usitai o tulafono a le Atua.<sup>25</sup>

O la'u peresitene pele o le misi-ona, o Elder Marion D. Hanks (o le na maliu ia Aokuso), na faatonuina i matou o ni faifeautalai ia taulotoina se faamatalaga ina ia tetee atu ai i luitau faaletino: "E leai se avanoa, leai se

taunuuga, leai se lumanai e mafai ona faalavelaveina pe taofia pe puleaina le mausali o le tuuto atu o se tagata naunau."<sup>26</sup>

Na ia faailoa mai e le faatatau lenei mea i luitau uma tatou te fetai'ai ae e moni i mataupu faaleagaga. Ou te talisapaia lana fautuaga i lo'u olaga.

O se tasi o mafuaaga mo le malaia matautia o ola i le *Titanic* o le le lava lea o vaafaaoa. E tusa lava pe o a luitau tatou te fetai'ai i lenei olaga, e maua lava i le Togiola a le Faaola ia vaafaaoa mo tagata uma. Mo i latou e manatu o luitau o latou fetai'ai e le talafeagai, ua tofogiina e le Togiola ia mea uma e le talafeagai o le olaga.<sup>27</sup>

O se luitau tulagaese mo i latou ua maliliu ē pele ia i latou o le aloese lea mai le mafaufau pea i avanoa ua maimau i lenei olaga. E masani lava o i latou e maliliu a o talavou ua faaalii ni tomali taua, mea e fiafia ai, ma taleni. Faatasi ai ma lo tatou malamalama faatapulaaina, tatou te faanoanoa ona o mea o le a le faataunuuiina atoa ma pese o le a le usuina. Ua faamatalaina lenei mea o le oti atu faatasi ma lau musika o loo i totonu pea o oe. O le musika i lenei tulaga o se faatusa mo soo se ituaiga o gafatia e le i faataunuuiina. O nisi taimi e faia ai e tagata ni sauniuniga taua ae e leai se avanoa e faatino ai i le olaga nei.<sup>28</sup> O se tasi o solo lauiloa e ta'ua soo, "Tusiaina ma le Faanoanoa i se Lotoa o le Ekalesia i se Nu'u Maotua," tusia e Thomas Gray, e manatunatu ai i ia avanoa ua misia:

*E tele fugalaau e fuga mai e le māvaavaia*

*Ma maumau ai lo latou matagofie i le ea o le toafa.*<sup>29</sup>

O le avanoa ua maumau e ono fesootai i le aiga, galuega, taleni, aafiaga, po o isi. O mea uma nei na

lē taulau i le tulaga o Sister Corbett. Sa i ai pese na te le'i usuina ma gafatia na te le'i faataunuuina i lenei olaga faaletino. Ae pe a tatou vaai i tioata lautetele ma le manino o le talalelei, nai lo tioata faatapulaa o le na ona i ai i le olaga faaletino, tatou te iloa ai le tau tele e faavavau na folafolaina e se Tama agaalofo i Lana fuafuaga. E pei ona aoao mai le Aposetolo o Paulo, "O mea e lei vaaia e mata, e lei lagona foi e taliga, o mea ia ua saunia e le Atua mo i latou o e alofa ia te ia."<sup>30</sup> Ua maua mai i se laina o se viiga pele le mafanafana, toomaga, ma tioata manino: "Ua faafofoga mai Iesu, i a'u pese fai lemu."<sup>31</sup>

Na fetalai mai le Faaola: "O lea, ia faamafanafanaina o outou loto. . . . Ia filemu ma iloa o A'u o le Atua."<sup>32</sup> Ua tatou maua Lana folafolaga o le a tatou usuina faatasi ma a tatou fanau ia "pese o le olioli tumau-faavavau."<sup>33</sup> I le suafa o Iesu Keriso, lo tatou Faaola, amene. ■

#### FAAMATALAGA

1. Tagai i le Ioane 16:33.
2. Tagai i le Mosaea 18:8-9; tagai foi i le 2 Nifae 32:7.
3. Tagai i le Boyd K. Packer, "The Play and the Plan" (Church Educational System fireside for young adults, May 7, 1995), 3: "I le olaga faaletino, e pei i tatou o le tagata e ulu atu i le faletifaga i le taimi tonu ua toso ai i luga pupuni o le vaega lona lua o le tala. Ua tatou misia le Vaega 1 . . . 'ona latou ola fiafia ai lea' e lei tusiaina lava i le vaega lona lua. O le laina lena e faatatau i le vaega lona tolu pe a uma ona foia mea lilo ma faasa'o ia mea uma." Tagai foi i le Neal A. Maxwell, *All These Things Shall Give Thee Experience* (1979), 37: "E vaai le Atua . . . mai le amataga e oo i le gataaga. . . . O le faamatematika . . . o se mea e le mafai ona malamalama i ai tatou o tagata. E le mafai ona tatou faia ni faaopoopoga ona e le o ia i tatou ia numera uma. Ua lokaina i tatou i le fuataga o le taimi ma ua faatapulaaina i vaaiga o lenei vaega lona lua."
4. O i latou e maliliu ae le'i aulia ia tausaga e tali atu ai e faaolaina i le malo selesitila (tagai i le Mataupu Faavae ma Feagaiga 137:10). O i latou e maliliu e aunoa ma se malamalama o le talalelei ma semanu e



- taliaina pe a na latou maua le avanoa o le a avea foi i latou ma suli o le Malo Selesitila (tagai i le Mataupu Faavae ma Feagaiga 137:7). Ma le isi, e oo lava ia i latou e le'i amiotonu tele o le a oo mai lava le taimi e faamanuaina ai i se olaga e sili atu i lenei olaga (tagai i le Mataupu Faavae ma Feagaiga 76:89).
5. Tagai i le Conway B. Sonne, *A Man Named Alma: The World of Alma Sonne* (1988), 83.
6. Tagai i le Sonne, *A Man Named Alma*, 84.
7. Galuega 10:34; tagai foi i le "The Sinking of the World's Greatest Liner," *Millennial Star*, Apr. 18, 1912, 250.
8. Tagai i le *Millennial Star*, Apr. 18, 1912, 250.
9. Elder Sonne is an uncle to Elder L. Tom Perry.
10. Tagai i le Sonne, *A Man Named Alma*, 83.
11. Tagai i le Sonne, *A Man Named Alma*, 83-84; tagai foi i le "From the Mission Field," *Millennial Star*, Apr. 18, 1912, 254: "Releases and Departures.—The following named missionaries have been honorably released and sailed for home April 13th, 1912, per s.s. *Mauretania*. From Great Britain—Alma Sonne, George B. Chambers, Willard Richards, John R. Sayer, F. A. Dahle. From the Netherlands—L. J. Shurtliff."
12. Tagai i le Kenese 44:30-31, 34.
13. I le Frank Millward, "Eight Elders Missed Voyage on Titanic," *Deseret News*, July 24, 2008, M6.
14. Tagai i le "Friend to Friend," *Friend*, Mar. 1977, 39.
15. Tagai i le David A. Bednar, "O Le Alofa Mutimutivale o le Alii," *Liahona*, Me 2005, 99-102.
16. Tagai i le Mataupu Faavae ma Feagaiga 59:21.
17. Tagai i le Alema 36:30.
18. Mataupu Faavae ma Feagaiga 42:44.
19. Faatalanoaga ma le tama o le tama (grandson) a Irene Corbett's o Donald C. Corbett, Oke. 30, 2010, e Gary H. Cook.
20. Mataupu Faavae ma Feagaiga 122:7.
21. Mataupu Faavae ma Feagaiga 122:9.
22. Alema 60:13.
23. Na manino lava le fetalaiaga a le Faaola e faapea "e oo mai o mea e tausuai ai: oi talofa foi i le e oo mai ai!" (Luka 17:1).
24. Vaega 89 o le Mataupu Faavae ma Feagaiga—"o le faatonuga ma le finagalo o le Atua i le faaolataga faaletino o le au paia uma i aso e gata ai" (fuaiupu 2)—e faateleina ai le faamanuaina o le Au Paia o Aso e Gata Ai.
25. Tagai Mataupu Faavae ma Feagaiga 42:22-24.
26. Tagai i le "Will," *Poetical Works of Ella Wheeler Wilcox* (1917).
27. Tagai i le "O Le Togiola," *Tala'i La'u Talalelei: O Se Taitala mo le Galuega Faafaijeautalai* (2004), 51-52.
28. Tagai i le "The Song That I Came to Sing," i le *The Complete Poems of Rabrindranath Tagore's Gitanjali*, ed. S. K. Paul (2006), 64: "The song that I came to sing remains unsung to this day. / I have spent my days in stringing and in unstringing my instrument."
29. Thomas Gray, "Elegy Written in a Country Church Yard," i le *The Oxford Book of English Verse*, ed. Christopher Ricks (1999), 279.
30. 1 Korinito 2:9.
31. "Ua Susulu Mai Nei o le La," *Viiga*, nu.140.
32. Mataupu Faavae ma Feagaiga 101:16; tagai i le Salamo 46:10.
33. Mataupu Faavae ma Feagaiga 101:18; tagai foi i le Mataupu Faavae ma Feagaiga 45:71.



Saunia e Peresitene Thomas S. Monson

# Seia Tatou Toe Feiloai

*Ia mafutaina i tatou e le Agaga sa tatou lagonaina iinei ma tumau ai a o tatou faia mea tatou te nopia'i ai i aso taitasi.*

O'u uso e ma tuafafine, ou te iloa o le a outou ioe faatasi ma a'u, o se konafesi ua aupito sili lenei ona musuia. Sa tatou lagonaina le tele naua o le Agaga o le Alii i nei aso e lua, a o tuia o tatou loto ma faamalolosia a tatou molimau i lenei galuega paia. E momoli atu le faafetai ia i latou taitoatasi sa saunoa, e faapea foi Uso na fofogaina tatalo.

Ua tatou i ai uma iinei aua tatou te alolofa i le Alii ma mananao e auauna atu ia te Ia. Ou te molimau atu e silafia e lo tatou Tama Faalelagi i tatou. Ou te tautino atu e i ai Lona aao i mea uma.

Ou te toe faapea atu, sa matagofie musika, ma e momoli atu ai la'u faafetai patino ma le Ekalesia atoa ia i latou ua naunau e faaso mai ia i tatou a latou taleni i lea itu.

E momoli atu le faafetai loloto i na Uso ua faamalolo mai i lenei konafesi. Sa latou tautua ma le faamaoni ma le lelei, ma sa tele lo latou sao i le galuega a le Alii.

E momoli atu la'u faafetai tele i o'u fesoasoani faamaoni ma le tuuto, ma faafetai atu faalauaite ia i la'ua mo le lagolago ma le fesoasoani la te tuuina mai ia te au. O i la'ua moni o ni tamalii o le tofa loloto ma le malamalama, ma e taua tele la la'ua tautua.

Ou te faafetai atu i o'u uso o le Korama a le Toasefululua mo la latou

auaunaga faifai pea i le galuega a le Alii. E faapena foi ona ou momoli atu la'u faafetai i uso o Korama a Fitugafulu ma le Au Epikopo Pulefaamalumu ma le latou auaunaga mataalia ma le le manatu faapito. E faapena foi ona momoli atu la'u faafetai mo alii ma tamaitai o loo galulue o ni taitai aao o ausilali.

Uso e ma tuafafine, ou te faamautinoa atu ia te outou o loo silafia e lo tatou Tama Faalelagi luitau o loo tatou feagai i le lalolagi i le taimi nei. E alofa o Ia ia i tatou taitoatasi, ma o le a faamanuiaina i tatou a o tatou taumafai e tausi Ana poloaiga ma

sailia o Ia e ala i le tatalo.

Ua matua faamanuiaina i tatou i le i ai o le talalelei toefuataina a Iesu Keriso. E maua ai tali i fesili pe o fea na tatou o mai ai, pe aisea ua tatou i ai iinei, ma pe o fea o le a tatou o i ai pe a tatou tuua lenei olaga. E aumaia ai le uiga ma le pogai ma le faamoemoega i o tatou olaga.

Ou te faafetai atu mo le auaunaga o loo outou matua naunau e tuuina atu i le tasi ma le isi. O i tatou o aao o le Atua i le lalolagi lenei, faatasi ai ma se poloaiga ia alolofa ma auauna atu i Ana fanau.

Ou te faafetai atu mo mea uma o loo outou faia i a outou uarota ma a outou paranesi. E momoli atu la'u faafetai i lo outou naunautai e auauna atu i tofiga ua valaauina outou i ai, po o a lava na tofiga. E taua uma i le faalauteleina o le galuega a le Alii.

Ua maea nei le konafesi. A tatou toe taliu atu i o tatou aiga, ia tatou foi atu ma le saogalemu. Talosia ia tatou maua atu o lelei mea uma i le taimi na tatou toesea mai ai. Ia mafutaina i tatou e le Agaga sa tatou lagonaina iinei ma tumau ai a o tatou faia mea tatou te nopia'i ai i aso taitasi. Ia tatou



faaalua le agalelei faateleina o le tasi i le isi. Talosia ia maua mai i tatou o faia le galuega a le Alii.

Ia i ai faamanuiaga a le lagi ia te outou. Ia faatumulia o outou aiga i le filemu ma le alofa. Ia outou fafagaina pea lava pea a outou molimau, ina ia avea ai ma o outou puipuiga mai le fili.

I le avea ai o sa outou auauna faatauvaa, ou te naunau ma lo'u loto atoa e faia le finagalo o le Atua ma auauna atu ia te Ia ma auauna atu foi ia te outou.

Ou te alofa ia te outou; ou te tatalo mo outou. Ou te toe talosaga atu foi, ia outou manatuaina a'u ma le Au Pulega Aoa o uma i a outou tatalo. E tasi lava i matou ma outou i le uunaia i luma o lenei galuega ofoofogia. Ou te molimau atu o loo tatou i ai faatasi uma i lenei galuega, ma e tofu alii uma, tamaitai, ma tamaiti ma se vaega e faatino. Ia aumaia e le Atua ia i tatou le malosi ma le tomai ma le naunautai e faatino lelei ai la tatou vaega.

Ou te molimau atu ia te outou e moni lenei galuega, o loo soifua lo tatou Faaola, ma Na te taialaina ma faatonutonu Lana Ekalesia i lenei lalolagi. Ou te tuuina atu la'u molimau ma la'u tautinoga o loo soifua le Atua lo tatou Tama Faavavau ma e alofa ia i tatou. O Ia moni lava o lo tatou Tama, e tino mai o Ia ma e moni lava. Talosia ia tatou iloaina ma malamalama i le latalata tele mai ua Ia naunau ai e afio mai, o le mamao o loo naunau o Ia e fesoasoani mai ai ia i tatou, o le tele o Lona alofa ia i tatou, ma le tele o mea Na te faia ma naunau e faia mo i tatou.

Ia faamanuia outou e Ia. Ia ia te outou i le aso ma aso uma le filemu na Ia folafola mai.

Ou te faatofa atu ia te outou seia tatou toe feiloai i le isi ono masina, ma ou te faia ai i le suafa o Iesu Keriso, lo tatou Faaola ma le Togiola, amene. ■



**Saunia e Julie B. Beck**  
Peresitene Aoa o le Aualofa

# O Le Mea Ou Te Faamoemoe o le a Malamalama ai Fanau Teine (ma Fanau Tama) a La'u Fanau e uiga i le Aualofa

*Mai lava i le aso na amata ai ona toefuatai mai le talalelei i lenei tisipenisione, o manaomia e le Alii ni tamaitai faamaoni e avea ma Ona soo.*

O se avanoa e le faatusalia le lauga atu ia te outou i lenei sauniga faasolopito. O se faamanuiaga lo tatou mafuta ai. I le avea ai o a'u ma peresitene aoa o le Aualofa, ua ou atiina ae ai se alofa loloto mo uso o le Aualofa o lenei Ekalesia, ma ua faalauteleina e le Alii la'u vaaiga mamao i Ona lagona e uiga ia i tatou ma le mea ua Ia faamoemoe i ai mo i tatou.

Ua ou faaulutalaina lenei savali "O Le Mea Ou Te Faamoemoe o le a Malamalama ai Fanau Teine (ma Fanau Tama) a La'u Fanau e uiga i le

Aualofa." O loo pisi fanau teine matutua a la'u fanau e galulue i le Alualu i Luma o le Tagata Lava Ia, ma le atiina ae o masani ma uiga faaletamaitai amiotonu. E le o toe mamao ona latou tauaveina lea ma a latou uo le tiute-tauave o lenei tulaga faatamaitai i le lalolagi atoa.

Ou te faamoemoe o mea o le a ou fai atu ai i lenei savali, o le a maua ai e i latou e faalogo i ai pe faitau i ai se malamalama manino i mea ua finagalo ai le Alii mo Ona afafine ina ua faatulagaina le Aualofa.



### O Se Mamanu Faanamua o le Avea ai ma Soo

Ou te faamoemoe o le a malamalama fanau teine a la'u fanau, o le Aualofa i le asō na faatulagaina i se mamanu o le avea ma soo, na i ai lava i le Ekalesia anamua. Ina ua faatulagaina e le Faola Lana Ekalesia i taimi o le Feagaiga Fou, “o fafine o ni tagata taua ia sa auai i le faatinoga o [Lana] galuega.”<sup>1</sup> Sa asiasi o Ia ia Mareta ma Maria, o nisi e toalua o Ona soo e sili ona naunautai, i le fale o Mareta. A o faalogologo atu Mareta ia te Ia ma auuina atu ia te Ia e tusa ai ma agaifanua o o latou taimi, sa fesoasoani atu o Ia ia iloa e tele atu isi mea e mafai ona ia faia nai lo lena. Sa fesoasoani o Ia ia Mareta ma Maria ia malamalama e mafai ona la filifili “lea mea lelei,” e le aveeseina ia te i laua.<sup>2</sup> O lena faamatalaga agavaivai ua avea o se valaaulia e faatino le galuega a le Alii. Ma i se taimi mulimuli ane i le Feagaiga Fou, o le molimau malosia a Mareta i le paia o le Faola tatou te maua ai sina malamalamaaga i lona faatuatua ma lona tulaga o se soo.<sup>3</sup>

A tatou faitau atili i le Feagaiga Fou, tatou te aoao ai sa faaauau e Apose-tolo ona faatuina le Ekalesia a le Alii. Tatou te aoao ai foi e uiga i tamaitai faamaoni, o lo latou avea ai ma soo ua saofagā i le faatupulaia o le Ekalesia. Sa tautala Paulo e uiga i soo tamaitai i nofoaga e pei o Efeso<sup>4</sup> ma Filipi.<sup>5</sup>

Peitai, ina ua leai se Ekalesia ona o le liliuese, sa faapena foi ona leai ai ma lena mamanu o le avea ai ma soo.

Ina ua amata ona toefuatai mai e le Alii Lana Ekalesia e ala mai i le Perofeta o Iosefa Samita, sa Ia toe faaafitia ai foi tamaitai i se mamanu o le avea ai ma soo. I ni nai masina talu ona faatulagaina aloaia le Ekalesia, sa faaali mai e le Alii e tatau ona vaetofiaina Ema Samita e avea o se taitai ma se faiaoga i le Ekalesia ma se fesoasoani aloaia i lana tane, le Perofeta.<sup>6</sup> I lona valaauga e fesoasoani i le Alii i le fausiaina o Lona malo, sa tuuina atu ia te ia faatonuga i le auala e faateleina ai lona faatuatua ma lana amiotonu patino, le auala e faamalosi ai lona aiga ma lona auuiga, ma le ala e auuina ai i isi.

Ou te faamoemoe o le a malamalama fanau teine a la'u fanau e mai lava i lena aso na amata ai ona toefuatai mai le talalelei i lena tisipenisi-one, o manaomia e le Alii ni tamaitai faamaoni e avea ma Ona soo.

Na o se tasi o faaitaiga o la latou sao tulaga ese sa i ai i le galuega faafaifeautalā. O le faatupulaia tele o le Ekalesia anamua na mafai ona o alii faatuatua sa naunautai e tuua o latou aiga ae malaga i nofoaga e le mailoa, ma mafatia ai i le tuatoatasi ma faigata ina ia aoao atu le talalelei. Peitai, sa malamalama nei alii semanu e le mafai ona taunuu a latou misi-ona e aunoa ma le faatuatua ma le

mafutaga faapaaga a tamaitai i o latou olaga, o e sa tausia o latou aiga ma pisinisi ma sailia tupe mo o latou aiga ma faifeautalā. O tamaitai foi sa tausia ma vaaia le fiaafe o tagata liliu mai sa faapotopoto i o latou nuu. Sa latou matua tautino atu i se ituaiga olaga fou, ma fesoasoani i le fausiaina o le malo o le Alii ma auai i Lana galuega o le faaolataga.

### Fesootai ma le Perisitua

Ou te faamoemoe o le a malamalama le fanau teine a la'u fanau sa musuia e le Alii le Perofeta o Iosefa Samita e faatulagaina ia tamaitai o le Ekalesia “e ala i le perisitua ma le mamanu o le perisitua”<sup>7</sup> ma aoao i latou i le “ala [latou te] maua ai avanoa, faamanuiaga ma meaalofo o le Perisitua.”<sup>8</sup>

Ina ua faatulagaina aloaia le Aualofa, sa faaauau e Ema Samita lona valaauga o se taitai. Sa avea o ia ma peresitene o le faalapotopotoga, ma fesoasoani e toalua e galulue faatasi ma ia i le au peresitene. Nai lo le filifilia i se palota faalauiloa e pei ona sa masani ai i faalapotopotoga i fafo atu o le Ekalesia, sa tofia lena au peresitene e ala i se faaaliga, ma sa lagolagoina e i latou o le a latou taitaia, ma vaetofiaina e taitai perisitua e galulue ai i o latou valaauga, o le mea lea na “valaauina se tagata e le Atua, e ala i le valoaga, ma le faaeega o lima o ē o i ai le pule.”<sup>9</sup> O le faatulagaina ai i lalo o le perisitua ua mafai ai e le au peresitene ona maua le taitaiga mai le Alii ma Lana perofeta mo se galuega patino. O le faalapotopotoga a le Aualofa ua mafai ai ona maua le faleteuolaga a le Alii mo taleni, taimi, ma punaoa e faafaeina i le potu ma le faatulagaina lelei.

Na malamalama lena uluai vaega o tamaitai sa tuuina atu ia i latou le pule e aoao atu ai, musuia, ma faatulagaina



tamaitai e avea ma soo e fesoasoani ai i le galuega a le Alii mo le faaolataga. I la latou uluai fonotaga na aoaoina ai tamaitai i faamoemoega taiala o le Aualofa—e faateleina le faatuatua ma le amiotonu patino, faamalolosa aiga, saili ma fesoasoani i ē le tagolima.

Ou te faamoemoe o le a mala-malama fanau teine a la’u fanau o le Aualofa o se vaega taua o le sauniaina o le Au Paia mo avanoa, faamanuiaga, ma meaalofa ia e na o le malumalu e maua ai. Sa aoao mai e Peresitene Iosefa Filitia Samita o le Aualofa “o se vaega taua i le malo o le Atua i le fogaeleele” ma “ua mamanuina ma faagaioia ia fesoasoani ai i ona sui auai faatuatua ia maua le ola faavavau i le malo o lo tatou Tama.”<sup>10</sup> E mafai ona tatou vaai faalemafaufau i le tulaga na i ai tamaitai i le Faleoloa Piliki Lanumumu o Iosefa Samita i na uluai fonotaga a le Aualofa, e faasasaga atu i le maupuepue sa fausia ai se malumalu e pei ona sa aoaoina ai i latou e le Perofeta “e tatau ona i ai se sosaiete maoae, e ese mai mea leaga uma o le lalolagi, filifiliga, ola mama, ma paia.”<sup>11</sup>

Ou te faamoemoe e faatauaina e fanau teine a la’u fanau le malumalu e pei ona faia e uluai uso o le Aualofa, o e sa talitonu o faamanuiaga o le malumalu o le togi ofoofogia lea ma sini maoae a tamaitai uma o le Au Paia o Aso e Gata Ai. Ou te faamoemoe, e faapei foi o uluai uso o le Aualofa, o le a taumafai fanau teine a la’u fanau ia lava lo latou matutua e osia ai ma tausia feagaiga paia o le malumalu, ma a oo ina latou o i le malumalu, o le a gauai atu i mea uma o le a tautalagia ma faia. O faamanuiaga o le malumalu o le a faaauppegaina ai i latou i le mana<sup>12</sup> ma faamanuiaina ai e maua “le ki o le malamalama o le Atua.”<sup>13</sup> O sauniga o le perisitua ia e na o malumalu e maua ai, o le a faamanuiaina ai



i latou e faataunuu o latou tiutetauave paia, e faavavau, ma o le a latou folafola atu e ola o ni soo ua tautino atu. Ou te faafetai ona o se tasi o faamoemoega taua o le Alii i le faatulagaina o le Aualofa, o le tuuina atu lea i tamaitai o le tiutetauave e fesoasoani ai le tasi i le isi e saunia “mo faamanuiaga e sili atu o le perisitua o loo maua i sauniga ma feagaiga o le malumalu.”<sup>14</sup>

### **O Le Sulufaiga ma le Uunaiga o se Usoga Faatamaitai i le Lalolagi Atoa**

Ou te faamoemoe o le a mala-malama fanau teine a la’u fanau i le uunaiga taua ma le mana o le usoga faatamaitai maoae o le Aualofa. Talu mai le 1842 ua salalau atu le Ekalesia i talaatu o Navu, ma ua i ai nei le Aualofa i le silia ma le 175 atunuu, lea e silia ma le 80 gagana e tautatala ai tamaitai. O vaiaso uma lava e faatulagaina ai uarota ma paranesi fou, ma avea ai foi Aualofa fou o se faaopoopoga tele o le tulaga faatamaitai “ua fofola i konetineta.”<sup>15</sup> Ina o matua laititi lava le Aualofa ma sa na o Iuta lava na faatulagaina ai, sa mafai e ona taitai ona taulai tele atu la latou faalapotopotoga ma le avea ai ma soo, i polokalama faaagafesootai i le lotofale ma galuega fesootai mo toomaga. Sa latou atiina ae mea e gaosi i le fale ma faatinoina galuega fesoasoani e

fausia ai falemai ma faaputu saito. O na uluai taumafaiga a le Aualofa sa fesoasoani e faatuina ai mamanu o le avea ai ma soo, ia ua faaaogaina nei i le lalolagi atoa. Ina ua tupu ma ola le Ekalesia, ua mafai nei e le Aualofa ona faataunuu ona faamoemoega i uarota ma paranesi taitasi, i siteki ma itu taitasi, a o fetuutuunai i se lalolagi ua matua tele suiga.

O aso uma, e feagai ai uso o le Aualofa i le lalolagi atoa ma luitau ma aafiaga eseese o le olaga. Ua feagai tamaitai ma o latou aiga i le taimi nei ma faamoemoega ua le faataunuaina; o ma’i faalemafaufau, faaletino, ma le faaleagaga; o faalavelave faafuasei; ma le oti. O nisi uso e feagai ma le tuulafoaiina ma le le fiafia ona e leai ni o latou lava aiga, a o isi e mafatia i tau-nuuga o filifiliga lē lelei e faia e tagata o aiga. O nisi sa feagai ma taua po o le matelaina po o mala faalenatura, a o isi o loo aoao e uiga i le tiga o mea ua fai ma vaisu, leai o se galuega, po o le le lava o le a’otauina ma aoaoga faamasani. O nei faigata uma e mafai ona olopalaina ai le faatuatua ma faaumatia le malosia o tagata ma aiga. O se tasi o faamoemoega o le Alii na faatulagaina ai tamaitai ia avea ma soo, o le saunia lea o le toomaga e mafai ona siitia i latou i luga a’e o “mea uma e faalavelave ai le olioli ma le alualu



i luma o tamaitai.”<sup>16</sup> I uarota ma paranesi taitasi, e i ai lava se Aualofa e i ai ni tamaitai e mafai ona sailia ma maua faaaliga ma talanoa ma taitai perisitua e fefaamalosia’i le tasi ma le isi ma galulue i tali e talafeauga ma o latou lava aiga ma nuu.

Ou te faamoemoe o le a malamalama fanau teine a la’u fanau e mafai ona faalauteleina lo latou avea ai ma soo i le Aualofa, ma e mafai ai foi ona latou galulue faatasi ma isi i galuega ofoofogia ma le toa sa faia e le Faaola. O le ituaiga o galuega ua talosagaina uso o lenei Ekalesia e faia i o tatou taimi, e le faatauvaa pe tautuauegaina lava i le Alii. O lo latou faamaoni, e mafai ai ona latou lagonaina Lana faamaoniga ma faamanuiaina ai i le mafutaga a Lona agaga.

E tatau foi ona iloa e fanau teine a la’u fanau e mafai e le usoga a le Aualofa ona tuuina atu se nofoaga o le saogalemu, sulufaiga, ma le puipufiga.<sup>17</sup> E ui ina faigata tele o tatou taimi, ae o le a fesoasoani uso faatuatua o le Aualofa e tutu faatasi e puipuia aiga o Siona mai leo faatosina o le lalolagi ma uunaiga faataumaoui ma taufaasooso o le tiapolo. O le Aualofa foi, o le a aoaoina ai ma faamalolosia i latou ma e mafai e uunaiga a tamaitai

amiotonu ona faamanuiaina isi e toatele o fanau a lo tatou Tama.

### **O Le Vaavaaiga ma le Auaunaga i le Avea ai ma Soo**


Ou te faamoemoe o le a malamalama fanau teine a la’u fanau o faiaoga asiati o se faailoga o lo latou avea ai ma soo, ma o se auala matagofie e faamamaluina ai a latou feagaiga. O lenei elemene o lo tatou avea ai ma soo, e tatau ona atagia manino ai le galuega a lo tatou Faaola. I le popofou o le Aualofa, sa i ai se komiti asiati mai uarota taitasi sa tuuina atu i ai se tofiga e iloilo manaoga ma ao mai foai e faasoaso mo i latou sa manaomia le fesoasoani. I le gasologa o tausaga, sa aoaoina ai e uso o le Aualofa se la’a se tasi i le taimi ma faaleleia atili ai i lo latou gafataulimaina lea ona vaavaaia o isi. E i ai taimi sa tele ina taulai atu ai tamaitai i le faamae’aina o asiatisa, aoaoina atu o lesonea, ma tuua ni pepa ua tusia ai ni savali pe a afea fale o uso o le Aualofa ae le o i ai. Sa fesoasoani nei faiga i uso e aoao ai mamanu o le vaavaaiga. E faapei foi o tagata i le taimi o Mose, sa matele i le tausia o lisi uumi o tulafono, e i ai foi taimi na uunaia ai e uso o le Aualofa le tele o tulafono tusitusia ma tulafono

e le tusitusia i o latou lava luga, ona o lo latou naunau ia malamalama pe faapefea ona faamalosi e le tasi le isi.

Ona o le manaomia tele o le toomaga ma le laveai i olaga o uso ma o latou aiga i le taimi nei, ua manaomia ai i tatou e lo tatou Tama Faalelagi ina ia mulimuli i se ala e maualuga atu ma faatino lo tatou avea ai ma soo e ala i le tausia ma le faamaoni o Ana fanau. Faatasi ai ma lenei faamoemoe tatau i le mafaufau, ua aoaoina nei taitai e talosagaina ni lipoti e uiga i le soifua manuia faaleagaga ma le faaletino o uso ma o latou aiga ma le auaunaga o loo tuuina atu.<sup>18</sup> Ua i ai nei i faiaoga asiati le tiutetauave e “faamaoni lo latou iloa ma le alolofa i tuafafine taitasi, e fesoasoani ia te ia e faamalosisia lona faatuatua, ma tuuina atu i ai le auaunaga.”<sup>19</sup>

I le avea ai ma soo naunautai o le Faaola, ua faaleleia atili ai lo tatou tomaki i le faia o mea semanu Na te faia pe ana o i ai o Ia iinei. Ua tatou iloa e tatau ia te Ia la tatou tausiga, ma o lea ua tatou taumafai ai e punoua’i i le tausiga o o tatou uso ae le o le faamae’aina o lisi o mea e fai. O le auaunaga moni e tele ina fuaina i le loloto o lo tatou alofa mama, ae le o le faaatoatoaina o a tatou fuainumera.

### **Itu, Pasila**



O le a tatou iloa ua manuia la tatou auaunaga o ni faiaoga asiasi pe a mafai ona faapea mai o tatou uso, “Ua fesoasoani lo’u faiaoga asiasi ua ou tuputupu a’e ai faaleagaga” ma “Ua ou iloa e amanaia tele a’u ma lo’u aiga e lo’u faiaoga asiasi” ma le “Afai e i ai ni o’u faafitauli, ou te iloa o le a gaioi lo’u faiaoga asiasi e aunoa ma le faatalitali se’i fai atu i ai.” O taitai ua malamalama i le taua o le auauna atu i isi, o le a fefautuagai faatasi e sailia ma maua faaaliga i le auala e faagaetia ai faiaoga asiasi ma le auala e faatula-gaina ai ma faatino la latou auaunaga musuia.

E le gata i lea, o faiaoga asiasi o se faalauteleaga o le tiutetauave o epikopo e tausia le lafu a le Alii. E manaomia e le epikopo ma le peresitene o le Aualofa le auaunaga a faiaoga asiasi musuia i le faataunuuna o o latou tiutetauave. O le auaunaga a faiaoga asiasi, o le a mafai ai e se peresitene o le Aualofa ona iloa le soifua manuia o uso taitoatasi i le uarota ma lipoti atu pe a talanoa ma lona epikopo.

Ua aoaoina i tatou e Peresitene Thomas S. Monson e faapea “pe a tatou taumafai ma le faatuatua, e leai se mea e taofia ai le faatinoina o tiute ua tofia i ai i tatou, pe a tatou saili atu i musumusuga a le Silisiliese i le faatinoina o o tatou tiutetauave, e mafai ona tatou ausia taunuuga faava-vega.”<sup>20</sup> Ou te faamoemoe o le a auai le fanau teine a la’u fanau i le faatinoina o vavega a’o latou fesoasoani atu i faiaoga asiasi ia avea o se mamanu o le avea ai ma soo, ma o le a silafia e le Alii pe a toe afio mai o Ia.

#### Faataunuuna o le Faamoemoega o le Aualofa

O nei aoaoga ma isi aoaoga taua e uiga i le Aualofa, ua maua nei mo le fanau teine a la’u fanau e suesue ai i le tusi *O Afafine i Lo’u Malo: O*



*Le Talafaasolopito ma le Galuega a le Aualofa.* O loo i ai i lenei tusi se faamaumauga o le talatuu o le Aualofa ma tamaitai o lenei Ekalesia. O le a tuufaatasia ai ma soofaatasi se usoga a tamaitai i faamoemoega o le Aualofa ma mamanu ma avanoa paia o soo. O se molimau o le matafaioi taua a tamaitai i le fuafuaga o le fiafia a lo tatou Tama, ma o loo i ai se tagavai mausali o mea ua tatou talitonu i ai, o mea tatou te faia, ma mea o le a tatou puipuia. Ua fautuaina i tatou e le Au Peresitene Sili ina “ia suesue i lenei tusi ma ia tuu atu i ona upumoni faavavau ma faataitaiga musuia e uunaia ai o [tatou] olaga.”<sup>21</sup>

I le iloa ai o le faalapotopotoga a le Aualofa sa amataina faalelagi, o lea na ta’u atu ai e Peresitene Iosefa F. Samita i uso o le Aualofa: “E mo outou e taitaia le lalolagi aemaise lava ia taiulu i tamaitai o le lalolagi. . . . O outou o le ulu,” na ia saunoa ai, “ae le o le si’usi’u.”<sup>22</sup> A oo ina avea le Aualofa o se auala i o latou olaga, o le a latou auauna atu ma le lotogatasi ma isi e faataunuu ona faamoemoega paia. E i ai sa’u molimau o le Ekalesia toefuataiina moni a Iesu Keriso, ma ou te faafetai mo le mamanu o le avea ai ma soo lea na toefuataiina mai ina ua

musuia e le Alii ia le Perofeta o Iosefa Samita e faatulaga le Aualofa. I le suafa o Iesu Keriso, amene. ■

#### FAAMATALAGA

1. *O Afafine i Lo’u Malo: O Le Talafaasolopito ma le Galuega a le Aualofa* (2011), 3.
2. Tagai Luka 10:38–42.
3. Tagai Ioane 11:20–27.
4. Tagai Galuega 18:24–26; Roma 16:3–5.
5. Tagai i le Filipi 4:1–4.
6. Tagai Mataupu Faavae ma Feagaiga 25.
7. Iosefa Samita, i le *O Afafine i Lo’u Malo*, 12.
8. Iosefa Samita, i le *History of the Church*, 4:567–68.
9. Mataupu Faavae o le Faatuatua 1:5.
10. Iosefa Filitia Samita, i le *O Afafine i Lo’u Malo*, 105.
11. Iosefa Samita, i le *O Afafine i Lo’u Malo*, 16.
12. Tagai Mataupu Faavae ma Feagaiga 109:22; tagai foi Sheri L. Dew, i le *O Afafine i Lo’u Malo*, 138.
13. Mataupu Faavae ma Feagaiga 84:19; Tagai foi Ezra Taft Benson, i le *O Afafine i Lo’u Malo*, 129.
14. *O Afafine i Lo’u Malo*, 142.
15. Boyd K. Packer, i le *O Afafine i Lo’u Malo*, 107.
16. John A. Widtsoe, i le *O Afafine i Lo’u Malo*, 26.
17. Tagai *O Afafine i Lo’u Malo*, 86–87.
18. Tagai *Tusitaulima 2: Taitaiina o le Ekalesia* (2010), 9.5.4.
19. *Tusitaulima 2*, 9.5.1.
20. Thomas S. Monson, i le *Afafine i Lo’u Malo*, 99.
21. Au Peresitene Sili, i le *O Afafine i Lo’u Malo*, ix.
22. Iosefa F. Samita, i le *O Afafine i Lo’u Malo*, 72.



**Saunia e Silvia H. Allred**

Fesoasoani Muamua i le Au Peresitene Aoa o le Aualofa

# E Le Uma le Alofa

*Talosagaina se naunautaiga e faatumulia i le meaalofo o le alofa, le alofa mama o Keriso.*

**S**a ma asiasi atu talu ai nei ma lo'u toalua i le aai o Navu, Ilinoi. A o ma i ai iina, sa ma nofonofo i le potu i luga o le Faleoloa Piliki Lanumumu, i le mea sa i ai le ofisa ma le pisinisi a le Perofeta o Iosefa Samita. Sa ma faalogologo toto'a i le tamaitai taiala sa ootoina mai ni nai mea o le talafaasolopito o le Toefuataiga na tutupu ai iina.

Sa liliu atu o'u mafaufauga i le faavaeina o le Aualofa ma nisi o ao-aoga na maua mai e uso o le Aualofa mai le Perofeta i lene lava potu. O na aoaoga na avea ma mataupu faavae sa faavae ai le Aualofa. O faamoemoega o le faateleina o le faatuatua, faamalolosa o aiga o Siona, ma le sailia ma fesoasoani ia i latou e manaomia le fesoasoani, sa faavaeina lava mai le amataga. Na ogatusa lava ma aoaoga a o tatou perofeta.

I se tasi o na uluai fonotaga, sa sii mai ai e le Perofeta le tusi a Paulo i Korinito. I lana lauga mamana e uiga i le alofa, na ta'ua ai e Paulo le faatuatua, faamoemoe, ma le alofa, ae faai ai i le "ae o le sili o na mea uma o le alofa lea."<sup>1</sup>

Na ia faamatalaina uiga auuumama e aofia ai i le alofa. Fai mai a ia:

"E onosai le alofa, e agamalu, e le losilosilo le alofa, e le mitamita vale le alofa, e le faafefeteina,

... E le sailia e ia ana lava mea, e le faaitaitagofie e le tuuina atu i nisi le leaga;

"E le fiafia i le amio leaga, a e fiafia i le faamaoni;

"E ufiufi i mea uma, e talitonu i mea uma, e faamoemoe i mea uma, e onosai i mea uma.

"E le uma le alofa."<sup>2</sup>

I sana saunoaga i tamaitai, na saunoa atu ai le Perofeta o Iosefa faapea: "Aua nei faaitiitia la outou vaai e tusa ai ma uiga lelei o outou tuaoi. . . . E tatau ona outou faateleina o outou agaga o le alofa i isi, pe afai [o le a] outou faia faapei o Iesu. . . . A o faateleina lo outou lotomama ma le amio-atua, a o faateleina lo outou lelei, ia faateleina lo outou alolofa atu i isi—e ao ina outou lava faapalepale ma onosai i faaletonu ma sese o tagata. E taua tele agaga o tagata!"<sup>3</sup>

O le tautinoga a le mau "E le uma le alofa" ua avea ma mautauave a le Aualofa aua o loo opomau ai nei aoaoga ma le poloaiga na tuuina atu e le Perofeta o Iosefa Samita i uso o le Aualofa ina ia "faamama avega ai i e matitiva" ma ia "faaolaina ai agaga."<sup>4</sup>

O nei mataupu ua fai ma faavae ua opomauina e uso o le Aualofa i le lalolagi atoa, aua o le natura lea o le galuega a le Aualofa.

O le a le uiga o le alofa? E faapefea

ona tatou maua le alofa?

Na faamatalaina e le Perofeta o Mamona le alofa "o le alofa le pona lea o Keriso,"<sup>5</sup> ae na aoa mai Paulo o le "alofa . . . o le fusi lea e atoatoa ona lelei ai,"<sup>6</sup> ma sa faamanatu mai e Nifae "ua tuu mai ai e le Alii le Atua se polo-aiga ia i ai i tagata uma le alofa mama, o lea alofa mama o le alofa lea."<sup>7</sup>

I le toe iloiloina o le faamatalaga talu ai a Paulo o le alofa, ua tatou aoa ai o le alofa mama e le o se faatinoga e tasi po o se mea tatou te foai atu, ae o se tulaga e tatau ona i ai, o se tulaga o le loto, o lagona agalelei e faaosofia ai faatinoga alofa.

O loo aoa mai foi Mamona e faaee atu le alofa mama i luga o soo moni o le Alii ma o le alofa mama e faamama-ina ai i latou o i ai le alofa.<sup>8</sup> E le gata i lea, ua tatou aoaoina o le alofa mama o se meaalofo e tatau ona tatou sailia ma tatalo ia maua. E manaomia le i ai o le alofa mama i o tatou loto ina ia tatou maua ai le malo selesitila.<sup>9</sup>

Faatasi ai ma le malamalama ua poloai mai le Alii ia outou "faafofu outou lava i le fusi o le alofa mama,"<sup>10</sup> e tatau ona tatou fesili po o a uiga auuumama e fesoasoani tatou te atiina ae ai le alofa mama.

E tatau ona muamua i ai lo tatou manao e faateleina le alofa mama ma ia avea atili e faapei o Keriso.

O le isi laasaga o le tatalo. Na apoapoi mai Mamona ia i tatou e "tatalo atu i le Tama ma le malosilo atoa o le loto, ina ia faatumulia [i tatou] i lenei alofa." O lenei alofa faaleatua, ma a o faatumulia i tatou i lenei alofa, o le a "avea i tatou e pei lava o Ia."<sup>11</sup>

O le faitauina o tusitusiga paia i aso taitasi, e mafai ona tatou mafaufau ai i le Faaola ma i ai se manao ia avea atili e faapei o Ia.

I lo'u ofisa, sa ou filifili e faatau-tau ai se atavali na tusia e Minerva Teichert ua faaulutalaina *O le Laveaiga*

*o le Tamai Mamoe na Se.* O loo faaalua ai le Faaola o loo tu i Lana lafu mamoe ma sapaia ma le faaeteete se tamai mamoe i Ona aao. E fesoasoani lea ia te au e toe mafaufau ai i Lana talosaga: “Fafaga i a’u mamoe,”<sup>12</sup> ia te a’u o lona uiga ia auuana atu ia i latou uma o loo siomia ai oe ma gauai faapitoa atu ia i latou e manaomia le fesoasoani.

O le Faaola o le faataitaiga atoatoa lea o le auala e faaali atu ai le alofa mama. I le taimi o Lana auunaga i le olaga nei, sa Ia faaalua ai le alofa nau-nau mo e fia aai, mo lē agasala, mo e mafatia, ma e mama’i. Sa auuana atu o Ia i e matitiva ma e mauoa; o tamaitai, o tamaiti, ma alii; o aiga, uo, ma tagata ese. Sa Ia faamagalalo atu ia i latou na molituina o Ia, sa puapuagatia foi o Ia ma maliu mo tagata uma.

I lona soifuaga atoa, sa faatino ai foi e le Perofeta o Iosefa Samita le alofa mama a o ia ofoina atu le alofa faauso ma le faaaloalo i isi. Sa lauiloa o ia i lona agalelei, alofa, tigaalofa, ma le popole mo i latou sa siomia o ia.

O le taimi nei, ua faamanuiaina i tatou i se perofeta o loo faatinoina le alofa mama. O Peresitene Thomas S. Monson o se faataitaiga ia i tatou ma le lalolagi. O loo ia laeiina le ofutalaloa o le alofa mama. E agalelei o ia, e tigaalofa, e limafoai; o se faitaulaga moni a le Alii o Iesu Keriso.

Ua aoao mai e Peresitene Monson:

### **Itu, Pasila**



“O le alofa o le onosai lea i se tasi ua mafua ai ona tatou lē fiafia. O le teena lea o le lagona ia itaitagofie. O le taliaina lea o vaivaiga ma faaletonu. O le taliaina o tagata i o latou tulaga moni o i ai. O le faasēloa o le vaai i luga atu o le vaaiga faaletino, i uiga faaleatua e le mu itiiti i le gasologa o le olaga. O le teena lea o le lagona e tuufaavasega isi.”<sup>13</sup>

A ia i tatou le alofa mama, ua tatou naunau e auuana atu ma fesoasoani i isi pe a faigata, ma e aunoa ma se mafaufau i se tau pe faalauiloa. Tatou te le faatalitali se’i tofia e fesoasoani aua ua ave ma o tatou lava natura. A tatou filifili ia agalelei, lotoalofa, limafoai, onosai, talia gofie, lotofaamagalalo, fetala’i, ma lē manatu faapito, ona tatou iloa lea ua tumu i tatou i le alofa mama.

E saunia e le Aualofa auala e le mafaitaulia e auuana atu ai i isi. O se tasi o auala aupito taua e faatino ai le alofa mama o faiaoga asiasi. E ala atu i faiaoga asiasi mataalia, tatou te maua ai le tele o avanoa e alolofa ai, auuana atu, ma tautuaina isi. O le faaalua o le alofa mama, po o le alofa, e faamama ma faapaia ai o tatou agaga, ma fesoasoani ai ia tatou ave atili ai e faapei o le Faaola.

Ou te maofa lava a o ou moli-mauina galuega e le mafaitaulia o le alofa mama e faatinoina i aso taitasi e faiaoga asiasi i le lalolagi atoa, o ē auuana atu ma le le manatu faapito i manaoga o uso taitoatasi ma o latou aiga. Ou te fai atu i nei faiaoga asiasi faamaoni, o na faatinoga laiti o le alofa mama, ua outou mulimuli ai ma galulue o ni meafaigaluega i Ona aao a o outou fesoasoani atu, tausia, sii a’e, faamafanafana, faalogo atu, faamalolo-siau, faafailele, aoao, ma faamalolo-sia uso i lalo o la outou tausiga. Se’i ou faaso atu lava ni nai faataitaiga pupuu o lena auunaga.

Sa mafatia Rosa i le ma’i suka tuga ma isi ma’i. Sa auai o ia i le Ekalesia i ni nai tausaga ua mavae. O ia o se tina mautoatasi ma sana tama tama talavou. E taofia soo i le falemai mo ni nai aso. E le gata ina ave o ia e ona faiaoga asiasi i le falemai, ae la te asiasi atu foi ia te ia ma faamafanafana ia te ia i le falemai ma la te vaaia foi lana tama i le fale ma le aoga. E ave ona faiaoga asiasi ma ana uo ma ona aiga.

Ina ua mavae ni nai asiasiga i se uso patino, sa iloa e Kathy e le iloa e lenei uso ona faitautusi ae sa manao o ia e aoao. Sa ofo atu Kathy e fesoasoani ia te ia e ui lava sa ia iloa e



manaomia se taimi umi, onosai, ma le faia pea lava pea.

O Emily o se ava talavou sa sailia le upumoni. O lona toalua o Michael, e le fiafia i le lotu. Ina ua ma'i Emiy ma ua taofia i le falemai, sa aveina atu i ai e Cali, o se uso o le Aualofa la te tuaoi, ni meaai mo le aiga, vaavaai le pepe, faamama le fale, ma faia fuafuaga ina ia maua e Emily se faamanu-iaga faaleperisitua. O nei galuega alofa na faamaluluina ai le loto o Michael. Sa tonu ia te ia e alu i sauniga Lotu ma feiloai ai i faifeautalai. Na papatiso talu ai nei Emily ma Michael.

E le uma le alofa. . . . E agalelei . . . le alofa, . . . e le sailia e ia ana lava mea, . . . e onosai i mea uma, e tumau e oo i le iuga.”<sup>14</sup>

Na saunoa Peresitene Henry B. Eyring:

Ua faatumulia le talafaasolopito o le Aualofa i tala o na auaunaga ofoofogia ma le le manatu faapito. . . .

O lenei sosaiete e aofia ai tamaitai o o latou lagona o le alofa e puna a'e mai loto ua suia e ala i le faaagavaaina mo le osia ma le tausiga o feagaiga, ia e na o le Ekalesia moni a le Alii e maua ai. O o latou lagona o le alofa moni e maua mai ia te Ia e ala i Lana Togiola. O a latou aga o le alofa e taialaina i Ana faataitaiga—ma e puna

mai i le lotofaafetai mo Lana meaalofo e le i'u o le alofa mutimutivale—ma le Agaga Paia, lea na Ia auina mai e mafutaina Ana auauna ia latou misi-ona o le alofa. Talu ai lena mea, ua latou faia ma ua mafai ona faia mea e le masani ai, mo isi ma maua ai le olioli tusa lava pe tele foi mea latou te manaomia.”<sup>15</sup>

O le tuuina atu o le auaunaga ma le alofa mama i isi e fesoasoani tatou te faatoilaloina ai o tatou lava faigata ma faafoliga ai e le ogaoga tele.

O le a ou toe foi atu nei i aoaoga a le Perofeta o Iosefa Samita i uso i le popofou o le Toefuataiga. I le uunaia o faatinoga o le alofa mama ma le agalelei na ia saunoa ai: “Afai tou te ola ai i nei mataupu faavae, se tau i ina a tele ma mamalu o lo outou tau i le malo selesitila! Afai tou te ola e tusa ai ma o outou avanoa paia, o le a le mafai ona taofia agelu mai le aveai ai ma a outou paaga.”<sup>16</sup>

E faapei o uluai aso i Navu, sa o ai uso e saili ma fesoasoani atu ia i latou sa manaomia le fesoasoani, e faapena foi i le taimi nei. O uso i le malo o ni poutu sili o le malosi faaleagaga, auaunaga alofa, ma le tuuto. E asiasi atu faiaoga asiasi tuuto ma tausua e le tasi le isi. Latou te mulimuli i faataitaiga a le Faaola ma faia e pei foi ona sa Ia faia.

E mafai ona faatumulia tamaitai uma o le Aualofa i le alofa i le iloaina o a latou galuega iti o le alofa mama e i ai se mana faamalolo mo isi ma mo i latou lava. E oo ina latou iloa ma le mautinoa o le alofa o le alofa mama lea o Keriso ma e le uma lava.

A e faitauina le talafaasolopito o le Aualofa, o le a musuia ai oe ia e iloa o lenei mataupu faavae taua o le talalelei o se autu masani lea o i ai i le tusi atoa.

Ou te faaiu atu i se valaaulia i tamaitai uma o le Ekalesia e talosaga-ina se naunautaiga e faatumulia i le meaalofo o le alofa, le alofa mama o Keriso. Faaaoga uma a outou punaoga e faia ai mea lelei, e aumaia ai le toomaga ma le faaolataga ia i latou o loo siomia ai outou, e aofia ai ma o outou lava aiga. O le a faapaleina ma le manuia e le Alii a outou taumafaiga.

Talosia ia aveai lo tatou iloa i le alofa sili o le Tama ma le Alo mo i tatou, ma lo tatou faatuatua ma le lotofaafetai mo le Togiola, e uunaia ai i tatou e atiina ae ma faatino le alofa mama mo i latou uma o siomia ai i tatou. O la'u tatalo lea i le suafa o Iesu Keriso, amene. ■

#### FAAMATALAGA

1. 1 Korinito 13:13.
2. 1 Korinito 13:4–8.
3. Iosefa Samita, i le *O Afafine i Lo'u Malo: O Le Talafaasolopito ma le Galuega a le Aualofa* (2011), 24.
4. Iosefa Samita, i le *O Afafine i Lo'u Malo*, 17.
5. Moronae 7:47.
6. Kolose 3:14.
7. 2 Nifae 26:30.
8. Tagai Moronae 7:48.
9. Tagai Eteru 12:34; Moronae 10:21.
10. Mataupu Faavae ma Feagaiga 88:125.
11. Moronae 7:48.
12. Tagai Ioane 21:16–17.
13. Thomas S. Monson, “E Le Uma le Alofa,” *Liahona*, Nov. 2010, 124.
14. 1 Korinito 13:4, 5, 7, 8.
15. Henry B. Eyring, “O Le Talatuu Tumau o le Aualofa,” *Liahona*, Nov. 2009, 121.
16. *Aoaoga a Peresitene o le Ekalesia: Iosefa Samita* [2007], 480.



**Saunia e Barbara Thompson**

Fesoasoani Lua i le Au Peresitene Aoao o le Aualofa

## Ia Pipii i Feagaiga

*Afai tatou te faatuatua ia Keriso ma pipii i a tatou feagaiga, o le a tatou mauaina le olioli lea o loo tautala i ai tusitusiga paia ma ua folafola mai e o tatou perofeta o aso e gata ai.*

“**I**a sii a’e i luga lou loto ma olioli, ma pipii i feagaiga ua e faia.”<sup>1</sup> E le mafai ona ou faitauina lenei mau e aunoa ma le lagonaina o le olioli. E olioli lo’u loto pe a ou mafaufau i folafolaga ma faamanuiaga e tele ia ua avea o se vaega o lo’u olaga a o ou saili e pipii i feagaiga sa ou faia ma le Tama Faalelagi.

Talu ai ua maliliu uma o’u matua, ua tatau ai i lenei tausaga ona faamama lo la’ua fale ma sauniuni ai mo le faatauina atu. I nai masina na mavae atu nei, a o matou faamamaina ma nai o’u tei ma faavasega mea o le fale o’u matua, sa matou mauaina ai ni talaaga faaleaiga ma le tele o pepa ma tusiga taua. O se mea matagofie le faitau i talaaga patino ma faamanuiaga faapeteriaka o o’u matua ma matua matutua. Sa faamanatu mai ai ia te ua ia feagaiga sa ou faia ma tausia.

O le tina o lo’u tina o Ellen Hanks Rymer o se tina talavou i le 1912 i le taimi na maua ai lona faamanuiaga faapeteriaka. Ina ua ou faitauina lona faamanuiaga, o laina nei na uunaia ai a’u ma sa pipiimau i lo’u mafaufau: “Na filifilia oe a o lei faavaeina le lalolagi, ma o se agaga filifilia e fanau mai i lenei taimi. . . . O le a faalau-teleina lau molimau ma o le a mafai ona e molimau atu. . . . Ua saili le

faoosala e faaumatia oe, ae afai o le a e pipiimau i le Atua, o le a le ia te ia [le faoosala] se mana e faatamaia ai oe. O le a i ai ia te oe e ala i lou faamaoni le mana sili ma o le a sola ese le faoosala mai ou luma ona o lou amiotonu. . . . A oo atu ia te oe le itula o le fefe ma tofotofoga, afai o le a e mapu ane i lou afeafe faalilolilo i le tatalo, o le a faamafanafanaina lou loto ma aveeseina mea faasoesa.”<sup>2</sup>

Na folafola atu i lo’u tinamatua afai o le a ia tausia ana feagaiga ma tumau i le Atua, o le a le mafai e Satani ona i ai sona mana e pulea ai o ia. O le a ia maua le mafanafana ma le fesoasoani i ona tofotofoga. Sa faataunuuna nei folafolaga i lona olaga.

O le aso ou te fia talanoa atu e uiga i le (1) taua o le pipii i feagaiga ma (2) le olioli ma le puipuiga e maua mai i le tausiga o feagaiga.

O le a ou faaogaina ni nai faataitaiga mai le *O Afafine i Lo’u Malo: O Le Talafaasolopito o le Galuega a le Aualofa*. Ua faatumulia lea tusi i faataitaiga o tamaitai na mauaina le olioli sili i le tausiga o feagaiga.

### **O Le Taua o le Pipii i Feagaiga**

“O loo ta’u mai i le Lomifefiloi o le Tusi Paia e faapea, o le feagaiga o se konekarate e faia i le va o le Atua

ma le tagata. “O le Atua lava i lona finagalo ma e tusa ai ma lona agalelei, na faatuina tuutuuga, lea na talia e le tagata. . . . Ua faatulagaina le talalelei ina ia maua ai mataupu faavae ma sauniga e ala i feagaiga ma tuu ai lē na te taliaina i se matafaioi malosi ma se tiutetauave e faamamaluina ai le tau-tinoga.”<sup>3</sup> I le fuaitau “pipii i feagaiga,” o le upu *pipii* o lona uiga “ia taofimau ma le mausali” i se mea.<sup>4</sup>

Ua tatou iloa mai tusitusiga paia ia alii ma tamaitai sa osifeagaiga ma le Atua. Na tuuina atu e le Atua ia faatonuga i mea e faia ina ia faamamalu ai na feagaiga, ma ina ua tausia na feagaiga, sa mulimuli mai ai ma faamanuiaga na folafolaina.

Mo se faataitaiga, e ala i le sauniga o le papatisoga, tatou te faia ai se feagaiga ma lo tatou Tama Faalelagi. Tatou te saunia i tatou lava mo le papatisoga e ala i le faatuatua i le Alii o Iesu Keriso, salamo i a tatou agasala, ma naunau e tauave i o tatou luga le suafa o Keriso. Tatou te faia se tautinoga e tausia poloaiga a le Atua ma manatua pea lava pea le Faaola. Tatou te osifeagaiga e “tauave avega a le tasi, ina ia mama.” Tatou te faailoa atu ua tatou naunau e faanoanoa faatasi ma faamafanafana atu ia i latou o e manaomia le faamafanafanaga.<sup>5</sup>

I totonu o malumalu paia, e maua ai isi sauniga ma faia ai isi feagaiga. I uluai aso o le Toefuataiga, sa naunau ia le Perofeta o Iosefa Samita mo le Au Paia ina ia mauaina faamanuiaga folafolaina o le malumalu. Na fetalai le Alii, “Ia tuu atu ia fausia lenei fale mo lo’u igoa, ina ia mafai ona Ou faaali atu ai i totonu a’u sauniga i lo’u nuu.”<sup>6</sup>

“O se tasi o faamoemoega o le Alii i le faatulagaina o le Aualofa o le saunia lea o Ona afafine mo faamanuiaga e sili atu o le perisitua, o loo maua i sauniga ma feagaiga o le malumalu. Sa faatalitali ma le naunautai tele ia . . . tuafafine



i Navu ia mae'a le malumalu aua sa latou iloa, e pei ona sa folafola atu e le Perofeta o Iosefa Samita ia Mercy Fielding Thompson, o le faaeega paia o le a aumaia ai i latou 'mai le pogisa i le malamalama ofoofogia.'<sup>7</sup>

"E silia ma le 5,000 le Au Paia na lolofi atu i le Malumalu o Navu ina ua mae'a lona faapaiaga, ina ia mafai ai ona maua o latou faaeega paia ma sauniga o faamauga a o lei tuua mo la latou malaga" i le Vanu o Sate Leki.<sup>8</sup> Na faaalu e Polika Iaga ma le toatele o taitai o le Ekalesia ma le auaifaluga o le malumalu lo latou taimi, i le ao ma le po, e galulue ai i le malumalu ina ia mafai ai ona faatino lenei galuega taua mo le Au Paia.

O a tatou feagaiga e lagolagoina ai i tatou i taimi lelei po o taimi faigata. Na faamanatu mai e Peresitene Boyd K. Packer ia i tatou e faapea "o i tatou o ni tagata o le feagaiga. Ua tatou osifeagaiga e tuu atu a tatou punaoa o taimi ma tupe ma taleni—o mea uma ua tatou maua—i le mea e manao ai le malo o le Atua i le lalolagi. I se faaupuga faigofie, ua tatou osifeagaiga e faia mea lelei. O i tatou o tagata o le

feagaiga, ma o le malumalu o le totonugalemu lea o a tatou feagaiga. O le puna o le feagaiga."<sup>9</sup>

Ua faamanatu mai e le mau, "Ma o le a avea lenei ma a tatou feagaiga—o le a tatou savavali i sauniga uma a le Alii."<sup>10</sup>

E maoae faamanuiaga tatou te maua pe a tatou pipii i a tatou feagaiga.

### **E Maua le Olioli ma le Puipuiga mai le Tausiga o a Tatou Feagaiga**

I le Tusi a Mamona tatou te faitau ai i le lauga a le Tupu o Peniamina. Na ia aoao atu ona tagata e uiga ia Iesu Keriso, o le a afio mai o Ia i le lalolagi ma o le a feagai o ia ma ituaiga o mafatiaga uma. Na ia aoao atu i tagata o le a togilaina e Keriso tagata uma mai a latou agasala, ma o Lona suafa o le a na o le pau lea o le suafa e mafai ona maua ai e le tagata le faaolataga.<sup>11</sup>

Ina ua uma ona faalogologo i nei aoaoga matagofie, sa lotomaulalo tagata ma mananao ma o latou loto atoatoa ia saoloto mai agasala ma ia faamamaina. Sa latou salamo ma

tautino atu lo latou faatuatua ia Iesu Keriso. Sa latou osifeagaiga ma le Atua o le a latou tausia Ana poloaiga.<sup>12</sup>

"Sa afio ifo i o latou luga le Agaga o le Alii, ma faatumuina i latou i le olioli, ina ua latou mauaina se faamagaloga o a latou agasala, ma ina ua latou maua le filemu o le mafaufau, ona o le faatuatua tele ia Iesu Keriso."<sup>13</sup>

O se tasi faaitaiga o le olioli e maua mai i le faamaoni i le tausiga o poloaiga a le Atua ma le faasoia atu o Lana talalelei i isi, o loo faaalua lea e Amona. Sa avea Amona ma ona uso ma meafaigaluega e fesoasoani ai i le fiaafe o tagata ia o mai ia Keriso. O nisi nei o upu na faaoga e Amona e faamatala ai ona lagona ina ua anoa-noai tagata e papatiso ma faia feagaiga ma le Atua:

"Ua tele se pogai tatou te olioli ai."<sup>14</sup>

"Ua atoatoa lo'u olioli, ioe, ua tumu lo'u loto i le olioli, ma o le a ou olioli i lo'u Atua."<sup>15</sup>

"E le mafai ona ou fai atu se vaega itiiti o le mea ua ou lagona."<sup>16</sup>

"E lei i ai lava ni tagata na i ai se pogai tele naua latou te olioli ai e pei o i tatou."<sup>17</sup>

O le faia ma tausia o feagaiga paia e mafai ai e i tatou ona maua le Agaga e mafuta ma i tatou. O le Agaga lena "o le a faatumulia ai lou agaga i le olioli."<sup>18</sup>

O le Taua Lona Lua a le Lalolagi na matua'ia ai le tele o mafatiaga mo le toatele o tagata i le lalolagi atoa. Sa onosaia e le Au Paia i Siamani le tele o faigata. O se peresitene faatuatua o le Aualofa i Stuttgart, Siamani, o Sister Maria Speidel. I lona ta'ua ai o ona faigata, na ia saunoa ai: "O lo matou faatuatua i le Alii ma a matou molimau i lana Ekalesia, sa avea ma poutu o le malosi. . . . Matou te usuina ma le olioli pese o Siona ma tuu atu lo matou faatuatua i le Alii. Na te faaleleia mea uma."<sup>19</sup>



Ou te toe fai atu, a o tausia e tagata o le ekalesia a latou feagaiga, sa latou lagonaina le olioli tusa lava pe fetai ai ma luitau ogaoga.

O Sarah Rich o se tamaitai amiotonu sa nofo i Navu, ma sa tofia e galue i le malumalu a o lei tutuliese a le Au Paia mai le aai. O ana upu nei e uiga i faamanuiaga o feagaiga o le malumalu: “O le tele o faamanuiaga sa matou mauaina i le maota o le Alii, ia sa matou fialia ai ma mafanafana i le lotolotoi o o matou faanoanoaga uma ma sa mafai ai ona matou maua le faatuatua i le Atua, i le iloa ai o le a Ia taialaina i matou ma tausia i matou i le malaga e le mailoa o loo lupe.”<sup>20</sup>

Na faamae’a e le Au Paia anamua le Malumalu o Katelani, ma e toatele sa auai ai i le faapaiaga. Ina ua mae’a le faapaiaga, sa taliaina e le Alii le malumalu. Na ta’u atu e le Alii ia i latou o le a “matua olioli tele i faamanuiaga o le a sasaa atu . . . i luga o ulu o [Lona] nuu.”<sup>21</sup>

Ma o loo tele pea isi malumalu ua fausia i le salafa o le lalolagi, ma ua oo vaaia faamanuiaga ua oo mai i olaga o tagata o le ekalesia. I le 2008, sa ou molimauina ai le olioli i foliga o se ulugalii mai Iukureini a o la faamatala mai e uiga i le o atu i Freiberg, Siamani, ina ia maua o la’ua sauniga o le malumalu. O le malaga i le malumalu e 27-itula e o ai i le pasi ma e faapena foi le toe foi ane mo nei au paia faamaoni, ma sa le mafai ona la malaga soo. Sa matua faagaetia i la’ua aua e le o toe mamao ona mae’a lea o le Malumalu o Kyiv, ona mafai lea ona la o soo i ai. O lea ua tatala nei lena malumalu, ma ua faitau afe i latou ua olioli ai i faamanuiaga iina.

I le faitauina o le talaaga patino o le tina o lo’u tina, sa ou aoaoina ai lona olioli tele i ana feagaiga. Sa fialia o ia e alu i le malumalu ma faatino sauniga mo le fiaafe o i latou



ua maliliu. O lana misiona lea i le olaga. Sa avea o ia o se tagata faigaluga i le malumalu mo le silia ma le 20 tausaga i le Malumalu o Manti Iuta. Sa ia tusia sa ia vaaia le tele o faamalologa faavavega ina ia mafai ai e ia ona tausia lana fanau ma au-auna atu i isi e ala i le faia o o latou galuega i le malumalu. I le avea ai ma fanau a lana fanau, afai e i ai se mea sa matou iloa e uiga ia Tinamatua Rymer, o ia o se tamaitai amiotonu sa tausia ana feagaiga ma sa mana o ia i matou ina ia faia foi faapena. Pe a faavasega e tagata a tatou meatotino pe a tatou oti, faamata o le a latou mauaina ni faamaoniga sa tatou tausia a tatou feagaiga?

Sa ta’u mai e lo tatou perofeta pele, o Peresitene Thomas S. Monson, ia i tatou i le konafesi aoao talu ai: “A tatou o i maota paia o le Atua, a tatou manatua feagaiga tatou te osia i totonu, o le a sili atu ona tatou mafaia ona onosaia tofotofoga uma ma faatolaloina faaososoga taitasi. O totonu o lena maota paia, o le a tatou maua ai le filemu; o le a faafouina ai ma faamalolosia i tatou.”<sup>22</sup>

Ou te toe fai atu, “Ia sii a’e i luga lou loto ma olioli, ma pipii i feagaiga ua e faia.”<sup>23</sup> O le tausia o feagaiga o le olioli moni lea ma le fialia. O le faamafanafanaga lea ma le filemu. O le puipuiga lea mai mealeaga o le lalolagi. O le tausia o a tatou feagaiga o le a fesoasoani ia i tatou i taimi o faigata.

Ou te molimau atu afai tatou te faatuatua ia Keriso ma pipii i a tatou feagaiga, o le a tatou mauaina le olioli lea o loo tautala i ai tusitusiga paia ma ua folafola mai e o tatou perofeta o aso e gata ai.

Uso pele, ou te alofa ia te outou ma e faamoemoe o le a outou mauaina le olioli tele i o outou lava soifuaga. I le suafa o Iesu Keriso, amene. ■

#### FAAMATALAGA

1. Mataupu Faavae ma Feagaiga 25: 13.
2. Faamanuiaga faa-Peteriaka tuuina atu e Walter E. Hanks, Oke. 25, 1912, i le Lyman, Wayne County, Utah.
3. Bible Dictionary, “Covenant.”
4. *Merriam-Webster’s Collegiate Dictionary*, 11th ed. (2003), “cleave.”
5. Tagai Mosaea 18:8–9; tagai foi Thomas S. Monson, “O Le a Se Mea Ua Ou Faia mo se Tasi i le Aso?” *Liahona*, Nov. 2009, 85–87.
6. Mataupu Faavae ma Feagaiga 124:40.
7. *O Afafine i Lo’u Malo: O Le Talafaasolopito ma le Galuega a le Aualofa* (2011), 131–32.
8. *O Afafine i Lo’u Malo*, 29.
9. Boyd K. Packer, *O Le Malumalu Paia* (1980), 170.
10. Mataupu Faavae ma Feagaiga 136:4.
11. Tagai Mosaea 3:5–18.
12. Tagai Mosaea 4:2; 5:5.
13. Mosaea 4:3.
14. Alema 26:1.
15. Alema 26:11.
16. Alema 26:16.
17. Alema 26:35.
18. Mataupu Faavae ma Feagaiga 11:13.
19. Maria Speidel, i le *O Afafine i Lo’u Malo*, 76.
20. Sarah Rich, i le *O Afafine i Lo’u Malo*, 30.
21. Mataupu Faavae ma Feagaiga 110:9–10.
22. Thomas S. Monson, “O Le Malumalu Paia—o se Faailo i le Lalolagi,” *Liahona Me* 2011, 93.
23. Mataupu Faavae ma Feagaiga 25:13.



**Saunia e Peresitene Dieter F. Uchtdorf**  
Fesoasoani Lua i le Au Peresitene Sili

# Aua Ne'i Galo A'u

*O la'u tatalo ma faamanuiaga ia aua nei galo o outou o ni afafine moni faapelepele i le malo o le Atua.*

O'u tuafafine pele, o se fiafiaga le faatasi ai ma outou i lenei aso. Ou te tulimataia lava lenei fonotaga aoao faaletausaga a le Aualofa ma savali e tuuina atu ai. Faa-fetai atu, tuafafine. O se faamamaluga taua mo au le tofiaina e Peresitene S. Monson e lauga atu ia te outou i le aso, ma faaopoopo atu ni nai manatu e lauga atu ai i tuafafine o le Ekalesia.

O se taimi e le'i mamao atu sa matou savalivali ai ma lo'u toalua ma lo ma afafine i se togalaau matagofie. Sa ou maofa i le mataina ma le matagofie o foafoaga a le Atua. Ona ou vaaia ai lea, i fuga mataina uma, o si tamai fugalaau. Sa ou iloaina le igoa o lenei fugalaau aua talu mai lo'u laitiiti, sa i ai so'u sootaga faapitua i lea fugalaau. O le fugalaau e ta'u o le aua-nei-galo-au.

Ua ou le mautinoa lelei pe aisea ua tele naua ai le taua o lenei fugalaau ititiiti ia te au i le aluga o tausaga. E le vave tosina atu i ai se vaai; e faigofie lava ona le iloa atu ona e punitia e fugalaau tetele ma sili atu ona lautetele; ae peitai, e tutusa lava le matagofie, ma lona lanu lea e atagia ai lagi e sili ona lanumoana—atonu o se tasi lea mafuaaga ou te fiafia tele i ai.

Ma o loo i ai le aioi faagalo gata i lona igoa. E i ai se tala faafagogo a Siamani e faapea, ina ua uma ona faaigoa

e le Atua o laau iti uma, e tasi lava le laau sa le'i faaigoaina. Sa tautala atu se leo ititiiti, "Aua nei galo a'u, le Alii e!" Ona tali atu lea o le Atua o lona igoa la lea.

O le afiafi nei, ou te fia faaaogaina ai lenei fugalaau laitiiti e fai ma faatusa. O petala e lima o le fugalaau ititiiti o le aua-nei-galo-au, ua uunaia ai au e mafaufau i mea e lima tatou te nofouta i ai ia aua lava nei faagaloina.

## **Muamua, aua nei galo ona e onosai ia te oe lava.**

Ou te fia faamatala atu se mea, ou te faamoemoe o le a outou faauigaina i lona aano moni: Ua silafia lelei lava e le Atua o oe ma a'u e le atoatoa.

Se'i o'u faaopoopo atu: Ua silafia lelei lava foi e le Atua, o tagata e te manatu ua atoatoa, e le atoatoa foi.

Ae peitai, tatou te faaaluina le tele o le taimi ma le malosi e faatusatusa ai i tatou lava i isi—e masani lava ona faatusatusa o tatou vaivaiga i o latou malosiaga. O lenei mea e mafua ai ona tatou fatuina ni faamoemoega mo i tatou lava ia e faigata ona ausia. O se taunuuga la, tatou te le patipatia lava a tatou taumafaiga lelei, aua e foliga mai e laiti atu nai lo mea e fai e se isi tagata.

E tofu tagata uma ma malosiaga ma vaivaiga.

E manaia tele le i ai o ou malosiaga.

Ma o se vaega o ou aafiaga i le olaga nei le i ai o ou vaivaiga.

E finagalo le Atua e fesoasoani mai ia i tatou ia liliu o tatou vaivaiga uma e avea ma malosiaga,<sup>1</sup> peitai ua la silafia o lenei mea o se sini mo se taimi umi. E finagalo o Ia ia tatou atoatoa,<sup>2</sup> ma afai tatou te tumau i le ala e avea ai ma soo, o le a i ai le aso o le a tatou atoatoa ai. E le o i ai se afaina i lou le'i oo atu i ai iina. Ia e galue pea i ai, ae tuu ia lou faasalaina o oe lava.

O'u tuafafine pele, o le toatele o outou e le uma lo outou tigaalofa ma le onosai i vaivaiga o isi. Faamolemole ia manatua foi, ia e tigaalofa ma onosai mo oe lava.

Ae o le taimi nei, ia e faafetai mo manuia laiti i totonu o lou aiga, o au fegalegaleaiga faaleaiga, au aoaoga ma galuega, lou auai i le Ekalesia ma le alualu i luma faaletagata lava ia. E faapei o fugalaau o le aua-nei-galo-au, atonu e foliga laiti nei manuia ia te oe ma atonu foi e le matauina e isi, ae e silafia i latou e le Atua ma e le o ni mea iti ia te Ia. Afai e te mafaufau e faapea, o le faamanuiaina e na o se rosa atoatoa po o se oketi matagofie, atonu ua e misia nisi o aafiaga sili ona matagofie o le olaga.

Mo se faataitaiga, o le manao ia e maua se afiafi faaleaiga "atoatoa e pei o se atapu'e" i vaiaso taitasi—e ui o le faia faapea e te faanoanoa ai ma faanoanoa ai tagata uma e siomia oe—atonu e le o le filifiliga sili lea ona lelei. Nai lo lena, ia fesili ifo ia te oe lava, "O le a se mea e mafai ona tatou faia o se aiga o le a avea ma se mea fiafia ma faaleagaga ma atili ai ona tatou nonofo vavalalata faatasi?" O lena ituaiga afiafi faaleaiga—e tusa lava pe faatauvaa ona faamoemoega ma le faataunuuga—e i ai taunuuga umi e sili atu ona lelei.

O la tatou malaga agai atu i le atoatoa e umi, ae e mafai ona tatou

maofa ma fiafia i laasaga aupito iti o lena malaga.

**Lona lua, aua nei galo le eseesea o se ositaulaga lelei ma se ositaulaga faavalevalea.**

O se ositaulaga e taliaina o lo tatou tuueseina lea o se mea lelei mo se mea e sili atu ona aoga.

O le ositaulagaina o se moe laitiiti ina ia fesoasoani i se tamaitiiti ua malu'ia, o se ositaulaga lelei lea. O le ala i le po atoa, ma lamatia ai lo tatou lava ola maloloina, ina ia fai ni teuga mo se ofu o lau tama mo le Aso Sa, atonu o se ositaulaga faalēlele lea.


O le tuuto atu o nisi o o tatou taimi i le suesueina o tusitusiga paia po o le tapena e aoao atu se lesona, o se ositaulaga lelei lea. O le faaaluina o ni itula se tele i le su'iina o le autu o le lesona i luga o ie sii ulo mo tagata taitoatasi o lau vasega, atonu e le o se ositaulaga lelei lea.

E eseese uma lava tagata ma tulaga, ma o se ositaulaga lelei i se tulaga se tasi atonu o se ositaulaga faavalevalea lea i se isi tulaga.

E faapefea ona tatou iloa le eseesea mo o tatou lava tulaga? E mafai ona tatou fesili ifo ia i tatou lava, “Pe o tuuto atu ea lo'u taimi ma le malosi i mea e sili ona aoga?” E tele lava mea lelei e fai, ae e le mafai ona tatou faia na mea uma. E sili ona fiafia lo tatou Tama Faalagelagi pe a tatou ositaulagaina se mea lelei mo se mea e sili atu, i se vaaiga i le faavavau. O nisi taimi, o le uiga o lena mea o le tausia o se fugalaau manaia itiiti o le aua-nei-galo-au nai lo o se togalaau o loo fuga taufuifui.

**Lona tolu, aua nei galo ona e fiafia i le taimi nei.**

I le tala manaia a tamaiti o, *Siale ma le Falegaosi Sukalati*, sa nana ai e le alii faisukalati faalilolilo o Willy Wonka se pepa auro i ni sukalati se



lima ma faasilasila atu o ai lava le tagata e mauaina se tasi o na pepa, o le a manumalo i se maimoaga taamilo i lona falegaosi sukalati ma se sapalai o sukalati i le olaga atoa.

Sa tusia i luga o ia pepa auro taitasi le savali lenei: “Faafeiloai atu ia te oe, le tagata laki ua mauaina le Pepa Auro lenei . . . ! E tele mea mananaia o loo teuina mo oe! E tele mea matagofie e te ofo ai o loo faatalitali atu mo oe! . . . Mealilo ma mea ofoofogia e te te'i ai . . . o le a . . . faafiafia ai . . . ma maofa ai ma faafenunia'i ai oe.”<sup>3</sup>

I lenei tala faamama'i a tamaiti, sa tau fai faamemelo ai tagata uma o le lalolagi ia maua le pepa auro. Sa manatu nisi o lo latou fiafia atoa i le lumanai e faalagolago lea i lo latou mauaina pe leai foi o se pepa auro. I lo latou popolevale, sa amata ai ona galo i tagata le fiafia faatauva sa masani ona latou maua i se fasisukalati. Sa avea le fasisukalati lava ia ma se mea faaosoita tele pe

a le maua i ai se pepa auro.

E toatele naua tagata i aso nei o loo faatalitali mo a latou lava pepa auro—o le pepa lea ua latou talitonu o loo i ai le autu o le fiafia sa latou moemiti i ai. Mo nisi, atonu o le pepa auro o se faaipoipoga atoatoa; mo isi, o se fale e pei o fale o loo faaalai i faavaa o mekasini pe atonu foi o le saoloto mai le atuavale po o le popole.

E leai se mea e leaga ai faanau-nauga amiotonu—tatou te faamoemoe ma saili i mea na e “mama, matagofie, pe logoleleia pe tauleleia.”<sup>4</sup> E oo mai le faaifitauli pe a tatou faapafala lo tatou fiafia ae tatou faatalitali mo se mea e tupu i le lumanai—la tatou pepa auro—ia oso mai.

Na pau lava le mea sa manao ai se tasi o tamaitai o le faaipoipo lea i le malumalu i se alii amiotonu e umia le perisitua ma ia avea ma se tina ma se avā. Sa moemiti o ia i lenei mea i lona olaga atoa, ma oka, se tina ina a lelei ma se ava agalelei o le a avea ai o ia.

O le a tumu lona aiga i le alofa ma le agalelei. O le a le tautalagia ai se upu faatiga. O le a le mu lava se meaai. O lana fanau foi, nai lo le tafafao ma a latou uo, o le a mananao e faaalu o latou afiafi ma faaiuga o vaiaso faatasi ma Tina ma Tama.

O lana pepa auro lea. O le mea lea e tasi sa manatu o ia ua faalagolago i ai lona ola atoa. O le mea lea e tasi i le lalolagi atoa sa matuai faananau i ai o ia.

Peitai sa le'i tupu lava. Ma a o alu pea tausaga, sa amata ona le toe fia fegalegaleai [ma isi tagata], ua inoino, ma iu ai ina ita. Sa le malamalama o ia pe aisea ua le foaiina mai ai e le Atua lona manaoga amiotonu lenei.

Sa faigaluega o ia o se faiaoga i le aoga tulagalua, ma o le i ai faatasi ma tamaiti i le aso atoa, na atili faamanatu atu ai ia te ia sa le'i maua lava lana pepa auro. A o mavae tausaga, sa atili ai lona le fiafia ma le le fia fegalegaleai ma isi tagata. Sa le fiafia tagata e pipii i ai ma ua aloaloese mai ia te ia i taimi uma latou te mafai ai. Sa iu foi ina faapa atu lona ita i tamaiti i le aoga. Sa oo ina itaitagofie, ma sa fai ma oso lona le fiafia ma le atuatuvaletu i le tuua toatasi.

O le leaga o lenei tala, o lenei tamaitai pele, ona o lona le fiafia i le pepa auro, sa le mafai ai ona ia matauina ia faamanuiaga sa *i ai* lava ia te ia. Sa le'i i ai sana fanau i lona aiga, ae sa siomia e i latou o ia i lona potuaoga. Sa le'i faamanuiaina o ia i se aiga, ae sa tuuina atu e le Alii ia te ia se avanoa lea e toalaite ni tagata e mauaina—o le avanoa e uunaia ai mo le lelei ia olaga o le faitau selau o tamaiti ma aiga i le avea ai o se faiaoga.

O le lesona i i o le, afai tatou te faaaluina o tatou aso i le faatalitali mo ni rosa mananaia, o le a tatou misia le matagofie ma le mananaia o fugalaau

laiti o le aua-nei-galo-au o loo siomia ai i tatou.

E le faapea ua ou fai atu e tatau ona tatou lafoaia le faamoemoe pe ta'umāmāina ai a tatou sini. Aua lava nei tuua le taumafai mo le mea sili o loo i totonu ia te outou. Aua nei tuua le faamoemoe mo manaoga amiotonu uma lava o lou loto. Ae aua foi nei moeiini ou mata ma lou loto i le matagofie o nai taimi masani i aso taitasi lea e maua ai se olaga tamaoaiga ma sologa lelei.

O tagata aupito sili ona fiafia ua ou iloa, e le o i latou o e ua maua a latou pepa auro; ae o i latou ia o e, a o tulitulimatagauina ni sini aoga, latou te maua ma teufatuina le matagofie ma le manaia o taimi o aso taitasi. O i latou ia o e, o loo lalagaina, i lea filo ma lea filo, se ielalaga o le agaga faafetai ma le mata'ina i o latou olaga. O i latou ia o loo fiafia moni.

### **Lona fa, aua nei galo le “aisea” o le talalelei.**

O nisi taimi, i mea masani o o tatou olaga, tatou te le mafaufauina ai le sopoloa o la tatou vaai i se vaega taua o le talalelei a Iesu Keriso, e pei uma lava o le sopoloa o le vaai a se tasi i se fugalaau matagofie ma le maaleale o le aua-nei-galo-au. I a tatou taumafaga maelega e faataunuu ia matafaioi uma ma tiute tatou te tauaveina o ni tagata o le Ekalesia, o nisi taimi tatou te vaai atu ai i le talalelei o se lisi umi o galuega e ao ona tatou faaopoopo atu i la tatou lisi ua matuai umi lava “o mea e fai”, o se poloka o le taimi lea e ao ona tatou faaofiina i a tatou fuafuaga pisi. Tatou te taulai atu i le *o le a* le mea e finagalo le Alii tatou te faia ma le *pe faapefea* ona tatou faia, ae o nisi taimi e galo ai ia i tatou le *aisea*.

O'u tuafafine pele, o le talalelei a Iesu Keriso e le o se matafaioi; o se auala, ua faataatia e lo tatou Tama

agalelei, e tau atu i le fiafia ma le filemu i lenei olaga ma le mamalu ma le fiafia e le mafaamatalaina i le olaga a sau. O le talalelei o se sulu lea e ati mai i le olaga nei ma faamalamalama ai le ala i o tatou luma.

E ui o le malamalama i le “o le a” ma le “pe faapefea” o le talalelei e alagata, ae o le afi faavavau ma le mamalu o le talalelei e fotu e mai i le “aisea.” A tatou malamalama i le *aisea* ua tuuina mai ai e lo tatou Tama Faalelagi lenei mamalu mo le ola ai, pe a tatou manatua le *aisea* ua tatou tautino ai i le faia ia avea o se vaega faavae o o tatou olaga, e le toe avea le talalelei o se avega ma, nai lo lona, e avea o se fiafiaga ma se olioliga. E iu ina pele ma matagofie.

Aua nei o tatou savavali i le ala o le avea ma soo ma tatou punonou i lalo, ae na o le mafaufau i galuega ma tiute o i o tatou luma atu. Ia aua nei o tatou savavali ma le le nofouta i le matagofie o lafanua mamalu faalelagi ma faaleagaga ua siomia ai i tatou.

Tuafafine pele, ia outou sailia le mamalu, ma le matagofie, ma le olioli tele o le “aisea” o le talalelei a Iesu Keriso.

O le “o le a” ma le “pe faapefea” o le usiusitai e faailoga ai le ala ma tatou tumau ai i le ala sa'o. O le “aisea” o le usiusitai e faapaiaina ai a tatou faatinoga, ma liua ai le mea masani i le mamalu. E faalateleina ai a tatou faatinoga laiti o le usiusitai i ni faatinoga o le faapaiaina.

### **Lona lima, aua nei galo e alofa le Alii ia te oe.**

A o ou laitiiti, a ou tilotilo i fugalaau laiti o le aua-nei-galo-au, o isi taimi ou te lagona ai e tai pei lava a'u o lona fugalaau—e laitiiti ma faalētaua. Sa ou le iloa pe o le a faagaloina au e lo'u aiga po o lo'u Tama Faalelagi.

O ni tausaga mulimuli ane, e mafai



ona ou toe tepa i tua i lena taulealea laitiiti ma le agalelei ma le alofa. Ma ua ou iloa nei—e lei faagaloina lava a’u.

Ma ua ou iloa foi se isi mea: i le avefa ai ma se Aposetolo a lo tatou Matai o Iesu Keriso, ou te folafola atu ma lo’u mautinoa atoa ma le talitonguga maumaututu o lo’u loto—e le o faagaloina foi oe!

E le o faagaloina oe.

Tuafafine, pe o fea lava o e i ai, pe o a foi ou tulaga o i ai, e le faagaloina lava oe. E tusa lava pe o le a le foliga faaletonu o ou aso, e tusa lava pe o le a lou lagonaina o lou faalētaua, e tusa lava pe o le a le lofituina ua e manatu ua e i ai, e le o faagaloina lava oe e lou Tama Faalelagi. O le mea moni, e alofa o Ia ia te oe, i se alofa e le mavae.

Mafaufau foi la i ai: O loo silafia ma manatua oe e le Tagata e aupito sili ona tamalii, mamana, ma mamalu i le lalolagi atoa! O loo alofaina oe e le Tupu o le vateatea e le gata ma faavavau!

O Lē na foafoaina ma silafia fetu, e silafia foi oe ma lou igoa—o outou o afafine o Lona malo. Sa tusia e le Fai Salamo:

“A ou vaai atu i lou lagi, o le galuega a ou tamatamai lima, o le masina atoa ma fetu na e faia;

“Se a ea le tagata e te manatu mai ai ia te ia? . . .

“Aua ua e faamaulalo ane teisi o ia i agelu, ua e faapaleina foi o ia i le mamalu ma le matagofie.”<sup>5</sup>

E alofa le Atua ia te oe aua o oe o Lona afafine. E alofa o Ia ia te oe e ui e i ai taimi atonu e te lagonaina ai le tuulafoaiina pe faia foi ni mea sese.

O le alofa o le Atua ma le mana o le talalelei toefuataiina e laveai ma faaolaina ai. A faapea e te faatagaina Lona alofa paia i lou olaga, e mafai ona fusifusia ai soo se manu’a, faamalolo i soo se tiga, ma faamafanafana ai soo se faanoanoaga.

O’u tuafafine pe o le Aualofa, o loo e latalata atu i le lagi nai lo le mea

e tatau ona i ai. Ua faauuina oe mo mea e sili atu nai lo mea e mafai ona e iloa. Ia faaaauu ona e alualu i luma i le faatuatua ma le amiotonu patino. Talia le talalelei toefuataiina a Iesu Keriso e avefa ma au auala e te ola ai. Opomau i le meaalofa o le malosi i totonu o lenei Ekalesia maoae ma le moni. Faapelepele i le meaalofa o le auauna atu i le faalapotopotoga faamanuiaina o le Aualofa. Ia faaaauu ona faamalolosia aiga ma auaiga. Faaauu ona saili ma fesoasoani atu i isi o loo manaomia lau fesoasoani ma le fesoasoani a le Alii.

Tuafafine e, o loo i ai se mea musuia ma le faagaetia i le fuga-lau ititi o le aua-nei-galo-au. Ou te faamoemoe o le a avefa ma se faailoga o mea iti e avefa ai o outou olaga o ni olaga fiafia ma suamalie. Aua nei galo e tatau ona outou onosai ma alolofa ia te outou lava, o isi osigataulaga e sili atu nai lo isi, tou te le tau faatalitali mo se pepa auro ina ia outou maua ai le fiafia. Faamolemole aua nei galo o le “aisea” o le talalelei a Iesu Keriso o le a musuia ma siitia ai oe. Ma aua lava nei galo e silafia, e alofa, ma faapelepele lou Tama Faalelagi ia te oe.

Faafetai mo le tagata ua avefa ai oe. Faafetai mo le anoanoai o faatinoga o le alofa ma le auauna atu o loo e ofoina atu i tagata e toatele. Faafetai mo mea uma o le a e faia e aumai ai le olioli o le talalelei i aiga, i le Ekalesia, i lou nuu, ma i malo o le lalolagi.

Tuafafine, matou te alolofa ia te outou. O la’u tatalo ma faamanuiaga ia aua nei galo o outou o ni afafine moni faapelepele i le malo o le Atua, i le suafa paia o lo tatou Faola pele, o Iesu Keriso, amene. ■

#### FAAMATALAGA

1. Tagai Eteru 12:27.
2. Tagai 3 Nifae 12:48.
3. Roald Dahl, *Charlie and the Chocolate Factory* (1964), 55–56.
4. Mataupu Faavae o le Faatuatua 1:13.
5. Salamo 8:3–5.

# Faasino Upu mo Tala o le Konafesi

O se lisi lenei o aafiaga ua filifilia mai lauga o le konafesi aoao e mafai ona faaaogaina i suesuega faaletagata lava ia, afiafi faaleaiga, ma isi aoaoga. O numera, e faasino i le itulau muamua o le lauga.

## FAILAUGA

## TALA

<b>Elder Richard G. Scott</b>	(6) Ua pueina e Richard G. Scott se lipine faalogologo o le Tusi a Mamona mo lona aiga.
<b>Elder José L. Alonso</b>	(14) O ni matua atuatuvaile na leiloa lo la atalii laitiiti i le Aai pisi o Mekisiko.
<b>Peresitene Boyd K. Packer</b>	(16) Mauaina e Boyd K. Packer o lona faamanuiaga faapeteriaka.
<b>Peresitene Dieter F. Uchtdorf</b>	(19) Na fesoasoani Dieter F. Uchtdorf i le fauina o se falelotu a o auai i aoaoga faamasani faapailate o le ea fosi. Na faaofi malosi atu e se ulugalii faamaoni se uunaiga lelei mo i latou sa siomia ai i la'ua.
<b>Elder David A. Bednar</b>	(24) O talavou o le Perisitua Arona na faiaoga i se vasega o talafaasolopito o aiga.
<b>Elder Neil L. Andersen</b>	(28) Ua tonu ia James O. Mason ma lona faletua e le faatalitali mo le mauaina o ni fanau. Na vaetamaina e Scott ma Becky se fanau ina ua mavae le 25 tausaga talu ona faaiipoipo.
<b>Elder Carl B. Cook</b>	(33) Na fautuaina e Thomas S. Monson ia Carl B. Cook e tepa a'e i luga. Na faamatuu atu e tuafafine "avega" i le lagi i foliga o paluni ua feulaina i le kesi.
<b>Elder LeGrand R. Curtis Jr.</b>	(35) Ua maua e tagata lē toaaga o le Ekalesia le togiola ina ua valaaulia e toe foi mai i le lotu.
<b>Elder D. Todd Christofferson</b>	(38) E manatua e se tasi o le Donner Party na sao mai, le taeao na ia vaai ai i le Johnson's Ranch.
<b>Elder W. Christopher Waddell</b>	(50) Ua feiloai le faifeautalai o Javier Misiego i le tagata na papatisoina lona tamā.
<b>Peresitene Henry B. Eyring</b>	(56) Ua asiasi atu le alii talavou o Henry B. Eyring ma lona epikopo i se tuafafine o la latou uarota. Ua iloiloina e Gordon B. Hinckley ma Henry B. Eyring se tusiga i le tuneva o le po.
<b>Peresitene Thomas S. Monson</b>	(60) Na manatu Thomas S. Monson e na o ia le tagata o le Ekalesia i le toluuapiga a fitafita. Na talanoa Thomas S. Monson i tagata i luga o se pasi e uiga i le Ekalesia.
<b>Peresitene Henry B. Eyring</b>	(68) Na saunoa Henry B. Eyring i se iunivesite lea na talosagaina ai o ia e aua ne'i faamatalaina lana molimau ia lesu Keriso. Na ave e Henry B. Eyring ona afafine e asiasi i se uo o le a maliu i le kanesa. O se alii o le a maliu, na ofuina ona laei o le Aso Sa mo se faamanuiaga faaleperisitua. Sa faitauina e se tagata le Tusi a Mamona ma maua ai se molimau, ina ua mavae ni tausaga sa sola ese ai mai lona aiga.
<b>Elder Tad R. Callister</b>	(74) O se tamaitai talavou na molimau atu i lana uo i le moni o le Tusi a Mamona.
<b>Peresitene Thomas S. Monson</b>	(82) Ua aoaoina e Thomas S. Monson le mana o le tatalo ina ua maua lana lima talā lea na ia manatu ua leiloa. Na uunaia Thomas S. Monson e faasilasila atu o Peter Mourik e lauga i le faapaiga o le Malumalu o Frankfurt i Siamani.
<b>Elder Russell M. Nelson</b>	(86) Ua faatauaina e tagata liliu mai o Rusia a latou faaiipoipoga o le malumalu.
<b>Elder Randall K. Bennett</b>	(98) Na le amana'iaina e Randall K. Bennett ni lapataiga o se galu aave malosi.
<b>Elder J. Devn Cornish</b>	(10) Na maua faavavega e J. Devn Cornish se kuata o le tali i se tatalo.
<b>Elder Quentin L. Cook</b>	(104) Na faaleaogaina e Alma Sonne le avanoa e malaga ai i le <i>Titanic</i> . O Irene Corbett na fano i luga o le <i>Titanic</i> .
<b>Silvia H. Allred</b>	(114) O se uso na mafatia i le tele o gasegase ae na faamafanafanaina e faiaoga asiasi. O se tagata na liua ina ua mae'a ona auuina atu faiaoga asiasi i lona aiga.
<b>Peresitene Dieter F. Uchtdorf</b>	(120) O se tamaitai na matuai le fiafia aua e le i faaiipoipo ma e leai foi sana fanau.

# Aoaoga mo o Tatou Taimi

O lesona a le Perisitua Mekisateko ma le Aualofa i Aso Sa lona fa, o le a tuuto atu i “Aoaoga mo o Tatou Taimi.” E mafai ona saunia lesona taitasi mai se lauga se tasi pe sili atu foi na tuuina mai i le konafesi aoao aupito lata mai (tagai i le siata o loo i lalo). E mafai e peresitene o siteki ma itu ona fili-fili pe o a lauga e tatau ona faaaoaga, a le o lena, e mafai ona latou atofa atu lenei tiutetauave i epikopo ma peresitene o paranesi. E ao i taitai ona faamamafa atu le taua o le suesue e uso o le Perisitua Mekisateko ma tuafafine o le Aualofa nei lauga e tasi i Aso Sa foi na.

O i latou e auai atu i lesona o le Aso Sa lona fa, ua fautuaina ina ia suesue ma aumai i le vasega le mekasini o le konafesi aoao aupito lata mai.

## Fautuaga mo le Sauniaina o se Lesona mai Lauga

Tatalo ina ia faatasi atu le Agaga Paia ma oe a o e suesue ma aoao atu ia lauga. Atonu e i ai taimi e faaosoosoina ai oe e faaaoaga nisi

mea e sauni ai lau lesona, peitai o lauga o le konafesi o mataupu na ua faamaonia mo le aoaoina. O lou tofiga o le fesoasoani lea i isi e aoao ma ola ai i le talalelei, e pei ona aoao mai i le konafesi aoao aupito lata mai a le Ekalesia.

Toe iloilo lauga, vaa-vaai mo mataupu faavae ma aoaoga faavae e fetau ma manaoga o tagata o le vasega. Ia vaavaai foi mo tala, o mau faasino, ma faamatalaga mai lauga o le a fesoasoani ia te oe e aoao atu ai nei upumoni.

Fai se oototoga o le auala e te manao e aoao atu ai ia mataupu faavae ma aoaoga faavae. E tatau ona aofia i lau oototoga ni fesili e fesoasoani ai i tagata o le vasega e:

- Vaavaai mo mataupu faavae ma aoaoga faavae o i lauga.
- Mafaufau i o latou uiga.
- Fefaasoai le malamalama, manatu, aafiaga, ma molimau.
- Faaaoaga nei mataupu faavae ma aoaoga faavae i o latou olaga. ■

O MASINA E AOA O ATU AI LESONA

Novema 2011–  
Aperila 2012

Me 2012–Oketopa 2012

ANOMEA O LESONA O LE ASO SA E FA

O lauga o loo lolomiina i le *Liahona* o Novema 2011\*

O lauga o loo lolomiina i le *Liahona* o Me 2012\*

\* O loo maua nei lauga i le tele o gagana i le conference.lds.org.

## Au Peresitene Aoao o Ausilali


### AUALOFA



Silvia H. Allred  
Fesoasoani Muamua



Julie B. Beck  
Peresitene



Barbara Thompson  
Fesoasoani Lua


### TAMAITAI TALAVOU



Mary N. Cook  
Fesoasoani Muamua



Elaine S. Dalton  
Peresitene




Ann M. Dobb  
Fesoasoani Lua


### PERAIMERI



Jean A. Stevens  
Fesoasoani Muamua



Rosemary M. Wixom  
Peresitene



Cheryl A. Esplin  
Fesoasoani Lua

### ALII TALAVOU



Larry M. Gibson  
Fesoasoani Muamua



David L. Beck  
Peresitene



Adrián Ochoa  
Fesoasoani Lua

### AOGA SA



David M. McConkie  
Fesoasoani Muamua



Russell T. Osguthorpe  
Peresitene



Matthew O. Richardson  
Fesoasoani Lua



**O se faatufugaga a se tusiata o loo faaalua ai le Tapeneko i Provo, lea sa faaumatia e le afi, ua toefuatai nei ma ua avea ma malumalu lona lua i Provo, Iuta, ISA.**

## Konafesi Aoao Lona 181 Faaleafatausaga

**E**silia ma le 100,000 tagata sa auai i sauniga e lima o le Konafesi Aoao Lona 181 Faaleafatausaga a le Ekalesia a Iesu Keriso o le Au Paia o Aso e Gata Ai i le Maota Autu mo Konafesi i le Aai o Sate Leki, Iuta, ISA, i le aso 1 ma le 2 o Oketopa. E faitau miliona isi na maimoa mai ma faalogologo faasalalaua i le TV, leitio, satellite, ma le Initoneti.

I le sauniga muamua i le aso Toonai, 1 Oketopa, sa fofogaina mai ai e Peresitene Thomas S. Monson ia nofoaga o malumalu fou e ono: Barranquilla, Colombia; Durban, Aferika i Saute; Kinshasa, Ripapelika Temokarasi o Congo; Pale, Farani; Provo, Iuta, ISA; ma Star Valley, Wyoming, ISA.

Ina ua maea lenei faasilasilaga, sa valaaulia e Peresitene Monson ia tagata o le ekalesia e saofagā i le Tupe Lautele e Fesoasoani ai i Tagata Ulu i le Malumalu. “O lenei tupe e maua ai se malaga se tasi i le malumalu a i latou o le a le mafai ona o i le malumalu, ae ua matua naunau lava mo lena avanoa,” na ia saunoa ai.

I le afiafi o le Aso Toonai, sa faasilasila mai ai e Elder David A. Bednar o le Korama a Aposetolo e Toasefululua se vaega fou o le youth.lds.org—FamilySearch Youth and Family History (lds.org/familyhistoryyouth). O lea vaega fou ua faamoemoe e fesoasoani

ai i talavou latou te sailia talafaasolopito o aiga ma tautuaina o latou augatama e ala i le sailia o o latou faamaumauga. (Tagai i le tusiga o i le itulau e 128.)

O le sauniga foi lea, na faamalolo mai ai Elder Claudio R. M. Costa mai le Au Peresitene o Fitugafulu. Sa lagolagoina ai i le Au Peresitene o Fitugafulu ia Elder Tad R. Callister (tagai i le itulau e 128 mo se oototoga o lona soifua). E toasefululua Fitugafulu ma Fitugafulu Eria na faamalolo mai ai pe tuuina atu foi i ai le tulaga o le faamalolo faamamaluina (tagai itulau 23 mo le lagolagoina o taitai ma e na faamalolo mai ai).

I lana saunoaga i le taeao o le Aso Sa, sa faamanatu mai ai e Peresitene Henry B. Eyring, Fesoasoani Muamua i le Au Peresitene Sili, i tagata taitoatasi le valaau—na tuuina mai i le konafesi aoao ia Aperila i le amataga o lenei tausaga—mo tagata uma o le au paia ina ia auai i le faatinoina o se auunaga i se aso o le 2011 (tagai Henry B. Eyring, “O Avanoa e Fai ai Mea Lelei,” *Liahona*, Me 2011, 22).

Sa faalogologo tagata o le ekalesia i le lalolagi atoa i le konafesi i gagana e 93. Mo faamatalaga e uiga i le taimi e maua ai tusiga, lipine e faalogologo ma matamata ai o le konafesi i gagana eseese, asiasi ane i le [lds.org/general-conference/when-conference-materials-will-be-available](http://lds.org/general-conference/when-conference-materials-will-be-available). ■

## O Afafine i Lo’u Malo: O Se Galuega Faasolopito mo Tamaitai o le AAG i le Taimi Nei

**Saunia e Chelsee Niebergall**  
Mekasini a le Ekalesia

**O**Afafine i Lo’u malo: O Le Talafaasolopito ma le Galuega a le Aualofa, o se tusi fou na saunia i lalo o le taitaiga a le Au Peresitene Sili, o loo i ai se faamaumauga o le talatuu o le Aualofa ma tamaitai o le Ekalesia, o le saunoaga lea a Julie B. Beck, le peresitene aoao o le Aualofa, i le sauniga aoao a le Aualofa ia Setema 2011.

“O le a tuufaatasia ai ma soofaatasi se usoga a tamaitai i faamoemoega o le Aualofa ma mamamu ma avanoa paia o soo,” na ia saunoa ai. “O se molimau o le matafaioi taua a tamaitai i le fuafuaga o le fiafia a lo tatou Tama, ma o loo i ai se tagavai mausali o mea ua tatou talitonu i ai, o mea tatou te faia, ma mea o le a tatou puipuia” (itulau e 113 o le lomiga lenei).

Na ta’ua e Sister Beck e faapea o le tusi o loo maua ai se faavae mo faasinomaga o tamaitai, o ni afafine o le Atua. A suesue e tagata le tusi, na ia saunoa ai, o le a mafai ona latou vaai i le ala e tatau ai ona aoga le Aualofa i olaga o uso taitasi.

### Pe na Faapefea ona Fatuina le Tusi

Na amata le galuega o se galuega na atofa mai i le Au Peresitene Sili. Na vaetofia ia Susan W. Tanner, le peresitene aoao talu ai o Tamaitai Talavou, na te tusia le tusi. Na tofia Sister Beck ma ona fesoasoani, o Silvia Allred, ma Barbara Thompson, e faafoeina le galuega ma galulue faatasi ma Sister Tanner, ma ē sa faasa’osa’oina, i latou sa mamamuina, ma isi e fuafua





ai lona faagasologa e ala i le agaga o faaaliga. “Ou te lei galue lava i se galuega faatino e sili atu ona taialaina e le Agaga nai lo lenei,” o le saunoaga lea a Sister Beck.

O se vaega o lona faagasologa sa aofia ai le filifili po o le fea o le fia afe o itulau o talaaga faasolopito e tatau ona faaafua ai i le tusi. Sa iloiloaina e Sister Beck, o ona fesoasoani, ma Sister Tanner ia minute mai i uluai fonotaga a le Aualofa i Navu, ma isi talafaasolopito ma faamatalaga e uiga i le Aualofa ma tamaitai o le Ekalesia.

Na saunoa Sister Beck e faapea, o le taunuuga e le o se talafaasolopito masani e faasolo lelei i taimi, ae o se talafaasolopito faaleagaga o tamaitai o le Ekalesia ma le Aualofa.

“Tatou te suesueina lo tatou talafaasolopito aua e fesoasoani tatou te suia ai,” na saunoa ai Sister Beck i lana saunoaga i le sauniga aoao a le Aualofa ia Setema 2010. “O le faaiuga lava, o le taua o le talaaga e le faapea o ona aso, taimi, ma nofoaga. E taua aua e aoaoina ai i tatou i mataupu faavae, faamoemoega, ma mamana e tatau ona tatou mulimuli ai, ma e fesoasoani tatou te iloa ai o tatou faasinomaga, ma le mea e tatau ona tatou faia e tuufaatasia ai i tatou i le faamalolosia o aiga o Siona ma fausia ai le malo o le Atua i le fogaeleele.” (“O Afafine i Lo’u Malo: O Le Talafaasolopito ma le Galuega a le Aualofa,” *Liahona*, Nov. 2010, 115).

E ui o loo mulimuli le tusi i se faasologa o taimi, ae o ona aoaoga o

loo faailoa mai i mataupu ua i ai ni autu patino. O loo faaaogaina ai tala ma faataitaiga mai tusitusiga paia ma taimi i ona po nei, mai upu a perofeta, ma mai taitai o le Aualofa e aoao atu ai ona savali taua.

### O Le Uunaiga a le Tusi

Na saunoa Sister Beck o le tusi o le a aoaoina ai e tamaitai le auala e faataunuu ai faamoemoega o le Aualofa i o latou lava olaga, ma le avea ai o se usoga a tamaitai o ni soo e tausi feagaiga.

“O le a latou aoaoina ai le uiga o le faateleina o le faatuatua ma le amiotonu faaletagata lava ia, faamalolosia aiga ma auaga, ma saili atu e fesoasoani i isi o loo manaomia le fesoasoani,” na ta’ua ai e Sister Beck i se faatalanoaga ma mekasini a le Ekalesia. “A oo ina vaai ia tamaitai ia i latou lava i le galuega a le Aualofa, ona mafai lea ona latou malamalama i le faigofie ona uunaia e tamaitai o le atinaega o le Ekalesia, i aso anamua ma aso e gata ai, ma mafai ai ona latou iloa lo latou faamoemoega ma lo latou faasinomaga.”

E talitonu Sister Beck e faapea o i latou e faitauina le tusi o le a aoao ai e ala i faataitaiga ma mataupu, i le ala e faalogo ai i le Agaga Paia ma maua faaaliga patino faaletagata lava ia. E mafai ai foi ona faamalolosia i latou ma uunaia i o latou olaga i aso faisoo, ma i o latou tofotofoga ma faigata.

“E anoanoai faataitaiga o le malosiaga o loo i ai i le tusi—tele le malosiaga e mafai ona tatou faataitai i ai,” na saunoa ai Sister Beck. “O lea, a oo i aso faigata, ou te faamoemoe o le a tuu faalatalata ane e tagata a latou tusi ina ia faigofie ona piki i luga ma faitau se tala se tasi po o se faataitaiga o le a faamalolosia ai i latou.”

Na saunoa foi Sister Beck e faapea, o le a oo atu le tusi i fale o aiga o le Ekalesia e ala atu i lima o tamaitai, ae e talitonu foi o ia o le a avea le tusi ma punaoa taua mo alii ma tamaitai. O le a fesoasoani e malamalama ai tamaitai talavou i le ala e avea ai i latou ma se

vaega o le usoga a tamaitai tele i le lalolagi atoa, ma e mafai ona tuufaatasia ai tane ma ava i la latou galuega paia, o le taialaina o o latou aiga ma auaua atu i le Ekalesia.

Ina ua maea ona suesue i le tusi, na saunoa Dale Cook, le peresitene o le Siteki a Syracuse Utah Bluff, o le a avea o se punaoa taua e fesoasoani ai e le gata i tamaitai o le Ekalesia ia malamalama ai i a latou matafaioi o ni soo o Keriso, ae faapena foi i alii. “Faitau i ai ma vaai pe faapefea e [le Aualofa] ona femilosa’i ma sofoaatasi i le perisitua,” na saunoa ai Peresitene Cook. “Ua fesoasoani ai ia te au ou te iloa ai le mana o loo i ai i lo’u toalua ma le [ala] e [atili] ai ona alofa ia te ia ma fesoasoani ma lagolagoina o ia.”

### E Uiga i le Tusi

O le tusi o se punaoa mo suesuega faaletagata lava ia ma mo aoaoga i totonu o le aiga, i le Aualofa, ma i faatulagaga faale-Ekalesia. Ua maea ona auina atu i epikopo ma peresitene o paranesi, o e o le a galulue ma peresitene o le Aualofa e fuafua ai pe faapefea ona avea le tufatufaga o tusi o se faamanuiaga i tamaitai i uarota ma paranesi.

Ua faamoemoe e maua ia tusi i le lata i le luasefulu ma ona tupu gagana i le faaiuga o Ianuari 2012. O le tele lava o na gagana ua maua i luga o le initoneti, lea e mafai ai e tagata o le au paia ona maua ia vitio e fesoatai i ai, o upusii e faasoa ai, ma faitauina fautuaga i le ala e faaoga ai ma faasoa atu savali o i ai i le tusi. Alu i le [lds.org/relief-society/daughters-in-my-kingdom](https://lds.org/relief-society/daughters-in-my-kingdom). Kiliki i le “**Additional Languages (PDF)**” i le ogatotonu o le itulau i lalo o le “**Related Resources.**” O le a oso mai ai se lisi o gagana ua maua ai, i le itu taumatau o le isi itulau. E iu lava ina faaliliuina le uepisaite i isi mau gagana.

Ua fuafuaina se lomiga faavaa-malo o le tusi i le gagana Peretania, Potukale, ma le Sipaniolo i le faaiuga o le tausaga ma o le a maua atu i Fale-tusi Autu ma le store.lds.org. ■

## O Le Saite Fou e Fesoasoani ai i Talavou e Amata ia Talafaasolopito o Aiga

O le vaega fou o le FamilySearch Youth and Family History o le [youth.lds.org](http://youth.lds.org) ([lds.org/familyhistoryyouth](http://lds.org/familyhistoryyouth)) ua faamoemoe e fesoasoani ai i le autalavou e saili ia talafaasolopito o aiga ma auauna atu i o latou tuua e ala i le sailia o o latou faamaumauga.

Ua i ai i nei saite ni punaoa o loo aoao ai le autalavou i le auala e amata faaagaina ai le FamilySearch. I ni laasaga faigofie se lima ua aoaoina ai le autalavou i le auala e sailia ai o latou gafa faaleaiga, faia o faamaumauga faaleaiga, ma saunia ia igoa e ave i le malumalu. Ua aofia ai foi i saite ni manatu i auala e mafai ai e vasega ma korama ona faaagaina ia talafaasolopito o aiga e fai ma ala e auauna atu ai i isi.

O le vaega fou o loo maua i le taimi nei i le gagana Peretania, Potukale, ma le Sipaniolo. O le a maua i isi gagana faaopoopo i masina o lumanai. ■

## Ua Valaaulia e le Tauvaga Tusigaata le Autalavou ina ia Susulu Atu

Ua valaaulia e le Falemataaga o Talafaasolopito o le Ekalesia le autalavou i le vaitausaga o le 13 i le 18 ina ia auai i lana uluai Tauvaga Tusigaata Faavaomalo mo le Autalavou.

E tatau i tagata tusiata ona fatufatua'i ana galuega ia faailoa ai le uiga o le "tutulai ia ma susulu atu" (tagai i le MF&F 115:4–6).

O le atatusi, o se ata sa tatau ona tusia i luma mai o le aso 1 Ianuari, 2009. E tatau ona 13 tausaga o lē e faaulu mai lana ata i le aso 1 Ianuari, 2012, ma ia mafai ona tuuina atu le atatusi e tasi i le initoneti mai le aso 2 Ianuari, 2012, seia oo atu i le aso e faagata ai—Aso Faraile, 1 Iuni, 2012. O le telē faatapulaa o le ata e 84 inisi (213 cm) i le fua aupito umi. E talia uma ia tusitusiga o faasalalauga faatusiata ma sitaili i le tauvaga.

O le a maua i le [lds.org/youthartcomp](http://lds.org/youthartcomp) ia faamatalaga mo le auina atu o ata.

O le a talosagaina i latou e manumalo e auina atu a latou uluai atatusi [original] i le falemataaga ina ia faaali ai i le faaaliga mai le aso 16 Novema, 2012, e oo atu i le aso 17 Iuni, 2013. ■



## Elder Tad R. Callister

*O Le Au Peresitene o Fitugafulu*

Sa faamalamalama mai e Elder Tad Richards Callister, lea faatoa lagolagoina i le Au Peresitene o Fitugafulu ma o se uso o le Korama Lua o Fitugafulu e faapea, o se tasi o sini a le Usoga o le aumaia lea o le "tupu-tupu ae moni" i le Ekalesia. "E manaomia ai le tele ma le tele o tagata e le tau na ona o mai i le sauniga faamanatuga ae ia taumamafa foi i le faamanatuga, mauaina ia sauniga ua ofoina mai e le Ekalesia, ma le tausaiaina o a latou feaiga," sa ia fai mai ai.

I lona naunautai ai e fesoasoani i taitai o le Ekalesia i iunite i lona taumafaiga, ua faafetai ai Elder Callister i le tele o avanoa ua tuuina atu e le Alii ia te ia e auauna ai i le tele o valaauga. "I le maua ai o ia aafiaga lava e tasi ma ia lava tagata ua matou galulue faatasi—peresitene o siteki ma epikopo ma peresitene o korama a toeaina—e faamoemoe ou te mataalia atili ai ma ou nofouta ai i o latou manaoga," o lana faamalamalama mai lea.

Sa avea ia Elder Callister o se faifeautalai faamisiona i le Misiona a Eastern Atlantic States, peresitene o le korama a toeaina, peresitene o le misiona a le siteki, fesoasoani i le peresitene o le siteki, epikopo, peresitene o le siteki, sui risone, Fitugafulu Eria, peresitene o le Misiona a Kanata Toronto East (2005–08), ma sa avea ma Peresitene o le Eria o le Pasefika i le taimi na valaauina ai i le Au Peresitene o Fitugafulu.

Sa soifua mai o ia ia Reed ma Norinne Callister ia Tesema 1945, i Glendale, Kalefonia, ISA, sa maua e Elder Callister se faailoga i le tausitusi mai le Iunivesite o Polika Iaga i le 1968. Sa faauu mai o ia mai le aoga faaloia i le Iunivesite o Kalefonia Los Angeles i le 1971. I le 1972 sa ia maua ai se LLM se faailoga (matuaofaiva) i le tulafono o lafoga mai le Iunivesite o Niu Ioka. Mai le 1972 i le 2005 sa ia galue ai o se loia, ma na ia tusia ni tusi e uiga i le Togiola ma le Liliuese ma le Toefuataiga.

Sa faaipoipo atu ia Kathryn Louise Saporiti ia Tesema 1968 i le Malumalu o Los Angeles Kalefonia. E toaono le la fanau.

Ua faailoa e Elder Callister le aao o le Alii i lona soifuaaga. "Ua matuai faagaetia lava au i le alofa o le Faola lea ou te manatu ai o loo Ia faatalitali pea ma lo tatou Tama i le Lagi ma le naunautai e faamanuia i tatou i ni nai mea itiiti tatou te faia, aua o lo La natura lena." ■



ATA NA PUEINA E MATTHEW REIER

### Malumalu o San Salvador El Salvador

O lenei malumalu mata 'ina i El Salvador sa faapaitina i le aso 21 Aokuso, 2011, o le malumalu aupito fou o malumalu e 135 ua faagaioia i le lalolagi atoa. Na saunooa Peresitene Howard W. Hunter (1907–95) e uiga i malumalu, i lana saunoaga i le konafesi aoao ia Oketopa, "Ia avea i tatou o ni tagata-e o i le malumalu. Auai soo atu i le malumalu pe a mafai i tulaga faaletagata lava ia. Ia tuu se ata o se malumalu i lo outou fale ina ia mafai ona vaa'i i ai lau fanau"

("O Mea Silisili Ese Lava ma le Aoga" Liahona, Ian. 1995, 8).



“**O**u te molimau atu ia te outou e moni lenei galuega, o loo soifua lo tatou Faaola, ma Na te taialaina ma faatonutonu Lana Ekalesia i lenei lalolagi,” o le saunoaga lea a Peresitene Thomas S. Monson i le sauniga faaiu o le Konafesi Aoa Lona 181 Faaleafatausaga. “Ou te tuuina atu la’u molimau ma la’u tautinoga o loo soifua le Atua lo tatou Tama Faavavau ma e alofa ia i tatou. O la moni lava o lo tatou Tama, e tino mai o la ma e moni lava. Talosia ia tatou iloaina ma malamalama i le latalata tele mai ua la naunau ai e afio mai, o le mamao o loo naunau o la e fesoasoani mai ai ia i tatou, o le tele o Lona alofa ia i tatou, ma le tele o mea Na te faia ma naunau e faia mo i tatou.”